

宋 王日休居士 撰

龍舒淨土文

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

# 龍舒淨土文卷第一

宋國學進士王日休撰

予徧覽藏經及諸傳記。取其意而爲淨土文。無一字無所本。幸勿以人微而忽其說。欲人人共曉。故其言直而不文。予龍舒人也。世傳淨土文者不一。故以郡號別之。

## 淨土起信一

淨土之說。多見於日用之間。而其餘功。乃見於身後。不知者。止以爲身後之事而已。殊不知其大有益於生前也。何則。佛之所以訓人者。無非善。與儒教之所以訓人。何以異哉。唯其名有不同耳。故其以淨土爲心。則見於日用之間者。意之所念。口之所言。身之所爲。無適而非善。善則爲君子。爲大賢。現世則人敬之。神祐之。福祿可增。壽命可永。由是言之。則從佛之言。而以淨土爲心者。孰謂無益於生前乎。其次

爲業緣所奪。而不能專志於此。苟有志焉者。亦惡緣可以自此而省。善緣可以自此而增。惡緣省而不已。終必至於絕其惡。善緣增而不已。終必至於純乎善。惡既絕矣。善既純矣。非爲君子而何。非爲大賢而何。由是言之。則從佛之言。而以淨土爲心者。孰謂無益於生前乎。又其次不知禮義之所在。不知刑罰之所畏。惟氣力之爲尚。惟勢力之爲趨。苟知以淨土爲心。則亦必知省已而自咎。所爲雖不能皆合於禮義。亦必近於禮義矣。雖不能盡超乎刑罰。亦必遠於刑罰矣。漸可以脫小人之域。而終爲君子之歸。庸人稍知佛理者。世必目爲善人。此其效也。由是言之。則從佛之言。而以淨土爲心者。孰謂無益於生前乎。或曰。從孔子之言。而以儒教爲心。豈不益於生前。何必淨土哉。曰。此世間法耳。非出世間法。世間法。則不出於輪迴。出世間法。則直脫輪迴之外。淨土既益於生前。又益於身後者。以其兼世間出世間法故也。

## 淨土起信二

淨土之說。有理有跡。論其理。則見於日用之間。而未嘗離。前篇所言是也。論其跡。則見於早晨一茶之頃。而不必終日泥。十念法門是也。蓋修持法門有九品。人人皆可以修。雖罪惡之人。佛亦不棄。回心向善。則爲善矣。故此十念法門。人皆可以通行。譬如久爲暗室。一燈照之。則爲明矣。故雖殺牛屠馬之人。放下屠刀。亦可以修。所以修者不難。亦不妨一切俗事。故在官不妨職業。在士不妨修讀。在商賈不妨販賣。在農人不妨耕種。在公門不妨事上。在僧徒不妨參禪。凡一切所爲。皆不相妨。故曰。其修持工夫。見於早晨一茶之頃耳。遂可以爲萬萬劫不壞之資。人何爲而不修乎。今有販物者。一錢而得兩錢之息。則必自喜。以爲得息之多矣。行路者。一日而及兩日之程。亦必自喜。以爲及程之多矣。是於外物小有所得而知其喜也。或兩錢而得一錢之價。必憂

之以爲喪本。兩日而及一日之程。亦必憂之以爲費日。是於外物小有所失。而知其憂也。何於吾身之光陰有限。則汨沒以過。其失大矣。而不以爲憂。於淨土之因緣難遇。幸而知之。其得大矣。而不以爲喜。是徒見小得小失。而知憂喜。及得失之大者。則不能知。何不思之甚也。況不費時刻。用力甚少。而收功有不可盡言者。人何爲而不修乎。此時不修。可痛惜哉。可痛惜哉。

### 淨土起信三

人驟聞淨土之景象。多不信之。無足怪也。蓋拘於目前所見。遂謂目前所不見者。亦如此而已。且如陋巷糞壤之居者。安知有廣廈之清淨。小器藜藿之食者。安知有食前之方丈。弊篋錙銖之蓄者。安知有天府之充溢。故處此娑婆濁世。不信其有清淨佛土。所以生長於胞胎。不知彼有蓮華之化生。壽不過百年。不知彼有河沙之壽數。衣食必由於營作。不

知彼有自然之衣食。快樂常雜於憂惱。不知彼有純一之快樂。然則佛之所言。不可以目前所不見而不信也。况佛切戒人以妄語。必不自妄語以誑人。世人妄語者。非以規利。則以避害。佛無求於世。何規利之有。佛視死生如刀斫虛空。何避害之有。是佛無所用其妄語也。世間中人以上者。猶不肯妄語。以喪其行止。况佛乎。其言可信。無足疑者。故先賢云。佛言不信。何言可信。昔有以忠臣爲姦黨者。刻之於石。天雷擊之。今以金寶綵色。鐫刻裝繪以爲輪藏貯佛之言。供以香華。嚴以神龍。使其言之妄。則又甚於姦黨之碑。何爲歷千百歲。而天雷不擊之哉。以其言之誠也。言之誠而不信。將何俟哉。是故淨土之說。更無可疑者。况自古及今。修此者感應甚多。尤不可以不信也。感應在第五卷。

#### 淨土起信四

儒者或以釋氏之徒無戒行。故輕其教。而因以不信淨土。是不然。豈可

以道士不肖而輕老子。士人不肖而輕孔子。智者尚不以人廢言。況可以其徒而輕其教乎。釋氏之教。有世間法。有出世間法。其世間法與吾儒同者。不可以縷數。姑舉其大者言之。釋氏之所以孳孳訓世人者。無非戒惡勸善。而吾儒何嘗不戒惡勸善哉。且以目前言之。佛以殺生偷盜邪淫爲身三業。而孔子言勝殘去殺。詩人言文王德及鳥獸昆蟲。是豈不戒殺哉。盜固不在所言矣。孔子言吾未見好德如好色者。詩人刺不好德而悅美色。是豈不戒邪淫哉。佛以妄言綺語兩舌惡口爲口四業。孔子謂人而無信。不知其可。豈不戒妄言也。謂巧言令色鮮矣仁。豈不戒綺語也。書稱爾無面從。退有後言。豈不戒兩舌也。惡口謂之惡怒之聲。尚未至於穢語。荀子謂傷人之言。深於矛戟。是未嘗不戒惡怒之口也。佛又以貪瞋癡爲意三業。孔子謂見得思義。是則戒貪矣。謂伯夷叔齊不念舊惡。是則戒瞋矣。謂困而不學。民斯爲下。是則戒癡矣。由此言之。儒



釋未嘗不同也。其不同者。唯儒家止於世間法。釋氏又有出世間法。儒家止於世間法。故獨言一世而歸之於天。釋氏又有出世間法。故知累世而見衆生業緣之本末。此其所不同耳。欲知釋氏之所長。須看楞嚴楞伽圓覺。與無蓋障菩薩所問經。及曉金剛經之理。未能如是而遂非之。則孔子所謂不知。而作之者。可不戒哉。誠如是。則釋氏爲可信矣。其言淨土。烏可以不信哉。所謂出世間法。淨土尤其要者。不可以不勉也。

### 淨土起信五

世有專於參禪者云。惟心淨土。豈復更有淨土。自性阿彌。不必更見阿彌。此言似是而非也。何則。西方淨土。有理有跡。論其理。則能淨其心故。一切皆淨。誠爲惟心淨土矣。論其跡。則實有極樂世界。佛丁寧詳復言之。豈妄語哉。人人可以成佛。所謂自性阿彌者。固不妄矣。然猝未能至此。譬如良材。可以雕刻佛像。而極其華麗。必加以雕刻之功

。然後能成。不可遽指良材。而遂謂極佛像之華麗也。是所謂惟心淨土。而無復更有淨土。自性阿彌。不必更見阿彌者。非也。又或信有淨土。而泥惟心之說。乃謂西方不足生者。謂參禪悟性超佛越祖。阿彌不足見者。皆失之矣。何則。此言甚高。竊恐不易到。彼西方淨土。無貪無戀。無瞋無癡。吾心能無貪無戀無瞋無癡乎。彼西方淨土。思衣得衣。思食得食。欲靜則靜。欲去則去。吾思衣而無衣。則寒惱其心。思食而無食。則飢惱其心。欲靜而不得靜。則羣動惱其心。欲去而不得去。則繫累惱其心。是所謂惟心淨土者。誠不易到也。彼阿彌陀佛。福重山海。力挈天地。變地獄爲蓮華。易於反掌。觀無盡之世界。如在目前。吾之福力。尚不能自爲。常恐宿業深重。墜於地獄。況乃變作蓮華乎。隔壁之事。猶不能知。況乃見無盡世界乎。是所謂自性阿彌者。誠不易到也。然則吾心可以爲淨土。而猝未能爲淨土。吾性可以爲阿彌。而猝未能

爲阿彌。烏得忽淨土而不修。捨阿彌而不欲見乎。故修西方見佛。而得道則甚易。若止在此世界。欲參禪悟性。超佛越祖爲甚難。況修淨土者。不礙於參禪。何參禪者。必薄淨土而不修也。大阿彌陀經云。十方有無量菩薩。往生阿彌陀佛國。彼菩薩尚欲往生。我何人哉。不欲生彼。是果勝於諸菩薩乎。由此言之。惟心淨土。自性彌陀者。大而不要。高而不切。修未到者。誤人多矣。不若腳踏實地。持誦修行。則人人必生淨土。徑脫輪迴。與虛言無實者。天地相遠矣。

### 淨土起信六

佛眼見無量劫事。故自古及今。無所不見。又戒人妄語。必不自妄語以誑人。又戒人有我。必不自有我以夸人。故其言誠可師法。按楞嚴經云。有十種仙。皆壽千萬載數盡復入輪迴爲不曾了得真性故。與六道衆生同名七趣。是皆輪迴中人也。世人學仙者。萬不得一。縱使得之。亦

不免輪迴。爲著於形神而不能捨去也。且形神者。乃真性中所現之妄想。非爲真實。故寒山詩云。饒汝得仙人。恰似守屍鬼。非若佛家之生死自如。而無所拘也。近自數百年來。得仙者。唯鍾離呂公。而學鍾離呂公者。豈止千萬。自予親知間。數亦不少。終皆死亡。埋於下土。是平生空費心力。終無所益也。欲求長生。莫如淨土。生淨土者。壽數無量。其爲長生也大矣。不知修此法門。而學神仙。是捨目前之美玉。而求不可必得之碲碲。豈不惑哉。或云。淨土乃閉眼後事。有何證驗。答云。淨土傳備載感應。豈無證驗哉。況神仙者。有所得。則甚祕而不傳。以謂泄天機而有罪。佛法門唯恐傳之不廣。直欲度盡衆生而後已。是其慈悲廣大。不易測量。非神仙之可比也。

### 淨土起信七

人有不信因果。從而不信淨土者。夫因果烏可以不信乎。經云。要知前

世因。今生受者是。要知後世界。今生作者是。若不信此語。何不以前前之事觀之。人生所以有貧富。有貴賤。有苦樂勞逸。有榮辱壽夭。其禍福種種不同。雖曰天命。天豈私於人哉。蓋以人前生所爲不同。故今生受報亦不同。而天特主之耳。是以此身謂之報身。報身者。報我前世所爲。故生此身也。天何容心哉。譬如人有功罪於外。當受賞罰於官府。官府豈私於人哉。特以有功當賞。有罪當罰。而主之耳。豈以賞罰無故而加於人。世間官府。猶不以賞罰無故而加於人。況天地造化。豈以禍福而無故加於人乎。是知以前世所爲有善惡。故以禍福而報之也。以其不能純乎善。故不得純受其福報。乃有富貴而苦夭者。有貧賤而壽樂者。有榮寵而悴辱者。其爲果報。各隨其所爲。如影從形。如響應聲。纖毫不差。故云。種桃得桃。種李得李。未有種麻而得豆。種黍而得稷者。唯種時少。收穫時多。故作善惡時甚小。受禍福之報甚大。故云。春

種一粒粟。秋收萬顆子。人生爲善惡。果報還如此。蓋造化自然之理也。此理可信。則淨土之說必可信。何則。二者皆佛言也。佛誠言於因果。必不妄言於淨土。故因不信因果。從而不信淨土者。此可以解其惑矣。

### 淨土起信八

人有見目前善惡未有報者。遂不信因果。而因以不信淨土。殊不知善惡未有報者。非無報也。但遲速耳。佛嘗謂阿難云。人有今世爲善。死墮地獄者。今世爲惡。死生天堂者。阿難問何故。佛言今世爲善死墮地獄者。今世之善未熟。前世之惡已熟也。今世爲惡死生天堂者。今世之惡未熟。前世之善已熟也。熟處先受報。譬如欠債。急處先還。左氏謂欒武子有德。可以庇其子。故其子廩。雖爲惡而可以免禍。廩之子盈爲善。而廩之惡乃累之。故盈雖善而及於難。止於世間目前可見者言之。善

惡之報。尚有如此者。況隔世乎。書曰。天道福善禍淫。老子曰。天網恢恢。疎而不漏。是三教皆言此理。但有遲速耳。豈可以目前未見果報。而遂不信因果。因以不信淨土乎。

### 淨土起信九

或者疑之云。人此間念佛。西方七寶池中。如何便生蓮華一朵。予告云。此不難知也。譬如大明鏡。凡有物來。便現其影。鏡何嘗容心哉。以其明而自然耳。阿彌陀佛國中。清淨明潔。自然照見十方世界。猶如明鏡。覩其面像。是故此間念佛。西方七寶池。自然生蓮華一朵。無足疑也。或者又疑之云。念往生真言者。阿彌陀佛常住其頂。衛護其人。若無量世界。有無量衆生。念此真言。阿彌陀佛豈能一一徧住其頂乎。曰。亦自然耳。譬如天上一月。普現一切水中。豈不自然哉。或者又疑之云。有修行精進。臨終之時。佛與菩薩來迎。且如十方世界。有無量衆

生精進。烏能皆知其期而往迎乎。曰。亦自然耳。譬如天上一日。普照無量境界。豈不自然哉。況佛之威神。不止如日月乎。則徧住其頂。徧知其期。何足疑哉。

備說

晝必有夜。必爲夜備。暑必有寒。必爲寒備。存必有去。必爲去備。何爲夜備。燈燭牀蓐。何爲寒備。衾裘炭薪。何爲去備。福慧淨土。

梵語阿。此云無。梵語彌陀。此云量。省文稱之。寧稱阿彌。不可稱彌陀。若稱彌陀。則是量。乃與無之意相反。若稱阿彌。猶有無量之意存焉。



# 龍舒淨土文卷第二

宋國學進士王日休撰

大藏中有無量清淨平等覺經。阿彌陀過度人道經。無量壽經。無量壽莊嚴經。四者本爲一經。譯者不同。故有四名。其舛訛甚多。予久已校正。亦刊板以行。今按此經。及餘經傳。爲淨土總要。

## 淨土總要一

統言大藏。不止有十餘經言西方淨土事。其大略謂彼處以七寶莊嚴。無地獄餓鬼禽畜。以至蝸飛蜈蚣之類。常清淨自然。無一切穢雜。故名淨土。其人皆蓮華中生。長生不老。衣食宅宇。隨意化成。其景序長春。無復寒暑。大受快樂。無一切苦惱。故名極樂世界。其佛名阿彌陀者。梵語也。此云無量。以此佛光明。照見十方世界。無有限量。凡念佛衆生。無不知之。故又名無量光佛。此佛壽命。與其國中人民壽命。皆無

有限量。雖恒河沙劫。亦無有盡。故又名無量壽佛。此佛有大誓願度人。其威神不可思議。故至心信向念其名號者。現世必消除災難。禳卻冤鬼。安靜形神。增延福壽。西方七寶池中。則生蓮華一朵。他日於其中託生。直脫輪迴之外。若此者皆有事跡非虛言也。其說甚易行。盡大藏中八萬四千法門。無如此之要捷者。而人或不知。可痛惜哉。知而不行。尤可痛惜也。

淨土總要二

大阿彌陀經云。釋迦佛一日容顏異常。侍者阿難怪而問之。佛言善哉。汝所問者。勝於供養一天下聲聞緣覺。及布施諸天人民。以至蜎飛螻動之類。雖至累劫。猶百千萬倍不可以及。所以者何。以諸天帝王人民。乃至蜎飛螻動之類。皆因汝所問。而得度脫之道。以此觀之。是釋迦佛初欲說阿彌陀佛之時。其存於心而形於色者。已異於平日。則阿彌陀佛

所以感諸佛者。固已非常。況於感一切衆生者乎。及阿難問而告之。則謂諸天帝王人民。以至蜎飛蠕動之類。皆因汝所問。而得度脫之道。是上自諸天。下至蠕動。皆同在三界之內。故不出輪迴。是以未爲得度脫者。阿彌陀佛大願大力。無所不度。故皆度脫之也。觀其初發願偈云。我至成佛時。名聲超十方。人天欣得聞。俱來生我刹。地獄鬼畜生。亦生我刹中。是則凡在三界六道輪迴之內者。無所不度可知矣。是以此經云。阿彌陀佛現在西方極樂世界。又在十方世界。教化無央數天人民。以至蜎飛蠕動之類。莫不得超度解脫者。蜎飛謂微細飛蟲也。蠕動謂微細蛆蟲也。若此者。佛尚化度。況於人乎。是其所以廣度衆生。無有窮極。而人一念歸依。遂生其國。無足疑也。

### 淨土總要二

經又云。無量無數劫以前。有世自在王佛出。化度衆生。是時有大國王

。往聽說法。遂有覺悟。乃捨國王之位。而往修行。號曰法藏比丘。即阿彌陀佛也。對世自在王佛。發四十八大願。願願皆爲濟度衆生。發此願已。乃精進以了生死。次入菩薩地。了生死者。乃生死自如也。入菩薩地者。內則修慧。外則修福也。修慧者。使慧性日廣於一日。至成佛時。則慧性含虛空世界。無所不知。無所不見也。修福者。乃託生於一切衆生中。同其形體。通其語言。以設教化。故上自天帝。下至微細蟲蟻。皆託生於其中。如此無量無數劫來。設化衆生。夫設化衆生者。無非得福也。得福而不受用。故其福愈積而愈大。久則徧於虛空世界矣。福大則威神大。譬如世人。官大則勢力大。是以威神無所不可。方得成就所願而入佛位。是初發願以至成佛。無非爲衆生者。故人至心信向。念其名號。現世必蒙福祐。身後必徑生極樂世界。若能精心想其形相。現世必見佛之真身。以佛之威靈無所不在。而人心念與佛純熟。則自然

交通。故佛現其身也。詳見第五卷。

#### 淨土總要四

經云。阿彌陀佛。歷大阿僧祇劫。行菩薩行。忍力成就。不計衆苦。常以和顏愛語。饒益衆生。善護口業。不譏他過。善護身業。不失律儀。善護意業。清淨無染。手中常出一切衣服。一切飲食。一切幢幡寶蓋。一切音樂。及一切最上所須之物。以此施惠衆生。令生歡悅。以行教化。故。致無量無數衆生。發無上菩提之心。如是善行。無量無邊說不能盡。歷無量無數百千萬億劫。功德圓滿。威神熾盛。方得成就所願。而入佛位。是以十方無央數世界諸天人民。以至蜎飛蠕動之類。無所不度。所以一念歸依。遂生其國。皆於七寶池蓮華中化生。自然長大。亦無乳養之者。皆食自然之食。其容貌形色。端明淨好。固非世人可比。亦非天人可比。皆受自然清虛之身。無極之壽。徧彼刹中。皆諸上善人。無

有婦女。皆壽命無央數劫。皆洞視徹聽。遙相瞻見。遙相聞語聲。皆求善道者。無復異人也。雖歷萬劫。已所從來。靡不知之。復知十方世界去來現在之事。復知無央數天上天下人民。以至蜎飛蠕動之類。心所欲念。口所欲言。復知此等衆生。當於何劫何歲。盡度脫爲人。得生極樂世界。以其慧性通徹故爾。

### 淨土總要五

淨土傳云。阿彌陀佛。與觀音勢至二菩薩乘大願船。泛生死海。就此娑婆世界。呼引衆生。上大願船。送至西方。如肯往者。無不得生也。觀此。則是佛與菩薩。憫念衆生沈淪苦海。無由得出故。自以誓願威力。招誘人生淨土。如舟人招誘行人登舟。送至彼岸也。人唯恐不信耳。若信心肯往。雖有罪惡。亦無不得生。蓋佛不可以凡人比。凡人不爲勢利。不與人交。非有益於己不與人交。此所以爲凡人也。賢人君子已不如

此。況於佛乎。蓋不慈悲。不足爲佛。不濟度衆生。不足爲佛。不有大威力。不足爲佛。爲其慈悲。故見衆生沈於苦海而欲濟度。爲其有大威力。故能遂濟度之心。成濟度之功。此所以爲佛也。經云。大醫王能治一切病。不能治命盡之人。佛能度一切衆生。不能度一切不信之人。以不信比命盡者。可謂極矣。蓋信者一念也。若人在生時。心念要去。身則隨去。心念欲住。身則隨住。是身常隨念。然猶有念欲去而身被牽繫者。身壞時。唯一念而已。一念到處。則無不到。是以一念在淨土。則必生淨土。況佛與菩薩。又招引人往生乎。

### 淨土總要六

阿彌陀佛有誓願云。已生我國。欲往他方生者。如其所願。永不復墜三惡道。何則。生淨土者。必證無生法忍。且無生法忍者。乃了生死也。了生死者。雖入生死界中。此一性已不昧矣。一性既不昧。何由而爲惡

乎。論其理固無墜墮。況又仗佛力。故墜墮必無。是以生淨土者。非徒長生不老。又生死自如故。欲設化一切衆生。而入一切衆生生死界中。而吾之真性。常湛然明朗。不復惑於外物。不復牽於業緣。雖在輪迴世界。而無復輪迴。所謂世出世間者是也。謂雖在世間而出世間矣。是故生淨土而生死自如者。欲生天上亦可。欲生人間亦可。欲生大富貴中亦可。欲生清淨中亦可。欲長生不滅亦可。欲滅而復生亦可。隨意所欲。無不自在。此所以貴於修淨土也。世人不知此理。徒爲生死所苦。欲生富貴中。反生於貧賤。欲生快樂中。反生於愁感。欲生而長壽。反生而夭促。欲生於善道。反生於惡趣。種種皆被外物所惑。業緣所牽。不得自在。是以無始劫來。輪迴六道。不得出離。當念此等憂苦。迴心淨土。所以名極樂世界者。其意可見矣。

淨土總要七



無爲楊傑次公。少登高科。明禪門宗旨。謂衆生根有利鈍。即其近而易知。簡而易行者。唯西方淨土。但一心觀念。仗佛願力。直生安養。其爲王敏仲作直指淨土決疑序云。阿彌陀佛光明。如大圓月。徧照十方。水清而淨。則月現全體。月非趨水而遽來。水濁而動。則月無定光。月非捨水而遽去。在水則有清濁動靜。在月則無取捨去來。故華嚴經載解脫長者子云。知一切佛。猶如影像。自心如水。彼諸如來不來至此。我若欲見安樂世界阿彌陀如來。隨意即見。是知衆生注念。定見阿彌陀。若生彼土。則無諸苦。般舟三昧經云。跋陀和菩薩問釋迦佛云。未來衆生。云何得見十方諸佛。佛教令念阿彌陀佛。即見十方一切諸佛。又大寶積經云。若他方衆生聞無量壽如來名號。乃至能發一念淨信。歡喜愛樂。所有善根迴向願生其國者。隨願往生。得不退轉。此皆佛言也。不信佛言。何言可信。不生淨土。何土可生。東坡云。次公晚年。作監司

太守。常畫丈六阿彌陀佛像。隨行供養觀念。至壽終時。感佛來迎。端坐而化。

# 龍舒淨土文卷第三

宋國學進士王日休撰

孟子云。人皆可以爲堯舜。荀子云。塗之人可以爲禹。常不輕菩薩云。我不敢輕於汝等。汝等皆可作佛。是人人可以爲聖賢。人人可以作佛。西方淨土。乃要捷門庭。無人不可以修。故爲普勸修持。

## 普勸修持一

或人問孔子曰。人有遷家而忘其妻者。有諸。孔子曰。又有甚焉。桀紂則忘其身。若以道眼觀之。今人皆忘其身矣。何則。自早晨開目離寢。至夜間就寢閉目。無非塵勞。未嘗暫省吾身。是皆忘其身也。且人之於身。以日言之。莫大於飢渴。必爲食飲之備。以歲言之。莫大於寒暑。必爲裘葛之備。以終身言之。莫大於死生。而不爲淨土之備。何哉。且若人有百斤之金。猝有大難。不能負挈以行。必捨之而去。若抱金而與

之俱死。世必謂之大愚。是皆知此身重於百斤之金也。然平日則區區趨名競利。雖百錢之物。亦不肯棄捨。而不自愛其身。何哉。或責以盜竊。或呵以禽畜。則怫然而怒。有至於終身怨憾而不可解者。有至於歐擊而成獄訟者。彼盜竊禽畜之名。無損於吾身。乃惡之如是。是徒惜吾身之名。而不知惜吾身之實。何哉。且吾身之實者非他。強名。曰。死。而實未嘗死者是也。人徒見其捨此敗軀而去。乃謂之死。不知捨此則往彼矣。然其所往之處。豈可不預備哉。故西方之說誠不可廢。

### 普勸修持二

人生時。父母妻子。屋宅田園。牛羊車馬。以至臺凳器皿。衣服帶索等物。不問大小。或祖父以傳於己。或自己營造而得。或子孫。或他人。爲己積累而得。色色無非己物。且如窗紙雖微。被人扯破猶有怒心。一針雖微。被人將去。猶有吝心。倉庫既盈。心猶未足。金帛已多。營猶

未止。舉眼動步。無非愛著。一宿在外。已念其家。一僕未歸。已憂其失。種種事務。無非掛懷。一旦大限到來。盡皆拋去。雖我此身猶是棄物。況身外者乎。靜心思之。恍如一夢。故莊子云。且有大覺然後知此其大夢也。古人有言。一日無常到。方知夢裏人。萬般將不去。唯有業隨身。妙哉此言也。予故用此後兩句。添以兩句。而成一偈云。萬般將不去。唯有業隨身。但念阿彌陀。定生極樂國。蓋業者。謂善業惡業。此皆將得去者。豈可不以淨土爲業乎。有了明長老爲衆普說。指此身而言曰。此爲死物。其內潑潑地者爲活物。莫於死物上作活計。宜於活物上作活計。余深愛此語。故常爲人言之。凡貪種種外物以奉其身者。皆是死物上作活計也。世人雖未能免此。當於營生奉身之中。挪頃刻之暇。迴光自照。以留心於淨土。乃活物上作活計也。且如汲汲營生。雖致富如石崇。貴極一品。終有數盡之期。豈若淨土之無盡也。

### 普勸修持三

人初未嘗死。而死之名。乃自此身體上得之。何則。以神之來而託於此。其形由是而長。故謂之生。以神之去而離於此。其形由是而壞。故謂之死。是神者我也。形者我所舍也。我有去來。故舍有成壞。然則生者非生也。以神之來而形成耳。死者非死也。以神之去而形壞耳。世之人不識其神。徒見其形。乃悅生而惡死。可不爲悲乎。且神之來也。何自而來哉。蓋隨業緣而來。神之去也。何自而去哉。蓋隨業緣而去。業緣者何哉。其所作者人間之業。神則隨之而生於人間。所作者天上之業。神則隨之而生於天上。若作阿修羅之業。神則隨之生於阿修羅。若作三惡道之業。神則隨之生於三惡道。是輪迴六趣。無有出期。然則神者。自無始以來。投胎易殼。不得久留於一所。所以然者何哉。以吾所造之業。非久而不盡者。故神之舍於業也。業盡則形壞。形壞則神無所舍。

又隨吾今世所造之業而往矣。譬如人造屋宇。必居其中。人造飲食。必享其味。故造如是業。必受如是之報。蓋自然之理也。然則吾今世所爲。豈可以不慎哉。欲直脫輪迴。永離苦惱者。無如西方淨土。故不可以不修也。

#### 普勸修持四

此世界中。人生皆如水泡。生滅不常。或一歲二歲。或一二十。幸而至四五十亦難矣。雖有至七十者。古來猶稀。人只見眼前老者。不思不待老而去者多矣。況世間無非是苦。但不思省。故不覺知。不稱意時。固爲苦矣。如或稱意。亦無多時。父母妻兒姻親眷屬。或疾病死亡。或殺傷離散。或自己大限忽然而至。平生罪惡。豈得全無。且以目前言之。起一不正念。說一不正語。視一不正色。聽一不正聲。爲一不正事。無非過惡。況所食者衆生之肉。所衣者亦殺衆生而得。又況所有過惡

。不止於食肉衣絲。不思則已。思之誠可畏也。自少至老。自生至死。積累既多。纏繇堅固。無由解脫。閉眼之後。不免隨業緣去。杳杳冥冥。知在何處。或墜地獄。受諸極苦。或爲畜生。受人宰殺。或生餓鬼。飢火燒身。或入修羅。瞋恨所迫。雖有善業。得生天上人間。受盡福報。依舊輪迴。漂流汨沒。無有出期。雖有西方淨土。最爲超脫輪迴之捷徑。色身難得。趁康健時辦此大事。當常作念云。吾曾自無始以來。輪迴六道。不曾知此法門。故不得出離。今日知之。豈可不即時下手。年高者固當勉力。年少者。亦不可因循。命終徑生極樂世界。迴視死入陰府。見閻王受恐怖者。不可同年而語矣。

### 普勸修持五

譬如人入大城中。必先覓安下處。却出幹事。抵暮昏黑。則有投宿之地。先覓安下處者。修淨土之謂也。抵暮昏黑者。大限到來之謂也。有投



宿之地者。生蓮華中不落惡趣之謂也。又如春月遠行。先須備雨具。驟雨忽至。則無淋漓狼狽之患。先備雨具者。修淨土之謂也。驟雨忽至者。大命將盡之謂也。無淋漓狼狽之患者。不至沉淪惡趣受諸苦惱之謂也。且先覓安下處者。不害其幹事。先備雨具者。不害其行遠途。是修淨土者。皆不妨一切世務。人何爲而不修乎。予一相識。平生多殺魚之罪。晚年得疾。有似中風。予憐其罪惡疾苦。乃往見之。勸念阿彌陀佛。堅不肯念。但與予說雜話。豈非爲惡業所障。疾病所昏。已不能迴心念善。閉眼之後。將奈之何。故修此者。宜急早回首也。世間晝必有夜。寒必有暑。人所共知。不可隱者。若曰生必有死。人乃諱之。不肯說出。何太蔽也。蓋不知所謂我者。初不曾死。唯業緣盡而去耳。故不可不修淨土。以求蓮華中生。而受清虛之身。無極之壽。以脫一切生死苦惱也。

### 普勸修持六

下品下生者。乃臨終時。地獄形相已現。能至心十念南無阿彌陀佛。則變地獄形相爲蓮華。亦生淨土。此佛慈悲至深。威力至大。故能如此。是所謂十念者。乃生前自十聲念阿彌陀佛。非謂身後請人念也。生前自念者。臨命終時。佛與菩薩自來迎接。故必生淨土。身後請人念者。未可知也。經云。身後人爲作功果。七分得一。生前自作者。得千百倍報。人何苦不於生前每日十聲念佛。必待死而請人念乎。又云。譬如鐵石雖重。賴舟船力。可以渡江。一針雖輕。不賴舟船。江不可渡。蓋謂人有重罪。仗佛力者。可生淨土。罪惡雖輕。不仗佛力。亦不得生。又如平生爲惡。一日招安。遂爲良民。仗佛力而消罪惡者。亦復如是。又如蟻蟲。萬死萬生。不能一里。若附人身。千里可至。仗佛力而生淨土者。亦復如是。切勿疑己。有罪惡念佛而不可以往生。但起見佛得道還度

一切冤親之心。則無不生也。或云。人平生爲惡殺害衆生。苦虐人民。臨死念佛。亦得往生。其所殺所苦之衆生。懷冤枉之心。何時而可解乎。答云。生淨土得道之後。皆度脫一切冤親。豈不勝冤冤相報。彼此無出期者乎。

### 普勸修持七

予爲此淨土說。欲勸一切見者聞者。廣大其心。以佛之心爲心。使人人知之而盡生淨土。當起念云。此法門人若知之。如已知之。豈不快哉。人若不知。如己不知。豈不痛哉。若止於自修。則是聲聞之徒。名爲小乘。蓋如車乘之小者。僅能自濟而已。此佛所謂斷佛種者也。能廣勸人者。名爲大乘菩薩。蓋如車乘之大者。人我兼濟之。謂此獲無量福報。所以能至佛地也。十方恒河數諸佛。皆共讚歎阿彌陀佛功德不可思議。謂不可以心思。不可以言議也。其功德如此。可謂至矣。何所施而不可

。故能勸一人修淨土。以此善緣。消釋罪惡可也。增崇福壽可也。莊嚴往生功德亦可也。追薦亡者亦可也。然必至誠發心。無不獲其功果。觀房翥傳。可見其略矣。況勸一人以上。至五十人乎。又況使其受勸者。轉以相勸。遞相繼續而不已乎。如是則西方之說。可徧天下。苦海衆生。可盡生淨土矣。勸人善道。名爲法施。此淨土法門。爲法施之大者。遂超出輪迴。非其他法施之比。故其福報不可窮盡。故大慈菩薩勸修西方偈云。能勸二人修。比自己精進。勸至十餘人。福德已無量。如勸百與千。名爲真菩薩。又能過萬數。即是阿彌陀。觀此則知西方之說者。豈可不廣大其心。而使人人共知此道。以積無量福報乎。

### 普勸修持八

且若人苦飢者與之一食。苦寒者與之一衣。已爲大惠。況彼沉淪六道。無有出期。我指示以此法門。使直脫輪迴。受無窮無極之壽樂。其惠豈

可窮盡哉。金剛經云。若其以恒河沙等身布施。如是無量百千萬億劫。不如有人聞此經典。信心不逆。人福勝彼。蓋以身布施者。不免受世間福報。有時而盡。若信此經典。則有悟真性之漸。其爲福則無時而盡。所以勝於彼也。以予觀之。豈唯信金剛經者如此。若勸人以淨土。其福報亦然。何則。淨土更無輪迴。已不退轉。直至成佛而後已。生於彼者。雖未成佛。乃成佛之階梯。是勸一人修淨土。乃成就一衆生作佛也。凡作佛者。必度無量之衆生。彼所度之衆生。皆由我而始。則其福報。豈不勝於以恒河沙等身布施無量百千萬億劫乎。

### 普勸修持九

凡受師友之訓誨。恩施之提挈。交遊之禮遇。悉皆告以淨土而爲之報。以至與一切人。或有一飯一茶之恩。或一言一坐之接。下至僕隸有事我之勞。凡吾受用處。一切致力者。皆以此告之。使脫離苦海。非唯此耳。

。凡一切知與不知。識與不識。皆欲以是化之。使共生淨土。又非唯此耳。釋迦佛在世時。有一國難化。佛言。與目連有緣。使往化之。其國人皆從化。人問佛云。與目連有何因緣。佛言。往昔世目連嘗爲樵人。於山間驚起一羣蜂子。目連乃發善言云。我得道後。盡度此蜂子。今此一城人者。乃當時蜂子也。目連發此善言。故爲有緣。由此觀之。非徒於一切人當勸修淨土。一切飛禽走獸。下至蝸飛蠕動之類。凡有形相可見者。吾因見之。皆當爲念阿彌陀佛數聲。發善願云。願汝等盡生極樂世界。我得道後。盡度汝等。非徒於有形相可見者如是。其形相不可見者。吾亦當作是念作是言。如此則吾善念甚熟。於一切衆生皆爲有緣。吾上品上生必矣。他時化度。無不樂從者也。

# 龍舒淨土文卷第四

宋國學進士王日休撰

淨土法門。多見於大阿彌陀經。與十六觀經。有淺有深。淺者其功小。而於九品中卑。深者其功大。而於九品中高。然皆脫離輪迴。長生不老。今先列其淺者。次及深者。蓋隨人所修也。

## 修持法門一

阿彌陀佛四十八願中。有一願云。我作佛時。十方衆生。至心信樂。欲生我國。十聲念我名號而不生者。我不作佛。是此佛自有誓願度人。唯假人之十念。以表歸依之心。每日早晨。合掌向西頂禮。念南無阿彌陀佛十聲。復頂禮念大慈菩薩發願偈一徧云。願同念佛人。共生極樂國。見佛了生死。如佛度一切。復頂禮而退。至誠如此。無不往生。但恐九品中不高耳。如不識字人。教念此偈。得大福報。

## 修持法門二

每日早晨。合掌向西頂禮。念南無阿彌陀佛。南無觀世音菩薩。南無大勢至菩薩。南無一切菩薩聲聞諸上善人。各十聲。復頂禮念大慈菩薩讚佛懺罪迴向發願全偈一遍云。十方三世佛。阿彌陀第一。九品度衆生。威德無窮極。我今大歸依。懺悔三業罪。凡有諸福善。至心用迴向。願同念佛人。感應隨時現。臨終西方境。分明在目前。見聞皆精進。共生極樂國。見佛了生死。如佛度一切。復頂禮而退。此偈有大威力。能滅一切罪。長一切福。凡頂禮時燒香作拜尤佳。每日如是。必中品生。如教人念此偈。得大福報。

## 修持法門三

一一念誦如前。唯念佛時。必想身在淨土佛前合掌。恭敬念佛。念菩薩時亦如此。念一切菩薩聲聞諸上善人時。則心想身在淨土。其念誦聲。



徧於一切菩薩聲聞諸上善人之前。作拜時。亦以想在淨土作拜。念偈時。亦以想在淨土佛前合掌恭敬念偈。雖有佛菩薩像時。則不須如此。然須想其像。如佛與菩薩現身在此受我禮拜。聽我念誦。專志如此。其往生品第必高。

### 大菩薩修行兼修淨土法門四

早晨先面西然香禮拜祝云。弟子某。謹爲盡虛空界一切衆生。然香敬禮盡虛空界一切諸佛。一切正法。一切諸大菩薩緣覺聲聞聖衆。過去然燈佛。本師釋迦牟尼佛。文殊師利菩薩。普賢菩薩。釋迦佛會下一切菩薩緣覺聲聞聖衆。過去世自在王如來。現在西方極樂世界三十六萬億一十一萬九千五百同名同號阿彌陀佛。觀世音菩薩。大勢至菩薩。阿彌陀佛剎中一切菩薩緣覺聲聞聖衆。佛號隨意所增不增亦可上自諸天天帝天人。日月星辰。南斗北斗。司中司命。風師雨師。一切主造化靈神。下自地祇。大嶽溟

海。羣山衆水。一切主造化靈神。中及人間一切掌禍福靈神。普同敬禮。乞成就一切善願。以濟度無量無邊衆生。先願某見今處世。無一切疾病災難等事。隨意所祝臨命終時。一月預知其期。化佛菩薩來迎。西方境界。盡現空中。遲遲而久。衆人皆見。某即如入禪定。安然化去。遂見阿彌陀佛。證無生法忍。了六神通。不出此間一歲。即來此間教化衆生。漸漸變此南閻浮提。盡娑婆世界。以至十方無量世界。皆爲清淨極樂世界。禮拜。

又祝云

弟子某。謹爲盡虛空界一切衆生。敬禮盡虛空界三世諸佛。仰惟如來大慈大悲。憫念衆生。沉淪苦海。無有出期。在涅槃者。盡出涅槃。救度衆生。無窮無已。現在世者。勤轉法輪。開覺羣迷。無窮無已。其未來者。入萬類中。廣種善根。無窮無已。度盡衆生而後已。緣覺聲聞之衆

。亦復如是。禮拜。

又祝云

弟子某。謹爲盡虛空界一切善人。念佛說長壽偈七徧。願增延此等善人壽數。廣化衆生。咸超苦海。我慈諸龍王。天上及世間。以我此慈心。得滅諸毒恚。我以智慧聚。用心殺此毒味毒無味毒。破滅入地去。禮拜。佛言。早晨清淨念此七徧。令人長壽。今爲盡虛空界一切善人念誦。則功德甚大矣。

又祝云

弟子某。至心敬禮日月光明世尊。火光如來。觀世音菩薩。乞念某每日持誦如來菩薩聖號各一百八徧。仰惟大慈大悲。各以願力。令某早悟真性。增崇福力。無一切疾病災難等事以上三者。爲救度衆生故。禮拜。

又祝云

弟子某。謹爲此南閻浮提無巨無細一切衆生。敬禮諸天。天帝天人。日月星辰。南斗北斗。司中司命。風師雨師。一切主造化靈神。諸地靈祇。大嶽冥海。羣山衆水。一切主造化靈神。人間一切掌禍福靈神。普同敬禮。以爲此等衆生。謝覆載照臨生成養育衛護之恩某謹爲此等衆生。念南無釋迦牟尼佛一百八徧，以種無上善根。念南無阿彌陀佛一百八徧。以結無上善緣。願此等衆生。常沐洪恩。歡喜相向。不相爭相殺。不相食相陵。修進佛法。脫離苦海即變此南閻浮提。爲極樂世界。禮拜。

又祝云

弟子某。感謝天地覆載。日月星辰照臨。造化生成。神靈衛祐。父母產育。君臣庇護師尊教誨。恩施提挈。及衣食來處。及受用處。及使令處。及行住坐處。一切有恩力於己者。悉皆感謝。謹爲念南無釋迦牟尼佛一百八徧。以種無上善根。念南無阿彌陀佛一百八徧。以結無上善緣。

一切有情。在上者。早證菩提正果。在下者。盡生極樂世界。禮拜。修此六段畢。然後面西修淨土。

### 大菩薩修淨土法門五

早晨面西然香禮拜祝云。弟子某。謹爲虛空界一切衆生。敬禮西方聖衆。十稱念四聖號。仰惟聖衆大慈大悲。特展威神。一如此等衆生。各各自十稱念。盡拔濟生於極樂世界乃念四聖號各十聲。禮拜。

### 又祝云

弟子某。謹爲盡虛空界一切衆生。讚阿彌陀佛。懺罪迴向。發願敬禮。仰惟如來大慈大悲。特展威神。一如此等衆生。各各自讚佛懺罪迴向發願敬禮。盡拔濟生於極樂世界。乃念大慈菩薩全偈一徧。在卷首第二段。禮拜。

### 又祝云

弟子某。謹爲盡虛空界一切衆生。敬禮西方極樂世界觀世音菩薩。大勢至菩薩。一切菩薩聲聞諸上善人。仰惟大慈大悲。憫念衆生。沉淪苦海。無有出期。特展威神。遞相勸勉。分身於此震旦國。爲卿相羣臣。共佐吾君。治教衆生。使不相爭相殺。不相食相陵。變世醇和。共躋仁壽。及於此南閩浮提。盡此娑婆世界。及十方濁惡世界。身爲國王大臣百僚庶尹。以次有位之臣。教化衆生。同修佛道。脫離苦海。即變吾國。以至十方濁惡世界。皆爲清淨極樂世界。禮拜。

古本云。延祐乙卯年。四月十四日命工刊板。至十月初一夜刊至此板。出舍利一顆。初七日刊至法字上。又出舍利一顆。下元日刊至聖字上。又現舍利一顆。見存板中。留以供養云。伏望觀此文者。觀此靈驗。同生深信堅固之心。請遵熏修。必生淨土。是即龍舒居士所謂自古及今修持者衆。豈無感應。斯言信不誣也。

如不食肉。此爲大善。如有疾病。不免食三淨肉。即祝云。

弟子某。爲身在世網。宿業深重之故。腑臟身體怯弱不免有時食三淨肉

。謹爲昨日所食之肉之衆生。念誦南無西方極樂世界。三十六萬億一十一萬九千五百同名同號阿彌陀佛七七徧。仰惟如來大慈大悲。特展威神。一如此衆生。自捨身命。以與念誦者。乞爲念誦。資薦其身。定拔濟生於極樂世界。某誓願所食之肉。所資氣力。所爲善業。願與此等衆生共之。願此等衆生先生極樂世界。俟某生極樂世界。見佛聞法。證六神通。來此南閻浮提化度衆生之時。此等衆生。皆隨逐而來。共化衆生。同升佛道。禮拜。

如不食肉則爲平生所衣之衣爲絲爲綿之蠶。及與已交力綿帛所爲之蠶。念誦如前。

### 又祝云

弟子某。謹爲此南閻浮提。今日所殺所食之衆生。念誦南無西方極樂世界三十六萬億一十一萬九千五百同名同號阿彌陀佛聖號。一百二十徧。

仰惟如來。大慈大悲。以某念誦如來名號。一聲一如來度一衆生。盡其念誦之數。古板此處  
出舍利亦復如是。盡度衆生於極樂世界。禮拜。

### 修持法門六

釋迦佛親以此聖號教二老人。無可疑者。若人至心持念。及誦往生真言。解冤延壽。得大福報。證無生忍。居不退地。豈不偉歟。呂元益謹勸。

釋迦佛在世時。

古板此處  
出舍利

有翁婆二人。用穀一斗記數。念阿彌陀佛。願生

西方。佛云。我別有方法。令汝念佛一聲。得多穀之數。乃教以念南無西方極樂世界三十六萬億一十一萬九千五百同名同號阿彌陀佛。出寶王論。嘗以私穀校之。一合千八百粒。此數乃二千石之數。佛自以此教二老人。則其功德甚大可知矣。若愚人不能念者。且單念亦可教人全念。得大福報。或兼持誦小阿彌陀經。或大阿彌陀經。或其他佛經。隨數多少。迴向願生西方。皆可拔一切業障根本往生淨土真言

南無阿彌多婆夜 哆他伽多夜 多地夜他 阿彌利都婆毗 阿彌利哆  
悉耽婆毗 阿彌利哆 毗迦蘭帝 阿彌利哆 毗迦蘭哆 伽彌膩 伽伽



那 枳多加利 娑婆訶

真言字。本非佛國字。乃譯經者所用。人多以其字難識而不讀。佛初說時。止有聲音。今存其聲音。用易識之字代之。不失佛之本意。更不須疑。又世間點句多差。今用藏經兩處點句一同。亦不須疑。誦此呪者。阿彌陀佛常住其頂。不令冤家爲害。現世安穩。命終任意往生。若滿二十萬徧。即菩提芽生。三十萬徧。非久面見阿彌陀佛。晉時遠法師誦此呪。有神人從西持一白銀臺來云。法師壽終。當乘此往生阿彌陀佛國。衆人聞空中如奏音樂。異香數日不歇。

### 修持法門七

佛問阿難云。汝欲見地獄人否。阿難云。欲見。佛云。身行惡。口言惡。意念惡。此地獄人也。蓋謂人生善惡。不過身口意三業。今三業俱惡。是爲純黑業。所以入地獄。若三業俱善。則爲純白業。乃生天堂。若

三業中。有一業善。則爲雜業。亦不入地獄。故身意雖惡。而口念佛名。亦一業善。遠勝於三業俱惡。況口念佛時。又能心想佛像。則意業善。端正其身。而手提數珠。則身業善。常能善此三業。以修淨土。必上品生。予嘗於鎮江聞賣蝦者。叫蝦一聲。而知其三業俱惡。何則。身荷蝦擔。則身業惡。意欲賣蝦。則意業惡。口叫賣蝦。則口業惡。是知叫蝦一聲。而三業俱惡。此佛之所謂地獄人也。以此觀之。則目前所謂地獄人者多矣。可不畏哉。衆生以愚癡不知因果。陷於罪惡。深可憐憫。知其說者。爲開導化諭。此名法施。法施爲布施之大者。其爲福報。豈易量耶。或曰。人誦佛名。一向稱誦。正如呼一人。一向呼之。其人必怒。故一向誦佛名者。未足爲善也。是不然。衆生自無始以來。口業過惡。積如山海。多誦佛名。以滌蕩之。猶懼不足。豈可以稱呼常人之名爲比也。況諸佛自開此念佛法門。所以誘掖衆生。善其口業。以漸善其

身意。故謂一向誦佛名。未足爲善者。世俗之言。非諸佛誘掖衆生之言。無足取焉。

### 修持法門八

全持齋戒。又禮佛念佛。讀誦大乘經典。解第一義。以此迴向。願生西方。必上品上生。所謂齋者何哉。不食肉。不飲酒。不淫欲。不食五辛。所謂戒者何哉。殺生。偷盜。邪淫。是爲身三業。妄言。綺言。兩舌。惡口。是爲口四業。貪欲。瞋恨。邪見。是爲意三業。總爲十戒。能持而不犯。是爲十善。若犯而不持。是爲十惡。全持十戒。乃生天上。持前四戒。加以不飲酒。是爲五戒。能持此五戒。常不失人身。若修淨土者。不在此限也。若全持十戒。加以上文所言功德。固上品上生矣。若止持五戒。而修淨土。亦不失中品上生。或上品下生也。若又不能持五戒。豈可以不戒殺生乎。殺生爲五戒之首。又爲十戒之首。亦爲比

丘二百五十戒之首。是不殺則爲大善。殺則爲大惡。故曰。凡欲殺生者。但將自己看。自身不可殺。物命無兩般。所以不殺得長壽報。殺則短命報。蓋謂己欲其命長。物亦欲其命長。乃殺物命而欲己之命長。烏有是理。故殺生不可不戒也。凡殺生以資口腹。則口腹之欲何厭。放箸之後。滋味已空。而殺業具在。若殺生以待賓客。則以平日不殺。人亦無可言者。況其罪己自當之。經云。來而獨自來。去而獨自去。輪迴獨自行。果報獨自受。觀此。則豈可爲人而殺生也。若殺生以祭先祖。豈無素食清羞。孔子曰。雖蔬食菜羹瓜祭。必齋如也。如是。何有不可哉。若然香誦經。仗佛力以爲薦拔。必遂超生。故皆不在殺生也。若止能持此不殺之一戒。以修淨土。已不在下品生矣。

### 修持法門九

齋戒潔己。清心靜慮。面西安坐。閉目默然。觀想阿彌陀佛真金色身。

在西方七寶池中。大蓮華上坐。其身長丈六。兩眉中間向上有白毫一條。八棱中空。右旋轉五道。光明照耀金色面與金色身。次停心注想於白毫。更不得妄有分毫他念。當令閉眼開眼。悉皆見之。蓋欲念念不忘也。如此久久。念心成熟。自然感應見佛全身。此法最爲上。謂心想佛時。此心即是佛。又過於口念也。身後必上品上生。唐啟芳圓果二人。作觀想法。只五月。自覺身到淨土。見佛聞法。載在第五卷。所謂十六觀經者。詳說諸觀想法。又不止此而已。

### 修持法門十

想阿彌陀佛身極高徹天。所坐蓮華亦相稱。及注想眉間白毫。一一如前篇所言之法。此法最爲上。以心想佛時。此心即是佛。其想極大。則其善念極大故也。若未能如此。且想小像亦可。唯要專精。不得散亂。據觀經云。觀想阿彌陀佛身相光明。如百千萬億閻浮檀金色。佛身高六十

萬億那由他恒河沙由旬。眉間白毫。如五須彌山。佛眼如四大海水。青白分明。以無緣慈攝取衆生。閻浮檀金者。極大極美之金也。那由他者。萬億也。由旬者。十六里也。據此所說。豈可窮盡。只一恒河沙由旬。其大已不可言矣。況六十萬億之萬億恒河沙由旬乎。

### 修持法門十一

兼觀想觀世音菩薩。身長八十萬億那由他由旬。身紫金色。手掌作五百億雜蓮華色。有八萬四千光。其光柔軟。以此寶手接引衆生。次觀想大勢至菩薩。身長八十萬億那由他由旬舉身光明作紫金色。有緣衆生皆悉得見。次想自身生於西方極樂世界。於蓮華中結跏趺坐。作蓮華合想開想。見佛菩薩滿虛空中。

### 修持法門十二

發救度衆生心。發至誠心。發堅固心。發深心。加以禮拜念佛。如此則

現世蒙佛加祐。身後必上品上生。救度衆生心者。願生淨土。見佛得道後。救度苦海衆生。非獨度其身也。至誠心者。至誠歸向。無苟且也。堅固心者。堅固修進。更不退轉也。深心者。用心深至。直透淨土。如探海底珠也。三世諸佛。與法界衆生。皆由心造。吾心如是。焉得不上品上生。

### 修持法門十三

齋僧供佛。燒香獻花。懸旛建塔。念佛禮懺。種種三寶上崇奉。以此功德。迴向願生西方亦可。或爲世間種種利益方便善事。若爲子而孝養父母。爲兄而友愛昆弟。爲弟而欽順其兄。閨門之內。無不盡善。宗族之間。無不和睦。鄉黨鄰里姻親。相接以禮。相與以恩。以至事君則赤心爲國。爲官則仁慈利民。爲長則善以安衆。爲下則勤以事上。或教導愚迷。或扶助孤弱。或濟急難。或惠貧窮。或修橋砌井。或施藥散食。或

減己奉養以利他人。或臨財饒人以自省約。或教人爲善。或讚善止惡。隨力所作世間一切善事。以此迴向願生西方亦可。或爲世間一切利益。不拘大小。不拘多少。若止以一錢與人。或止以一杯水與人。下至如毫芒之善。亦必起念云。以此善緣迴向願生西方。常使一念不斷。念念在彼。必上品生。

#### 修持法門十四

佛言。欲生淨土。當修三福。一者孝養父母。奉事師長。慈心不殺。修十善業。二者受持三歸。具足衆戒。不犯威儀。三者發菩提心。深信因果。讀誦大乘。勸進行者。此三世諸佛淨業正因。三歸。謂歸依佛法僧也。

#### 佛持法門十五

予徧覽藏經。都無陰府寄庫之說。奉勸世人以寄庫所費。請僧爲西方之



供。一心西方。則必得往生。若不爲此。而爲陰府寄庫。則是志在陰府。死必入陰府矣。譬如有人。不爲君子之行。以交結賢人君子。乃寄錢於司理院獄子處。待其下獄。則用錢免罪。豈不謬哉。

### 食肉記

楞伽經云。有無量因緣。不當食肉。衆生肉本非所食之物。以耳聞目見。慣熟。不知其非。如能斷去。固爲上也。如不能斷。且食三淨肉而減省。所謂不見殺。不聞殺。不疑爲己殺是也。如食兼味。且去其一。如兩餐皆肉。且一餐以素。人生祿料有數。若此自可延壽。次日可爲此衆生念誦資薦。庶可釋冤滅罪。據閻羅王告鄭鄰之言。則至誠爲彼念佛。必得往生。

### 觀音坐相說

按藏經諸佛菩薩。手足六根。皆常端正。故云八端。觀世音菩薩。本結

跏趺坐。其神通變化自在。故云觀自在。今人作翹足搭手坐。謂自在觀音者訛也。

# 龍舒淨土文卷第五

宋國學進士王日休撰

東晉遠法師。倡首修淨土。本朝王敏仲侍郎。及近年錢塘陸居士。編集往生事跡。凡二百餘傳。皆鏤板流傳。今不及盡載。略取其齋戒修者。及中人修者。及罪惡人修者。及疾苦中修者。共三十傳。所以發人之信心也。

## 東晉遠法師

僧慧遠。廬門人。居廬山。與劉遺民等僧俗百二十三人。結爲蓮社。以修淨土。謂他日託生蓮華中也。遠澄心觀想。初十一年三覩聖相。而遠沉厚不言。後十九年七月晦夕。遠面見阿彌陀佛身滿虛空。圓光之中有諸化佛。觀音勢至侍立左右。又見水流光明分十四支。一一支水流注上下。自能演說苦空無常無我妙法。如十六觀經所說。佛告遠曰。我以本

願力故。來安慰汝。後七日當生我國。見僧佛馱耶舍。及慧持。及曇順。在佛之側。向前揖遠曰。法師之志在吾先。何來之遲也。遠目見分明。乃與其徒言之。且曰。始吾居此十一年。幸於淨土三覩聖相。今復見之。吾生淨土決矣。次日寢疾。至七日卒。遠少年博覽經史。尤通莊老。因往太行山。聽道安法師講般若經。豁然開悟。乃曰。九流異議。乃糖粕耳。因削髮事之。後至廬山。凡三十年不出。卒年八十二。

### 東晉劉遺民

程之。字仲思。號遺民。依遠公共修淨土。專坐禪作觀想法。方半歲。即於定中見佛光照曜。又地皆金色。居山十五年。末年。又於想念佛中。見阿彌陀佛。身紫金色。毫光散照。垂手下接。以臨其室。程之慰幸。悲泣自陳曰。安得如來爲我摩頂。以衣覆我。佛乃摩其頂。引袈裟以覆之。他日想念佛。又見身入七寶大池。蓮華青白相間。其水湛湛。如

無邊岸。中有一人。頂有圓光。胸有卍字。指池水曰。此八功德水。汝可飲之。程之飲水。甘美盈口。乃還。猶覺異香發毛孔。乃曰。此吾淨土之緣至矣。廬阜諸僧皆來會。程之對佛像焚香再拜。祝曰。我以釋迦遺教。故知有阿彌陀佛。此香當先供養釋迦如來。又供養阿彌陀佛。後供養法華會中佛菩薩衆。以至十方佛菩薩衆。願令一切有情俱生淨土。祝畢。與衆話別。面西端坐。斂手氣絕。年五十九。

### 東晉闕公則

公則遠公蓮社中人。已亡。友人於東京白馬寺。爲作忌日。林木殿宇皆金色。空中有聲云。我是闕公則。所祈往生極樂寶國。今已達矣。故來相報。言訖不現。

### 石晉翰林學士張抗

抗平生積善。信重佛門。誓課大悲心陀羅尼十萬遍。願生西方。課畢。

年過六十。忽寢疾。唯念阿彌陀佛。謂家人云。西方淨土。元只在堂屋西間之內。阿彌陀佛坐蓮華上。翁兒在蓮華池金沙地上。禮佛嬉戲。言訖。良久念佛而亡。翁兒者抗之孫。方二三歲而亡矣。

### 宋江陵僧曇鑒

曇鑒。履行尤謹。常願身升安養。面見阿彌陀佛。安養即淨土也。故雖毫芒之善。悉迴向之。一日。定中見阿彌陀佛。以水灑其面曰。滌汝塵垢。清汝心念。汝之身口。俱致嚴淨。又於瓶中出一蓮華與之。出定。乃與寺僧叙別。夜漸深。獨步廊下。念阿彌陀佛。將至五更。其聲彌厲。及旦。弟子依常問訊。跌坐不動。就而視之亡矣。

### 南齊揚都僧慧進

慧進。年四十餘。願誦法華。執卷病生。乃發願造百部以懺業障。化錢造畢。病亦隨癒。願以造經功德迴向淨土。忽空中有聲云。汝事已辦。

願亦已遂。其生淨土。非汝而誰。進聞之曰。進不敢以冀上品。但下品之下。亦無退轉矣。永明三年。年八十。無病而卒。

### 後魏壁谷僧曇鸞

曇鸞。初自陶隱居得仙經十卷。鸞欣然自得。以爲神仙必可致也。後遇僧菩提留支。問曰。佛道有長生乎。能却老爲不死乎。支云。長生不死。吾佛道也。遂以十六觀經與之。云。汝可誦此。則三界無復生。六道無復往。盈虛消息。禍福成敗。無得而至。其爲壽也。有劫石焉。有河沙焉。沙石之數有限。壽量之數無窮。此吾金仙氏之長生也。鸞深信之。遂焚仙經。而專修觀經。雖寒暑之變。疾病之來。亦不懈怠。魏主憐其志尚。又嘉其自行化他。流傳甚廣。號爲神鸞。一日告弟子云。地獄諸苦。不可以不懼。九品淨業。不可以不修。因令弟子高聲念阿彌陀佛。鸞西向閉目叩頭而亡。是時僧俗同聞管絃絲竹之聲。從西而來。良久

乃止。

### 隋開覺寺僧道喻

道喻。念阿彌陀佛。造旃檀像長三寸。後忽死。七日却甦。云見阿彌陀佛云。汝造我像何太小。對曰。心大即大。心小即小。言訖。其像徧於虛空。又云。汝且回本國。香湯沐浴。明星出時。我來迎汝。至時。果見化佛來迎。光明照室。衆皆聞見。乃亡。時開皇八年。

### 唐京師僧善導

善導。貞觀中見西河綽禪師淨土九品道場。於是篤精勤苦。若救頭然。每入佛堂。合掌胡跪。一心念佛。非力竭不休。雖寒冰亦須流汗。以表至誠。出即爲衆說淨土法門。無暫時不爲利益。三十餘年。不暫睡眠。般舟行道。禮佛方等。專爲己任。護持戒品。纖毫不犯。未嘗舉目視女人。絕意名利。遠諸戲笑。所行之處。淨身供養。飲食衣服有餘。並以



迴施。好食送大廚供衆。麤惡自食。乳酪醍醐。皆不飲噉。諸有覲施。用寫阿彌陀經十萬餘卷。畫淨土變相三百餘壁。見壞寺及塔。皆悉修營。然燈續明。每歲不絕。三衣瓶鉢。不使人持洗。始終無改。不與衆同行。恐談世事。妨修行業。展轉授淨土法門者。不可勝數。滅問導云。念佛之善。生淨土否。答云。如汝所念。遂汝所願。於是導自念阿彌陀佛一聲。則有一道光明從其口出。十聲以至百聲。光明亦如此。其勸化偈云。漸漸雞皮鶴髮。看看行步龍躡。假饒金玉滿堂。難免衰殘老病。任是千般快樂。無常終是到來。雖有徑路修行。但念阿彌陀佛。後謂人曰。此身可厭。吾將西歸。乃登寺前柳樹。投身自絕。高宗見其念佛口出光明。又捨身時精至如此。賜寺額爲光明。本朝慈雲式懺主略傳云。阿彌陀佛化身。至長安聞漉水聲。乃曰。可教念佛。三年後。滿長安城中念佛。後有法照大師。即善導後身也。

### 唐台州僧懷玉

懷玉。注想淨業。近四十年。天寶元年。玉念佛間。忽見西方聖衆。數若恒沙。中有一人。手擎銀臺以示玉。玉曰。如玉者。本望金臺。何爲銀臺耶。臺乃隱。人亦隱。於是彌加精苦。至三七日。向之擎臺者復來告云。法師以精苦故。得升上品。又云。上品往生。必先見佛。可趺坐以俟佛來。未旋踵間。異光照室。又三日。異光再發。玉曰。若聞異香。我報身即盡。次日書偈云。清淨皎潔無塵垢。蓮華化生爲父母。我經十劫修道來。出示閻浮厭衆苦。一生苦行超十劫。永離娑婆歸淨土。偈畢。香氣四來。弟子有見佛與二菩薩。共乘金臺。臺下千百化佛。自西而下迎玉。玉恭敬合掌。含笑長歸。

### 唐汾州僧啟芳圓果

啟芳圓果二法師。精心觀想淨土。後五月。於觀想中。同覺身臨七寶大

池。池間有大寶帳。身入其中。見觀音勢至坐二大寶蓮華。下有蓮華彌滿千萬。阿彌陀佛從西來。坐一最大蓮華。迭出光明相照。芳等禮佛問曰。閻浮衆生。依經教念佛。得生此否。佛云。如念我名。皆生我國。無有一人念而不生者。又見其國地平如掌。寶幢珠網。上下間錯。又有一僧乘寶車逐遠而來。謂芳等云。吾法藏也。以宿願因。故來迎汝。芳等乘車前往。又覺其身坐寶蓮華。又聞釋迦佛與文殊菩薩稱讚淨土。其前又有大殿。殿有三道寶階。第一道純是白衣。第二道僧俗相半。第三道唯僧無俗。佛指之謂芳等云。此皆南閻浮提念佛衆生。遂生於此。汝宜自勉。芳果既寤。歷與其徒言之。後五月。二人無病遽聞鐘聲。他人不聞。芳果云。鐘聲乃我事。頃刻二人同終。

### 唐真州僧自覺

自覺發願。願因大悲觀音。接見阿彌陀佛。於是化錢鑄大悲像四十九尺

。造寺居之。既成祝願。其夜三更。忽有金色祥光二道。阿彌陀佛。自光中乘雲而下。觀音勢至左右隨之。佛垂金臂。按覺首曰。守願勿悛。利物爲先。寶池生處。孰不如願。後十一年七月望夕。見一人雲間現半身。若毘沙門天王。俯謂覺曰。安養之期。於斯至矣。乃於大悲前跏趺化去。

### 唐睦州僧少康

少康。貞元初。至洛下白馬寺。見殿中文字累放光明。採取之。乃善導西方化導文也。康曰。若於淨土有緣。當使此文再發光明。言未已。光乃閃爍。遂至長安善導影堂。大陳薦獻。善導於空中曰。汝依吾事。利樂有情。則汝之功。同生安養。又逢一僧謂曰。汝欲化人。當往新定。言訖而隱。新定今嚴州也。至彼。人尚無識者。康乃乞錢誘小兒與之約曰。阿彌陀佛是汝本師。能念一聲。與汝一錢。小兒務得其錢。隨聲念

之。後月餘。小兒念佛求錢者衆。康乃曰。念佛十聲。乃與爾錢。小兒從之。如此一年。無長少貴賤。凡見康者。則稱阿彌陀佛。以故念佛之人。盈於道路。後康於烏龍山建淨土道場。築壇三級。聚人午夜行道。康升坐。令人面西。康先倡阿彌陀佛。次衆人和之。唐倡時。衆見一佛從其口出。連倡十聲。則有十佛。若聯珠狀。康云。汝見佛否。如見佛者。決生淨土。其禮佛人數千。亦有竟不見者。後囑衆人。當於安養。起增進心。於閻浮提。生厭離心。又云。汝等此時能見光明。真我弟子。遂放異光數道而亡。

### 唐并州僧惟岸

惟岸。專修十六觀。因出見觀音勢至二菩薩現於空中。遲久不滅。岸頂禮雨淚而歎曰。幸由肉眼得見聖容。所恨後世無傳。忽有二人。自稱畫工。未展臂間。聖像克就。已而人亦不見。弟子怪而問之。岸曰。此豈

畫工哉。又曰。吾之西行。乃其時也。弟子有從我者。當明言之。小童子云。從師而往。岸曰。必能從我。可歸告父母。父母聞而笑罵之。子乃歸寺。香湯沐浴。於阿彌陀佛像前。跌坐而往。人或告岸。岸撫其背曰。汝事吾者。何乃先去。遂索筆焚香。向所畫菩薩前作偈云。觀音助遠接。勢至輔遙迎。寶瓶冠上顯。化佛頂前明。俱遊十方刹。持華候九生。願以慈悲手。提獎共西行。遂令弟子助聲念佛。仰目西顧而亡。

### 唐長安尼淨真

淨真。住長安積善寺。衲衣乞食。一生無瞋。誦金剛經十萬遍。專精念佛。顯慶五年染疾。告弟子云。五月內十度見阿彌陀佛。兩度見極樂世界。寶蓮華上童子遊戲。吾得上品往生。言訖。跏趺而去。光照其寺。

### 唐房翥

翥暴死。至陰府見閻羅王。王曰。據案簿。君曾勸一老人念佛。已生淨

土。君承此福。亦合生淨土。故召來相見。翥曰。先許金剛經萬卷。巡禮五臺。未欲往生。王曰。誦經巡禮。固爲好事。不如早生淨土。王知志不可奪。乃放還。以此知勸人修者。非徒往生。又感動幽冥也。

### 唐長安李知遙

知遙。善淨土教。五會念佛。爲衆師範。後因疾。忽曰。念佛和尚來也。洗嗽著衣。索香爐。出堂頂禮。乃聞空中說偈云。報汝李知遙。功成果自招。引君生淨土。將爾上金橋。却就床坐而化去。衆聞異香。

### 唐上黨姚婆

姚婆。因范行婆勸念阿彌陀佛。臨終見佛菩薩來迎。告佛言。未與范行婆相別。請佛暫住少時。佛住空中。候范婆至。姚婆立化。

### 唐并州溫靜文妻

靜文妻。久患在牀。靜文勸以念阿彌陀佛。乃念佛二年不絕。遂見淨土

。乃告靜文言。我見佛了。後月定去。又以食獻父母云。今得隨聖往生。願父母及夫專念佛。來西方相見。言訖而終。前三日。見蓮華大如日輪。

### 唐張鍾馗

鍾馗。殺雞爲業。忽見一人著緋。驅羣雞來叫云。啄啄。四畔上啄。兩目血流。受大痛苦。有僧爲鋪佛。像燒香念阿彌陀佛。兼令鍾馗一心專念。忽香氣滿室。安然而終。

### 唐張善和

善和。殺牛爲業。臨終見牛數頭。作人言云。汝殺我。善和大恐。告妻云。急請僧來救我。僧至云。十六觀經說。若人臨終。地獄相現。至心十稱南無阿彌陀佛。即得往生淨土。善和云。便入地獄也。不暇取香爐。即以左手擎火。右手拈香。面西專切念佛。未滿十聲。乃云。我見阿



彌陀佛從西來。與我寶座。言訖而終。

### 石晉鳳翔僧志通

志通。見智者大師淨土儀式。不勝欣抃。不向西唾。不背西坐。專心修進。後見白鶴孔雀成行列西下。又見蓮華光相開合於前。通云。白鶴孔雀淨土境也。蓮華光相。託生處也。淨土現矣。乃起禮佛。對佛而終。火化時。五色祥雲環覆火上。

### 國初永明壽禪師

禪師名延壽。本丹陽人。後遷餘杭。少誦法華。初爲縣衙校。多折官錢。勘之。止是買放生命。罪當死。引赴市曹。錢王使人探之。若顏色變。即斬之。不變來奏。臨斬。顏色不變。乃貸命。遂爲僧。於禪觀中。見觀音以甘露灌其口。乃獲觀音辯才。下筆盈卷。著萬善同歸集。宗鏡錄等。共數百卷。住持雪竇永明。日課一百八事。精進以修西方。既坐

化。焚畢爲一塔。有僧每日遶塔禮拜。人問其故。僧曰。我撫州僧也。因病至陰府。命未盡放還。見殿角有僧畫像一軸。閻羅王自來頂拜。我問此僧何人。主吏云。此杭州永明寺壽禪師也。凡人死者。皆經此處。唯此一人。不經此處。已於西方極樂世界。上品上生。王敬其人。故畫於此供養。我聞之。故特發心來此遶塔作拜。以此見精修西方者。爲陰府所重。

### 宋明州僧可久

可久。常誦法華經。故號久法華。平生修淨土業。元祐八年。年八十一。坐化。三日卻還。說淨土事。與十六觀經所一同。見蓮華臺皆標合生者姓名。一紫金臺標云。大宋成都府廣教院熏法華。已生其中。又一金臺標云。明州孫十二郎。合生其中。又一金臺標云。明州徐道姑臺。語訖。復化去。五年徐道姑亡。異香滿室。又

十二年。孫十二郎亡。天樂盈空。

### 宋會稽金太公

太公名爽。網魚爲業。一日改業。持阿彌陀佛日萬聲。蔬素修行。不曾暫輟。後無疾告家人云。我見阿彌陀佛與觀音勢至在門前。我今歸淨土也。次日又云。我已見金蓮華來迎我矣。索香爐安坐捏印而化。鄉村遠近聞音樂。異香終日不散。時政和六年。

### 宋潭州黃打鐵

黃打鐵。本軍中人。打鐵爲生。每打鐵時。念阿彌陀佛不絕聲。一日無疾。託鄰人寫頌印行。廣勸人念佛。頌云。日夜玎玎璫璫。久練成剛。太平將近。我往西方。即化去。此頌廣行湖南。人多念佛。

### 宋臨安府仁和吳瓊

吳瓊。先爲僧。後還俗。前後兩娶。生二子。屠沽無所不爲。常與人作

廚子。每殺雞鴨等物命。以持起叫云。阿彌陀佛子。好脫此身去。遂殺之。連稱佛數聲。每切肉時。一面切肉。一面念阿彌陀佛。常念佛不輟。教村中人念經修懺。及勸人念阿彌陀佛。後眼上生瘤。如雞子大。乃憂怖。造一草庵。分散其妻子。晝夜念佛修懺。紹與二十三年秋。告村中人云。瓊來日戌時去也。人皆笑之。將用碗鉢鍋子盡與人。次日晚。報諸道友行婆云。瓊去時將至。盡來與瓊高聲念佛相助。將布衫當酒飲了。即寫頌云。似酒皆空。問甚禪宗。今日珍重。明日清風。端坐合掌念佛。叫一聲佛來。即化去。

### 宋荆王夫人

元祐間荆王夫人。與婢妾精修西方。唯一妾懈怠。夫人斥去。其妾悔悟精進。久之謂他妾云。吾今夜當生西方。其夜異香滿室。無疾而終。明日。同事之妾告夫人云。昨夜夢化去之妾。託致起居云。夫人訓責我修

西方。今已獲往生。感德無量。夫人云。使我亦夢。乃可信耳。其夜夫人夢見亡妾。敍謝如前。夫人云。西方可到否。妾云。可到。但從妾行。夫人隨之。見池塘廣大。紅白蓮華大小相間。或榮或悴。種種不同。夫人問云。何以如此。妾云。此皆世間發念修西方人也。纔發一念池內便生蓮華一朵。若願心精進。則華日日敷榮。以至大如車輪。若願心退轉。則華日日萎悴。以至殞滅。次見一人坐蓮華上。其衣飄揚散去。寶冠瓔珞莊嚴其身。夫人問云。何人也。妾云。楊傑也。又見一人坐於華上。妾云。此馬玕也。夫人云。我當生何處。妾引行數里許。遙望見一金壇。金碧照曜。妾云。此夫人化生處。乃上品上生也。夫人既覺。訪問楊馬所在。則傑已亡。而玕無恙。是知精進不退者。雖身在娑婆之內。其神識已在淨土矣。後夫人於生日。秉爐焚香。望觀音閣而立。子孫方具獻壽之儀。已立化矣。

### 宋觀音縣君

縣君姓吳氏。其夫都官員外郎呂宏。亦悟佛理。夫婦各齋戒清修。吳氏有二侍女。亦絕葷血。勤力助爲勝業。其一頗好禪理。既病猶怡然笑語而逝。如委蛻然。其一奉戒剋苦。或終月不食。但日飲吳氏所呪觀音淨水一盞而已。忽見金蓮捧足者三。又數日見其膝。又數日見其身。又數日見其面目。其中乃阿彌陀佛。左右則觀音勢至也。又悉見其堂殿國界。皎如指掌。曉然知其爲淨土。問其詳。則云。彼皆清淨男子。經行遊樂。無女人也。又問彼佛如何說法。云。我得天眼。未得天耳。故但見問答指顧。而不能聞所說也。如是者三年。未嘗一瞬不在目前。忽感疾。自言往生。乃終。吳氏事觀音有靈感。每於淨室列置瓶缶數十。以水注滿。手持楊枝誦呪。必見觀音放光入瓶缶中。病苦者飲水輒癒。所呪水積歲不壞。大寒不凍。世號觀音縣君。

## 宋馮氏夫人

夫人名法信。贈少師諱珣之女。適承宣使陳思恭。少多疾。及嫁。疾尤甚。醫者以爲不可療。往見慈受深禪師。問癒疾之方。深教以持齋念佛。夫人盡去葷血。及裝飾之奉。衣掃塔服。專以西方爲念。行亦西方也。坐亦西方也。起居食息亦西方也。語默動靜亦西方也。酌水獻華亦西方也。誦經行道亦西方也。剎那之念。秋毫之善。一以爲西方之津梁。十年間無惰容。心安體健。神氣昌盛。人皆尊尚之。一日忽書偈云。隨緣任業許多年。枉作老牛爲耕田。打疊身心早歸去。免教鼻孔受人穿。族黨怪之。夫人云。行即西歸。何怪之有。乃臥疾。微有喘息。忽矍然而起云。吾神遊淨土。面禮阿彌陀佛觀音左顧。勢至右盼。百千萬億清淨佛子。稽首慶我來生其國。若宮殿林沼。光明神麗。與華嚴經及十六觀經所說一同。明日安然化去。家人聞妙香芬馥。不類人間。及三日茶

毘。舉屍如生。

龍舒淨土文卷第五終



# 龍舒淨土文卷第六

宋國學進士王日休撰

修淨土者。宜隨其所而爲善。以資進修之功。故此卷名特爲勸諭。若不識字人。全賴慈仁君子。發菩薩心。爲彼解說。此布施之大者。先後之序。乃自近及遠。或自急及緩。不拘其人高卑。

## 勸士人

士人或有未深讀書。遂登高科者。有深讀書。終身尚不預薦者。豈非前世所種不同。故其報不同乎。雖然。使少年登科。涉華要。功業濟一時。福報亦有時而盡。奉勸後生者。勤於學問。篤於孝友。遠念吾曾高以來。誰其存者。亦留心此道。日月長而積累之功多。久則自有可樂。及年高者。當念已往之事。皆如夢幻。日復一日。其誰免者。豈可不急留心此道也。不問老少。若能轉以化人。使更相勸化。現世獲福。身後必

上品生。

### 勸有官君子

有官君子。無非前世修種作福。故受此報。譬如春時下種。秋乃收穫。若不修福。何緣得此。然此報有盡。若更修福行種種方便愛人利物之事。以此迴向西方。則直出輪迴之外。壽樂無窮。豈世間福報所能比哉。若切意斯民而不忍捨去。且生西方。了生死之後。卻來此世界現宰官身。以大興功利。何有不可哉。若能轉以此化人。使更相勸化。人則以己言重。必樂從之。據大慈菩薩偈。現世可以消災獲福。身後必上品生。

### 勸在公門者

在公門者。當自念云。彼爲有官。我乃事彼。彼尊我卑。彼逸我勞。奉事常喜。得以無虞。或有觸忤。加之譴責。是我前世所修不及於彼。故至於此。我但小心謹行以保此身。事無大小。隨宜方便。目前人見歡悅。

。必無後患。積善不已。福及子孫。當思在公門者。其子孫榮顯。必祖上積德。天道昭明。不可不信。更常念阿彌陀佛。願生極樂世界。又轉以此化人。使更相勸化。非徒現世獲福。身後可中上品生。

### 勸醫者

醫者當自念云。人身疾苦。與我無異。凡來請召。急去無遲。或止求藥。宜即發付。勿問貴賤。勿擇貧富。傳以救人爲心。以結人緣。以積己福。冥冥中自有祐之者。若乘人之急。切意求財。用心不仁。冥冥中自有禍之者。吾鄉有張彥明善醫。僧道貧士軍兵官員。及凡貧者求醫。皆不受錢。或反以錢米與之。人若來召。雖至貧下亦去。富者以錢求藥。不問錢多寡。必多與藥。期於必癒。未嘗萌再攜錢來求藥之心。病若危篤。知不可救。亦多與好藥以慰其心。終不肯受錢。予與處甚久。詳知其人。爲醫而口終不言錢。可謂醫人中第一等人矣。一日城中火災。周

迴蕪盡。煙焰中獨存其居。一歲水災尤甚。而其莊上獨全。此神明祐助之明效也。其子讀書。後乃預魁薦。孫有二三。龐厚俊爽。亦天道福善之信然也。使其孜孜錢物爲心。失此數者。所得不足以償所失矣。同門之人。可不鑒哉。若常如是存心。迴向淨土。必上品生。若因人疾苦。而告以淨土。則易生信心。使復發大願。以廣其傳。以贖宿譴。以期痊癒。必遂所願。若天年或盡。亦可此乘此願力。徑生淨土。常如是以化人。非徒身後上品化生。現世則人必尊敬。而福報亦無窮流及子孫矣。

### 勸僧

僧家當自念云。我爲出家人。了達生死。乃本分事。不能如此。遂汨沒俗塵。一日大限到來。有何倚賴。平日雖有善業。不免逐輪迴去。善業報盡。又復墜墮。不如早修淨土。直脫輪迴。面見阿彌陀佛。方是出家事畢。如永明壽禪師。長蘆頤禪師。萬年一禪師。皆修此道。又轉以化

人。使更相勸化。豈可不效彼乎。凡受人一錢之施。一食之供。皆當爲說淨土以報其德。縱彼不信。亦使知之。耳根漸熟。久而自信。若或便信。其利益大矣。常如此是化人。現世則爲人所敬。己之善緣愈見純熟。又能精心觀想。不久必見佛之真身。此報身盡後。必上品上生。爲不退轉地菩薩矣。古語云。此身不向今生度。更向何生度此身。當常念此意。不可懈怠。

### 勸參禪者

參禪大悟。遂脫生死輪迴。固爲上矣。然至此者。百無二三。若修西方。則直出輪迴而生死自如。萬不漏一。故予欲勸僧家上根器者。參禪之外。每日以頃刻之暇修西方。若參禪大悟。遂超脫輪迴。尚去佛地極遠。更往見阿彌陀佛。展禮致敬。有何不可。若未得大悟。而壽數忽盡。且徑往西方見佛聞法。可患其不大悟也。若不修西方。不免隨業緣去。

雖如青草堂。戒禪師。真如喆。皆汨沒輪迴。誠可畏者。詳見第七卷。若不忽此道。精心修進。仍轉以化人。使更相勸化。人則以己爲名僧。必樂從其言。其爲利益無窮。己必上品上生。

### 勸富者

富者當自念云。我今生富足。皆由前世修種。譬如今年所食之穀。乃去年所種也。然人生衣食財祿。陰司皆有定數。徐徐營生。合有之數。亦自然來。其來之遲。乃可延壽。如水淺流則久也。若急急貪求。亦只此數。數外得之。則禍生而去。如水過滿則溢也。宜隨分爲生。無使滿溢。少損濟物。以防滿溢。非徒可以享現世之安。又可種後來之福。仍當念世間福亦有盡。若以迴向西方則無盡。況世間富足。亦不能色色如意。唯留意西方。則自有可樂。更相印施西方文字。以廣勸人。使更相勸化。此爲種無窮之福。現世可以消災禳難。鬼神亦敬而祐之。身後必上

品上生。

### 勸貪吝者

得人三千而不以爲多者。貪也。自費兩千而遂以爲多者。吝也。貪吝之失。衆人所同。而不自覺。若能去此。方爲賢者。如是則善業無不可爲。惡業無不可戒。何則。不吝財以爲善。不貪財以爲惡。故也。若如是。以修淨土。必不在下品生矣。又能轉以化人。使更相勸化。人則以己無貪吝之心。必加尊敬而樂從其化。所化必廣。上品往生。復何疑哉。生前之福報。亦可立而見矣。此不可以言盡。行者當自知之。

### 勸孝子

長蘆蹟禪師。作勸孝文百二十篇。前百篇言奉養甘旨。爲世間之孝。後二十篇言勸父母修淨土。爲出世間之孝。蓋世間之孝。一世而止。猶爲孝之小者。出世間之孝。無時而盡。以父母生淨土。福壽不止如恒河沙劫。

。此莫大之孝也。父母存而不能以此勸勉。他日徒傷其心。徒爲厚禮。亦何益乎。若又能轉以化人。使更相勸化。以此功德資父母之福壽。厚父母之善報。佛不阻衆生之願。此意必可遂矣。上品上生者。先言孝養父母。若能推是心以爲孝養。其往生品第可見矣。

### 勸骨肉恩愛者

骨肉恩愛者。當自念云。大慈菩薩有偈云。骨肉恩情相愛。難期白首團圓。幾多強壯亡身。更有嬰孩命盡。勸念阿彌陀佛。七寶池中化生。聚會永無別離。萬劫長生快樂。不能如是。徒爲好衣以華其身。美食以悅其口。一旦分離。無著力處。故生前宜相勸以念佛。若又能轉以化人。使更相勸化。是不徒使己之骨肉有無窮之恩愛。亦使他人骨肉有無窮之恩愛。其福報豈有窮盡。必中上品生。

### 勸婦人



婦人當自念云。據佛所言。慾心重者。受婦女身。是已非善業。若不自省。更加嫉妒貪慾。業緣轉深。果報可畏。若能迴心懺悔。絕其非念。仁慈以待婢妾。溫和以禮上下。常念阿彌陀佛。發願云。願我黑業日消。白業日長。現身清淨。內外輕安。此世之後。永不復受女身。使念念不斷。念自純熟。定生極樂世界。若轉以化一家。及婢妾。及宗族親戚。其福報無窮。必上品生。觀荆王夫人傳可見矣。在第五卷。

### 勸僕妾

爲僕妾者當自念云。我前世不曾修福。故至貧賤。人受安逸。我當勤勞。人享美味。我食麤糲。人服輕細。我著麤惡。此皆前世業緣。已往者不可悔。自此之後。當念善改過。忠直勤謹。小心奉事。以保此身。以種後福。常念阿彌陀佛。念念不絕。念自純熟。定生極樂世界。又以化其同類。使更相勸化。則福報無窮。必中上品生。

### 勸農者

爲農者當自念云。農業雖爲務本。然耕田種地。殺害微細物命。亦不爲少。此雖無可奈何。若能委曲全護。懺悔前失。常念阿彌陀佛。發大願云。願我見佛得道之後。先度耕種以來一切所殺微細衆生。次度一切冤親衆生。常作此念。使念念不絕。念自純熟。定生極樂世界。若轉以化人。使更相勸化。現世獲福。身後必中上品生。

### 勸養蠶者

養蠶者當自念云。蠶爲絲以爲人衣。此固世間常理。然亦是殺害物命。世人以爲馬鳴菩薩。考於藏經。本無此說。唯說佛訓弟子不得衣綿絹。及用皮爲鞋履。爲殺物命而得。人既以養蠶爲業。豈可不知慚愧。當常懺悔。念阿彌陀佛。發大願云。願我見佛得道之後。盡度養蠶以來所殺一切蠶命。使念念不絕。念自純熟。亦生極樂世界。若轉以化人。使更

相勸化。現世必獲福報。身後亦中品生。

### 勸商賈

爲商賈者。當自念云。平生販賣。寧無欺僞。若是尺帛。皆由蠶命而得。不可謂全無過惡。一旦命盡。隨業緣去。不如懺悔爲善。隨分營生。命若多財。自然漸有。命若財少。多得亦失。況人生財數有限。急求而數滿。則致早終。緩求而來遲。則可延壽。宜以此存心。常念阿彌陀佛。願見佛得道之後。先度一切與己交涉衆生。次度一切冤親。次度一切有緣無緣衆生。如此念念不絕。念自純熟。定生極樂世界。若轉以化人。使更相勸化。現世獲福。身後必中上品生。

### 勸工匠

爲工匠者。當自念云。我爲人造屋宇。或爲人作器用。此雖爲善業。然以前世不曾修種。故今生自不富足。所造之屋。乃他人居。所作之器。

乃他人用。若不如是。衣食虧缺。當隨分爲善。爲人造作之時。物不過。望事則盡心。此亦種福。常念阿彌陀佛。用斧斤時。亦一心常念。使念念不絕。念自純孰。定生極樂世界。若轉以化人。使更相勸化。現世獲福。身後必中上品生。

### 勸多屯蹇者

多蹇屯者。勿怨天。勿責人。皆己之業緣所致。若見人歡喜者。得歡喜報。惱害人者。得惱害報。行方便者。得如意報。阻難人者。得齟齬報。種種皆本於前世之所爲。如影隨形。如響應聲。是今生所以多屯蹇者。乃前世不爲善事。不作福業。已往者既不可悔。自此以後。當勤懺悔。常念阿彌陀佛。非徒可消除宿障。又可增長善緣。後世生極樂世界。無復有此屯蹇矣。莫言後世遠。閉眼即是。若轉以化人。使更相勸化。現世獲福。身後必中上品生。

## 勸骨肉怨憎者

骨肉怨憎者。當自念云。我以前世惡業。故招此報。或殺彼命。或負彼債。或惱害彼。若作善緣必不至此。若能懺悔宿業。痛自責己。不復與人爲惡。常念阿彌陀佛。以解怒心。以消惡緣。願生極樂世界。與己相聚者。皆諸上善人。無復有此患矣。若轉以化人。使更相勸化。現世可獲福報。身後必中上品生。

## 勸漁者

漁者當自念云。魚生水中。無害於人。我乃巧計取之。圖以販賣。以養我命。以活家眷。魚在水中。亦有眷屬。腹中多子。皆是性命。我乃殺害。其罪無量。若能改業。此爲上也。若未能猝改。且勿殺微細命多螺蛤鱓鼈等難死之物。常念阿彌陀佛。懺悔發大願云。願我見佛得道之後。盡度從生以來。一切所殺物命。皆生淨土。今念不絕。念自純熟。亦

生極樂世界。若轉以化人。使更轉相勸化。現世可除災獲福。身後亦不在下品下生。

### 勸網飛禽者

網飛禽者當自念云。飛禽在林野與空中。無害於人。我貪其肉。多方巧取。我愛性命。他亦有命。我愛骨肉。他亦有子。若能改業。此爲上也。若未能改。且勿殺物小命多生抱子者。常念阿彌陀佛。懺悔發大願云。願我見佛得道之後。盡度從生以來。一切所殺物命。皆生淨土。念念不絕。念自純熟。亦生極樂世界。若轉以化人。使更相勸化。現世可除災滅罪。身後亦不在下品下生。

### 勸爲廚子者

爲廚子者當自念云。我前世不修福業。今世貧困。又烹炮切割衆生。雖非自己親殺。然亦罪重。若能改業。固爲上也。如不能改。慎勿親殺。

常念阿彌陀佛。懺悔爲善事。發大願云。願我得道之後。盡度從生以來。一切所殺物命。一切所切割之衆生。皆生淨土。念念不絕。念自純熟。亦生極樂世界。若轉以化人。使更相勸化。現世可除災滅罪。身後亦不在下品下生。

### 勸作福者

種種作福。固爲善矣。然世間之福。其報有盡。爲其不出輪迴之外也。若以迴向西方。則直出輪迴之外。其報豈有盡耶。惟世人多半不明此理。全賴作福者。以菩薩之心爲心。爲彼解說。如暗者得燈。迷者得路。以此法門。廣作布施。使人人知之。人人皆脫離輪迴。其福報萬萬劫無盡。已於極樂世界必上品生。豈世間福報所能比哉。

### 勸誦經人

凡誦經人。及持齋戒人。固爲善業。後世必受福報。無可疑者。然此報

有盡。不能脫離輪迴。若更修西方。即超出輪迴之外。罪惡人修者。尚得往生。況持齋誦經。其往生上品必矣。雖然獨修者。其功小。勸人修者。其功大。若能廣以勸人。使更相勸化人。則以己持齋誦經之故。必信重其言。其功尤大。現世則受恭敬歸依之報。身後福德豈有盡耶。

### 勸貴人

貴者當自念云。雖種種如意。種種快樂。光陰迅速。幻身難保。古來極貴。誰其在者。不如忙中偷閑。每朝以頃刻之暇。修西方法門。現世可以消災而省業。身後託生於蓮華中。永無苦趣。常受快樂。豈不美哉。若宋朝文潞公。在京師與淨嚴禪師結十萬人淨土緣。王敏仲。楊次公。葛仲忱。馬東玉。馮濟川。皆以貴人而修淨土者。可不念哉。若發大菩薩心。轉以化人。使更相勸化。人則以己爲貴人。皆信重其言。此教遂可以廣行。其爲福報。豈可量耶。身後必上品生。若汨沒度時。不知修



此。一日悔之。不可及已。

### 勸大聰明人

大聰明人博學疆識。發言成文。下筆成章。固爲世所尊仰。然於我性分之內。若不相干。莊子云。所謂見者。非謂其見彼。自見而已。所謂聞者。非謂其聞。彼自聞而已。不自見而見彼。不自聞而聞彼。是得人之得。非自得其得。適人之適。非自適其適。一旦棄去。方知平生所以留意者。無益於我。雖聰明事業。不可以廢。宜每日挪頃刻之暇。留心淨土。若洞曉此理。惡緣自省。善緣自積。生前已有可樂。若轉以勸人。使更相勸化。人則以己聰明過人。猶信此理。必謂此理無可疑者。其說遂可以盛傳而愈久。是亦菩薩之扶持此教也。他日必上品生。其爲福報。豈易量哉。

### 勸賣酒者

賣酒者當自念云。五穀本以養人。今糜爛爲酒。使人飲之亂性多爲不善。是誰之過。宜常自懺悔。念阿彌陀佛。發大願云。願我賣酒以來。一切壞五穀人性之罪。悉以消滅。見佛得道之後。盡度脫所用爲酒五穀種蒔之時。一切所殺微細衆生。及一切致力衆生。及飲酒亂性之人。使皆生淨土。如是念念不絕。念自純熟。定生極樂世界。若轉以化人。使更相勸化。現世則可以滅罪而長福。身後必中品生。

### 勸開食店者

開食店者當自念云。我以衆生之肉。割切烹炮。謀利養生。我有骨肉。欲安欲樂。我養生之業。乃由殺衆生而得。極爲惡業。若能改業。此爲上也。若未能改。且省去鱔魚螃蟹螺蛤等難死之物。及微細命多之物。隨分用肉。此爲次也。若又未能。且常念阿彌陀佛。遠勝不念。次懺悔發大願云。願我見佛得道之後。盡度從生以來。一切所殺衆生。及一切

所用肉之衆生。使皆生淨土。念念不絕。念自純熟。亦生極樂世界。若轉以化人。使更相勸化。現世則可消滅罪業。身後福報無窮。

### 勸屠者

屠者當自念云。人貪其肉。故養物命。我貪其利。故殺物命。殺彼物命。以養我身。以活我家。我有骨肉。欲安樂無疾。彼物性命。我乃殺之。其罪無量。若能斷除屠業。此爲上也。若未能斷除。且從減省。此爲次也。若又未能。且常念阿彌陀佛。遠勝不念。次懺悔發大願云。願我見佛得道之後。盡度從生以來。一切所殺衆生。使皆生淨土。如此念念不絕。念自純熟。亦生極樂世界。若轉以化人。使更相勸化。現世則可消除惡業。身後亦福報無窮。

### 勸在風塵者

在風塵者當自念云。生爲婦人。已非善業。況我又處風塵。其業不善甚

矣。若能省悟。斷除淫業。此爲上也。如未能斷。常念阿彌陀佛。發大願云。願我惡業日消。善業日長。衣食麤足。早離此門。見佛得道之後。盡度一切因我爲淫之人。使皆生淨土。念念不絕。念自純熟。定生極樂世界。若轉以化人。使更相勸化。現世則必除災滅罪。身後亦福報無窮。

### 勸罪惡人

有罪惡人當自念云。我平生罪惡既多。一日閉眼之後。當奈之何。須急懺悔迴心。念阿彌陀佛。發大願云。願我見佛得道之後。盡度從生以來。一切所害之人。使皆生淨土。念念不絕。念自純熟。則可漸除惡業。增長善緣。定生極樂世界。若能轉此以化人。使更相勸化。非徒現世可以滅罪。身後亦福報無窮。

### 勸病苦者

殺衆生者。得命短報。隨喜殺者。得煩惱報。若病苦者。乃殺生之餘報。食肉之正報。亦惱害衆生之正報。善惡於人。如影隨形。不可免離。故疾苦者。當自責云。我以惡緣故至於此。常念阿彌陀佛。發誓願不復爲惡。不復殺生。不復惱害一切衆生。願此身早離病苦。見佛得道之後。盡度脫前生今世一切所殺之衆生。及一切冤親。使皆生淨土。念念不絕。念自純熟。定生極樂世界。若轉以化人。使更相勸化。功力勝時。善報自應。其病苦必癒。身後福報無窮。

### 勸疾惡欲爲神者

世有疾惡者。謂世間爲惡人。予力不能治。死必爲神以痛治之。而不欲生西方。按佛言神在六道中。爲墮落之數。而西方則超出六道輪迴。故修西方者。以正直慈悲爲本。見於所爲。無非慈悲。若人有罪惡。則憫其愚癡。人有困苦。則欲其濟拔。是無累於己。而於一切衆生有大良緣。

也。爲神者。以正直瞋恨爲本。見於所爲。無非瞋恨。若懲人之過。則加以疾病。治人之罪。則加以火鑊。是有害於物而於己則受爲神之福盡。以瞋恨作業。故墮地獄。自地獄出。則爲蟒蛇蠹蠹之類。無時而超脫也。昔有二僧同修行。一僧作福而多瞋。一僧常戒之不從。後多瞋者死。戒之者附客舟至江上邾亭。其廟神甚靈。能與人言。客登岸祭神。神告之曰。與汝同舟僧。可來見我。其僧往見之。神乃言曰。我是汝同修行僧。以多瞋故。墮於此爲神。其僧欲見神形。堅不肯。再三欲見。乃露一截蟒形。神又言曰。有人施絹十疋。可爲我作追薦。次於洪州西山上見我。僧如其言。果於西山上見死蟒一條。長二三里。瞋恨之報如此。且人有一心虛明。湛然如清冷之水。一起瞋恨。則若投以汙穢之物。敗其清冷甚矣。一起慈悲。則若投以沉檀之香。助其清冷亦甚矣。人何苦不爲慈悲以修西方。必欲瞋恨而墮於爲神。豈不惑哉。

## 勸軍中人

當念我輩受國家所養。其錢糧綿帛。皆自民力辛苦得之。我輩所以日食飽足。衣裝溫涼。上得以奉親老。下得以養妻兒者。皆國家之賜。皆生民之力。無事常修整兵器。馳習騎射。震軍威於可畏。消寇盜於未萌。期於國家安榮。生民休息。每日默念阿彌陀佛千聲。願冥冥中資其氣力。壯其軍容。有難則力以禦之。雖捐軀而不顧。無難則靜以鎮之。非貪功而妄殺。期於國家常安。生民常保而後已。是爲菩薩心。發爲將軍行。又能轉以勸人。使更相勸化。如是則善念純熟。福祿日增。身後必於淨土中上品生矣。

## 勸惡口者

身口意謂之三業。藏經所言果報多因口業者。以口易發也。云昔有人恨其母送飯來遲。乃云生於母腹。不如生於鹿腹。後果託生於鹿腹中。又

有人以食與之。若不如意。則云。不如與狗。後乃生爲狗頭。是皆口業果報也。所謂惡口者。乃惡怒之口。唯言語不溫和耳。今人所爲惡口。直爲穢語矣。惡口困報。固已不佳。若穢語。則地獄畜生之報也。世人多不知此。乃以惡口穢語爲常。奉勸世人。力以戒此。常念阿彌陀佛。以洗滌口業之穢惡。聞人惡口穢語。亦常念此佛名。以洗滌耳根之穢惡。願以此生念佛之善業。洗滌累世以來之穢惡。如此則善念日熟。惡業日消。又能轉以勸人。使更相勸化。則災難可消。福祿可永。身後必於淨土中上品生矣。

### 勸童男

人家生男。七歲即令入學。蓋欲曉解文義。長大成立。父母之心。莫不如是。不知人生難保。少得高年。或遇冤家。以致橫死。或與父母宿爲冤業。託生其家。惱害父母。敗壞家產。奉勸爲父母者。兒童方能言時



。即語以日念西方四聖號十聲。大慈菩薩偈一徧。及誦淨土真言。此止五十九字。甚易誦持。若日滿五百徧。或千徧。不一年二年。可足三十萬徧。自六歲誦起。七歲乃畢。不妨入學習讀。縱此生無冤惡。亦爲此大善。必消災增福。若或有之。因此持誦。遂得以免。不亦善乎。若不信此言。臨時悔之無益。孔子曰。不曰如之何。如之何者。吾末如之何也已。

### 勸室女

予見婦女。多因生產而致大病。或致身亡。此乃與其所生之子前世爲冤。故有此報。據藏經云。拔一切業障根本往生淨土真言有誦持此者。阿彌陀佛常住其頂。不令冤家爲害。現世安穩。命終任意往生。若滿二十萬徧。則菩提芽生。三十萬徧畢竟面見阿彌陀佛。奉勸爲女子時。在父母身傍。清淨少事。可日誦西方四聖號各十聲。大慈菩薩偈一徧外。日

誦此真言五百徧。或千徧。不足一年二年。可足三十萬徧。能令平生不遭產子之厄。父母若驕縱其女。或不信此言。一旦冤債相逢。以爲大厄。悔之無及。縱使其女此生無冤。在父母身傍。先誦此真言三十萬徧。種此大善根。作此大善緣。有何不可。此恩愛之甚善而大者也。可不勉哉。

### 八八兒口生蓮華

有人養一鸚鵡。俗名八八兒。見僧念佛。亦學念佛。遂捨與僧。此僧常教念阿彌陀佛。後八八兒死。僧爲小棺埋之。墓上生蓮華一朵。開棺看其根。自口中生。人爲偈云。有一飛禽八八兒。解隨僧口念阿彌。死埋平地蓮華發。我輩爲人可不知。蓋以阿彌陀佛有誓願云。衆生念我名號者。必生我國。凡言衆生者。上自天人。下至微細蟲蟻之類皆是。以此觀之。則此八八兒。必生極樂世界爲上善人矣。人而不知。人而不修。

可痛惜哉。事在潭州城外。因此而名其城門。

龍舒淨土文卷第六終



# 龍舒淨土文卷第七

宋國學進士王日休撰

參禪者多不信淨土。以爲著相。欲直指人心見性成佛。此說甚善。然此極不易。因而自誤者多矣。故今詳言參禪之弊。且引事跡爲證。與諸修行不知其要者。併舉而言之。故此卷名指迷歸要。

## 青草堂後身曾魯公

宋朝有二青草堂。在前者年九十餘。有曾家婦人。常爲齋供及布施衣物。和尚感其恩。乃言老僧與夫人作兒子。一日此婦人生子。使人看草堂。已坐化矣。所生子。即曾魯公也。以前世爲僧。常修福修慧。故少年登高科。其後作宰相。以世俗觀之。無以加矣。雖然。此亦誤也。何則。此世界富貴不長久。受盡則空。又且隨業緣去。輪迴無有了時。不如且生西方，見佛了生死大事。卻來作宰相。故雖入胞胎中受生。此一性

已不昧。所以雖在輪迴世界中。實不受輪迴。而生死去住自如矣。今未能了生死。乃念區區恩惠。爲人作子。則不脫貪愛。永在輪迴。其失計甚矣。

### 戒禪師後身東坡

五祖戒禪師。乃東坡前身。應驗不一。以前世修行。故今生聰明過人。以三毒習氣未除。故今生多緣詩語。意外受竄謫。此亦大誤也。若前世爲僧。參禪兼修西方。則必徑生淨土。成就大福大慧。何至生此世界。多受苦惱哉。聞東坡南行。唯帶阿彌陀佛一軸。人問其故。答云。此軾生西方公據也。若果如是。則東坡至此。方爲得計。亦以宿植善根。明達過人。方悟此理故也。聞魯直前世爲婦人。誦法華經。以誦經功德。故今生聰明有官職。此隨業緣來者也。若生西方。豈如是而已哉。

### 詰老後身多憂苦

有喆老者。住京師大剎。四十年不睡。坐禪精苦如此。坐化後。紙襖亦燒出舍利。中官有以三十千。買一紙襖者。以其有舍利故也。其效驗已如此。若修西方必爲不退轉地菩薩。即生死自如矣。卻來此世界濟度衆生。有何不可。不知修此。乃生大富貴處。一生多受憂苦。可哀也哉。縱使受大富貴。亦終有盡。依舊輪迴。或云。以喆老之精修。今生多受憂苦。何也。答云。佛言。假令百千劫。所作業不亡。因緣會遇時。果報還自受。永嘉大師亦云。了則業障本來空。未了應須還宿債。以喆老不曾了得生死大事。今生於大富貴處。乃前生願心也。多受憂苦者。乃因緣會遇。而還千百世之宿債也。若生西方。則宿債不須還矣。何則。生死自如。故雖入一切衆生生死界中。大作濟度。一性已不昧。而超脫三界。豈須還宿債哉。且以喆老之精修。猶不能超脫三界。豈非三界之岸極高。其苦海極深。其波濤極急。故不易超脫乎。修西方而超脫者。

仗佛力也。有佛力而不倚仗。猶窮賤餓人。見富貴者而不倚仗。哀哉。

### 古老後身耽富貴

有惠古長老。先住舒州太平。次住浙東大剎。亦名行尊宿也。死而生於宰相家。後生登高科。世固以爲榮矣。然此甚失計也。何則。前世齋戒。今世食肉。必以食肉爲美矣。前世清修。今生近色欲。必以色欲美矣。前世恬靜。今生享富貴。必以富貴爲美矣。譬如大象入泥。一步深如一步。奈之何哉。楞嚴經云。聞所聞盡。盡聞不住。覺所覺空。空覺極圓。蓋謂所聞之事盡矣。盡聞其不住也。故世間雖享快樂。其如不住何。不住則過去。過去則不能久也。又覺其所覺者。皆歸於空。空則無實矣。誠能於此空而覺之。則真覺之性極圓。而無復墜墮也。使古老而悟此理。必不生宰相家。縱未能悟明真性。且修西方以脫去輪迴可也。楞伽經謂世間修行人。如澄濁水。澄之雖清。未去濁腳。攪之復濁。古老



之謂也。如生西見佛得道。復來生此世界。則若刷去濁腳。純爲清水。雖攪之不復濁矣。故雖名行尊宿。亦不可不修西方。古老足以鑒矣。

### 西方如現受官

譬如人有一官而不受。必欲修學爲大魁。其志固美矣。然大魁不可必得。固不若且受其官。一面修學。如得大魁。則若錦上添花。若不得之。不失其爲官人。修西方者。且受官之謂也。一面修學者。兼以參禪之謂也。不得大魁者。參禪未悟之謂也。不失其爲官人者。直脫輪迴大受快樂之謂也。既生西方。見佛聞法。烏有不悟哉。故西方之說。誠不可廢。

### 三菩薩修兜率

智者十疑論云。三菩薩修兜率。一名無著。二名世親。三名師子覺。約云。先生兜率見彌勒者。即來相報。師子覺先亡。數年無報。次世親亡

。三年乃來報云。天日長。我生兜率。禮彌勒佛。聽其說法。即來相報。已三年矣。問師子覺如何。云生兜率外院。戀著天樂。即不曾見佛。且以菩薩而修兜率。猶有戀著不見佛者。此輪迴之根本。是知兜率難修有墜。非比西方易修無墜也。智者又云。有見釋迦佛而不得道者。若修西方見阿彌陀佛。無不得道者。則釋迦佛與阿彌陀佛。其願力所加。固不同矣。故大慈菩薩云。十方三世佛。阿彌陀第一。念其名號。消一切罪。遂生淨土。宜哉。

### 法華尼後身作官妓

歐陽永叔知潁州。一官妓口氣作蓮華香。有僧知宿命。言此妓前世爲尼。誦法華經三十年。一念之差。遂至於此。問妓云。曾讀法華經否。答云。失身於此。何暇誦經。與以法華。則讀誦如流。與之他經。則不能讀。以此知僧言可信矣。使此尼知西方法門。則上品上生可也。不知而

墜墮於妓。可不哀哉。以此知能用西方法門教人者。其濟拔之功大矣。  
福報豈易量哉。

龍舒淨土文卷第七終



# 龍舒淨土文卷第八

宋國學進士王日休撰

極樂世界雖去此百萬世界，論其迹則不勝其遠。然佛之慧性。含虛空世界。故無所不在。是以一切衆生舉意動步。皆在佛之性中。至心懇切。無不應驗。故此卷叙現世感應。

## 見殺生念佛得福

觀音感應記云。饒州軍典鄭鄰。死至陰府。以誤追來放還。閻羅王告云。汝還人間。勉力爲善。汝見人殺生。但念阿彌陀佛。與觀世音菩薩。彼得受生。汝亦得福。由此推之。足以見念阿彌陀佛。誠可薦拔亡者。可增延福壽。不特身後生西方而已。

## 陳企念佛卻鬼

予同邵望江陳企。嘗妄殺人。後見鬼現。企畏懼。急念阿彌陀佛。鬼不

敢近。企念佛不已。鬼遂不現。後常念佛。臨終坐化。後半年。附本家孫女名妙光云。我因念阿彌陀佛。已生極樂世界。舉動言語。一如平生。親戚相知皆來看。至兩三日。家人云。惜乎你在生時。不曾傳得喜神供養。企遂現。儼然如平生。唯面帶少顏。蓋西方長生不老。其頭如佛之螺髻。蓋成佛之漸也。望江士人周憲叔爲予言之。

### 鄒賓王念佛夢覺

予嘗勸鎮江士人鄒賓王以西方說。且言若無閒暇。但早晨合掌向西。念南無阿彌陀佛十徧。亦得。賓王信之。其夜遂夢與一士人同赴法。正恐懼間。遂念阿彌陀佛至十聲。乃覺。豈非佛以此堅其信心乎。

### 張繼祖念佛薦亡

予嘗與鎮江士人張繼祖言西方事。繼祖信之。其乳母死。多爲念阿彌陀佛追薦。一夜夢其乳母。借背子衣之。來謝繼祖而別去。此念佛追薦之

效也。

### 劉慧仲念佛安寢

予舊相識劉慧仲。湖州長興人。以夜夢多恐懼。予勸以念阿彌陀佛。慧仲至誠高聲。念一百八徧。當夜遂安寢。次日如前念誦。自此皆得安寢。以此見佛力廣。大無所不可。此予序所謂安靜形神者也。

### 阮嫂念佛眼明

予同郡懷寧縣營田庄。有阮念三嫂。患兩目將盲。常念阿彌陀佛。遂得開明。此予親見之。

### 閻羅王勸婆念佛

鎮江金壇縣株林村蔣婆。年七十許。死至陰府。命未盡當還。閻羅王問云。汝能念經否。對云不能。王云汝不能念經。但念阿彌陀佛。既放還。蔣婆謂閻羅王教我念佛。更無可疑。故常念佛名。近百二十歲方終。

其生淨土定可必矣。豈非以其念佛而又延壽乎。何其壽之多也。金壇士人張延芝爲余言之。

### 邵安撫念佛脫難

晉江邵彪。字希文。爲士人時。夢至一官府。人皆稱安撫。彪自喜曰。豈非予及第後作安撫乎。行至前。見一官員問云。汝知汝未及第因否。對云不知。令引彪去看。見一大鑊煮蛤蜊。見彪乃作人聲。呼彪姓名。彪遂念阿彌陀佛。方念一聲。蛤蜊皆變作黃雀飛去。彪後果及第。至安撫使。以此見殺生阻人前程。不可不戒。又見佛力廣大。不可不敬。官職自有定分。不可苟求。

### 念佛風疾不作

予近附舟至鎮江閘中。闕水不能行。乃於金山借四經。即阿彌陀經也。欲校勘刊板廣傳。舉筆之時。右手有風。其指自掉。寫字不便。予乃舉



指念阿彌陀佛。與觀世音菩薩數聲。禱告乞除風疾。以成就寫此經。禱畢。指遂不掉。以至終帙無恙。以此見佛與菩薩。只有目前。但人信心不至耳。

### 夢中念佛脫恐懼

予於夢寐中有恐懼時。念阿彌陀佛。與觀世音菩薩。未嘗不即安穩。或即覺醒。足以見佛與菩薩威神之速如此。但辦信心。效無不應。

### 念佛屋不壓死

有一老婦雙瞽。令小兒牽行。常念阿彌陀佛。一日。息於舊屋之下。屋忽傾倒。小兒走去。老婦在下。乃有二木相拄。護於老婦之上。得不壓死。此念佛之效也。妙定居士爲予言之。

### 念佛痼疾遂癒

有官員李子清。寄居秀州。頗好道家。嘗從學於予。前年久苦痼疾。予

告云。但恐子清不信。若信之必效。予乃授以一方。令臨發時。專念阿彌陀佛。而服此藥。子清從之。其日遂癒八分。次日復如是。遂全癒。子清由是篤信佛理。常以淨土文置於袖中。

### 念佛痼疾皆癒

梁氏女兩目俱盲。念阿彌陀佛三年。繫念不絕。雙目開明。又馮氏夫人亦念佛。久病遂癒。見第五卷。

### 繡佛舍利迸出

贛州廉中大夫恭人。繡丈六身阿彌陀佛。繡方及半。舍利迸出。其親戚鄭逢原爲予言之。

### 佛像常有舍利

真州鍾離少師宅。自任氏夫人修西方。雕阿彌陀佛像。長四寸八分。龕飾甚嚴。常頂戴行道。其像眉間常迸出舍利。大如黍米。光彩照人。出

寶珠集。

### 夢佛遂得聰辯

隋慧思禪師。因夢阿彌陀佛與之說法。其後聰辯過人。祥瑞不一。出往生傳。

### 念佛治病得癒

近年秀州一僧。常念阿彌陀佛。爲人治病。有病者請往。常得痊癒。秀州人皆能言之。

### 念佛孫兒免難

予鄉村落間有一老人。每有事。必合掌至額。念阿彌陀佛。其孫兒方二三歲。因隨母至田野。忽失之。老人尋訪不見。後數日。人告云。在溪外。果尋得之。見足跡徧於灘上。其溪甚深。不知此兒何緣過彼。又久而無恙。人以爲其祖至誠念阿彌陀佛所感也。龍舒淨土文卷第八終



# 龍舒淨土文卷第九

宋國學進士王日休撰

十六觀經云。上品上生者。讀誦大乘經典。解第一義。然則修上品者。佛之深旨。不可不知。今淺者尚不能知。況其深乎。故此卷自淺及深。切於日用者皆載焉。名曰助修上品。

## 習說

孔子化三千之徒。其要旨不出一部論語。而首以學而時習之一句。則此一句之義。豈不爲急先務哉。蓋學者。學其爲君子。爲聖人。習者。如習射習儀之習。學君子聖人者。不可驟爾而至。故必以時而漸習之。若學寬大。則於褊隘習之。若學溫和。則於忿怒時習之。若學恭敬。則於傲慢時習之。若學良善。則於狠戾時習之。若學辭讓。則於忿爭時習之。若學勤敏。則於懈怠時習之。然則所謂時習者。當其事之時而習。則

不虛習矣。其習必成。成則自有可喜。故曰不亦悅乎。能悟此理。則盡論語中所言之善。皆可以進。是知以此一句冠於一章之首者。深有意也。修西方而進乎道者。尤貴乎習。故此不可不知。

### 葛守利人說

大觀間。一官員買靴於京師市中。見一靴甚大。乃其父送葬者。問其所得之由。答云。一官員攜來修整。問何時來取。遂往候之。果見其父下馬留錢取靴。其子拜不顧。復乘馬去。修子追隨二三里許。將不及。乃呼曰。我與父生爲父子。何無一言。以教我。其父曰。學葛繁。問葛何人。曰世間人。遂訪問所在。其時爲鎮江太守。乃往見之。言其故。且問葛何以見重於幽冥如此。答云。予始者日行一利人事。其次行二事。又其次行三事。或至十事。於今四十年。未嘗一日廢。問何以利人。葛指坐間腳踏子云。若此物置之不正。則蹙人足。予爲正之。亦利人事也。

。又若人渴。予能飲以一杯水。亦利人事也。惟隨事而利之。上自卿相。下至乞丐。皆可以行。惟在乎久而不廢耳。其子拜而退。葛後以高壽坐化而去。觀此則利人之事。不可不勉。害人之事。豈可爲哉。所謂愛人利物之謂仁者。葛得之矣。葛兼修淨業。以是迴向。後有僧神遊淨土。見葛在焉。

### 施報說

儒家言施報。佛家言布施果報。其實一也。佛言。欲得穀食。當勤耕種。欲得智慧。當勤學問。欲得長壽。當勤戒殺。欲得富貴。當勤布施。布施有四。一曰財施。二曰法施。三曰無畏施。四曰心施。財施者。以財惠人。法施者。以善道教。人無畏施者。謂人及衆生當恐懼時。吾安慰之使無畏。或教以脫離恐懼。使之無畏。心施者。力雖不能濟物。常存濟物之心。佛以孝養父母。亦爲布施。是凡施於外者。皆爲布施。故

爲下而忠勤事上。爲長而仁慈安衆。爲師而謹於教導。爲友而誠於琢磨。一言一話之間。必期有益。一動一止之際。必欲無傷。種種方便利物。勿使有所損害。皆布施也。所爲如此。存心又如此。後世豈得不獲富貴之報。古語云。人人知道有來年。家家盡種來年穀。人人知道有來生。何不修取來生福。是今生所受之福。乃前世所修者。猶今歲所食之穀。乃前歲種者。人不能朝種穀而暮食。猶不能旋修福而即受。所以穀必半歲。福必隔世也。孔子謂貨惡其棄於地。不必藏於己。力惡其不出於身。不必爲己。老子謂既以爲人。己愈有。既以與人。己愈多。皆布施之謂。曾子謂出乎爾者反乎爾。老子云。天道好還。皆果報之謂。是儒道二教。皆言施報。但不言隔世爾。所謂愛人者。人皆愛之。敬人者。人常敬之。災人者。人必反災之。皆現世之施報也。知是修淨土。滋培善根多矣。



## 至人延年說

予嘗聞至人云。人生衣食財祿。陰司皆有定數。若儉約不貪。則可延壽。奢侈過求。受盡則終。譬如人有錢一千。日用一百。則可十日。日用五十。可二十日。若恣縱貪侈。立見敗亡。則若一千之數。一日用盡。可不畏哉。易稱天地之數。五十有五。所以成變化而行鬼神。是天地之大。變化之妙。鬼神之奧。猶不逃於數。況於人乎。或謂人有廉儉而命促。貪侈而壽長者。何也。廉儉而命促者。當生之數少也。若更貪侈則愈促矣。貪侈而壽長者。當生之數多也。若更廉儉。則愈長矣。且天地於人無私。何謂當生之數有多少乎。此皆前世所爲耳。故曰。要知前世因。今生受者是。唯現世多爲吉善。則增福壽。故曰神之聽之。介爾景福。現世多爲罪惡。則減福壽。故曰。多行不義。必自斃。且修淨土者。固不在福壽之多。然損福壽之事。則是薄德耳。豈可不戒哉。增福壽

之事。則是厚德耳。豈可不勉哉。

### 食肉說

佛告大慧菩薩云。有無量因緣。不應食肉。我今爲汝略說。謂一切衆生從本已來。展轉因緣常爲六親，以親想故。不應食肉。不淨氣分所生長故。不應食肉。衆生聞氣悉皆恐怖故。不應食肉。令修行者慈心不生故。不應食肉。凡愚所嗜。臭穢不淨。無善名稱故。不應食肉。令諸呪術不成就故。不應食肉。以殺生者見形起識。深味著故。不應食肉。彼食肉者。諸天所棄故。不應食肉。令口氣臭故。不應食肉。多惡夢故。不應食肉。空閑林中虎狼聞香故。不應食肉。令人飲食無節量故。不應食肉。令修行者不生厭離故。不應食肉。我常說言。凡所飲食。作食子肉想。作服藥想故。不應食肉。聽食肉者無有是處。大慧。凡諸殺者。爲財利故。殺生屠販。彼諸愚癡食肉衆生。以錢爲網。而捕諸肉。彼殺生

者。以若財物。若以鉤網。取彼空行水陸衆生。種種殺害。屠販求利。大慧亦無不教不求不想而有魚肉。以是義故。不應食肉。佛復說偈。略云。爲利殺衆生。以財網諸肉。二俱是惡業。死墮叫呼獄。若無教想求。則無三淨肉。彼非無因有。是故不應食。酒肉蔥韭蒜。悉爲聖道障。食肉無慈悲。永背正解脫。及違聖表相。是故不應食。衆生肉。本非所食之物。耳聞目見慣熟。不知其非。如能斷肉。固爲上也。如不能斷。且食三淨肉而減省。食若兼味。且去其一。如兩餐皆肉。且一餐以素。人生祿料有數。若此自可延壽。如早晨食素。其利甚多。一省業緣。二可清淨。三不妨善業。四至晚食葷時。不至厭此而欲彼。如此自可延壽。若以食素爲難。宜以食葷之費爲素食。則易行而可持久。若縱口腹之欲。亦無了期。語曰。世上欲無刀兵劫。須是衆生不食肉。斯言可不畏哉。不免食三淨肉者。次日可爲所食之肉衆生。念西方四聖號并真言。

以資薦往生。庶幾可釋怨滅罪。據閻羅王告鄭鄰之言。則至誠念四聖號以追薦者。必得往生。詳載在第八卷。三淨肉。謂不見殺。不聞殺。不疑爲己殺。及自死。鳥殘。爲五淨肉。

### 戒殺盜淫說

楞嚴經。佛謂想愛女色。心結不離。故有淫欲。則諸世間父母子孫。相生不絕。是等則以欲貪爲本。貪愛血味。心滋不止。故有食肉。則諸世間卵化濕胎。隨力強弱。遞相吞食。是等則以貪殺爲本。以人食羊。羊死爲人。人死爲羊。食餘衆生。亦復如是。死死生生。互來相噉。惡業俱生。窮未來際。若此則以盜貪爲本。汝負我命。我還汝債。以是因緣。經百千劫。常在生死。汝愛我心。我憐汝色。以是因緣。經百千劫。常在纏縛。此殺盜淫三者爲之根本。以是因緣。惡業果報相續不已。如西方淨土。愛清淨身。不因淫慾而生。食清淨食。不因殺害而得。友清

淨人。不因染著而交。是皆脫去此等。然修上品者。此等亦不可不知。

### 飲食男女說

飲食男女。人之大欲存焉。制之若無。斯爲聖人。節而不縱。可爲賢人。縱而不節。是爲下愚。蓋此二者。皆造業之所。殺生以恣口腹。非造罪而何。淫慾以喪天真。非造罪而何。況二者更相助發。因美飲食則血氣盛。血氣盛則淫慾多。淫慾多則反損血氣。血氣損則又賴飲食以滋補。是二者更相造罪也。若欲省口腹。必先節淫慾。若能節淫慾。即可省口腹。乃安生延年之道。若能節而絕之。則麤糲亦自美矣。若縱之。則人生受用之數有限。限盡則早終也。慈覺禪師云。飲食於人日月長。精麤隨分塞飢瘡。纔過三寸成何物。不用將心細較量。若能如是思省。自可省口腹矣。務實野夫云。皮包骨肉并尿糞。強作嬌嬈誑惑人。千古英雄皆坐此。百年同作一坑塵。若能如是思省。自可省淫慾矣。果了得此

二者。在生何由有疾病夭折。身後何由有地獄畜生。雖不免此。而修淨土。亦脫去輪迴。然修上品者。不可不戒此。

### 貪折前程說

有官員二人。求夢於京師二相廟中。以問前程。其夜一人夢見有一人持簿一扇。揭開版云。此汝同來之官人前程也。視之。乃自小官排至宰相。仍有勾之者。其官員問云。勾之者何也。持簿者答云。此官人愛財。世間不義取一項。此間勾一項。若急改過。尚可作監司。其人聞之。更不敢妄取財。其後果至監司。又何仙姑在世間。有一主簿家。忽有天書降。爲不識字畫。乃往見仙姑問之。仙姑設香案拜而後看。看畢微笑。主簿云。特來拜問。何故乃笑。仙姑云。天書言主簿受金十兩。折祿五年。以此觀之。不義之財。誠可畏也。移是心於淨土。其熟善緣多矣。

### 福慧說

人不可不兼修福慧。種種利物。常行方便。作一切善。戒一切惡。所謂修福也。知因果。識罪福。觀釋氏書。內明性理。觀儒家書。外明世道。所謂修慧也。修福得富貴。修慧得明了。修慧不修福。明了而窮困。修福不修慧。富貴而愚癡。福慧若兼修。富貴而明了。二者皆不修。愚癡而窮困。佛以福慧兼修。故謂之兩足尊。謂福慧兩足也。昔有二人同修行。一人專修福。一人專修慧。經數世後。專修福者。因受福而作惡。墮於象中。以有餘福。人乘之以戰。有勝敵之功。國王賜以瓔珞。其專修慧者。得阿羅漢。果以不曾修福。故爲僧而乞食。多不得之。故偈云。修福不修慧。象身掛瓔珞。修慧不修福。羅漢應供薄。此福慧所以不可不兼修也。必不得已。寧使慧勝於福。莫令福勝於慧。若慧勝於福。則知罪福而戒慎。故無墜墮。若福勝於慧。則因受福而作惡。故有墜墮。楞伽經云。受現在樂。種未來苦。是也。偈云。兼修福與慧。又復

念阿彌。九品蓮華裏。第一更何疑。齋戒明了人修者。必上品上生故也。又偈云。雖修福與慧。不知念阿彌。未得阿羅漢。輪迴無了時。在此世界修行。得阿羅漢果。方脫輪迴故也。

### 習慈說

觀世音菩薩謂萬善皆生於慈。老子言三寶以慈爲首。儒家言五常先之以仁。其意皆同。人有多瞋怒者。蓋不思此意。未言害物造業。先自損氣傷和。人若能到慈仁之境。方知瞋怒不佳。當其在瞋怒中。則不自知其苦。正如行荆棘中。趨一大廈安居之所也。方其矯宿性之瞋怒。如行荆棘中。及習成慈仁。則如入大廈安居矣。此不可以言盡。但當瞋怒時習之。久久自有可喜。釋道二教。固已戒瞋。儒家亦然。桓魋欲害孔子。孔子曷嘗瞋乎。顧倉毀鬲孟子。孟子曷嘗瞋乎。韓信不報胯下之辱。安國不怨溺灰之言。此皆可爲師法。況凡待貧下。御僕妾。詆忤己者。易



致瞋怒。尤當戒謹。蓋彼亦人也。但以薄福而事我。豈可恣其情性。而造惡業哉。究而言之。慈和者於自己大得便宜。藏經云。今生人見歡喜者。前世見人歡喜故。此慈和之所致也。修淨土者。烏可不以是爲心哉。如一切衆生爲大罪惡。亦勿生瞋。以汙吾清冷之心。念彼以愚癡故爾。使有智慧。必不爲此。當生憐憫其愚癡之心。故曾子曰。如得其情。則哀矜而勿喜。如是以修淨土。其圓熟善根甚矣。

### 爲君子說

人皆可以爲君子。而不肯爲君子。不須爲小人。而必欲爲小人。若誠信恭敬溫和方正。若推賢揚善。若隨宜利物。凡此之類。皆君子之事也。爲之亦不難者。人不肯爲何哉。若欺詐傲慢。若麤暴諂曲。若說短揚惡。若縱意害物。凡此之類。皆小人之事也。爲之又何利益。人必爲之何哉。爲君子。則人喜之。神祐之。禍患不生。福祿可永。所得多矣。雖

有時而失命也。非因君子而失。使不爲君子亦失矣。命有定分故也。爲小人。則人怨之。神怒之。禍患將至。福壽以促。所失多矣。雖有時而得命也。非因爲小人而得。使不爲小人亦得矣。命有定分故也。孔子謂不知命無以爲君子。小人不知天命。又謂得之不得曰有命。能審此理。所謂君子樂得爲君子。小人枉自小人。如是以修淨土。必不在下品生矣。

### 爲聖爲佛說

予嘗謂孔子所以爲聖人。固非一端。然其要在於三人行必有我師焉。惡者亦爲師。何適而非師乎。見識如是。烏得不爲聖人。又嘗謂釋迦佛所以爲佛者。固非一端。然其要在於山中修行時。國王出獵。問獸所在。若實告之則害獸。不實告之則妄語。沉吟未對。國王怒斫去一臂。又問。亦沉吟未對。又斫去一臂。乃發願云。我作佛時。先度此人。不使天

下人傲彼爲惡。存心如是。烏得不爲佛。後出世成佛。先度憍陳如者。乃當時國王也。能如是以修淨土。立與諸大菩薩等矣。

### 阿羅漢說

佛言。阿羅漢雖能受天人供。而福及人也劣。假使有人百年供養四天下阿羅漢。不如發菩薩心。一日供養佛。蓋佛自無量劫來救度衆生。無非得福。而福利人也。勝阿羅漢了生死。遂入涅槃。獨善其身。故福及人也劣矣。佛又言。若人有福。曾供養佛。亦勿謂供養乃身後事。近年秀州一僧。專念阿彌陀佛。爲人禱病。即得痊癒。豈可謂佛不利於生前。既可禱病。則亦可祈福。但恐信心不至耳。若修淨土期於復來化度者。尤不可無福。故此不可不知。

### 楞伽經說

楞伽經說淵源理致。除一切妄想。此一經有三譯。其十卷者太繁。四卷

者。雖達摩發揚。東坡所書。譯得太晦。難讀難曉。唯七卷者分明。修淨土欲上品上生者。須讀誦大乘經典。解第一義。故此不可不知。在四字號。

### 二天人說

華嚴經云。人生有二天人隨人。一名同生。二名同名。天人常見人。人不見天人。此二天人。豈非善惡二部童子之徒歟。人之舉意發言動步。常念此二天人見人而能無愧。如此修淨土。則必上品上生。或曰。一人尚有二天人。何天人之多也。曰。一月普現一切水。豈必月之多哉。

### 小因果說

有修橋人。有毀橋人。此天堂地獄之小因也。有坐轎人。有荷轎人。此天堂地獄之小果也。觸類長之。皆可見矣。常如是存心以修淨土。上品往生。復何疑哉。龍舒淨土文卷第九終

# 龍舒淨土文卷第十

宋國學進士王日休撰

造至深之理者。雖居濁世。與淨土何以異哉。故此卷載至深之理。名淨濁如一。然亦不可恃此而不修淨土之業。恐易涉於空談。又若參禪者之弊故也。

## 情說

喜怒好惡嗜慾皆情也。養情爲惡。縱情爲賊。折情爲善。滅情爲聖。甘其飲食。美其衣服。大其居處。若此之類。是謂養情。飲食若流。衣服盡飾。居處無厭。若此之類。是謂縱情。犯之不校。觸之不怒。傷之不怨。是謂折情。犯之觸之傷之如空。反生憐憫愚癡之心。是謂滅情。悟此理則心地常淨。如在淨土矣。

## 即是空說

佛言受即是空。受謂受苦受樂及一切受用也。如食列數味。放箸即空。出多駒從。既到即空。終日遊觀。既歸即空。又如爲善事既畢。其勤勞即空。而善業俱在。爲惡事既畢。其快意即空。而惡業俱在。若深悟此理。則可食菲薄。無過用殺害之冤債。出可隨分。無勞心若人之煩惱。遊觀可息。無放蕩廢事之愆尤。善可勉爲。無懈怠因循之失。惡可力戒。無恣縱怨讎之罪。予喜得此理。故欲與人共之。及一切受用。即所謂不苦不樂受者是也。

### 六根說

千般裝點。只爲半寸之眼。百種音樂。只爲一豆之耳。沈檀腦麝。只爲兩竅之鼻。食前方丈。只爲三寸之舌。妙麗嬌嬈。只爲臭腐之身。隨順逢迎。只爲縱恣之意。若能識破此理。便是無煩惱快樂之人。佛言。衆生無始以來。認賊爲子。自劫家寶。謂惑六根之賊而喪真性也。孟子言

。唯聖人然後可以踐形。蓋不惑於此矣。有淫女得道。文殊問云。如何不瞋。答云。見一切衆生不生。又問。如何見十八界。答云。如見劫火燒諸世界。妙哉言乎。蓋謂一切衆生本來無有。唯因妄想中生。又何瞋之有。十八界。謂六根六塵六識。因有此種種。故生無量事。造無量惡。是故如劫火燒諸世界。若悟此理。雖未生淨土。已如生淨土矣。

### 真性說

金剛經二十七段。其大意。不過言真性皆無所有。如虛空然。此虛空謂之頑空。頑空者。直無所有。而真性雖如虛空。其中則有。故曰真空不空。頑空則可以作。可以壞。若此地實掘去一尺土。則有一尺空。掘去一丈土。則有一丈空。是頑空可以作也。若此器本空。以物置之則實矣。此室本空。以物置之亦實矣。是頑空可以壞也。若真性之空。則不可作。不可壞。本來含虛空世界。烏可作乎。無始以來。至於今日未嘗變

動。烏可壞乎。真性中俱無所有無得而比。故不得已而以頑空比之。故般若心經云。是諸法空相。謂諸法皆空之相。乃真性也。繼之以空中無色。以至無智亦無得。謂真性中皆無所有。如頑空中皆無所有也。既皆無所有。然有一切衆生者。乃真性中所現之妄緣耳。大概言之。真性如鏡。一切有生者如影。是真性中所現之影也。影有去來。而鏡常自若。衆生有生滅。而真性常自若。生滅既除。真性乃現。蓋生滅者妄也。真性者真也。故楞嚴經云。諸妄消亡。不真何待。此性上自諸佛。下至蠢動含靈。初無有異。其異者皆妄也。

### 心乃妄想說

楞嚴經第一卷。佛與阿難七次論心。終之以尋常所謂心者。乃妄想耳。非真心也。真心即性也。圓覺經謂衆生妄認六塵緣影爲自心相。是尋常所謂心者。乃六種塵緣之影耳。謂此心本無。唯因外有六種塵緣。故內



現此心。若外因有色。內則起愛色之心。外因有聲。內則起愛聲之心。外因有香味觸法。內則起愛香味觸法之心。蓋真性如鏡。六種塵緣如形。此心如影。若外無此六塵。則內亦無此心矣。此心豈不爲六種塵緣之影乎。形來則影現。形去則影滅。而性鏡則常自若。故金剛經云。過去心不可得。現在心不可得。未來心不可得。此三心者皆謂妄想心也。故有過去未來現在。若真心。則無始以來。未嘗變動。烏有過去未來現在乎。不可得者謂無也。若饑而思食。得食則此心過去矣。正食而知味。乃現在心。未思食則此心未有。故爲未來心。此三心皆隨時壞滅。故云不可得。

### 五蘊皆空說

般若心經云。觀自在菩薩。照見五蘊皆空。度一切苦厄。五蘊。謂色受想行識也。色謂色身。受謂受用。想謂思想。行謂所行。識謂辨識。

此五者蘊積不散。以壅蔽真性。故謂之蘊。又謂之五陰。謂陰暗真性也。色身終歸於壞。受用隨時即過。色受豈不空乎。且如思想一物。既得之則無想矣。想豈不空乎。所行之事。迴首尚如夢幻。行豈不空乎。識盡千種事物。再生不復能識。識豈不空乎。一切苦厄。皆從五者生。若能照見色身為空。則不泥於色身而畏死亡。是度過此一種苦厄也。照見受用為空。則不泥於受用而貪奉養。又度過此一種苦厄也。照見思想為空。則不泥於思想。而意乃無所著。又度過此一種苦厄也。照見所行為空。則不泥於所行。而可以息跡。是又度過此一種苦厄也。照見辨識為空。則不泥於辨識。而可以坐忘。是又度過此一種苦厄也。故照見五蘊皆空。則度過一切苦厄。此五者皆不是真實。乃真性中所現之妄緣。若六根六塵六識十二緣四諦皆此類也。

廢心用形說

列子謂孔子廢心而用形。謂心已不著於物而廢之矣。唯用形以應物。予深愛此語。故雖勞苦憔悴而不以爲失意。榮華奉養而不以爲得意。蓋心不著於物也。因念菩薩了生死。乃託生於一切衆生中。以設教化者。以心不著於物。唯用形以應之耳。然則孔子於此。乃菩薩之儔也。

### 用形骸說

天人禮枯骨偈云。汝是前生我。我今天眼開。寶衣隨念至。玉食自然來。謝汝昔勤苦。令吾今快哉。散花時再拜。人世莫驚猜。又餓鬼鞭死屍偈云。因這臭皮囊。波波劫劫忙。只知貪快樂。不肯暫迴光。白業鎚銖少。黃泉歲月長。直須痛棒打。此恨猝難忘。此言化俗則可。以爲誠然則不可。何則。人神託於形骸之中。所以用形骸者皆神也。譬如匠人用斧斤。用之而善。則爲善器械。用之不善。則爲惡器械。故爲天人者。前世善用形骸者也。餓鬼者。前世不善用形骸者也。其得其失。皆在當

時。及其受報。而禮之鞭之亦何益。

### 齊生死說

想右腳大指腫爛流惡水。漸漸爛至脛。至膝。至腰。左腳。亦如此。漸漸爛過腰上。至腹。至胸。以至頸頂。盡皆爛了。唯有白骨。次分明歷歷觀看白骨。一一盡見。靜心觀看良久。乃思觀白骨者是誰。白骨是誰。是知身體與我常爲二物矣。又漸漸離白骨觀看。先離一丈。以至五丈十丈。乃至百丈千丈。是知白骨與我不相干也。常作此想。則我與形骸本爲二物。我暫住於形骸中。豈可謂此形骸終久不壞。而我常住其中。如此便可齊死生矣。況我去此則往淨土乎。日日作此想。更別有所得。如人飲水。冷熱自知。不假於言傳也。

### 我說

物之所在。不可以無我。無我則逐物矣。理之所在。不可以有我。有我

則蔽理矣。孔子毋我。菩薩無我相。能至於此。則與虛空等矣。豈復有淨濁之辨哉。但恐不易到耳。

龍舒淨土文卷第十終



## 附錄 淨土指導

林俠菴編述

△導師阿彌陀佛。於往劫中。發四十八願度脫衆生。第十八願云。設我得佛。十方衆生。至心信樂。欲生我國。乃至十念。若不生者。不取正覺。唯除五逆。誹謗正法。第十九願云。設我得佛。十方衆生。發菩提心。修諸功德。至心發願。欲生我國。臨壽終時。假令不與大衆圍繞。現其人前者。不取正覺。第二十願云。設我得佛。十方衆生。聞我名號。繫念我國。植衆德本。至心迴向。欲生我國。不果遂者。不取正覺。阿彌陀佛。誓願度生。若衆生不求接引。佛亦無可奈何。倘志心稱名。誓求出離娑婆者。無一不蒙垂慈攝受。往生極樂國土。△釋迦世尊說。從是西方。過十萬億佛土。有世界名曰極樂。其土有佛。號阿彌陀。今現在說法。又云。彼土何故名爲極樂。其國衆生。無有衆苦。但受諸樂。故名極樂。又云。若有善男子。善女人。聞說阿

彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖衆。現在其前。是人終時。心不顛倒。即得往生阿彌陀佛極樂國土。

△觀世音菩薩大悲心陀羅尼經云。稱我本師阿彌陀佛。常須供養。專稱名號。得無量福。滅無量罪。命終往生阿彌陀佛國。如來授手。摩頂告言。汝莫恐怖。來生我國。

△大勢至菩薩說。十方如來。憐念衆生。如母憶子。若子逃逝。雖億何爲。子若憶母。如母憶時。母子歷生。不相違遠。若衆生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰。香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯爲第一。



△淨土聖賢錄說。唐法照大師。蒙文殊師利菩薩威神力。攝入五台聖境。照見作禮。諸問修行要道。文殊告曰。汝今念佛。今正是時。諸修行門。無過念佛。供養三寶。福慧雙修。此之二門。最多善要。我於過去劫中。因觀佛故。因念佛故。因供養故。得一切種智。是故一切諸法。般若波羅蜜。甚深禪定。乃至諸佛。皆從念佛而生。故知念佛。是諸法之王。照問。當云何念。文殊言。此世界西。有阿彌陀佛。彼佛願力。不可思議。汝當憶念。勿令間斷。命終決定往生。永不退轉。語已。舒金色臂。摩照頂曰。汝念佛故。不久當證無上菩提。照授記矣。歡喜作禮而退。

△蓮池大師說。念佛者。有默持。有高聲持。有金剛持。然高聲覺費力。默念易昏沉。只是綿綿密密。聲在於唇齒之間。乃謂金剛持。又不可執定。或覺費力。則不防默持。或復昏沉。則不防高聲。雜念是病。

。念佛是藥。念佛正治雜念。而不能治者。因念佛不親切也。雜念起時。即用心加工念。字字句句。精一不二。雜念自息矣。

△徹悟大師說。真爲生死。發菩提心。以深信願。持佛名號。此十六字。爲念佛一大綱宗。一切行門之中。求其最易下手最易成就。至極穩當。至極圓頓者。則無如以深信願。持佛名號矣。所謂執持名號者。即拳拳服膺之謂。謂牢持於心。而不暫忘也。稍或一念間斷。則非執持也。稍或一念夾雜。則非執持也。念念相續。無雜無間。是真精進。精進不已。則漸入一心不亂。圓成淨業一心不亂。乃淨業之歸宿。淨土之大門。未入此門。終非穩妥。學者可不勉哉。○一真爲生死。發菩提心。是學道之通途。二以深信願。持佛名號。爲淨土正宗。三以攝心專注而念。爲下手方便。四以折伏現行煩惱。爲修心要務。五以專持四重律儀。爲入道根本。六以種種苦行。爲修道助緣。七以一

心不亂。爲淨土歸宿。八以種種靈瑞。爲往生驗證。以上八事。各宜痛講。修淨業者。不可不知。

△善導大師說。大聖悲憐。直勸專稱名字者。正由稱名易故。相續即生。若能念念相續。畢命爲期者。十即十生。百即百生。何以故。無雜緣。得正念故。與佛本願相應故。不違教故。順佛語故。若捨專念。修雜念者。百中希得一二。千中希得三四。○凡人臨終。須不得怕死。常念此身。多苦不淨。若得捨此幻身。超生善道。乃是稱意之事。○凡有疾病。但念無常。一心待死。囑看病問候人。凡來我前。爲我念佛。不得說眼前閒雜之話。若病重將終之際。不許有人哭泣。但同聲念佛。待氣盡方可舉哀。若得明解淨行之人。頻來策勵。實爲大幸。用此法者。決定往生。○凡臨睡時。觀西方勝境。或觀阿彌陀佛。相好光明。不得雜語雜想。亦不得求見瑞相。但辦專心。自有見時。

或但稱佛號而睡。行者專取一法。不得雜用。務在久遠行之。必於淨土。功不唐捐也。

△覺明妙行菩薩說。心本無念。念逐想生。此想虛妄。流轉生死。當知此一句阿彌陀佛。不從想生。不從念有。不著內外。無有相貌。即是盡諸妄想。與佛法身。非一非異。不可分別。如是念者。無煩惱塵勞。無斷無縛。止是一心。必得一心。方得名為執持佛號。方得名為一心不亂。○念佛不能一心者。但息想定慮。徐徐念去。要使聲合乎心。心合乎聲。念久自得諸念澄清。心境絕照。證入念佛三昧。偈曰。少說一句話。多念一句佛。打得念頭死。許汝法身活。○念佛預先當發大願。願生極樂。然後至誠懇切。稱於阿彌陀佛。必使聲緣於心。心緣於聲。聲心相依。久久不失。則入憶念三昧。

△紫柏大師說。念佛心真不真。勘驗關頭。只在歡喜煩惱處取證。其真

假之心。歷然可辨。大抵真心念佛人。於歡喜煩惱中。必然念念不間斷。是以煩惱也動他不得。歡喜也動他不得。二者既不能動。生死境上。自然不驚怖。今人念佛。此小喜怒到前。阿彌陀佛便拋在腦後矣。如何能得念佛靈驗。若依我念佛。能於僧愛關頭。不昧此一句阿彌陀佛。而現前日用。不能受用。臨終不得生西方者。我舌根必然破爛。若不依我法行。則念佛無靈驗。過在於汝。與我無干。○又問學者云。汝念佛常間斷否。答。合眼睡時。便忘記了。師震威呵曰。合眼便忘。如此念佛一萬年也莫幹。汝自今以後。直須睡夢中。念佛不斷。乃有出苦分。若睡夢中。不能念佛。忘記了。一開眼時。就痛哭起來。直向佛前叩頭懺悔。或念千聲或念萬聲。盡自家力量便罷。如此做三二十翻。自然大昏睡中。佛即不斷矣。

△截流大師說。念佛貴在一心不亂。無間無雜。非必以快念多念爲勝也

。但不緩不急。密密持名。使心中佛號。歷歷分明。著衣喫飯。行住坐臥。一句洪名。綿密不斷。猶如呼吸相似。既不散亂。亦不沉沒。如是持名。可謂事上能一心精進者也。

△印光大師說。念佛用功。最妙之方法。是都攝六根。淨念相繼。都攝六根者。即是念佛之心專注於佛名號。即攝意根。口須念得清清楚楚。即攝舌根。耳須聽得清清楚楚。即攝耳根。此三根攝於佛號。則眼決不會亂視。念佛時眼宜垂簾。不可睜大。眼既攝矣。鼻也不會亂嗅。則鼻亦攝矣。身須恭敬。則身亦攝矣。六根既攝而不散。則心無妄念。唯佛是念。方為淨念。六根不攝。雖則念佛。心中仍然妄想紛飛。難得實益。若能常都攝六根而念是名淨念相繼。能常常淨念相繼。則一心不亂。與念佛三昧。均可漸得矣。○欲心不貪外事。專念佛。不能專。要他專。不能念。要他念。不能一心。要他一心。亦無奇特奧

妙法則。但將一箇死字。貼在額顱上。掛在眉毛上。心常念曰。我某人。從無始來。直至今生。所作惡業。無量無邊。假使惡業有體相者。盡虛空界。不能容受。宿生何幸。今得人身。又聞佛法。若不一心念佛。求生西方。一氣不來。定向地獄鑊湯炭劍樹刀山裏受苦。不知經幾多劫。雖欲出離。未由也已。○念佛心不歸一。當攝心切念。自能歸一。攝心之法。莫先於至誠懇切。心不至誠。欲攝莫由。既至誠已。猶未純一。當攝耳諦聽。無論出聲默念。皆須念從心起。聲從口出。音從耳入。心口念得清清楚楚。耳根聽得清淨楚楚。如是攝心妄念自息矣。○所謂十念記數者。當念佛時。從一句至十句。須念得分明。仍須記得分明。至十句已。又從一句至十句。不可二十三。隨念隨記。不可掐珠。唯憑心記。若十句直記爲難。可分爲兩氣。則從一至五。從六至十。作兩氣念。念得清楚。記得清楚。聽得清楚。妄

念無從著腳。一心不亂。久當自得耳。

△道需大師說。念佛須信憶兩字。不離於心。稱敬二字。不離於口。謂往生淨土。須要有信。千信即千生。萬信即萬生。信佛名字。不離心口。諸佛即救。諸佛即度。心常憶佛。口常稱佛。心常敬佛。始名深信。○念佛務使字字分明。句句相續。蓋不分明。即是昏。不相續即是散。一句佛號。歷歷現前。久之自然成就念佛三昧也。

△悟開大師說。開眼念佛。心易散動。可閉目念。當念佛時。將心放空。提起佛號。即念即聽。即聽即念。綿綿密密。行之久久。必有相應時也。但要字字從念頭上著實。句句從求生西方裏出來。更有繫念一法。在不念佛時。將念頭常掛在阿彌陀佛身上。心常清淨。不動不搖。便是得力處。

△妙空大師說。念佛之人。勿雜惡念。於必經之事。一過即捨。久之意



地清淨。過事即有妙智觀察。此乃念佛。轉識成智之謂也。○所謂隨順持名者。昏沉則經行持。散亂則端坐持。或跪或立或坐。皆隨己便。總使一句佛號不忘。此乃降伏心魔之要術也。○病者死之機也。死者凡聖淨穢之關也。病中當作死想。勤念佛名。決定待死。必有光明接引。往生西方。遂我往生之願。若於病中。略一停念。則一切愛戀恐怖。煩惱安排。種種雜念。一齊現前。生死關頭。如何濟事。若病危時。但記取阿彌陀佛四字。於心勿忘可也。左右侍奉之人。亦宜將此四字。頻頻提醒。當知百劫千生。所有錯走之路。全在此時一念。斷得清楚。何以故。六道輪迴。皆一念為主。若一念在佛。則形雖敗壞。而神不散亂。即隨一念而往生淨土矣。嗚呼。但記取阿彌陀佛四字於心勿忘可也。

△弘一大師說。古詩云。我見他人死。我心熱如火。非是熱他人。看看

輪到我。人生最後一段大事。豈可須臾忘耶。今爲講述。如下所列。當病重時。應將一切家事。及自身體悉皆放下。專一念佛。一心希冀往生西方。能如是者。如壽已盡。決定往生。如壽未盡。雖求往生而病反能速癒。因心專誠。故能滅除宿世惡業也。倘不如是放下一切專一念佛者。如壽已盡。決定不能往生。因自己專求病癒。不求往生。無由往生故。如壽未盡。因其一心希冀病癒。妄生憂怖。不但不能速癒。反更增加病苦耳。○病未重時。亦可服藥。但乃須精進念佛。勿作服藥癒病之想。病已重時。可以不服藥也。余昔臥病石室。有勸延醫服藥者。說偈謝云。阿彌陀佛。無上醫王。捨此不求。是謂癡狂。一句彌陀。阿伽陀藥。捨此不服。是謂大錯。因早日既信淨土法門。諄諄爲人講說。今日患病。何反捨此而求醫藥。可不謂爲癡狂大錯取。○若病重時。痛苦甚劇者。切勿驚惶。因此病苦。乃宿世業障。或

亦是轉未來三途惡道之苦。於今生輕受。以速了償也。○自己所有衣服諸物。宜於病重之時。即施他人。若依地藏菩薩本願經如來讚歎品所言供養經像等。則彌善矣。○若病重時。神識猶清。應請善知識爲之說法。盡力安慰。舉病者今生所脩善業。一一詳言而讚歎之。令病者心生歡喜。無有疑慮。自知命終之後。承斯善業。決定生西。○臨終之際。切勿詢問遺囑。亦勿閒談雜話。恐被牽動愛情。貪戀世間。有礙往生耳。若欲留遺囑者。應於健康時書寫。付人保藏。○倘自言欲沐浴更衣者。則可順其所欲而試爲之。若言不欲。或噤口不能者。皆不須強爲。因常人命終之時。身體不免痛苦。倘強爲移勸沐浴更衣。則痛苦更當加劇。世有發願往生之人。臨終爲眷屬等移動擾亂。破壞其正念。遂至往不能往生者。甚多甚多。又有臨終可生善道。乃爲他人誤觸。遂起瞋心。而牽入惡道者。如經所載。阿耨達王死墮蛇身

。豈不可畏。○臨終時。或坐或臥。皆隨其意。未宜勉強。若自覺氣力衰弱者。僅可臥床。勿求好看。勉強坐起。臥時。本應面西右脅側臥。若因身體痛苦。改爲仰臥或面東左脅側臥者。亦任其自然。不可強制。○大衆助念佛時。應請阿彌陀佛接引像。供於病人臥室。令彼瞻視。○助念之人。多少不拘。人多者。宜輪班念。相續不斷。或念六字。或念四字。或快或慢。皆須預問病人。隨其平日習慣及好樂者念之。病人乃能相隨默念。今見助念者皆隨己意。不問病人。既已違其平日習慣及好樂。何能相隨默念。余願自今以後。凡任助念者。於此一事切宜留意。○尋常助念者。皆用引磬及小木魚。以余經驗言之。神經衰弱者。病時甚畏引磬及小木魚聲。因其聲尖銳。刺激神經。反令心神不寧。若依余意。應免除引磬小木魚。僅用音聲助念。最爲妥當。或改爲擊大鐘大磬大木魚其聲宏壯。聞者能起肅敬之念。實勝

於引磬小木魚也。但人之所好。各有不同。此事必須預先向病人詳細問明。隨其所好而試行之。或有未宜。儘可隨時改變。萬勿固執。○既已命終。最切要者。不可急忙移動。雖身染便穢。亦勿急爲洗滌。必須經過八小時後。乃能浴身更衣。常人皆不注意此事。而最要緊。惟願廣勸同人。依此謹慎行之。○命終前後。家人萬不可哭。哭有何益。能盡力幫助念佛。乃於亡者有實益耳。若必欲哭者。須俟命終八小時後。○頂門溫暖之說。雖有所據。然亦不可固執。但能平時信願真切。臨終正念分明者。即可證其往生。○命終之後。念佛已畢。即鎖房門。深防他人入內。誤觸亡者。必須經過八小時後。乃能浴身更衣。前文已言，今再諄囑切記切記。因八小時內。若移動者。亡人雖不能言。亦覺痛苦。○八小時後著衣。若手足關節硬。不能轉動者。應以熱水淋洗。用布攪熱水。圍於臂肘膝灣。不久即可活動。猶如生人。○凡念佛等一切

功德。皆宜迴向。普及法界衆生。則其功德乃能廣大。而亡者所獲利益。亦更因之增長。○吾人臨命終時。乃是一生之臘月三十日。爲人生最後。若未將往生資糧預備妥穩。必致手忙足亂。呼爺叫娘。多生惡業一齊現前。如何擺脫。臨終雖恃他人助念。諸事如法。但自己亦須平日修持。乃可臨終自在。奉勸諸仁者。總要及早預備才好。

### △淨土雜詠

修途十萬一毫端。何謂西方路渺漫。佛境不從心外見。真容多在定中觀。古溪禪師

西方故國早回還。人命無常呼吸間。有限光陰當愛惜。今生蹉過出頭難。一元禪師

千劫升沈事可嗟。須彌散骨亂如麻。於今始覺知慚愧。淚眼晨昏只憶家。蓮侶居士

最怕臨終神識迷。舌根堅硬氣難提。若非平日心專一。那得資糧助往西。西一居士

靜觀深時落日斜。了知極樂路非賒。十年浪子無歸處。一念迴光便是家。蘭臺居士

輾轉因緣十二支。塵沙劫數了何時。空王路下勤稽首。雙淚潛流不自知。樂園居士

(註：空王即指阿彌陀佛)

稱一弘名哭一聲。聲聲哭向大慈尊。此回若不歸家去。六道何時得脫身。慈西大師  
說著無常事事輕。饑餐渴飲懶經營。一心不退思安養。萬善同歸憶永明。楚石老人  
說著蓮邦兩淚垂。閻浮苦趣實堪悲。世間出世思惟遍。不念彌陀更念誰。夢東大師  
念念彌陀休背覺。心心極樂欲還鄉。何時得受清虛體。壽極河沙不可量。省庵大師  
六時叩問黃金父。赤子飄零幾日歸。話到輪迴無盡處。相看不覺淚沾衣。中峯國師  
暫居此地非吾土。遙憶西方是我家。極樂人民無量壽。不將日月計年華。實賢大師  
船上西來望故鄉。寶華池上晚風涼。飄零不耐歸心切。一片輕旛挂夕陽。明本禪師  
夜長易得還鄉夢。藏暮難忘作客情。十萬億程安養國。寸心耿耿掛長庚。思齊老人  
深宵倚檻窺殘月。薄暮推窗望夕陽。客路踟躕久漂泊。苦求佛力早還鄉。寸香齋主  
生死輪迴望攝提。心酸徹腑痛沉迷。回家不待蓮花放。先送神歸落日西。昱山法師  
人生百歲七旬稀。往事回觀盡覺非。每哭同流何處去。閒拋淨土不思歸。梵琦禪師

日夜思歸未得歸。天涯客子夢魂飛。覺來何處雁聲過。望斷故鄉書信稀。楚石老人  
白露秋分涼透窗。客途遊子憶蓮邦。慈尊何日垂金臂。一片歸心夢不忘。昱山法師  
六道輪迴佛悲憐。特開方便念佛門。都攝六根淨念繼。命終生西是真言。無名居士  
娑婆八苦實堪悲。修行念佛求出離。願我命終生極樂。喜能帶業往生西。無名居士



## 論飭終念佛助生之重要

人生大事。莫過於生死。念佛助生。關仰至巨。蓋一息不來。便屬後世。一念差錯。便墮輪迴。故臨終正念。爲念佛人往生極樂最要關頭。夫人臨命終時。四大分張。衆苦畢集。若非三昧久證。誠恐不易得之。況眷屬不明利害。往往以世情而破壞彼之正念。此飭終念佛助生之應早爲提倡也。助念云者。即助往生之謂也。蓋以行人當此時節。得人開導而輔助之。則欣厭心生。貪愛情息。耳聞佛名。心緣佛境。自可與佛感應道交。蒙佛接引。往生西方。譬如怯弱之人。欲登高山。前有牽者。後有推者。左右有扶掖將護者。自不至半途而廢耳。即使平素不聞佛法之人。臨終蒙善知識開導。令生信心。又爲助念佛號。令彼隨大衆音聲。或出聲念。或心中默念。果能如法助念。無一破壞正念。亦可往生。以佛力不可思議。法力不可思議。心力不可思議。故得此殊勝利益也。須

知飭終念佛助人往生。關係最大。我今日爲他人助念。則他日人亦爲我助念可得互助之益。彼人因我助念故。得生西方。他日以此善因緣故。彼人當從西方侍佛來迎。助我得力。善莫大焉。普願大眾同知此義。同依此行。同生極樂。同見彌陀。如是切禱也已。

林俠菴謹識

## 發願文

三寶弟子某甲等。誠意倡印龍舒淨土文。廣宣流布。闡提淨土。伏念我等從無始來。迷本淨心。隨業流轉。六道輪迴。受苦無窮。雖得人身。去佛遙遠。縱發道心。或進或退。皆由無明薰習。不自覺知。任貪瞋癡。障戒定慧。雖知念佛。資糧未具。西方勝境。難得現前。今我等發願懺悔痛念世間諸有爲法。虛妄不實。深知苦空無常無我。不生貪著。慧眼開明。勤修淨業。期得正信正願正行。時時俱足。專念阿彌陀佛萬德洪名。速獲一心。於此法中。圓悟無量法門。圓證無生法忍。圓轉無礙法輪。圓度無邊衆生。願我等臨終無障礙。阿彌陀佛遠相迎。觀音甘靈灑吾頭。勢至金臺安我足。一剎那中離五濁。屈伸臂頃到蓮池。蓮華開後見慈尊。

。親聽法音可了了。聞已即悟無生忍。不違安養入娑婆。善知方便度衆生。巧把塵勞爲佛事。我願如斯佛自知。畢竟當來得成就。

## 語錄

法照入竹林寺傳◎◎唐釋法照。不知何許人。大曆二年。棲止衡州雲峰寺。勤修不懈。於僧堂內粥鉢中。忽睹五彩祥雲。雲內現山寺。寺之東北五十里已來。有山。山下有澗。澗北有石門。入可五里。有寺。金榜題云。大聖竹林寺。雖目擊分明。而心懷隕穫。他日齋時。還於鉢中五色雲內。現其五臺諸寺。盡是金地。無有山林穢惡。純是池臺樓觀。衆寶莊嚴。文殊一萬聖衆而處其中。又現諸佛淨國。食畢方滅。心疑未決。歸院問僧。有曾遊五臺山已否。時有嘉延曇暉二師言。曾到。言與鉢內所見。一皆符合。然尚未得臺山消息。暨四年夏。於衡州湖東寺。內有高樓臺。九旬起五會念佛道場。六月二日未時。遙見祥雲彌覆臺寺。雲中有諸樓閣。閣中有數梵僧。各長丈許。執錫行道。衡州舉郭咸見彌陀佛。與文殊普賢一萬菩薩。俱在此會。其身高大。見之者皆深泣血設

禮。至酉方滅。照其日晚。於道場外。遇一老人告照云。師先發願往金色世界。奉覲大聖。今何不去。照怪而答曰。時難路艱。何可往也。老人言。但亟去。道路固無留難。言訖不見。照驚入道場。重發誠願。夏滿約往前。任是火聚冰河。終無退衄。至八月十三日。於南嶽與同志數人。惠然肯來。果無阻礙。則五年四月五日到五臺縣。遙見佛光寺南。數道白光。六日到佛光寺。果如鉢中所見。略無差脫。其夜四更。見一道光。從北山下來射照。照忙入堂內。乃問衆云。此何祥也。吉凶焉在。有僧答言。此大聖不思議光。常答有緣。照聞已。即具威儀。尋光至寺東北五十里間。果有山。山下有澗。澗北有一石門。見二青衣。可年八九歲。顏貌端正。立於門首。一稱善財。二曰難陀。相見歡喜。問訊設禮。引照入門。向北行五里已來。見一金門樓。漸至門所。乃是一寺。寺前有大金榜。題曰。大聖竹林寺。一如鉢中所見者。方圓可二十里。

· 一百二十院。皆有寶塔莊嚴。其地純是黃金。流渠華樹。充滿其中。照入寺。至講堂中。見文殊在西。普賢在東。各據師子之座。說法之音。歷歷可聽。文殊左右菩薩萬餘。普賢亦無數菩薩圍繞。照至二聖前作禮問言。末代凡夫。去聖時遙。知識轉劣。垢障尤深。佛性無由顯現。佛法浩瀚。未審修行於何法門。最爲其要。唯願大聖。斷我疑網。文殊報言。汝今念佛。今正是時。諸修行門。無過念佛。供養三寶。福慧雙修。此之二門。最爲徑要。所以者何。我於過去劫中。因觀佛故。因念佛故。因供養故。今得一切種智。是故一切諸法。般若波羅蜜。甚深禪定。乃至諸佛。皆從念佛而生。故知念佛。諸法之王。汝當常念無上法王。令無休息。照又問。當云何念。文殊言。此世界西。有阿彌陀佛。彼佛願力不可思議。汝當繼念。令無間斷。命終之後。決定往生。永不退轉。說是語已。時二大聖。各舒金手摩照頂。爲授記莢。汝以念佛故

·不久證無上正等菩提。若善男女等·願疾成佛者·無過念佛·則能速證無上菩提。語已·時二大聖·互說伽陀<sub>讚美也</sub>。照聞已·歡喜踴躍·疑網悉除·又更作禮·禮已合掌。文殊言·汝可往詣諸菩薩院·次第巡禮·受教已·次第瞻禮·遂至七寶果園·其果纔熟·其大如鉢·便取食之·食已·身意泰然·到大聖前·作禮辭退·還見二青衣·送至門外·禮已·舉頭遂失所在·倍增悲感。乃立石記·至今存焉。復至四月八日·於華嚴寺西樓下安止。洎十三日·照與五十餘僧·同往金剛窟·到無著見大聖處·虔心禮三十五佛名。照禮纔十徧·忽見其處廣博嚴淨·琉璃宮殿·文殊普賢一萬菩薩·及佛陀波利·居在一處·照見已·惟自慶喜·隨衆歸寺。其夜三更·於華嚴院西樓上·忽見寺東山半有五聖燈·其大方尺餘。照咒言·請分百燈歸一畔·便分如願。重謂分爲千炬·言訖便分千數·行行相對·徧於山半。又更獨詣金剛窟所·願見大聖。三更



盡到。見梵僧。稱是佛陀波利。引之入聖寺。語在覺護傳即佛陀波利傳。至十二月初。遂於華嚴寺華嚴院。入念佛道場。絕粒要期。誓生淨土。至於七日初夜。正念佛時。又見一梵僧入乎道場。告云。汝所見臺山境界。何故不說。言訖不見。照疑此僧。亦擬不說。翌日申時。正念誦次。又見一梵僧。年可八十。乃語照曰。師所見臺山靈異。何不流布。普示衆生。令使見聞。發菩提心。獲大利樂乎。照曰。實無心祕蔽聖道。恐生疑謗故。所以不說。僧云。大聖文殊。現在此山。尚招人謗。況汝所見境界。但使衆生見聞之者。發菩提心。作毒鼓緣耳。照聞斯語。便隨憶念錄之。時江東釋慧從。以大曆六年正月內。與華嚴寺崇暉明謙等三十餘人。隨照至金剛窟所。親示般若院立石標記。於時徒衆。誠心瞻仰。悲喜未已。遂聞鐘聲。其音雅亮。節解分明。衆皆聞之。驚異尤甚。驗乎所見不虛。故書於屋壁。普使見聞。同發勝心。共期佛慧。自後。照又

依所見化竹林寺題額處。建寺一區。莊嚴精麗。便號竹林焉。又大曆十二年九月十三日。照與弟子八人。於東臺覩白光數次。有異雲靉靄。雲開見五色通身光。光內有圓光紅色。文殊乘青毛師子。衆皆明見。乃霏微下雪。及五色圓光。徧於山谷。其同見弟子純一。惟秀。歸政。智遠。沙彌惟英。優婆塞張希俊等。照後篤鞏其心。修鍊無曠。不知其終。絳州兵掾王士詹。述聖寺記云。

清徹悟禪師 撰述

夢東禪師遺集

佛陀教育基金會 印贈



## 徹悟禪師行略

師諱際醒·字徹悟·一字訥堂·又號夢東·京東豐潤縣人·族姓馬·父諱萬璋·母高氏·師幼而穎異·長喜讀書·經史羣籍·靡弗采覽·二十二歲·因大病·悟幻質無常·發出世志·病已·至房山縣·投三聖庵榮池老宿剃髮·越明年·詣岫雲寺恆實律師圓具·次年聞香界寺隆一法師開演圓覺·師與會焉·晨夕研詰·精求奧義·遂悟圓覺全經大旨·復依增壽寺慧岸法師·聽講相宗·妙得其要·後歷心華寺徧空法師座下·聽法華楞嚴金剛等經·圓解頓開·于性相二宗·三觀十乘之旨·了無滯礙·乾隆三十三年冬·參廣通粹如純翁·明向上事·師資道合·乃印心焉·是爲臨濟三十六世·磐石七世也·三十八年·粹翁遷萬壽寺·師繼席廣通·率衆參禪·策勵後學·津津不倦·十四年如一日·聲馳南北·宗

風大振。每憶永明延壽禪師。乃禪門宗匠。尚歸心淨土。日課十萬彌陀。期生安養。況今末代。尤宜遵承。遂棲心淨土。主張蓮宗。日限尺香。晤客。過此惟禮拜持念而已。五十七年。遷覺生寺。住持八年。百廢盡舉。于淨業堂外。別立三堂。曰涅槃。曰安養。曰學士。俾老病者有所依託。初學者便于誦習。師于禪淨宗旨。皆深造其奧。律已甚嚴。望人甚切。開導說法。如瓶瀉雲興。與衆精修。蓮風大扇。遐邇仰化。道俗歸心。當時法門爲第一人。嘉慶五年。退居紅螺山資福寺。以期終歲。柰因衲子依戀追隨。致難避迹。師爲法爲人。心終無厭。遂復留衆。俄成叢席。擔柴運水。泥壁補屋。一飲一食。與衆共之。如是者又十年。十五年二月。詣萬壽寺掃粹祖塔。辭諸山外護。囑曰。幻緣不久。人世非常。虛生可惜。各宜努力念佛。他年淨土好相見也。三月還山。命豫辦茶毘事物。十月十七日。集衆付院務。命弟子松泉領衆主持。誠曰。

念佛法門。三根普被。無機不收。吾數年來。與衆苦心建此道場。本爲接待方來。同修淨業。凡吾所立規模。永宜遵守。不得改絃易轍。庶不負老僧與衆一片苦心也。臨示寂半月前。覺身微病。命大衆助稱佛號。見虛空中幢幡無數。自西而來。乃告衆曰。淨土相現。吾將西歸矣。衆以住世相勸。師曰。百年如寄。終有所歸。吾得臻聖境。汝等當爲師幸。何苦留耶。十二月十六日。命監院師貫一。設涅槃齋。十七日申刻。告衆曰。吾昨已見文殊觀音勢至三大士。今復蒙佛親垂接引。吾今去矣。衆稱佛號愈勵。師面西端坐合掌曰。稱一聲洪名。見一分相好。遂手結彌陀印。安詳而逝。衆聞異香浮空。供奉七日。面貌如生。慈和豐滿。髮白變黑。光潤異常。二七八龕。三七茶毘。獲舍利百餘粒。門弟子遵遺命。請靈骨葬于普同塔內。師生于乾隆六年十月十四日未時。終于嘉慶十五年十二月十七日申時。世壽七十。僧臘四十九。法臘四十有三。

。所著有示禪教律念佛伽陀行于世。嘉慶十七年壬申九月既望。有師之弟子惺聰者。持師之行實。請敍于余。余與師相契有年。素蒙開誨。啟迪良多。師真過量人也。六根通利。解悟超常。既具辯才。兼持苦行。始終如一。余所目覩。故此錄不容一字假飾。愧余不文。特質言之。以傳信云爾。拈花寺慕蓮杜多體寬申敬敍



# 夢東禪師遺集

徹悟禪師行略……………一

目錄……………五

原 鈔……………九

自 鈔……………十一

重刻鈔……………十四

## 卷 上

法語 示衆……………一

## 卷 中

雜著 般若淨土兩門大義……………四九

西有解……………五〇

相相離相心心印心略解……………五二

華嚴經節略要旨……………五二

楞嚴二決定義……………五六

楞嚴頓歇漸修說……………五七

楞嚴經知見無見說……………五八

金剛經實無有法發菩提心說……………五九

一乘決疑論說……………五九

禮佛說……………六〇

紅螺普陀塔說……………六一

個菴老人生塔說……………六二

闡教禪師塔銘……………六三

重修中天寺十方常住碑記……………六六

壽萬壽蓮筏和尚序……………六九

淨土津梁跋……………七〇

跋德全禪人血書蓮經……………七二

跋明初禪人血書蓮經……………七三

跋禪人勇建血書楞嚴經莊嚴淨土……………七四

書蓮經普門品後……………七六

二有室跋……………七六

覆香嚴居士書……………七七

答江南彭二林居士書	七九	本然安老宿像讚	九二
與瑞一李居士書	七九	個菴老人像讚	九三
尺香齋白詞	八〇	法空寶耆宿像	九四
款待白詞	八一	偈頌 念佛伽陀 教義百偈	九五
衣單疏	八一	宗乘百偈	一〇三
資福寺講前提綱	八二	念佛偈	一一三
為均伯老和尚入塔	八五	示衆偈六首	一一八
慈壽寺熏塔	八六	講圓覺經畢示衆偈七首	一二〇
得戒和尚塔前供	八七	覆講大義八首	一二〇
讚 念佛堂釋迦佛像	八八	解制示衆偈	一二一
阿彌陀佛像	八八	我空偈四首	一二二
讚血畫彌陀佛像	八九	資福寺講前示衆偈十六首	一二二
讚乘吼觀音丈夫相	九〇	開爐示衆偈二首	一二四
讚大士像	九一	題試齋居士照	一二四
悟圓老宿像	九二	個菴老人斗室偈	一二五

觀空應真	一二五	落花十首	一四九
頌楞嚴經十首	一二五	閱歸元鏡	一五二
頌般若心經十二首	一二八	香巖居士肖像	一五二
歌詩 擬證道歌	一三一	偶成四首	一五二
示學者	一三五	題慈因講寺太湖石	一五三
挽羯磨阿闍黎岫雲靜觀老和尚	一三六	病中示衆二首	一五三
祝闍教禪師八十壽三首	一三七	三週哭師三首	一五三
爲潭柘監院琮公七旬壽	一三八	立春	一五三
爲廣善復公法主五旬之慶	一三九	香巖公松泉小照三首	一五四
鐵冶亭長江濯足圖	一三九	挽戒臺度公四首	一五四
小徑蒔花	一三九	自題肖像六首	一五四
題柏石小照	一四〇	語錄	一五六
山居三十首	一四〇		
紙鳶	一四七		
和惺齋主人原韻	一四八		
偶作三首	一四八		

有清中葉·夢東老人繼蓮池蕩益而起·宏闡淨土法門于京北之紅螺山。迄今百有餘年。海內稱淨土門庭·首推紅螺焉。師早年文字悉自焚棄。門人喚醒了審輯錄餘燼·益以晚年所作·由師手自刪定爲兩卷。師西逝後。門人松泉刻于北方·名夢東禪師遺集。其念佛伽陀一卷·先已別行。旋由浙江錢伊庵居士節其上卷·合念佛伽陀仍爲兩卷·易名徹悟禪師遺稿·刻于杭城。清季楊仁山居士又稍加刪節·改名語錄·刻于金陵。揚州藏經院遂以附淨土十要之後·合刻行世。而原集之在北方者·後人獲師遺稿·次第增入·雖較完足·稍傷陵雜·適同人以集板漸形漫漶·公議集資排印。爰重爲編次·釐爲三卷。復荷紅螺山普泉老和尚以本山所奉遺像見示·亟冠卷首·并爲目錄·便檢尋云。

甲戌仲春菩薩戒弟子徐顯瑞識

## 原 敘

世之稱淨業者。自晉遠法師始。仰體佛慈。大啟渡門。鑿池植蓮。建堂立誓。于時十八賢衆。百二十三人。得自在力。念而無念。無生而生。心印遞傳。迄至于今不墜。有夢東禪師者。法門之元嗣也。夙具定慧。參契淵微。始則悟圓覺一經要義。繼則了解三藏十乘妙旨。盡棄舊習。專注淨業。虛其衷。平其氣。歷廿載如一日。無退轉心。克隨西生之願。是以圓信圓解。饒益衆生者。即以之證彌陀法界。遺集具存。讀之而益信師之所言。曰願。曰信。曰行。曰罪業懺除。曰善根成熟。要惟兢兢於一心之生。夫橫徧十方。豎窮三際。心之廣也。慮墜徧小。發大菩提。心之宏也。任運感業。合道轉業。心之權也。清珠濁水之投。種瓜種豆之穫。鑄金成麪之具。心之緣也。經所稱是心作佛。是心是佛二語。尤反覆求詳。三致意焉。又謂一寸時光。一寸命光。欲後之學者。於恆

河沙數中。履捷行簡。速出生死之關。共證安樂之境。拯拔羣迷。胥登彼岸。其意亦何厚乎。師平昔於語言文字。不欲究心。然偶一拈吟。大之總攝無餘。細之圓融無礙。對機立教。真理兼包。如阿伽陀藥。無病不療。如如意珠。無願不滿者。其如斯乎。余竊念宗教兩門語錄。浩如烟海。疏經注義。法旨昭明。而淨業之修。爲入道正軌。自龍舒大佑諸集外。言者闕如。宜師言之不可湮沒也。師之高弟松泉。以是集付刊。問敍于余。余即師文之奧衍者申言之。是爲敍。三寶弟子誠安謹識

附念佛伽陀原敍

訥堂老人率衆精修持名法門。備極誠懇。於廣通覺生兩蘭若。歷有年所。茲乙卯冬。復以教義宗乘各詠偈百首。闡其要妙。舉以示衆。如輩按偈爲了。如所錄故云當時一聞。心盪神怡。若深有領會焉。因仰體老人爲衆苦心。諄諄如是。若不刊布。久必湮沒。遂壽之梨棗。以期修淨業者。共爲參味云

爾。嘉慶元年歲次丙辰佛歡喜日。受業弟子心雨稽首謹題

## 自敘

余自乾隆癸巳。住持京都廣通寺。領衆參禪。間有東語西話。筆以記之。至丁酉歲。以宿業深重。多諸病緣。因思教乘五停心觀。多障有情。以念佛治。且此一門。文殊普賢等諸大菩薩。馬鳴龍樹等諸大祖師。智者永明楚石蓮池等諸大善知識。皆悉歸心。我何人斯。敢不皈命。於是朝暮課佛。而禪者愿隨者頗夥。因順時機。且便自行。遂輟參念佛。時門牆見重者。謗釁四起。余以深信佛言不顧也。十餘年來。所有積稿。一旦付之丙丁童子。不意爲多事禪者。于灰燼中撥出若干則。然百不存一矣。嗣後爲業風所吹。歷主覺生資福兩刹。爲虛名所誤。往往有請開示索題跋者。迫不得已而應之。日久歲深。復積成卷。戊辰夏。逢春李

居士在山聽講。聞法有悟。遂欲付之剞劂。余曰不可。身既隱矣。焉用文爲。此世間隱者之言尚然。余已棲心淨土。復何文字可留。居士堅請不已。爰弁數語。用示皆不得已之言也。嘉慶歲次庚午九月重陽後三日。訥道人書于資福二有丈室。

訥堂老人一生苦心爲法真誠。誨人不倦。住廣通時。著作法語偈頌題跋甚富。逮輟參後。一意西馳。從前所作。盡令焚之。乾隆五十四年冬。睿始親炙座下。次歲解制。同學喚醒師欲旋梓里。臨行遺余鈔本語錄一卷。題曰碎瑚析檀。內有山居詩偈等作。余甚愛而吟玩之。惜未暇問出何人手筆。壬子夏。老人遷住覺生。睿亦隨往。一日老人見之問曰。此錄燒已數年。子安得有此。睿述所由。老人曰。常時所焚如此者數本。此必喚醒多事。私竊留者。仍命焚之。睿始知爲老人之稿本也。由是愈加珍秘。且私囑同人將各所記憶。或別有收藏者。求



而時襲之。然希圖完璧不可得也。及老人退居紅螺山寺。以期靜養。由禪者追隨不捨故。體恤衆心。復成叢席。丁卯昶亭居士來山聽講。法喜怡神。深生感激。索所存語句。並堅請老人開示淨土宗旨。及啟信發願立行用心修持等文。合前詩偈等篇。共爲兩卷。而老人復將宗門中語句刪去大半。今所傳者止此耳。念佛伽陀久已別行。嘉慶乙丑。又得老人山中講前法語一篇。不忍棄置。今附集內。顧睿劣機淺識。謬承齒錄。自慚未能克振先宗。光揚法道。但恪守成規。謹仿腳迹而已。每生厭離。竊常私祝老人現屈蓮邦。何吝文殊金臂。遙摩睿頂。一安慰之也。抑或未敢私先導師。必待彌陀同至。始攜睿手往育珍池乎。心懷劇切。語吐真實。良由苦海濤凶。業風無定。此生錯過。後世何追。更祈老人于寶華臺上。無量光中。遙相攝受。嘉慶二十二年佛成道日不肖了睿謹識

## 重刻敘

余輯徹師遺稿成。或問念佛往生之道有要術乎。余曰。有。確信而已矣。淨土三資糧。曰信曰願曰行。確信而願行在其中矣。憶昔從學單華藏。夫子請益當世諸大德。即耳都中徹悟老人名。蓋淹貫宗教。而宏揚淨土者。慕之。丙寅遊燕。竊幸獲禮座矣。至則師已移居紅螺。相距信宿程。以俗羈不果行。悵緣慳者久之。戊寅之春。真益子自京攜師集來。余獲讀焉。歎其示衆之語語悲激。往生之種種確鑿。密授北濟宗風。曠遊南台教海。不覺涕泗悔憤。何當年之阻于咫尺。遽交臂而失之耶。嗟夫。娑婆忍土。境苦而壽促。稍知發大心者。孰不警惕無常。思出生死。然終以不得其門而止。即有多生善根。皈敬三寶。且知有最上往生之捷徑。又或以一己之見聞未確。反疑傳載或過其實。卒至懷疑自悞。甘忍以待死。吁。確信之難生有如是耶。今徹師之西歸也。數月前辭囑外護

·次第諸務·則預知時至之確也。幢幡盈空而來·諸大菩薩繼至·臨終之頃·彌陀親接·則報終境現·佛菩薩接引之確也。然猶師一人之獨見也。若夫異香浮空·七日如生·髮白變黑·舍利鱗砌·此則當時衆見衆知·往生之確瑞。徧布支那·而無所用其纖疑者也。人若聞此而仍不知霍然猛省·步武後塵·努力今生以了當生死·是誰之過歟。余嘗攷震旦自遠公開淨土法門爲初祖·其後可登祖位者·殆不乏人。而自古沿傳·以善導·承遠·法照·少康·永明·省常·蓮池·思齊·諸師爲淨宗九祖。余維徹師行履·盡未來際·足以聞風興起。後有繼列祖位者·殆不可遺也。適胥城貝寶巖先生續以師念佛伽陀相贈·而松濤開士謂宜重合梓以廣其傳。首捐刻資若干·遂擇兩集之精談宗教淨者刊之。其餘雜著·備體而已。蓋以資天下後世會宗教而同歸淨土·尤當於三資糧中·決以確信往生爲先務故也。松師勸人念佛僧·西天目淨文長老之戒子也。

清嘉慶二十四年歲次己卯夏六月既望虎林三寶弟子錢伊庵謹敍

徹悟語錄·洵爲淨宗最要開示。倘在蕩益老人前·決定選入十要。然具法眼者·肯令此書湮沒不傳乎。以故錢伊庵居士于嘉慶二十四年擇要節略。名徹悟禪師遺稿·刊布南方。同治七年。杭州諗西師依伊庵本·重刻于杭州。同治十年楊仁山居士又稍節之·改名語錄·刻于金陵。光緒十六年揚州貫通和尚刻淨土十要·依仁山本·附于十要後以行。今排十要原文·特附于十要第十之後·仍依仁山本·但加錢敍于首·俾閱者咸知此書之源委云。所願見者聞者·同皆深入淨宗法界·直登上品蓮臺。庶不負徹悟老人一番大慈悲心也。民國十九年庚午仲冬釋印光識

夢東禪師遺集 卷上

門人喚醒了睿輯錄

法語

示衆

一切法門。以明心爲要。一切行門。以淨心爲要。然則明心之要。無如念佛。憶佛念佛。現前當來。必定見佛。不假方便。自得心開。如此。念佛非明心之要乎。復次淨心之要。亦無如念佛。一念相應一念佛。念念相應念念佛。清珠下於濁水。濁水不得不清。佛號投於亂心。亂心不得不佛。如此。念佛非淨心之要乎。一句佛號。俱攝悟修兩門之要。舉悟則信在其中。舉修則證在其中。信解修證俱攝。大小諸乘一切諸經之要。罄無不盡。然則一句彌陀。非至要之道乎。吾人現前一念之心。全真成妄。全妄即真。終日不變。終日隨緣。夫不隨佛界之緣而念佛界。便念九界。不念三乘。便念六凡。不念人天。便念三途。不念鬼畜。便

念地獄。以凡在有心。不能無念。以無念心體惟佛獨證。自等覺已還。皆悉有念。凡起一念。必落十界。更無有念出十界外。以十法界。更無外故。每起一念。爲一受生之緣。果知此理而不念佛者。未之有也。若此心能與平等大慈大悲。依正功德。以及萬德洪名相應。即念佛法界也。能與菩提心六度萬行相應。即念菩薩法界也。以無我心。與十二因緣相應。即念緣覺法界也。以無我心。觀察四諦。即念聲聞法界也。或與四禪八定。以及上品十善相應。即念天法界也。若與五戒相應。即念人法界也。若修戒善等法。兼懷瞋慢勝負之心。即落修羅法界。若以緩輒心。念下品十惡。即墮畜生法界。或以緩急相半心。與中品十惡相應。便墮餓鬼法界。若以猛熾心。與上品十惡相應。即墮地獄法界也。十惡者。即殺。盜。婬。妄言。綺語。惡口。兩舌。貪。瞋。邪見。是。反此則爲十善。當密自檢點日用所起之念。與何界相應者多。與何界相應

者猛。則他日安身立命之處。不勞更問人矣。

一切境界。惟業所感。惟心所現。即其現處。當體即心。凡在有心。不能無境。不現佛境。便現九界之境。不現三乘之境。便現六凡之境。不現天人鬼畜之境。便現地獄境界。佛及三乘所現境界。雖有優降不同。要皆受享法樂而已。三界諸天所現之境。但唯受用禪定五欲之樂。人道之境。苦樂相間。各隨其業。多少不同。鬼畜之境。苦多樂少。至於地獄。則純一極苦。如人夢中所見山川人物。皆依夢心所現。若無夢心。必無夢境。設無夢境。亦無夢心。故知心外無境。境外無心。全境即心。全心即境。若於因中察果。當須觀心。設於果處驗因。當須觀境。故曰。未有無心境。曾無無境心。果必從因。因必剋果。苟真知此心境因果一如不二之理。而猶不念佛求生淨土者。吾不信也。

真爲生死。發菩提心。以深信願。持佛名號。十六字。爲念佛法門一大

綱宗。若真爲生死之心不發。一切開示。皆爲戲論。世間一切重苦。無過生死。生死不了。生死死生。生生死死。出一胞胎。入一胞胎。捨一皮袋。取一皮袋。苦已不堪。况輪迴未出。難免墮落。豬胞胎。狗胞胎。何所不鑽。驢皮袋。馬皮袋。何所不取。此個人身。最爲難得。最易打失。一念之差。便入惡趣。三途易入而難出。地獄時長而苦重。七佛已來。猶爲蟻子。八萬劫後。未脫鴿身。畜道時長已極。鬼獄時長尤倍。久經長劫。何了何休。萬苦交煎無歸無救。每一言之。衣毛卓豎。時一念及。五內如焚。是故即今痛念生死。如喪考妣。如救頭然也。然我有生死。我求出離。而一切衆生皆在生死。皆應出離。彼等與我。本同一體。皆是多生父母。未來諸佛。若不念普度。唯求自利。則於理有所虧。心有未安。况大心不發。則外不能感通諸佛。內不能契合本性。上不能圓成佛道。下不能廣利羣生。無始恩愛。何以解脫。無始冤愆。何



以解釋。積劫罪業。難以懺除。積劫善根。難以成熟。隨所修行。多諸障緣。縱有所成。終墮偏小。故須稱性發大菩提心也。然大心既發。應修大行。而於一切行門之中。求其最易下手。最易成就。至極穩當。至極圓頓者。則無如以深信願。持佛名號矣。所謂深信者。釋迦如來梵音聲相。決無誑語。彌陀世尊大慈悲心。決無虛願。且以念佛求生之因。必感見佛往生之果。如種瓜得瓜。種豆得豆。響必應聲。影必隨形。因不虛棄。果無浪得。此可不待問佛而能自信者也。况吾人現前一念心性。全真成妄。全妄即真。終日隨緣。終日不變。橫徧豎窮。當體無外。彌陀淨土。總在其中。以我具佛之心。念我心具之佛。豈我心具之佛。而不應我具佛之心耶。往生傳載臨終瑞相。班班列列。豈欺我哉。如此信已。願樂自切。以彼土之樂。回觀娑婆之苦。厭離自深。如離廁坑。如出牢獄。以娑婆之苦。遙觀彼土之樂。欣樂自切。如歸故鄉。如奔寶

所。總之如渴思飲。如饑思食。如病苦之思良藥。如嬰兒之思慈母。如避冤家之持刀相迫。如墮水火而急求救援。果能如此懇切。一切境緣。莫能引轉矣。然後以此信願之心。執持名號。持一聲是一九蓮種子。念一句是一往生正因。直須心心相續。念念無差。唯專唯勤。無雜無間。愈久愈堅。轉持轉切。久之久之。自成片段。入一心不亂矣。誠然如此。若不往生者。釋迦如來便爲誑語。彌陀世尊便爲虛願。有是理乎哉。觀經是心作佛。是心是佛二語。較之禪宗直指人心。見性成佛。尤爲直截痛快。何也。以見性難而作佛易故。何爲見性。離心意識。靈光迸露。始爲見性。故難。何爲作佛。持佛名號。觀佛依正。即爲作佛。故易。經云。汝等心想佛時。是心即是三十二相。八十種好。豈非以想念於佛。即爲作佛耶。夫成佛是佛。理無二致。而見性作佛。難易相懸若是。豈非念佛較之參禪。尤爲直截痛快也哉。一是祖語。一是佛言。何重何輕。

。何取何捨。學者但當盡捨舊習。虛其心。平其氣。試一玩味而檢點之。當必首肯是說爲不謬矣。

石霜遷化。衆舉泰首座繼席住持。時九峯虔爲侍者。乃曰。若繼住持。須明先師意。泰曰。先師有什麼意。我會不得。虔曰。先師尋常教人。休去歇去。冷湫湫地去。古廟香爐去。一條白練去。萬年一念去。其餘則不問。如何是一條白練去。泰云。此但明色一邊事。虔云。原來未曾先師意。泰云。裝香來。香烟盡處。我若去不得。即不會先師意。左右即裝香。香烟未盡。泰即化去。虔撫其背曰。坐脫立亡即不無。先師意未夢見在。曹山堂上坐。紙衣道者從堂下過。山曰。莫是紙衣道者麼。衣曰。不敢。山曰。如何是紙衣下事。衣曰。一裘纔掛體。萬法悉皆如。山曰。如何是紙衣下用。衣曰。諾。便化去。山曰。汝祇解恁麼去。不解恁麼來。衣復開目問曰。一靈真性。不假胞胎時。如何。山曰。未

是妙。夫坐脫立亡。未明大法。固非了事。然其造詣工夫。殊非易易。果能回此一段精神。專心念佛求生淨土。當必穩得上品上生。豈更遭人檢點哉。如紙衣進問。如何是妙。山答云。不借借。衣便珍重化去。噫。與其不借而借臭穢胞胎。何如不借而借香潔蓮花。直以胞胎臭穢。蓮花香潔而論。已自勝劣懸殊。况出胎隔陰。作主大難。而蓮胞一敷。勝緣具足。此則日劫相懸。天地不足以喻其否泰矣。無怪乎永明大師。謂有禪無淨土。十人九錯路。無禪有淨土。萬修萬人去。此真語也。實語也。大慈悲心淚出痛腸之語也。學者幸勿忽諸。最初迷真起妄。則曰一念妄動。末後返妄歸真。則曰一念相應。是則起妄之後。歸真之前。更有何法。能外此一念乎。是故一念悟。隨淨緣。即佛法界。迷。隨染緣。即九法界。十方虛空。是此一念迷昧。一切國土。是此一念澄凝。四生正報。是此一念情想合離。四大依報。是此一念動靜違順。唯依此念

。變現諸法。離此念外。無法可得。原此一念。本是法界。從緣而起。緣無自性。全體法界。故得橫徧十方。豎窮三際。離過絕非。不可思議。法爾具此威神。法爾具此功用。今以此念。念於西方阿彌陀佛。求生極樂淨土。正當念時。西方依正。在我心中。而我此心。已在西方依正之內。如兩鏡交光。相含互照。此橫徧十方之相也。若約豎窮三際。則念佛時。即見佛時。亦即成佛時。求生時。即往生時。亦即度生時。三際同時。更無前後。帝網珠光。難齊全體。南柯夢事。略類一班。此理悟之最難。信之最易。但能直下承當。終必全身受用。可謂參學事畢。所作已辦矣。如或未能。但當任便觀察。隨分受用耳。

心能造業。心能轉業。業由心造。業隨心轉。心不能轉業。即爲業縛。業不隨心轉。即能縛心。心何以能轉業。心與道合。心與佛合。即能轉業。業何以能縛心。心依常分。任運作受。即爲業縛。一切現前境界。

一切當來果報。皆唯業所感。唯心所現。唯業所感故。前境來報。皆有一定。以業能縛心故。唯心所現故。前境來報。皆無一定。以心能轉業故。若人正當業能縛心。前境來報一定之時。而忽發廣大心。修真實行。心與佛合。心與道合。則心能轉業。前境來報。定而不定。又心能轉業。前境來報不定之時。而大心忽退。實行有虧。則業能縛心。即前境來報。不定而定。然業乃造於已往。此則無可奈何。所幸而發心與否。其機在我。造業轉業。不由別人。如吾人即今發心念佛。求生極樂。或觀依正。或持名號。念念相續。觀念之極。則心與佛合。合之又合。合之其極。則心能轉業。而前境之娑婆。轉爲極樂。胎獄之來報。轉爲蓮胞。便是樂邦自在人矣。若正恁麼時。其心或偶然失照。或忽生退悔。不與佛合。則業能縛心。而前境仍舊。來報依然。還是忍土苦衆生也。然則我輩有志出離。求生淨土者。可弗惕然而警。奮然而發也哉。

淨土門中。以願爲最。凡有願者。終必能滿。如鬱頭藍弗。習非非想定於水邊林下。每定將成。多爲魚鳥所驚。因發惡願曰。吾他日後。當作飛狸。入林食鳥。入水食魚。後非想定成。遂生天上。壽活八萬大劫。天報既終。遂墮爲飛狸。入林水以食魚鳥。此惡願也。與性相違。尚有大力用。八萬劫後能滿。况稱性之善願乎。神僧傳。載一僧於石佛前。戲發願曰。如今生生死不了。願來生作威武大臣。後果作大將軍。此戲發之願也。尚終得遂。况至誠所發之願乎。復載一僧。博通經論。所至無所遇。乃咨嗟歎息。傍一僧曰。汝學佛法。獨不聞未成佛果。先結人緣。汝雖明佛法。其如無緣何。其僧曰。我即終於此乎。傍僧曰。吾代汝爲之。問其僧有何所蓄。曰。無他。僅餘一衣料耳。曰。此亦足矣。遂變價置買食物。引其僧至一深林。禽鳥昆蟲甚多之處。置食於地。復教以發願。乃囑曰。汝二十年後。方可開法。其僧如所囑。至二十年後

始開法。受化者多少年。蓋皆受食之禽鳥昆蟲也。此願力之不可思議也。尚能以他人之願。攝彼蟲鳥。脫異類而入人道。豈自願不能自度耶。佛以四十八願。自致成佛。而我所發之願。正合佛攝生之願。此則直以發願。便可往生。而况佛有不思議大慈大悲。如瑩珂。酒肉無擇之人。後閱往生傳。每讀一傳。爲一首肯。遂斷食念佛。至七日。感佛現身慰之曰。汝陽壽尚有十年。當好念佛。吾十年來後來接汝。珂曰。娑婆濁惡。易失正念。願早生淨土。承事諸聖。佛曰。汝志如此。我三日後來接汝。三日後果得往生。又懷玉禪師。精修淨業。一日見佛菩薩滿虛空中。一人執銀臺而入。玉念曰。吾一生精進。志在金臺。今胡不然。銀臺遂隱。玉彌加精進。二十一日後。復見佛菩薩徧滿虛空。前持銀臺者易金臺而至。玉遂泊然而逝。劉遺民。依東林。結社念佛。一日想念佛次。見佛現身。劉念曰。安得如來手摩我頭乎。佛即手摩其頭。復念曰



。安得如來衣覆我體乎。佛即以衣覆其體。於戲。佛之於衆生。無所不至。真可謂大慈悲父母矣。欲速生即令速生。欲金臺即易金臺。欲手摩頭即摩頭。欲衣覆體即覆體。佛既慈悲一切衆生。豈獨不慈悲我乎。佛既滿一切衆生之願。豈獨不滿我之願乎。大慈悲心。無有揀擇。安有此理。是以真能發願。則信在其中。信願既真。行不期起而自起。是故信願行三種資糧。唯一願字盡之矣。世之最可珍重者。莫過精神。世之最可愛惜者。莫過光陰。一念淨。即佛界緣起。一念染。即九界生因。凡動一念。即十界種子。可不珍重乎。是日已過。命亦隨滅。一寸時光。即一寸命光。可不愛惜乎。苟知精神之可珍重。則不浪用。則念念執持佛名。光陰不虛度。則刻刻熏修淨業。倘置佛名而別修三乘聖行。亦是浪用精神。亦是千鈞之弩。爲鼯鼠而發機。况造六凡生死之業乎。倘置淨業而別取權乘小果。亦是虛度光陰。亦是以如意寶珠。而買一衣一食

。况取人天有漏之果乎。如是珍重。如是愛惜。則心專而佛易感。行動而業易精。果得真生淨土。親見彌陀。時承開示。面奉慈音。妙悟自心。深證法界。延一念爲長劫。促長劫爲一念。念劫圓融。得大自在。得非自食其珍重愛惜之報乎。

夫見道而後修道。修道而後證道。此千聖同途。千古不易之定論也。然見道豈易言哉。若依教乘。必大開圓解。若依宗門。必直透重關。然後得論修道。否則便爲盲修瞎練。不免撞牆磕壁。墮坑落壑矣。唯淨土一門則不然。從是西方過十萬億佛土。有世界名曰極樂。其土有佛。號阿彌陀。今現在說法。但發願持名。即得往生。此乃佛心佛眼。親知親見之境界。非彼三乘賢聖。所能知見也。但當深信佛言。依此而發願持名。即是以佛知見爲知見。不必另求悟門也。餘門修道。必悟後依法修習。攝心成定。因定發慧。因慧斷惑。所發之慧有勝劣。所斷之惑有淺深。

。然後方可論其退與不退。唯此淨土門中。唯以信願之心。專持名號。持至一心不亂。淨業即爲大成。身後決定往生。一得往生。便永不退轉。又餘門修道。先須懺其現業。若現業不懺。即能障道。則進修無路矣。修淨業者。乃帶業往生。不須懺業。以至心念佛一聲。能滅八十億劫生死重罪故。又餘門修道。須斷煩惱。若見思煩惱分毫未盡。則分段生死不盡。不能出離同居國土。唯修淨業。乃橫出三界。不斷煩惱。從此同居。生彼同居。一生彼土。則生死根株便永斷矣。既生彼土。則常常見佛。時時聞法。衣食居處。出於自然。水鳥樹林。皆悉說法。同居土中。橫見上三淨土。諸上善人俱會一處。圓證三種不退。一生便補佛位。然則淨土一門。最初省求悟門。末後不待發慧。不須懺業。不斷煩惱。至極省要。至極徑捷。及其證入。至極廣大。至極究竟。學者當細心玩味而詳擇之。毋以一時貢高。失此殊勝最大利益也。

一窮人遙望。見錢一串。就而取之。乃蛇也。遂瞠立於其傍。復一人至。得錢一串携去。夫錢非蛇也。而蛇現者。唯業所感。唯心所現也。錢上之蛇。固是業感心現。而蛇上之錢。獨非業感心現乎。錢上之蛇。一人之別業妄見也。蛇上之錢。多人之同分妄見也。一人之妄見。其妄易知。多人之妄見。其妄難知。以易知例難知。難知亦易知矣。然則蛇固蛇也。錢亦蛇也。推此而往。內而根身。外而境界。由一方而至十方。以及四大部洲。三千大千世界。皆此錢上之蛇也。但唯心之蛇既現。便能螫人。唯心之錢既現。便得享用。非謂唯心。便無外境。且娑婆之穢苦。安養之淨樂。皆唯心現。唯心之穢苦既現。則遭大逼迫。唯心之淨樂既現。則得大受用。既穢苦淨樂皆唯心現。何不捨唯心之穢苦。以取唯心之淨樂。而乃久經長劫。甘爲八苦之所交煎也哉。

吾人生死關頭。惟二種力。一者心緒多端。重處偏墜。此心力也。二者

如人負債。強者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業力唯強。乃能牽生。若以重心而修淨業。淨業則強。心重業強。惟西方是趨。則他日報終命盡。定往西方。不生餘處矣。如大樹大牆。尋常向西而歪。他日若倒。決不向餘處也。何爲重心。我輩修習淨業。信貴於深。願貴於切。以信深願切故。一切邪說莫能搖惑。一切境緣莫能引轉。若正修淨業時。倘達磨大師。忽現在前。乃曰。吾有直指人心見性成佛之禪。汝但捨置念佛。吾即以此禪授汝。但當向祖師作禮。謂我先已受釋迦如來念佛法門。發願受持。終身不易。祖師雖有深妙禪道。吾則不敢自違本誓也。縱或釋迦如來。忽爾現身。謂曰。吾先說念佛法門。特一時方便耳。今更有殊勝法門。超于彼者。汝當且置念佛。吾即爲說勝法。亦祇可向佛稽首陳白。我先稟受世尊淨業法門。發願一息尚存。決不更張。如來雖有

勝法。吾則不敢自違本願也。雖佛祖現身。尚不改其所信。况魔王外道。虛妄邪說。豈足以搖惑之耶。能如是信。其信可謂深矣。若赤熱鐵輪。旋轉頂上。不以此苦。退失往生之願。若輪王勝妙五欲現前。亦不以此樂。退失往生之願。此逆順至極。尚不改所願。况世間小小逆順境界。豈能引轉哉。能如是願。其願可謂切矣。信深願切。是謂重心。而修淨業。淨業必強。心重故則易純。業強故則易熟。極樂淨業若熟。娑婆染緣便盡。果得染緣已盡。則臨終時。雖欲輪迴境界再現在前。亦不可得。果得淨業已熟。則臨終時。雖欲彌陀淨土不現在前。亦不可得。然此信願。要在操之有素。臨時自不入于歧路。如古德臨欲命終。六欲天童次第接引。皆不去。唯專心待佛。後佛現。乃曰佛來也。遂合掌而逝。夫臨欲命終。四大分張。此何時也。六欲天童。次第接引。此何境也。苟素常信願不到十分堅固。當此時。對此境。而能強作主宰乎。如古

德真可謂千古修淨業者之標榜矣。

有禪者問曰。一切諸法。悉皆如夢。娑婆固夢也。極樂亦夢也。既同是一夢。修之何益。予曰。不然。七地以前。夢中修道。無明大夢。雖等覺猶眠。唯佛一人。始稱大覺。當夢眼未開之時。苦樂宛然。與其夢受娑婆之極苦。何若夢受極樂之妙樂。况娑婆之夢。從夢入夢。夢之又夢。展轉沉迷者也。極樂之夢。從夢入覺。覺之又覺。漸至於大覺者也。夢雖同。所以夢者未嘗同也。可槩論乎。

佛法大海。信爲能入。淨土一門。信尤爲要。以持名念佛。乃諸佛甚深行處。唯除一生所繫菩薩。可知少分。自餘一切賢聖。但當遵信而已。非其智分之所能知。况下劣凡夫乎。然十一善法。以信居初。信心之前。更無善法。五十五位。以信爲始。信位之前。別無聖位。故菩薩造起信論。祖師作信心銘。以信心一法。爲入道要門也。昔王仲回問於楊無

爲曰。念佛如何得不間斷去。楊曰。一信之後。更不再疑。王欣然而去。未久。楊夢仲回致謝。謂因蒙指示。得大利益。今已生淨土矣。楊後見仲回之子。問及仲回去時光景。及去之時節。正楊得夢之日。噫。信之時義大矣哉。

法藏比丘。對世自在王佛。發稱性四十八種大願。依願久經無量長劫。修習大行。至於因圓果滿。自致成佛。法藏轉名彌陀。世界轉名極樂。彌陀之所以爲彌陀者。深證其唯心自性也。然此彌陀極樂。非自性彌陀。唯心極樂乎。但此心性。乃生佛平等共有。不偏屬佛。亦不偏屬衆生。若以心屬彌陀。則衆生乃彌陀心中之衆生。若以心屬衆生。則彌陀乃衆生心中之彌陀。以彌陀心中之衆生。念衆生心中之彌陀。豈衆生心中之彌陀不應彌陀心中之衆生耶。但佛悟此心。如醒時人。衆生迷此心。如夢中人。離醒時人。無別夢中之人。豈離夢中之人。別有醒時之人耶。



。但夢中之人。當不自認爲真。亦不離夢中之人。別求醒時之人。唯應常憶醒時之人。憶之又憶。則將見大夢漸醒。而夢眼大開。即夢中能憶之人。便是所憶醒時之人。而醒時之人。非夢中人也。夢中人衆多。醒時人惟一。十方諸如來。同共一法身。一心一智慧。力無畏亦然。此乃即一即多。常同常別。法爾自妙之法也。念佛之意。大略如此。

生則決定生。去則實不去。二語。上句說事。下句說理。事是即理之事。謂生即不生。非直以生爲生也。理是即事之理。謂不去而去。非直以不去爲不去也。兩句作一句看。則事理圓融。所謂合之則雙美也。若兩句作兩句看。則事理分張。所謂離之則兩傷也。若不合此兩句作一句。便當演此兩句作四句。謂生則決定生。生而無生。去則實不去。不去而去。雖爲四句。義亦無增。合爲一句。義亦無減。總一事理圓融耳。與其執去則實不去之理。不如執生則決定生之事爲得。何也。以執事昧理

。猶不虛入品之功。若執理廢事。便不免落空之誚。以事有偕理之功。理無獨立之能故也。以有生爲生。則墮常見。以不去爲不去。則墮斷見。斷常雖同一邪見。而斷見之過患深重。故不若執事之爲得。然總不如圓會二句爲佳耳。

吾人現前一念。緣生無性。無性緣生。不生佛界。便生九界。若約緣生無性。則生佛平等一空。若約無性緣生。則十界勝劣懸殊。阿祈達王臨終。爲趕蠅人以拂拂面。一念瞋心。遂墮爲毒蛇。一婦人渡河失手。其子墮水。因撈子故。與之俱沒。以慈心故。得生天上。夫一念慈瞋。天畜遂分。則此臨終之緣生一念。可不慎乎。苟以此心緣念彌陀。求生淨土。得不見佛往生乎。但此一念。不可僥倖而致。必須存之以誠。操之有素。是故吾輩於此一句彌陀。千念萬念。以至終日終年念者。無非爲熟此一念而已。果得一念純熟。則臨命終時。唯此一念。更無異念。智

者大師云。臨終在定之心。即淨土受生之心。然惟此一念。更無異念。非在定之心乎。念果如是。不見彌陀。更見何人。不生淨土。更生何處。只恐吾人自信不及耳。

觀經是心作佛。是心是佛。二語既舉。則言外之心不作佛。心不是佛。心作九界。心是九界。心不作九界。心不是九界。等義俱彰矣。噫。果明此理。而猶不念佛者。則吾末如之何也已矣。

觀經是心作佛。是心是佛二語。不唯是觀經一經綱宗法要。實是釋迦如來一代時教大法綱宗。不唯釋迦一佛法藏綱宗。實是十方三世一切諸佛法藏綱宗。此宗既透。何宗不透。此法既明。何法不明。所謂學雖不多。可齊上賢也。

真法無性。染淨從緣。一真既舉體成十界。則十界全體即一真。是故善談心性者。必不棄離於因果。而深信因果者。終必大明乎心性。此理勢

所必然也。

吾人現前一念能念之心。全真成妄。全妄即真。終日隨緣。終日不變。一句所念之佛。全德立名。德外無名。以名召德。名外無德。能念心外。無別所念之佛。所念佛外。無別能念之心。能所不二。生佛宛然。本離四句。本絕百非。本徧一切。本含一切。絕待圓融。不可思議。蓮宗行者。當從者裏信人。

殺生一事。過患至爲深重。一切衆生皆有佛性。生可殺乎。造重業。縱殺心。結深怨。感苦果。皆由一殺所致。是以殺心漸猛。殺業漸深。漸以殺人。以及殺其六親。甚而積爲刀兵大劫。可悲也矣。蓋皆由不知戒殺之所致。苟知戒殺。牲且不忍殺。况殺人乎。况殺六親乎。牲不忍殺。刀兵大劫。何所從來。殺人之父者。人亦殺其父。殺人之兄者。人亦殺其兄。知人之父兄不可殺。亦戒殺之漸。但不知殺父兄者。由於不戒

殺始也。

人之所以不戒殺者由於不達因果之理。因果者。感應也。我以惡心感之。人亦以惡心應。我以善心感之。人亦以善心應。人但知感應見於現生。而不知感應通於三世也。人但知感應見於人道。而不知感應通於六道也。果知感應通於三世六道。六道中皆多生之父兄。殺可不戒乎。縱知感應通於六道。亦不知感應通於世出世間也。以無我心感。則聲聞緣覺之果應之。以菩提心六度萬行感。則菩薩法界果應之。以平等大慈。同體大悲感。則佛法界果應之。噫。感應之道。可盡言哉。

須知一句阿彌陀佛。以唯心爲宗。此惟心之義。須以三量楷定。三量者。現量。比量。聖言量也。現量者。謂親證其理也。如羅什大師。七歲隨母入佛寺。見佛鉢。喜而頂戴之。俄而念曰。我年甚幼。佛鉢甚重。何能頂戴。是念纔動。忽失聲置鉢。遂悟萬法唯心。高麗元曉法師。來

此土參學。夜宿塚間。渴甚。明月之下。見清水一汪。以手掬而飲之。殊覺香美。至次日清晨。乃見其水爲墓中控出。遂惡心大吐。乃悟萬法唯心。便回本國著述。此皆現量親証也。比量者。借衆相而觀於義。比喻而知也。諸喻之中。夢喻最切。如夢中所見山川人物。萬別千差。皆不離我能夢之心。離夢心外。別無一法可得。即此可以比喻。而知現前一切萬法。但唯心現也。聖言量者。三界唯心。萬法唯識。千經萬論。皆如是說。已約現等三量。楷定唯心。更約事理二門。辨明具造。謂由有理具。方有事造。理若不具。事何所造。所以理具。但具事造。離事造外。無別所具。由有事造方顯理具。事若不造。爭知理具。所以事造。祇造理具。離理具外。別無所造。只此一念心中。本具十界萬法。即此一念隨緣。能造十界萬法。理具。如金中本具可成瓶盤釵釧之理。事造。如隨工匠爐鎚之緣。造成瓶盤釵釧之器。又理具。如麵中本具可成

種種食物之理。事造。如水火人工之緣。造成種種食品也。已辨事理。復約名體同異。揀定真妄。佛法中有名同而體異者。有名異而體同者。名同體異。如心之一名。有肉團心。有緣慮心。有集起心。有堅實心。肉團心。同外四大。無所知識。緣慮心。通於八識。以八種識皆能緣慮自分境故。此則是妄。集起心。唯約第八。以能集諸法種子。能起諸法現行故。此則真妄和合。堅實心者。即堅固真實之性。乃離念靈知。純真心體也。今言唯心者。乃堅實純真之心也。名異體同者。如諸經中所說真如。佛性。實相。法界等。種種極則之名。皆此堅實純真心也。已揀真妄。還約本有現前。折衷指點。以諸經皆言無始本有真心。夫既曰本有。即今豈無。而今現有。即本有也。若無無始。則無現前。若離現前。豈有無始。是故不必高尊本有。遠推無始。但現前一念心之自性。即本有真心也。以現前一念。全真成妄。全妄即真。終日隨緣。終日不

變。離此現前一念之外。豈別有真心自性哉。古德云。威音那畔。不離今世門頭。衆生現行無明。即是諸佛不動智體。其庶幾乎。由上四義。以顯唯心。故一以唯心爲宗也。又一句阿彌陀。以唯佛爲宗。以一切萬法。既唯心現。全體唯心。心無彼此。心無分際。於十界萬法。若依若正。假名實法。隨拈一法。皆即心之全體。皆具心之大用。如心橫徧。如心豎窮。以唯心義成。唯色唯聲唯香唯味唯觸唯法。乃至唯微塵。唯芥子。一切唯義俱成。一切唯義俱成方成真唯心義。若一切唯義不成。但有唯心之虛名。而無唯心之實義。以一切唯義俱成。故曰法無定相。遇緣即宗。唯微塵。唯芥子。尚可爲宗。八萬相好莊嚴之果地彌陀。反不可以爲宗耶。故以唯佛爲宗。又以絕待圓融爲宗。於十界萬法。隨拈一法。無非即心全體。具心大用。橫徧十方。豎窮三際。離於四句。絕於百非。獨體全真。更無有外。彌滿清淨。中不容他。一法既爾。萬法



皆然。各約諸法當體。絕待無外。是爲絕待。又以十界萬法。各各互徧。各各互含。一一交羅。一一該徹。彼彼無障無礙。各各無壞無雜。如當臺古鏡。影現重重。如帝網千珠。迴環交攝。此約諸法迭互相望。是爲圓融。今合絕待圓融爲一宗。正絕待時即圓融。正圓融時便絕待。非離絕待別有圓融。絕待。絕待其圓融。非離圓融別有絕待。圓融。圓融其絕待。絕待圓融。各皆不可思議。今共合爲一宗。則不思議中不思議也。又超情離見爲宗。以但約諸法絕待。離過絕非。已超一切衆生情妄執著。三乘賢聖所見差別。若約諸法圓融。圓該四句。融會百非。尤非凡情聖見之所能及。故總立超情離見爲宗。初以唯心爲宗。次以唯佛爲宗。三以絕待圓融爲宗。末以超情離見爲宗。總此四重宗旨。方是一句彌陀正宗宗旨。豈易言哉。

此一念佛法門。如天普蓋。似地普擎。無有一人一法。能出其外。不在

其中者。如華嚴全經。雖有五周四分之殊。以因果二字。該盡無餘。四十一位因心。無一心而不趨向果覺。四十一位所修種種法行。豈非皆念佛法行也。而末後普賢以十大願王。導歸極樂。爲全經一大結穴。不其然乎。又華嚴者。以萬行因華。莊嚴一乘佛果。此萬行非念佛行耶。華嚴。具婆須密女。無厭足王。盛熱婆羅門等無量門。然皆顯示毗盧境界。此無量門。非即念佛門耶。法華一經。從始至終。無非開示悟入佛知佛見。此非始終唯一念佛法門耶。楞嚴最初顯示藏性。明成佛之真因也。其次揀選圓通。示成佛之妙行也。後歷六十聖位。圓滿菩提。歸無所得。證佛地之極果也。背此則成七趣沈淪。向此則明五魔擾亂。末後云。有人身具四重。十波羅夷。瞬息即經此方他方阿鼻地獄。乃至窮盡十方無間。靡不經歷。若能一念將此法門。於末劫中開示未學。是人罪障應念消滅。變其地獄所受苦因。爲安樂國。此則徹始徹終。唯一念佛法

門也。總佛一代時教。三藏十二部。半。滿。權。實。偏。圓。頓。漸。種種法門。無非顯示唯心自性。圓成無上妙覺而已。得非總一大念佛法門耶。至如禪宗。達磨大師西來。但當曰。直指人心見性便了。而云成佛者。非宗門亦念佛門耶。故合二派五宗千七百則公案。不過指點當人本源心性。顯示本有清淨法身。法身橫徧豎窮。無所不徧。而參禪人。要須時時現前。頭頭相應。此何在而非念佛法門哉。至如佛之一字。吾不喜聞。一棒打殺。與狗子喫等語。皆顯示法身上勝妙方便。是真念佛也。往往無知之輩。謂宗門中人。不宜念佛。此不唯不知念佛。豈真知宗哉。不唯宗教兩門如是。即普天之下。士農工商。諸子百家。縱不欲念佛。不知佛者。亦不能出於念佛法門之外。以彼去來動靜。咸率此道。百姓日用而不知也。所謂一氣不言含有象。萬靈何處謝無私。夾路桃花風雨後。馬蹄無地避殘紅。

一真爲生死。發菩提心。是學道通途。二以深信願。持佛名號。爲淨土正宗。三以攝心專注而念。爲下手方便。四以折伏現行煩惱。爲修心要務。五以堅持四重戒法。爲入道根本。六以種種苦行。爲修道助緣。七以一心不亂。爲淨心歸宿。八以種種靈瑞。爲往生證驗。此八種事。各宜痛講。修淨業者。不可不知也。

衆生所以輪迴者。六道也。餘趣衆生。爲驚瞋苦樂○所障。無暇向道。可以整心慮。趣菩提。唯人道爲能耳。但失人身者。如大地土。得人身者。如爪上土。人身豈易得乎。人道衆生。從生至壯。以及老死。眼之所見。耳之所聞。無非世間塵勞生死業緣耳。佛法豈易聞乎。得人身已難。況得男子身。六根具足尤難。聞佛法已難。况聞彌陀名號。淨土法門尤難。何幸而得難得之人身。何幸而聞難聞之佛法。聞之而猶不肯信。不深爲可惜也哉。不信姑置。即如信者。信而不願。猶不信也。願而

無行。猶弗願也。行而不猛。猶弗行也。行之所以不猛。由願不切。願之所以不切。由信不真。總之生真信難。信果真矣。願自能切。願果切矣。行自能猛。真切信願。加以勇猛力行。決定得生淨土。決定得見彌陀。決定證三不退。決定一生補佛。既得生淨土矣。曠大劫來生死業根。則從此永斷。既一生補佛矣。至極尊貴無上妙覺。則便得圓成。此一念真信所關係者。豈淺淺哉。苟非障道緣薄。生死業輕。久種善根。宿因深厚者。何以能爾。然吾人無量劫來。業力輕重。善根深淺。皆莫得而知。但業力由心轉變。善根在人栽培。是故宏法者。不得不善巧方便。懇切開示。而學道者。不可不竭力奮勉。勇往直前。但一言入耳。一念動心。皆可轉變業力。皆能栽培善根。雖聞種種緊要開示。都無一言所入。雖遭種種逆順境界。曾無一念奮發。是爲真業力深重。真善根輕。則亦莫可如何也矣。現前一念心性。本與佛同體。佛已久悟。而我

猶迷。佛雖已悟。亦無所增。我雖猶迷。亦無所減。佛雖無增。以順性故。受大法樂。我雖無減。以背性故。遭極重苦。佛於同體心性之中。雖受法樂。以同體大悲。無緣大慈。念念憶念於我。念念攝化於我。我於同體心性之中。雖遭衆苦。不知仰求於佛。不知憶念於佛。但唯逐境生心。循情造業。曠大劫來。五逆十惡。種種重業。何所不造。三途八難。種種大苦。何所不受。言之可慚。思之可怖。設今更不念佛。依舊埋頭造種種業。依舊從頭受種種苦。可不愧乎。可不懼乎。今且知佛以大慈大悲。於念念中憶念攝化於我。則我今者深感佛恩。故應念佛。一向長劫枉受衆苦。欲求脫苦。故應念佛。已造之業。無可如何。未來之業。可更造乎。生慚愧心。故應念佛。同體心性。既曰本有。即今豈無。祇欠悟證耳。求悟心性。故應念佛。以求悟心念佛。念佛必切。以慚愧心念佛。念佛必切。以畏苦心念佛。念佛必切。以感恩心念佛。念佛

必切。我不念佛。佛尚念我。我今懇切念佛。佛必轉更念我矣。大勢至菩薩云。十方諸佛憐念衆生。如母憶子。子若逃逝。雖憶何爲。若子憶母。如母憶時。母子歷生。不相違遠。若衆生心。憶佛念佛。現前當來必定見佛。去佛不遠。不假方便。自得心開。此大士親證實到境界。吐心吐膽相告語也。我今念佛。必得見佛。一得見佛。便脫衆苦。即開悟有期。果得開悟。便可一痛洗已往之慚愧矣。佛尚可不念乎。

一切衆生本來是佛。真心本有。妄性元空。一切善法。性本自具。但以久隨迷染之緣。未斷元空之妄。未證本有之真。善本具而未修。佛本是而未成。今欲斷元空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。無如持名念佛之一行矣。以能念之心。本是全真成妄。全妄即真。所念之佛。亦本全德立名。全名即德。能念心外。無別所念之佛。所念佛外。無別能念之心。能所兩

忘。心佛一如。於念念中。圓伏圓斷五住煩惱。圓轉圓滅三雜染障。圓破五陰。圓超五濁。圓淨四土。圓念三身。圓修萬行。圓証本真。而圓成無上妙覺也。一念如是。念念皆然。但能念念相續。其伏斷修證。有不可得而思議者矣。以是全佛之心。念全心之佛。實有自心果佛全分威德神力。冥熏加被耳。一句佛號。不雜異緣。十念功成。頓超多劫。於此不信。真同木石。捨此別修。非狂即痴。復何言哉。復何言哉。

問。諸方皆有淨土。何專讚西方。求願往生耶。答。此非人師意也。乃金口誠言。分明指示故。大乘顯密諸經。同指歸故。令初心人專注一境。三昧易成故。四十八願爲緣。緣強故。十念爲因。因勝故。佛與衆生。偏有緣故。此土衆生。無論僧俗男女老幼善惡之人。當其處極順逆苦樂境緣之時。多必由中而發。衝口而出。念佛一聲。然不念佛則已。凡念佛必念阿彌陀佛。此誰使之然。蓋衆生久蒙佛化。久受佛恩。與佛緣



深故也。且此彌陀一經。羅什最初譯成。東林遠祖。即與一百二十三人。結社念佛。其一百二十三人。以次漸化。臨終皆留瑞應。雖鸚鵡。八  
八兒念佛。化時皆有瑞相。此非衆生與佛緣深。謂之何哉。又無量壽經  
云。當來經道滅盡。我以願力。特留此經。更住百年。廣度含識。夫不  
留他經。而獨留此經者。豈非以此法門。下手易而攝機普。入道穩而獲  
益速耶。以是而知。其時愈後。此法愈當機矣。

世間衆生。當處急難痛苦之時。嗥叫父母。呼天喚地。不知父母人天王  
等。不能救我生死。盡我輪迴。以其同在生死輪迴故耳。三乘聖人。雖  
出生死。無大悲心。無益於我。諸菩薩等。雖有大慈悲心。以其心證各  
有分限。未能普利衆生。滿一切願。十方諸佛。雖皆證窮法界。然我感  
之不易。縱感極而見。不過暫時離苦。終非究竟。唯阿彌陀佛。但得一  
見。即頓脫生死。永斷苦根矣。唯此一句阿彌陀佛。是所當盡心竭力者

。予曾有偈云。世間出世思惟徧。不念彌陀更念誰。然而念佛不難。難於堅久。果能堅持一念。如生鐵鑄成。渾鋼打就。如一人與萬人敵。千聖遮攔不住。萬牛挽不回頭。如是久之。必能感通相應。若其未能如此用心。便謂佛言無驗。佛心難感者。夫豈可哉。但得一念感通。便頓出生死。直登不退。穩成佛果。豈易事也哉。

知小而不知大。見近而不見遠者。此衆生之常分也。如阿彌陀佛。於諸衆生。有大恩德。衆生不知也。佛於無量劫前。對世自在王佛。普爲惡世界苦衆生。發四十八種大願。依願久經長劫。修菩薩行。捨金轉輪王位。國城妻子。頭目腦髓。不知其幾千萬億。此但萬行中內外財布施一行也。如是忍人所不能忍。行人所不能行。圓修萬行。力極功純。嚴成淨土。自致成佛。分身無量。接引衆生。方便攝化。令生彼國。然則如爲一人。衆多亦然。如爲衆多。一人亦然。若以衆多觀之。佛則普爲一

切衆生也。若以一人觀之。佛則專爲我一人也。稱性大願。爲我發也。長劫大行。爲我修也。四土爲我嚴淨也。三身爲我圓滿也。以致頭頭現身接引。處處顯示瑞應。總皆爲我也。我造業時。佛則警覺我。我受苦時。佛則拔濟我。我皈命時。佛則攝受我。我修行時。佛則加被我。佛之所以種種爲我者。不過欲我念佛也。欲我往生也。欲我永脫衆苦。廣受法樂也。欲我展轉化度一切衆生。直至一生補佛而後已也。噫。佛之深恩重德。非父母所可比。雖天地不足以喻其高厚矣。非聞開示。安知此意。不讀佛經。安曉此理。今而後。已知之矣。唯有竭力精修。盡報歸誠。拚命念佛而已。復何言哉。

一切衆生。爲利鈍十使所使。久經長劫。流轉生死。受大苦惱。不能出離。可悲也。十使者何。即身。邊。邪。見。戒。此五爲利使。以發動輕便。故貪。瞋。癡。慢。疑。此五爲鈍使。由利使所生。對利說鈍故

。此之十使。衆生或多或少。各有偏重。若帶之修道。但唯增長邪見煩惱。決無相應分。如欲斷之實難。以此十使。於四諦下歷三界九地。有八十八使見惑。八十一品思惑。但斷見惑。如斷四十里流。况思惑乎。若見思二惑。毫髮未盡。分段生死。不能出離。此所謂豎出三界也。甚難甚難。然此十使。總名衆生知見。古德謂衆生知見。須以佛知見治之。佛知見者。即現前離念靈知也。然此靈知。不能孑然自立。必隨緣起。不隨佛界之緣。便隨九界緣起。離十界外。無別緣起故。欲隨佛界緣起。無如以信願心。持佛名號。但信貴深。願貴切。持名貴專勤。果以深切專勤之心。信願持名。即是以佛知見而爲知見。亦即是念念中。以佛知見。治衆生知見也。熾然十使心中。但置一信願持名之心。即轉生界緣起。爲佛界緣起。此於修道門中。乃點鐵成金極妙之法耳。只須赤體擔當。久久勿替。管取金臺可以坐待。寶蓮不日來迎。是爲從此同居

。生彼同居。橫出三界。較之豎出者。不亦省力也哉。

一句阿彌陀佛。是阿伽陀藥。無病不療。是如意珠王。無願不滿。是生死苦海之慈航。無苦不度。是無明長夜之慧燈。無暗不破。但得一歷耳根。便爲有緣。但能一念信心。便可相應。信心果真。願不期發而自發。只將此信願二法。常存在心。如忠臣之奉明君密旨。孝子之受慈父嚴命。憶念不忘。作爲第一件要事。不論所處境界。靜鬧閒忙。多念少念。總皆爲往生正因。只恐把作近似間耳。（或作只恐介在勤怠間耳）吾人曠大劫來。久在輪迴。豈永不發求出離之心。修向道之行耶。皆廢於因循。敗於怠惰。所以常在生死。受大苦惱。今聞持名簡要法門。若仍循故轍。安於覆敗。可謂第一等無血性漢子矣。

所謂執持名號者。即拳拳服膺之謂。謂牢持於心而不暫忘也。稍或一念間斷。則非執持也。稍或一念夾雜。則非執持也。念念相續。無雜無間。

。是真精進。精進不已。則漸入一心不亂。圓成淨業焉。若到一心不亂。仍復精進不輟。將見開智慧。發辯才。得神通。成念佛三昧。以至種種靈異瑞相。皆現前矣。如蠟人向火。薄處先穿。但不可預存期効之心。唯當致力於一心不亂耳。一心不亂。乃淨業之歸宿。淨土之大門。若未入此門。終非穩妥。學者可不勉哉。

修習一切法門。貴乎明宗得旨。今人但知萬法唯心。不知心唯萬法。但知心外無佛。不知佛外無心。但知無量爲一。不知一爲無量。但知轉山河大地歸自己。不知轉自己歸山河大地。然既不知心唯萬法。豈真知萬法唯心哉。既不知佛外無心。豈真知心外無佛哉。所謂一個圓球。劈作兩半。離之則兩傷。合之則雙美也。是故念佛者。必以唯佛唯土爲宗。若唯佛唯土之宗不明。則真唯心義不成。果透真唯心義。則唯佛唯土之宗自成。既成此宗。則一句所念之佛。所生之土。全體大用。橫徧豎窮。

。獨體全真。包羅無外。所念既爾。能念亦然。是謂以實相心。念實相佛。以法界心。念法界佛。念念絕待。念念圓融。以絕待故。全超一切法門無與等者。以圓融故。全收一切法門。無出其外者。此之謂法無定相。遇緣即宗。繁興大用。舉必全真。一句阿彌陀佛。須恁麼信。恁麼念。方是不思議中不思議也。

生佛不二。平等共有者。唯此現前離念靈知耳。諸佛以隨悟淨因緣。悟之又悟。淨之又淨。悟淨之極。故其靈知徧豎窮。廣大無外也。衆生以隨迷染因緣。迷之又迷。染之又染。故其靈知局然促然。介爾微劣也。然即此介爾靈知。與諸佛廣大靈知。覲體不二。毫髮無差。使其得隨悟淨之緣。業盡情空。則此介爾之知。當下轉爲廣大無外之靈知矣。如一星之火。能燒萬頃荒田。然此現前一念靈知。若約所知之境。固有廣狹勝劣之不同。若約能知之知。則全體無異。如同一火也。燒檀則香。

燒糞則臭。所燒雖殊。能燒之火無二。又如同一水也。清濁不同。同一鏡也。昏明有異。清濁雖殊。溼性不二。昏明雖異。光體是同。水同一溼也。濁者可使澄之而清。鏡同一光也。昏者可使磨之而明。光昏者爲帶垢耳。垢非光。光者鏡之本體也。水濁者爲雜塵耳。塵非溼。溼者水之本性也。此一念靈知。如水之溼。如鏡之光。如火之燒。舉體無異者也。唯其舉體無異。故於修道方便門中。便有多門。有但仰慕諸聖者。有但尊重己靈者。有外慕諸聖內重己靈者。有不慕諸聖不重己靈者。若但仰慕諸聖者。如本分念佛之人。以知諸聖皆已先證我之己靈。語默動靜。皆堪垂範。我曹若不仰慕諸聖。則進修無路矣。故或專持名號。或觀想音容。三業虔誠。六時敬禮。傾心皈命。盡報傳承。及乎時至緣熟。感應道交。心地大開。靈光獨露。乃知我之己靈。原與諸聖平等無異。亦不可不自尊重也。又但尊重己靈者。如宗門參禪者。以直指人心。



見性成佛。故唯欲十二時中。四威儀內。獨露當人面目。受用本地風光。離心性外。毫無取著。所謂任他千聖現。我有天真佛也。及乎造詣功深。悟證已極。乃知一切諸聖。皆久已先證我之已靈者。尤不可不仰慕也。又外慕諸聖內重已靈者。夫欲尊重已靈。必須仰慕諸聖。唯其仰慕諸聖。正是尊重已靈。又仰慕諸聖。必須尊重已靈。若不尊重已靈。豈能仰慕諸聖。此則內外交修。心佛等重。既無偏執。進道彌速。至於力極功純。全體相應。乃知諸聖。但不過先證我之已靈而已。無庸仰慕。而我已靈者。亦不過平等齊於諸聖而已。何勞尊重。又不慕諸聖。不重己靈者。此謂寸絲不挂。心佛兩忘。徹底撒開。迴無依倚。外遺世界。內脫身心。一念不生。萬緣坐斷。至於久久功熟。圓滿證入。本靈獨露。諸聖頓齊。雖不仰慕諸聖。乃善仰慕。雖不尊重已靈。却真尊重。此之四路。學者自諒根性。各隨好樂。但當一門深入。久之必皆有相應。

切不可妄生執着。輕發議論。出奴入主。是一非餘。不唯背妙道而成障礙。將恐謗大法而招愆尤也矣。

楞伽經云。諸聖所知。轉相傳授。妄想無性。二祖云。覓心了不可得。起信論云。若有能觀無念者。即爲向佛智故。華嚴合論云。頓悟一念緣起無生。超彼三乘權學等見。此佛經祖語。菩薩知識造論。皆就現前一念指點。顯妄性本空也。夫妄本空而真本有。非佛而何。但衆生久隨污染之緣。未能頓復其本空耳。須以清淨緣起。漸而轉之。以吾即佛之因心。念吾即心之果佛。因果從來交徹。心佛法爾一如。而吾即心之果佛。無緣大慈。同體大悲。本自不可思議且吾即佛之因心。深信切願。專懇持名。亦復不可思議。能於念念中。齊澄衆染。圓顯本空頓契靈源。直趣果海。然則清淨之緣。無過此者。但於念時。當萬緣放下。一念單提。如救頭然。如喪考妣。如雞抱卵。如龍養珠。不期小效。不求速成。

。但只一心常恁麼念。是名無上深妙禪門。此則根身世界。密隨其心。念念轉變。殆非凡心肉眼。所能知見者也。及乎報終命盡。彌陀聖衆。忽現在前。或現異香天樂。諸靈瑞相。世人方謂淨業成就。然淨業之成。豈此時乎。

念佛當生四種心。云何爲四。一無始以來造業至此。當生慚愧心。二得聞此法門。當生欣慶心。三無始業障。此法難遭難遇。當生悲痛心。四佛如是慈悲。當生感激心。此四種心中有一。淨業即能成就。念佛當長久。不可間斷。間斷。淨業亦不能有成。長久當勇猛。不可疲怠。疲怠。淨業亦不能成。長久不勇猛。即有退。勇猛不長久。即無進。

當念佛時。不可有別想。無有別想。即是止。當念佛時。須了了分明。能了了分明。即是觀。一念中止觀具足。非別有止觀。止即定因。定即止果。觀即慧因。慧即觀果。一念不生。了了分明。即寂而照。了了分

明。一念不生。即照而寂。能如是者。淨業必無不成。如此成者。皆是上品。一人乃至百千萬億人。如是修。皆如是成就。念佛者可不慎乎。

夢東禪師遺集 卷中

門人  
喚醒  
了審輯錄

雜著

般若淨土兩門大義

般若。乃即緣起而明性空。雖性空而不壞緣起。淨土。乃即性空而明緣起。雖緣起而不礙性空。此則空有兩門。互不相礙也。不特於此。正以緣起故性空。若非緣起。說誰性空。此則緣起爲性空之所以。又以性空故緣起。若非性空。何從緣起。此則性空爲緣起之所以。若然者。空有兩門不但不相礙。且復迭互相成矣。即古所謂萬象參天。觀之而無色。羣音揭地。聽之而無聲。愈有愈空。愈空愈有者矣。夫緣起性空。既在同時。任運便有雙泯雙存之面目。雙泯雙存。同時無礙。即是向上圓融不思議第一義諦。圓融第一義諦。即是當人本源心性之異名。是知佛說種種般若門。無非顯示此本源心性。佛說種種淨土門。亦無非顯示此本

源心性。從本源性。流出種種般若淨土法門。而種種般若淨土法門。皆悉指歸本源性。所謂無不從此法界流。無不還歸此法界也。昔有人問雲棲大師云。參禪念佛。如何得融通去。大師答云。若然是兩物。用得融通著噫。旨哉言乎。夫禪者淨土之禪。淨土者禪之淨土。本非兩物。用融通作麼。然則般若淨土兩門。既唯一本源性。不唯分無可分。亦且合無可合。分合尚著不得。况可更論其相成相礙也哉。

### 西有解

西有者。謂西方的的是有。但含事理空有等種種義相耳。若謂定方實有。不可移易。此凡情執着之常有也。若謂一切境界。循業發現。即其現處。當體全空。此則非有而有。有即非有。真空妙有二諦交徹之有也。若互奪雙亡。二諦俱泯。則非空非有之有也。若相成兩立。二諦俱存。則即空即有之有也。若正雙泯時。便雙存。正雙存時。便雙泯。雙泯雙

存同時無礙之有也。又此有緣起性空。不墮有句。性空緣起。不墮空句。二義只成一法。不墮亦有亦空句。一法宛具二義。不墮非有非空句。此則四句全超之有也。又此有性空緣起。該得有句。緣起性空。該得空句。二諦雙存。該得亦有亦空句。二諦俱泯。該得非有非空句。此則四句全該之有也。又唯全超故全該。設有一句不超。亦不能全該四句。唯全該故全超。設有一句不該。亦不能全超四句也。此則圓教有門之有也。又西方依正莊嚴。皆一切衆生性所本具。特借彌陀大願爲增上緣因。一顯發耳。曾何片法之新得哉。此則西有者。乃自性本具真善妙有之有也。又有句固是有句。有句亦是空句。有句亦是亦有亦空句。有句亦是非有非空句。一句即四句也。一句既即四句。四句亦即一句。有句固是有句。空句亦是有句。亦有亦空句亦是有句。非有非空句亦是有句。全一即四。全四即一。一四圓融。不可思議。又此有空等四句。執之則成

四種邪見。通之則爲四方便門。執成邪見網。永墮外道種族。通爲方便門。便入聖賢階位。故曰。般若如大火聚。觸著便燒。此謂四邊不容執著也。又曰。般若如清涼池。隨方可入。此謂四門皆堪入道也。然全大火聚是清涼池。非離火聚別有涼池。全涼池是大火聚。非離涼池別有火聚。所謂毫釐有差。天地懸隔。毫釐無差。天地懸隔也。

### 相相離相心心印心略解

原夫境逐念生。念泯則相相離相。妄依真起。達真則心心印心。惟其離也有相皆歸實相。即斯印矣。無心不屬真心。是以滯相迷真。頭頭障礙。背塵合覺。法法圓通。心相大端。略申管見。精微詳釋。以俟多聞。

### 華嚴經節略要旨

大方廣佛華嚴經者。乃毗盧遮那如來。於菩提場。初成正覺。七處九會。一音頓演。稱性法門也。按西域記。此經有三本。上中二本。其偈品



以世界微塵論。下本猶有十萬偈。四十八品。結集之後。收入龍宮。以上中二本。非閻浮提人心力能持。故龍樹大士。但於龍宮記出此本。流布人間。而經來此土。有晉唐兩譯。佛陀波陀羅所譯。六十卷。三十四品。唐實叉難陀所譯。八十卷。三十九品。即今經也。然文雖未備。義已周圓。神而會之。存乎其人。文中前後。共有七處九會。古德判爲五周四分。曲盡精詳。今古同遵焉。第一會說毗盧遮那如來依正因果法門。經文凡十一卷。六品。即四分中舉果勸樂生信分。五周中所信因果周也。此中因果。乃聖位中修證之圓因妙果。非善惡因果之謂也。後皆倣此。其次六會。以次說十信十住十行十回向十地等妙二覺法門。共四十一卷。三十一品。即四分中修因契果生解分。五周中差別因果。平等因果二周也。第八一會。說離世間法門。普慧雲興二百問。普賢瓶瀉二千酬。重明因果行相。共七卷。一品。即四分中託法進修成行分。五周中成行因果周也。第九一會。有本有末。初如來現

相放光。具答諸菩薩心念所請果海中事三十問。令其現證。爲本會。後文殊於福城東際大塔廟前。令六千比丘頓證十信滿心。指善財童子南參諸善知識。爲末會。共二十一卷。一品。即四分中依人證入成德分。五周中證入因果周也。以前三十八品。雖廣談法界因果。但令生信開解起行造修。至此。方始證入。苟無此證。前之信解行俱爲虛設。故以證終焉。詳夫全經之大旨。統惟一真法界焉。蓋圓該萬有。唯是一心。觀體全真。融通交攝。是爲諸佛極證之果海。亦即衆生本有之心源也。然法界勢含四重。謂理法界。事法界。理事無礙法界。事事無礙法界也。重重無盡。因果緣起六位。即前信。住。行。向。地。等。妙。二覺位位圓融。圓融不礙行布。行布於圓融。差別非離平等。平等其差別也。初則舉法界而全成因果。萬德萬行昭然。後乃融因果而混同法界。一毫一塵廓爾。雖四重六位有殊。隱顯開合無定。而原始要終。究不離乎一真法界。故曰無不從此法界流。無不還歸此法界也。是以一心萬法。

舒卷自由。三際十方。縱橫無礙。十世古今互現。無邊剎境交羅。猶帝網之千珠。光含衆影。類天池之一滴。味具百川。故界標華藏。具見染淨之融通。而佛號毗盧。直示應真之不二。五周四分之金文。瀾翻於口海。六相十玄之妙旨。星燦於義天。可謂教啟無上圓宗。法窮甚深理窟者矣。故得若聞若見。圓文殊智鑒於自心。或誦或持。啟普賢行門於徧界。人人入金剛之藏。塵塵樹功德之林。直得一生事辦。則我即善財。唯但使法界願周。而誰非淨滿。經云。此經不入一切餘衆生手。論云。唯付囑最上大心凡夫。斯言豈無謂哉。故知排斥久修開士。聾瞽上德聲聞。是皆所以融權執。引大心之深意也。然則食金剛之少許。固已植乎聖因。剖大經於微塵。終有待夫智者。况一字法門。海墨書而不盡。千重樓閣。指聲彈而頓開。非貝葉之所能詮。豈管窺可得而測。謬承叱命。愧乏精思。勉述大端。聊備采覽云爾。

如欲詳明者。藏中有清涼觀國師疏鈔。棗柏李長者合論。其疏盡精微。冲深包博。而論得大體。痛快直截。二者參而觀之。則華嚴大旨。無餘蘊矣。

### 楞嚴二決定義

初義蓋示根中之湛性爲真因。真因得而後果證可期。二義蓋指根中之結相爲惑本。惑本明而後斷修有要。湛性者。六根之性也。不變之真也。結相者。六根之相也。隨緣之妄也。斯則唯一六根。特相妄性真之別耳。惟其相妄。故須解之令盡。惟其性真。故可依而爲因。然真既不變。則妄即本空。而妄既緣起。則真必全隱。約妄緣起而真全隱。修德固不可缺。且真不變而妄元空。性德尤所當明。性德固資修德而顯。修德全依性德而成。合二門之義而觀之。則真妄交融。性修雙妙之旨。無餘蘊矣。然則推此而往。根身世界。物物頭頭。真也妄也。圓陀陀。活潑潑

。渾無定相。云爲動作。心心念念。性也修也。淨灑灑。赤裸裸。了無定執。夫如是則何惑不斷。何果不成。而實亦無斷無不斷。無成無不成。特對迷心倒見者強分別耳。

### 楞嚴頓歇漸修說

前云汝但不隨分別三種相續。狂性自歇。歇即菩提。何藉劬勞肯綮修證。似令一念頓歇也。此云菩提涅槃。尚在遙遠。非汝歷劫辛勤修證。雖復多聞。祇益戲論。似令歷劫漸修也。阿難之根。不劣於滿慈。而滿慈之位。差勝於阿難。何其修證難易之相懸若是耶。此蓋世尊據念劫圓融之理。頓漸不二之宗。顯妄空以奪法執。斥徒聞而策真修。即所謂看孔著楔。應病與藥也。試論之。一念歇狂。頓也。不了則流爲長劫。歷劫勤修。漸也。究亦不離于一念。此念劫頓漸。似相懸而實不離也。況乃念性元空。時節無體。迷時似有隔異。悟後本自圓融。一念本不殊長劫

。而長劫原祇是一念。復何念劫頓漸之可疑哉。向使滿慈不索妄因而執實有。阿難不溺多聞而廢進修。則世尊頓歇漸修之說。亦不容拈出矣。

楞嚴經知見無見說

楞嚴經知見無見一語。至爲要妙。總攝一切諸要妙句。以其即是見猶離見也。華屋之門也。狂心頓歇也。不取無非幻也。聞復翳根除也。歸無所得也。滅妄名真也。全修在性也。覓心了不可得也。心空及第歸也。子轉身而就父也。臣退位以朝君也。父子投機也。君臣道合也。以少方便疾得成佛也。緣起無生也。知之一字衆妙之門也。剎那而登正覺也。體得無心道也。休也。諸聖所知。轉相傳授。妄想無性也。一超直入如來地。回頭慚愧好兒孫也。自是不歸歸便得。故鄉風月有誰爭也。撒手到家何所似。更無一物獻尊堂也。知而無知。不是無知而說無知也。即此見聞非見聞。無餘聲色可呈君也。根既不立。塵無所緣。根塵兩亡。

靈光獨耀也。類此句義。不能盡舉。唯此四句。攝盡無餘。所謂緊要處。佛法無多子也。果能一念相應。是爲真轉全經。古德如慈明圓。權大道。棲賢舜。廣道者等諸人。於大見道後。皆作此工夫。謂之無心體道。以其是還鄉要路。歸真秘訣也。

### 金剛經實無有法發菩提心說

金剛經圓明五眼。洞徹三心一段。乃解上文實無有法發菩提心者之義。謂衆生所以爲衆生者。爲有妄心故也。三心既不可得。衆生豈復可得。衆生不可得。誰爲能發之人。三心不可得。何爲所發之心。故曰實無有法。發菩提心者。又妄心不可得。則全妄即真。衆生不可得。則全生即佛。果見到全妄即真。全生即佛。是爲不發而發。稱性開發阿耨多羅三藐三菩提心。如此發心。何更有法可得。故曰實無有法。發菩提心者。

### 一乘決疑論說

欲得不招無間業。莫謗如來正法輪。此古德大慈悲心淚出痛腸語也。良以我釋迦如來。爲衆生故。修證此法。無央數劫。行諸一切難行法行。捨所愛之國城妻子。頭目腦髓。不知其幾萬千億。至於道成。仍以平等大悲。順悉檀義而敷衍之。故凡一句一字。皆無明長夜之寶炬。生死苦海之慈航。凡在有情。孰不蒙益。而諸子以依違之見。肆口詆呵。障正法門。瞎將來眼。疑誤衆生。殊非小小。謂其無罪。寧有是處。茲以一乘之理。剖決羣疑。正大光明。直截痛快。蕩迷雲而淨盡。耀佛日以重光。誠爲法門一大金湯矣。當是時也。諸子天眼法執。果得已通已忘。自能深生隨喜。正使未忘未通。定當頓獲勝益。故知此論之作。非特有益於法門。實則有益於諸子。不唯有益於諸子。且深有益於天下後世之學者。請即流通。以廣法施。

禮佛說



趙州古佛。城東老姥。戒慎乎其所不聞。恐懼乎其所不睹。固是眼同千日。耳如幽谷。卻不解道無固必。又何妨因我禮汝。今將垂範後昆。卻乃調翻前古。雖似截鶴續鳧。然亦不無小補。忽有個傍不甘的。搖手道何苦何苦。彼既一十。汝乃二五。某應之曰。一棚傀儡大家舞。

### 紅螺普陀塔說

沙門者。學死者也。夫四大如幻。五蘊性空。生本不生。死本不死。是之謂不生不死。達此者之謂無生。契此者之謂涅槃。是謂參學事畢。所作已辦。生。幻也。死。幻也。涅槃亦幻也。以幻塔而藏幻骨。是謂收因結果。了幻中之幻。經云。知幻即離。不作方便。離幻即覺。亦無漸次。恰與理合。著此骨堆。不唯無我。即骨堆亦空。了此則證四聖。昧此則墮六凡。是知生佛十界。均不外此骨堆耳。本色道人。觸此骨堆。定能於百骸未散時著眼。四重淨土。何土也。九品蓮臺。何臺也。生此

上。登斯臺。受大法樂。得大自在。而於得生本起宿因之地。能無一念

及乎。

嘉慶丁卯  
秋重九日

### 個菴老人生塔說

諸緣無性。生從何來。大地絕塵。塔將安寄。無生之生。色身法身不隔。非塔而塔。七尺八尺何妨。直饒如斯會取。要與老人相見。猶似蘆溝橋上望潼關。尚大遠在。况夫必待頑石高豎。幻蹟詳陳。縛見聞於影響。塗眉目於虛空。認假相假名爲實法。執一事一行而論人。竊知老人之頭。將不屑於橫點矣。或曰。子作是說。理固善矣。然則建塔植樹。非老人之意歟。得毋過尊而失其實。余曰。不然。獨不聞古有修無縫塔。栽無影樹者乎。借巧樣於鄰菴。垂嘉訓於末學。實一時之偶合。亦千載之佳話也。或人笑曰。無縫塔。何塔也。無影樹。何樹也。乃以此塔此樹而擬之。何迂謬之甚也。噫。是不唯不識無縫塔。無影樹。即此塔此

樹。亦何嘗識。正所謂執相徇名者也。試一於此澄心斂念。審諦觀之。所謂無縫塔無影樹者。其果離此塔樹爲別有耶。抑亦即此塔樹而便是乎。如是諦觀久之。必大有以發明。至彼此即離之凝滯。廓然而盡。自親見老人首肯是說於言象之表矣。或人退。遂以是說質諸老人。老人笑而不答。命勒之塔末。

### 闡教禪師塔銘

師諱通理。字達天。家直隸新河。族趙氏。父名士公。嘗閱大藏。母白氏。敬事三寶。師生鬢黻之年。投本邑妙音鐸師薙染。從祖顯如珍公受學。年十一。侍顯至檀越家。值衆僧誦法華經。師隨誦之。若宿習然。舉衆稱異。謂再來人也。至年十九。禮岫雲德彰律師稟具足戒。遂依座下學律。未幾辭去。徧遊講席。謁衍法元香崑來等諸老宿。皆以大器期之。雍正三年乙巳。居妙峯石草精舍。撰法華新疏。至方便品初。疑情

頓發。執筆經旬。一詞難措。偶讀經至如是相處。恍然大悟。回觀諸經。向所疑滯者皆洞然矣。歲庚戌。出世遺光。一住二十餘年。道風大振。乾隆辛未。受檀那請。開法於嘉興寺。居無何。復領香界之命。甲申。修三山菴爲休老所。遂有終焉之志。丙戌夏。皇六子質王力挽復出主拈花寺。師受濟北密印於古梅成禪師。傳賢宗教觀於永祥煥法主。城市山林。歷遷四刹。皆以苦心實行爲住持。著述講演爲佛事。乘戒俱急爲策進。福慧圓修爲自宗。兼復善開喻而接納不倦。故四方學者。奔赴恐後。爰以道聲日著。上達宸聰。於辛卯冬仲。賜紫色伽黎以旌異之。壬辰。開清字譯館翻大藏諸經。師統三宗。通曉經旨。沙門日於館所講證大義。庚子冬。復蒙勅旨。封闡教禪師。時年八十矣。辛丑。盡出衣鉢之資。修華嚴於永安塔。次年夏。示微疾。至六月十三日集衆告別。泊然而逝。師生於康熙辛巳。世壽八十二。僧臘六十有三。門弟子奉全身

塔於永安塔前。師貌溫和。氣剛果。質體豐厚。慧解過人。持身尚儉約。不憚勞苦。所至輒有興建。處順逆之際。操行無少變。有古尊宿風。住遺光嘉興日。敗壁頽垣。殊不介意。日與學者坐瓦礫堆中。激揚法華楞嚴等要旨。行道垂六十年。戒傳十四期。說法三十餘會。居常除齋粥蒞衆外。便焚香註經。執筆輒竟日。若忘人間世。臨示寂。猶命弟子取圓覺新疏稿讀之。師危坐靜聽。恐錄者或有訛脫也。其生平著述。珍重可知矣。晚年嘗語人曰。老僧別無長處。特六十餘年未離佛法耳。蓋誠諦語也。有法華等六疏行世。嗣法弟子若干人。多唱教一方者。拈花懷公。師之高弟也。乙巳春。具行狀以塔上之銘見囑。余惟法華經藏深固幽遠。惟佛與佛。乃能究盡。而况末法宏經此土尤難。自非靈山得記之人。無敢發是願者。今也不讀成誦。一悟大通。盡形壽以闡揚。廣流通而著述。於戲。師其地湧衆中之一耶。抑爲如來所使之人乎。不然。亦

必白毫光中。以無量喻。爲衆講法。修菩薩行而求佛道者也。故焚香叉手。敬爲銘曰。

道本無迷。人自不悟。佛降西乾。教流東土。文字性離。體即般若。非證罔通。知音蓋寡。一會靈山。儼然未散。與麼現前。豈拘禪觀。指點鏡燈。卷舒華藏。廣大門風。何慚向上。師其適生。千年之後。跡踵天台。家世賢首。披忍辱衣。坐法空座。秉願宏經。垂老不墮。名刹四遷。殊恩兩被。燄續輝聯。雲凝花墜。塔影高標。真身不滅。萬象森羅。熾然常說。

重修中天寺十方常住碑記

原夫插莖草以建梵刹。坐微塵而轉法輪。事是恁麼事。人須恁麼人。余於同學友人銷塵法師見之矣。法師幼脫白於武清邑東北孝力觀音寺。具戒後。依增壽慧岸道翁法主習性相宗。遂蒙印可。未幾歸受業事師。理

院務有年。以道義聞。孝力村東八里許有寺名中天。門近通衢。頽廢日久。唯基址尚存。法師過而有感。願爲興復。遂捐資倡募。鳩工集材。親董厥事。歷十餘年方始落成。曰佛殿。曰懺壇。曰僧堂。曰丈室。以及客寮雲廚十方旦過。凡叢林所宜有者咸備焉。復置地若干頃。用充香火。爲檀那無盡福德藏。工既竣。丐余文記其事。且曰。將請一名德法師主之。宣演教乘。接待雲水。如法熏修。隨緣津濟。使吾佛大法流通。與邦人結出世緣。作永永傳賢之所。而剃度無與焉。噫。大哉行願。不啻與日月爭光矣。維法師數年苦行。一片血心。不惜勞瘁。不私眷屬。唯汲汲然以上續慧命。下廣福田爲務。且復功成不居。卑以自牧。尊賢重法。宏護唯誠。此豈南閩浮提後五百歲可多得之事耶。夫佛性之在衆生。如水之在地。鑿而汲之以廣利濟。要待其人。經不云乎。諸佛兩足尊。知法常無性。佛種從緣起。是故說一乘。又曰。凡有聞法者。無

一不成佛。以是故知中天此舉。乃普與一切見聞隨喜者。深植菩提種子。頓了大事因緣也。今而後凡居斯位者。當必以法師之心爲心。以法師之行爲行。庶幾元風不墜。慈化日隆。其益塵寰而垂來劫。有不可得而限量者。抑又須知如上所示招提種種莊嚴。種種利益。咸於法師偶然感發一念心中。圓滿成就。初無欠少。雖後數年種種措辦。特不過完此最初一念而已。離此念外。別更何有。萬法唯心。於茲益信。一念既爾。念念皆然。一草一塵。莫不如是。夫如是。謂建梵刹竟可謂無梵刹可建亦可。謂轉法輪竟可。謂無法輪可轉亦可。法性如是。非強爲也。然法性平等。非有自他。既法師偶有所感。能順法性入解脫門。建無可建之梵刹。轉無可轉之法輪。當必有感法師之感者。相繼而起。感復致感。感之不已。將見莖草徧插於處處。法輪大轉於塵塵。此實余所深望。而亦法師之至願也矣。爲之記。



### 壽萬壽蓮筏和尚序

和尚。余同門也。家世姑蘇。姓王氏。童年薙染。依寶華山文海律師具戒。雲水三十年。參南北知識四十餘人。末上入先師萬壽粹老人室。乃印心焉。甲午冬。出世西山普覺寺。未幾。復遷萬壽。所至雖以宗門住持。而時或兼傳戒法。數年以來。期經四建。而壇下稟受者輒千餘指。今秋重九。大戒將圓。適值和尚六旬初度之辰。其嗣法得戒諸弟子。欲順世緣。用酬法乳。炷香作禮請余爲文以祝。因而曉之曰。壽者之相。乃我執之異名。如來於圓覺般若等經。揭而斥之。其無可取也明矣。然經有云具壽。或云無量壽者。何耶。蓋具壽以戒言。重臘非重齒也無量壽以心言。依性不依形也。以戒爲壽。持之即具。以心爲壽。悟則無量。若是。則孰不可以具壽。而孰不可以無量壽乎。况因戒名僧。僧而無戒果僧乎。約心論悟。悟不了心非悟也。且夫戒也者。所以續慧命也。

戒不持則戒命無以存。心也者。所以體法身也。心不悟則法身無以顯。法身顯。我身諸佛身。同一身也。慧命存。我命衆生命。無二命也。保是身。延是命。是謂壽得其正。以之自壽壽世。則亦無不壽矣。是故應知和尚之開檀授戒。囑累傳心。是先以是壽壽諸子。諸子當妙悟自心。精持佛戒。亦還以是壽壽和尚。庶幾和尚授得其授。而諸子受不徒受也。抑又須知和尚推此壽而壽諸子。即所以壽衆生。亦所以自壽也。諸子能以此壽而自壽。正所以壽和尚。亦所以壽諸佛也。其爲壽也。不亦大乎。其爲祝也。不亦至乎。若夫一介之軀。六十之年。特空塵海漚。電光石火耳。焉用祝。諸子聞而歡喜踴躍。遂焚香散花。持是以爲壽。

淨土津梁跋

乙巳仲秋。衍法志公和尚。會刻淨土經論文集。成。囑跋數語。余因歷觀三經。明因舉果。大開淨土之門。三論。顯理破迷。的示唯心之要。龍

舒文。導初機而精詳曲盡。指歸集。采衆善於事理圓通。或問數紙。搜決禪者孤陋之疑。法語一章。力振行人因循之弊。雲棲願文。自註戒殺放生等篇。莫非往生急務。助行要門。至若蓮花世界詩。雖文出遊戲。而理實圓常。况寫境傳神。引心入觀。攝化門中爲不可少。善哉念佛一門。得此諸說。無機不被。無路不通。統萬流而歸淨土。誠爲一大津梁矣。爰爲題名曰淨土津梁。然而津梁雖設。履踐在人。撩起便行。阿誰無分。所貴賈勇先登。占寶蓮之上品。玄關直踏。獲法忍於無生。佛記早承。願輪速轉。徧刹網而縱橫應化。盡劫波以展轉津梁。則苦海勞生。由是而蒙利濟者。可復量哉。如其逐世波而忘返。趨險道以苟安。或則玩津梁而不進。守津梁以自足。不驚汨沒踰躡之苦。卒致問橋戀筏之譏。其何以慰集者之苦心。且深昧夫命名者之大義也矣。或曰。和尚秉單傳之宗。以祖道自任。當依本分直截示人。夫唯心淨土。當處現成。

自性彌陀。覲體不隔。乃爲是津梁之說。以起人心外有法。去來取捨之見乎。噫。通玄峯頂不是人間。心外無法。滿目青山。本分直截耶。去來取捨耶。於此縑素分明。許汝會唯心自性。如或未然。莫寐語好。

跋德全禪人血書蓮經

無我而靈者。佛知見也。有我而昧者。衆生知見也。生佛知見無殊。特一妄我間之耳。夫大迷之本存乎我。而我之最愛者莫過身。苟衆生之身見不亡。我執不破。則生死輪迴。曷能自己。德禪人密發九品淨願。書成七軸蓮經。以無情之霜刀。刺難出之身血。十指瀝乾。一心不動。偉矣哉。真無邊苦海中頓空我見。直出生死之勇猛丈夫也。噫。禪人初發是念。蓮華種植時也。日漸刺書。蓮花增長時也。七卷功圓。蓮花光香具足時也。如是則禪人之淨因已成矣。但當莫忘本願。繫心念佛。直待此方報謝。彼土花開。即見佛聞法。因圓果滿時也。雖然。即今試問禪

人。方金刀裂肉。血筆縱橫時。其知疼痛而成點畫者。靈耶昧耶。我耶非我耶。佛知見耶。衆生知見耶。於此了然。則佛國非遙。寶蓮正放。或猶未也。請分明記取。以質諸彌陀老子。

### 跋明初禪人血書蓮經

金刀未舉。斑管未拈。盡十方是部血淋淋的妙法華經。於斯見徹。謂靈山一會未散可也。謂靈山一會本不曾會亦可也。向當時喝散可也。於今日再會亦可也。大用現前。不存軌則。如王寶劍。殺活臨時。如是刺血。如是書經。是真精進。是真法供養如來。可以暢本師出世之懷。可以來古佛泥洹之塔。直令十二類生。迎刃而命根頓斷。無邊法藏。點筆而文彩全彰。莫不滴滴歸源。言言得髓。奚止刺無能刺。書無所書。鋪好花於錦上。指明月於天邊也哉。明禪人年齒尚少。向道唯誠。刺血書經。皈心樂土。果能聞是說而不生驚怖。是爲解第一義。上品生因。如

其未然。直須十二時中。四威儀內。以書經之念。念念忘緣。刺血之心。心心憶佛。管取金臺可以坐待。妙諦不日親聞。否則必見我爲能書。經爲所書。彼是刺血時。彼是書經處。以生滅心。取實相法。轉不輕行。爲我慢幢。不特全迷妙法。遠背佛心。且深負此一點百劫千生不易發起之勇猛淨信。爲可惜矣。禪人其勉之。

跋禪人勇建血書楞嚴經莊嚴淨土

首楞嚴者。稱性大定之名也。以如來藏心而爲體性。以耳根圓通而爲入門。以窮極聖位而爲究竟。此依藏性之理。起稱性之行。還復證入藏性全體。一經大旨。義盡於斯。故文殊於是請結經名。此後復明昧此難免七趣沉淪。修此須防五魔擾亂者。但反觀正宗。以補足其間要務耳。經中兼明淨土。其處有四。第一大勢至法王子。親稟念佛法門於超日月光佛。其所陳念法。至爲切要。而大士修因契果。自利利他。唯以念佛。

皆悉具足。第二乾慧地中云。現前殘質。不復續生。夫乾慧地。雖圓伏五住。見思尚猶未斷。何以便不續生。蓋超同居穢土。生同居淨土矣。智者大師是其明證。第三情想昇沈中云。純想即飛。便生天上。若飛心中兼福兼慧。及與淨願。自然心開。見十方佛。清淨國土。隨願往生。前乾慧地。猶屬聖位。此則博地凡夫。純想之心。便往生有分。此蓋我釋迦如來大慈悲心。熾然輪迴之中。特地拈出此橫出三界之要道耳。古今未入聖位之人。臨終往生者。是其證也。第四流通分中。若有一人身具重罪。將招極惡。一念宏法。變其所受地獄苦因。爲安樂國。重罪尚然。况輕罪乎。况無罪乎。無福尚然。况有福乎。况多福乎。一念尚然。况多念乎。况終年終身乎。其往生不在中下品矣。古今宏法諸師。現相往生者。皆其證也。夫念佛法門。專逗十方之機。三根齊被。耳根圓通。專逗此方之機。惟利上根。且示阿難以就路還家。故文殊大士曲爲

揀選。非謂耳根獨勝。念佛便劣也。讀經者不可不知。禪人血書此經。流通大法。實爲希有難能之行。其於往生。當必有分焉。

書蓮經普門品後

題標妙法。何法也。品號普門。何門也。說者謂一光東照。十界圓彰。隨類現身。應念脫苦。未爲非是。特其末耳。直須未舉以前。向世尊開口不得處。大士迴避不及時。親見法法此法。門門此門。正與麼時。不與麼會。始具看經眼。否則入海算砂。執指爲月。不唯埋沒己靈。見惜明眼。將恐普門漸閉。而妙法終隱矣。默超居士有見於此。得是經而裝帙之。囑綴數語。普爲見聞隨喜者。震塗毒鼓。食少金剛。其意豈淺淺哉。

二有室跋

經云。從是西方過十萬億佛土。有世界名曰極樂。其土有佛。號阿彌陀



。今現在說法。此金口誠言。分明指示。而世之昧者。猶謬執唯心。橫生異議。可悲也。因特書此以名余室。用警省焉。余以二有名室。或者淺之。吁。是尚不知即空之有。有而非有。况復雙泯雙存。超四句。該四句。圓教有門之有。與夫性具本有之有耶。其謂之淺也宜矣。無庸辯。

### 覆香嚴居士書

月內廿九日得尊扎。備悉一切。欣慰無量。讀扎內有念佛期過三七。尚未見相好云云。觀此用心之切。立行之猛。此百日內。當必有大不思議之成就。但此時不可預存期效之心。存之則增燥動。而翻爲障礙矣。此係修行門中微細心病。不可不知。直須深信諦了。心外無佛。佛外無心。全心即佛。全佛即心。一念現前。即一念相應。念念現前。即念念相應。但使此念常現在前。便是真實效驗。離此念外。別求效驗。便是間

斷。便不親切。便入歧路矣。經云。是心作佛。是心是佛。正此之謂也。鄙見如此。不識居士於意云何。至如長水之問。瑯琊之答。鍼鋒直截明白。不可更爲蛇足。果能於此正眼洞開。覷破瑯琊。捉敗長水。楞嚴大旨。思過半矣。然雖如此。正好擲向他方世界。且自一心念佛。若曰開少解路。則更不勞拈出矣。柴紫錄。久聞其名。第未親見其書。未可懸斷。寺中近日。唯嘉園居士兼旬或一至。此外別無客迹。不慧逐日與諸衲子揮塵談經。罷即焚香晏坐。或讐校華嚴。或檢閱津梁。別亦無事。楞嚴已講竟六卷。約於後七月間。可圓全部。因思半載之內。兩終此經。亦閻浮提人生一大快事也。然唯循行數墨而已。絕無一字之新得。并書以博一笑。

答江南彭二林居士書

仰惟居士。深入淨宗。廣陳法施。自他並利解行俱圓。可謂現居士身。

修菩薩行。不違本願。不忘佛囑者矣。向得三經新論。妄爲評題。不見罪責。已出分外。茲復寄示種種新刻。囑令論定。益覺赧顏。山野維教乘大旨。麤知向方。而幼失問學。語不成文。故兩處住持二十餘年。檀護之門。未投隻字。今感居士。虛懷遠問。爲法之誠。遂頓忘固陋。罄己所知。直詞以告。其當否去取。惟高明以自裁焉。念佛決疑兩論。皆發前人所未發。一以見慧解之超卓。一以彰衛道之真切。並沒量大人。出格作用。可續入藏。永永流通。序跋皆精當。間有可商之處。簽辯於後。

### 與瑞一李居士書

屢有書來。曾未覆答。師資心契。諒不我疑。聞在南中竭力辦公。盡心護法。修持不輟。勸導惟殷。此則自行化他。二利並舉。世法佛法。一道齊行。或雁信時通。或口碑傳誦。每一聞見。且慰且欣。因思道無不

在。豈分朝野。而修證之際。實有易難。的論修道。出家尚不易。況在家耶。居家已難。况居官耶。故知即塵勞爲佛事。化熱惱作清涼。苟非忍證無生。位登不退。深入如來之室。權現宰官之身者。恐終不免塵緣漸染。而道念日微也。今賢契信向此道未久。便能於衝繁官署。猛切乃爾。非宿善根力。謂之何哉。雖然。猶須痛念三界無安。肉身苦惱。生死路險。人命無常。幸聞佛法。幸生信心。幻境幻緣。隻眼覷破。佛心佛行。赤體擔當。淨業得修且修。宦場可下便下。無少生留戀。無虛棄光陰。務期事辦一生。花開上品。庶幾不負自己多生熏習之善願。我佛長劫護念之慈恩。而成一世出世間之勇猛丈夫焉。

尺香齋白詞

死生事大。來日無多。道業未成。實深慚懼。尊客相看。午後炷香。非敢輕疏。幸垂鑑恕。

款待白詞

米不蓄一粒。菜不蓄一莖。一任往來者喫得飽膨臍。吾斯未能。實有深愧。某自住此刹。十餘年來。片板自擔。門庭日冷。向唯法道難通。今併食輪有礙。因集兩序相與而謀。衲子鉢盂。從來無底。諸天華雨。那得常飛。若乃拖布袋以逢人放愁。固爲可耻。便即鳴榘椎而開門散衆。尤不自安。反覆籌度。別無長策。亦唯此事稍可變通。既蒸砂難以療饑。而畫餅豈堪供客。此後凡大衲尊官。檀那法侶。或偶然經過隨喜。或專爲光顧降臨。到來原不因齋。接待但應盡禮。只者點敬心不減。勝滿甌香飯別炊。務在一衆同遵。便從今日約定。斷不以來人或豐或儉。總請隨大衆同苦同甘。實欲省緣。非敢慢客。伏希鑒恕。莫怪空疏。

衣單疏

衲僧三百六十骨節。在在撐天拄地。道人八萬四千毛竅。一一徹古通今。

。且不資三事斜披。六銖高挂。又豈藉金針暗度。玉線橫抽。蓋爲法身久昧。情執彌堅。未徹一真之極致。難空四大於現前。寒暑迭遷。不無逼惱。龍象雲集。宜肅觀瞻。是以裸四體於長年。墮邪宗之謬計。著三衣於後夜。定吾教之常儀。令範既垂。昔賢共相依稟。芳規未墜。末學敢不遵承。奈何天際唯高。剪春雲而莫及。寒威特甚。編秋草以難堪。故雖靜掩禪關。直欲蒲團坐破。而乃孤堅鐵脊。翻憐布衲披殘。緬維一雙鞋留。既解個中著眼。七斤衫破。寧無格外知音。欲使禪和子赤體擔當。要憑大居士毫端點出。將看雲水別增氣象人天共仰威儀。冷暖自知。誰肯道一絲未挂。果因不昧。君定獲多福何疑。

資福寺講前提綱

庚申五月  
十一日

禪提向上綱宗。教闡離言大義。向上綱宗。固是教外別傳。離言大義。亦即教內真傳。教內教外。別傳真傳。名雖似異。實本無殊。悟別傳之

謂宗通。得真傳之謂說通。二通俱備。三軌無違然後得座披衣。橫身爲物。如王寶劍。殺活臨時。設自宗不通。安能說法。而無言啟迷。何名達者。但宗貴用到。教須說到。畢竟用又用個什麼。說又說個什麼。用說俱到。則宗教掃土矣。何似我淨業門中。別有方便。祇消一句南無阿彌陀佛。將他三藏十二分教典。一千七百則公案。一串穿來。更無少賸。又管甚說到說不到。用到用不到。但暮暮朝朝。只恁麼念。雖然。此是文殊普賢大人境界。後生晚進。也不得草草。山僧今將世間常情之所共知一問。問諸大德。隨己所見。各下一語。期與通方上士。共展風規。出格高流。互揚法道。直得紅螺山率羣峯而騰歡作舞。珍珠泉湧巨浪而喝采揚聲。也未爲分外事。且道如何是唯心淨土。自性彌陀。不須離座。便請速道。衆無語師云。諸人既珍重吝詞。山僧只得自代去也。復舉前問。著語云。是唯心淨土。自性彌陀。但如此下語。足令文字法師。脫

胎換骨。卻未免助禪和子儻伺之機。不惜饒舌。再代一轉。復舉前問。著語云。有世界名曰極樂。其土有佛號阿彌陀。若與麼下語。足與虛頭禪客。抽釘拔楔。亦未免增座主家廉纖之見。欲得十分親切。一等痛快。本山今日初轉法輪。山僧更代一語。有何不可。復舉前問。遂合掌珍重。稱南無阿彌陀佛。復云。山僧恁麼說話。設有個傍觀的呵呵大笑。又且如何解。笑者是我同參。老氏云。上士聞道。勤而行之。中士聞道。若存若亡。下士聞道大笑之。不笑不足以爲道。復有人云。下士聞道。勤而行之。上士聞道大笑之。不笑不足以爲道。適才傍觀之笑。於斯二者。孰同孰異。且笑既同笑。行又同行。上士下士。何自而分。所以道。毫釐有差。天地懸隔。毫釐無差。亦天地懸隔。毫釐有差。天地懸隔則固是。毫釐無差。因甚亦天地懸隔。復珍重稱南無阿彌陀佛一聲。顧衆云。有差耶。無差耶。懸隔耶。不懸隔耶。良久云。良馬不知何處



去。阿難依舊世尊前。

### 爲闡教禪師入塔

無方大道契環中。悲願高深海嶽同。應跡但隨緣起盡。千江一月去來空。  
。恭惟拈花堂上法伯老和尚。三宗並闡。四刹迭興。古道儼存。大方獨  
步。八十二年廣陳法施。百千萬劫。恒轉化輪。千花座上。撒絕類之戒  
珠。微笑堂前。提無文之祖印。疏釋六經。漲起難思法海。宗崇五教。  
傳來無盡心燈。悟蓮經於早歲。白牛曾吐古黃金。叨聖澤以優隆。丹鳳  
晚銜雙紫詔。德行巍巍。獨尊乎當世。道香馥馥。四布於遐方。正宜與  
法門作大主宰。何期息緣事而入寂光。使水雲失最勝依止。人天增無限  
悽惶。正恁麼時。辦香初爇。盃茗三傾。且作麼生與老人相見。赤日當  
天釀白汗。熏風入座動微涼。

### 爲均伯老和尚入塔

七十餘年遊戲身。去年今昔總同塵。泥牛耕罷回途處。劫外風光另有春。  
。恭惟白衣堂上均翁法伯老和尚法雷初震。敗納於青塔招提。金錫罷搖。  
。活埋向白衣蘭若。懸宗鏡於機先。不留影像。續心燈於室內。轉見光  
輝。示慳吝乃等凡情。即塵勞而爲佛事。不唯彰水雲之跡幻。要且見貪  
欲之性空。所以聖財法寶。尋常間一串穿來。習氣識情。末梢頭從空放  
下。到者裏長安不住。一步密移。藏明月於懷中。橫全身於物外。且正  
恁麼時。老人收因結果立命安身一句。畢竟如何。萬象環羅無縫塔。紅  
塵隔斷九仙橋。

慈壽寺薰塔

徧十方是座團圓古塔。光放有時。盡大地是個清淨法身。緣感即應。是  
知時節因緣。全彰佛性。慈光妙應。不外當人。事是恁麼事。人須恁麼  
人。變淨土。集分身。非老釋迦不可。請香飯。借師座。唯大居士爲能

。道本貫乎古今。法豈間於凡聖。由是瓣香珍重。即一念而過未齊熏。三拜殷勤。徧法界而遠近頓禮。全真全應之佛身。祇今塵塵出現。即縫無縫之寶塔。從此刻刻放光。故得誠傾縑素。喜動見聞。共植無上圓因。終成究竟妙果。幸逢斯會。愧乏長才。不唯法無可說。亦復讚莫能及。聊爲頌曰。

古塔經年誰禮熏。結緣還待有緣人。試看縑素歡騰處。已放祥光滿刹塵。

### 得戒和尚塔前供

炷香云。道衍華臺。來春風於葉葉。戒傳心地。建佛事於塵塵。恭惟岫雲堂上第七世得戒本師老和尚。得真解脫。具大慈悲。嚴開遮於毫末。空止作於機先。開示人天正路。廿有餘年。安立定慧初基。衆機萬數。某當初無授受中。既爾師資分定。今日絕獻納處。宜乎感應道交。然則

無縫塔前。殷勤展拜。一衆觀瞻。大寂定裏。再四點頭。阿誰證據。雲外九峯橫碧漢。巖前萬樹動秋風。

讚

念佛堂釋迦佛像

三藏汪洋。五乘浩渺。惑亂衆生。猶更嫌少。開念佛門。倒也卻好。只有一事。計較宜早。若到他年。廣行此道。娑婆界空。事或難保。香無人焚。地無人掃。當與麼時。不得懊惱。

阿彌陀佛像

全心即佛。全佛即心。該法報化。絕去來今。當陽獨露。徧界難尋。突兀妙峯。未足爲高。淵澄香海。未足爲深。腦後一鎚。頂門一鍼。七珍池沼水投水。九品蓮花金博金。

皈命世尊。無量光壽。誓重如山。慈逾於母。爲我現身。爲我垂手。證

我發心。滅我宿垢。醒我愚癡。淨我身口。惠我寶蓮。出我險有。天未足高。地未足厚。我其云何。焚香稽首。

一心皈命。我佛阿彌。大誓大願。大悲大慈。胡爲乃爾。直至於斯。身爲我現。手爲我垂。罪容我懺。名許我持。拔我之苦。覺我之迷。護我以念。接我以時。資我法乳。育我蓮池。親授我記。常爲我師。佛其如是。我復何之。萬緣東謝。一意西馳。虛空可壞。此志不移。

金容獲一覩。血淚滿雙顙。稽首大慈父。願隨歸去來。

### 讚血畫彌陀佛像

慚愧走他鄉。鈴鐺苦徧嘗。追思腸寸寸。回首淚行行。刀裂不堅指。血塗無量光。慈恩何以報。珍重一爐香。大悲熏曠劫。滴血現全身。本自關天性。何曾隔點塵。爲憐三界苦。與種九蓮因。故國歸猶未。瞻依雨淚頻。指端滴血現全身。同體悲深覺更親。不轉慈眸應待我。長舒金臂

欲攜人。淨光煥赫空今古。嘉號宣傳徧剎塵。總爲天真無間隔。見聞瞻禮盡圓因。

霜刀自刺苦身根。血染彌陀佛一尊。豈是指端無痛覺。不知何以報慈恩。瀝乾指血畫彌陀。畫得彌陀意若何。暮禮朝參常供養。臨終導我出娑婆。四八端嚴像逼真。墨花香染血痕新。始知生佛原無間。豈但三身祇此身。金刀刺破娘生指。赤血塗成法界身。父子天真從此合。一回相見一回親。筆鋒點滴血花香。影現彌陀老法王。不羨人天求富樂。願垂接引放慈光。要向珍池結勝因。慈容點染血精神。幾回稽首殷勤白。赤色蓮花最可人。愧欠孤恩恨且哀。真誠畫個血如來。從今母子常相憶。刀斧應教斫不開。聖凡不隔一微塵。底事分明證始親。誰信皮囊腥穢血。頓成妙麗紫全身。真身指出血淋淋。說法明明在現今。四土九蓮渾不隔。從來無法外唯心。

讚乘吼觀音丈夫相

廿五圓通功獨殿。當陽首中文殊選。神奇將謂有多般。耳朵原來皮兩片。毛蟲走出補陀崖。楊柳蘸乾南海浪。一片老婆心不休。堂堂重現大人相。淨瓶打失知何日。楊柳空持到此方。甘露不曾施一滴。爭教火宅頓清涼。按轡當陽不去來。情知救苦念頭灰。沈沈那管人瞻禮。盡日思量覓善財。寶蓮四色曾誰問。宏願千重祇自忙。好把身心都放下。晨昏受我一爐香。

### 讚大士像

宏願等虛空。含靈共景仰。垂慈雖有方。赴感何曾往。大士顧無言。善財欣合掌。始知巧逗機。不在脣皮上。尚未空諸有。何能滿大哀。忍歸安養去。親自補陀來。萬古枝楊柳。羣靈個善財。普門原不閉。豈待指彈開。觸著毫端便現身。悲深那怕惹紅塵。肝腸何止十分熱。面目常隨萬類新。淨水遙含空界月。楊枝暗露劫前春。相逢盡解低頭拜。親見慈容有幾人。

圓通面目本分明。不識誰人畫得成。月上千峯看有象。風鳴萬籟聽無聲。  
。普門未必須彈指。大道何嘗禁夜行。試向補陀岩畔問。聖凡曾有幾多  
爭。

悟圓老宿像

滿地布黃金。未免俗氣。當陽插莖草。猶欠事功。爭似者老師。平地起  
孤堆。伽藍自建。連囊贈滯貨。檀度圓成。佛法僧三尊等供。施受物一  
體全空。六七十年。妄想慳貪。總成佛事。百千萬劫。齋田寶殿。常放  
光明。且畢竟渠是阿誰。京北大牛房村觀音寺裏杜多悟公。呵呵。  
輪珠未轉佛心通。田服閒披色本空。道範祇應天眼對。高踪豈在畫圖中  
。

本然安老宿像讚

九重城裏。十字街頭。金錫高卓。實行密修。三十載光陰。渾如一日。



百千般境界。不換雙眸。淳樸出自天真。非關造作。瓦礫翻成金碧。豈待營謀。天共白雲曉。水同明月流。資糧老去擬勤積。牢把輪珠念不休。嘆。現有蒼居標榜在。時人何更學虛頭。

蒼隱皇都幾十秋。紅塵堆裏見清修。生平得力無多子。一味尋常老實頭。實頭念佛最相宜。一句洪名密自持。萬妙千玄都不會。坐看花放寶蓮池。縱橫四土聲前淨。自在三身象外彰。如是念時非有念。珠輪未轉又何妨。伽黎色帶煙霞古。珠數香分菡萏清。定久不知誰是佛。長空萬里月孤明。觸目明宗猶是鈍。入門辨主尚嫌遲。如何覲面堂堂處。念佛依然問是誰。

### 個菴老人像讚

情性是一味冰冷。面皮得恁麼癩黑。九重城裏。四十載混俗和光。十字街頭。半個菴騎聲蓋色。人天盡力。推挽不前。佛祖致竟。奈何不得。武接寒山之步。六百首唾出便休。心折潛子之風。十二章行如不及。杖

龍活欲舞。腦蓋慣與敲開。鞋虎睡方酣。腳跟何處摸掌。一毫端上戲分身。從此含靈重被惑。咦。不是我儂親法叔。定教趁入無生國。  
鶴林比壽。梵網提綱。菴居無玷。僧史有光。

法空寶書宿像

半肩雲衲披殘。百八輪珠捏扁。法爾無事相關。不是有心擔板。便經億萬斯年何妨。任他佛魔都來不管。過現未十世。一坐渾忘。法報化三身。個中圓滿。面目如此分明。相逢直須具眼。設有個覷面不識的。更問道念佛的畢竟是誰。你且燒香禮拜了。再向你道未晚。

夢東禪師遺集卷中

夢東禪師遺集

卷下

門人  
喚醒了輯錄

偈頌

念佛伽陀

教義百偈

- 一句彌陀。我佛心要。豎徹五時。橫該八教。
- 一句彌陀。意旨如何。知音常少。木耳偏多。
- 一句彌陀。大意分明。蛇生弓影。藥出金瓶。
- 一句彌陀。名異方便。普攝羣機。旁通一線。
- 一句彌陀。開往生門。是多福德。非少善根。
- 一句彌陀。臨終佛現。四辯親宣。方方共贊。
- 一句彌陀。成佛標準。以念佛心。入無生忍。
- 一句彌陀。證三不退。祇此一生。便補佛位。

- 一句彌陀。滿十大願。豈得普賢。錯教了辦。
- 一句彌陀。白牛駕勁。其疾如風。行步平正。
- 一句彌陀。如來藏心。水外無浪。器原是金。
- 一句彌陀。妙真如性。春在華枝。像舍古鏡。
- 一句彌陀。清淨實相。絕議絕思。難名難狀。
- 一句彌陀。圓融法界。觀體全真。交羅無礙。
- 一句彌陀。大圓智鏡。身土影含。重重掩映。
- 一句彌陀。空如來藏。萬法未形。一真絕相。
- 一句彌陀。圓滿菩提。天更無上。雲不與齊。
- 一句彌陀。大般涅槃。一輪明月。萬里空寒。
- 一句彌陀。開般若門。十虛萬法。一口平吞。
- 一句彌陀。華屋門開。從者裏入。快隨我來。

一句彌陀。入王三昧。似地均擎。如天普蓋。  
一句彌陀。得大總持。轉一切物。使十二時。  
一句彌陀。性本自空。星皆拱北。水盡朝東。  
一句彌陀。法界緣起。淨業正因。菩提種子。  
一句彌陀。如鏡照鏡。宛轉互含。重疊交映。  
一句彌陀。似空合空。了無痕縫。卻有西東。  
一句彌陀。一大藏經。縱橫文彩。絕待幽靈。  
一句彌陀。一大藏律。瞥爾淨心。戒波羅蜜。  
一句彌陀。一大藏論。當念心開。慧光如噴。  
一句彌陀。一藏秘密。發本神通。具大威力。  
一句彌陀。渾全大藏。戒定慧光。流出無量。  
一句彌陀。繩本是麻。奈何不會。翻疑作蛇。

- 一句彌陀。罕聞罕睹。影現鏡林。響宣天鼓。
- 一句彌陀。無可譬喻。古鏡當臺。水銀墮地。
- 一句彌陀。老婆心苦。運萬斛舟。發千鈞弩。
- 一句彌陀。明明是有。四辯八音。婆心苦口。
- 一句彌陀。的的是無。鎔他萬像。入我洪鑪。
- 一句彌陀。亦無亦有。夢裏山川。鏡中華柳。
- 一句彌陀。非有非無。捺著便轉。水上壺盧。
- 一句彌陀。第一義諦。尚超百非。豈落四句。
- 一句彌陀。妙圓三諦。最清涼池。大猛火聚。
- 一句彌陀。得大自在。轉變聖凡。融通世界。
- 一句彌陀。有功者賞。王膳盈前。髻珠在掌。
- 一句彌陀。里仁爲美。居卜來歸。枯椿非鬼。

一句彌陀。非難非易。九品蓮華。一生心力。  
一句彌陀。就路還家。可惜痴人。棄金担麻。  
一句彌陀。橫出娑婆。你信不及。吾末如何。  
一句彌陀。歸元捷徑。緊要資糧。唯信願行。  
一句彌陀。要在信深。蓮芽九品。抽自此心。  
一句彌陀。要在願切。寸心欲焚。雙目流血。  
一句彌陀。要在行專。單提一念。斬斷萬緣。  
一句彌陀。誓成片段。拌此一生。作箇閒漢。  
一句彌陀。只恁麼念。百八輪珠。線斷重換。  
一句彌陀。不急不緩。心口如一。歷歷而轉。  
一句彌陀。愈多愈好。如人學射。久習則巧。  
一句彌陀。攝心密持。如人飲水。冷暖自知。

- 一句彌陀。譬猶掘井。就下近泥。價廉工省。
- 一句彌陀。類如鑽火。木煖煙生。暫停不可。
- 一句彌陀。全身頂戴。人命無常。光陰不再。
- 一句彌陀。如救頭然。盡十分力。期上品蓮。
- 一句彌陀。妙圓止觀。寂寂惺惺。無雜無間。
- 一句彌陀。險路砥平。直抵寶所。不住化城。
- 一句彌陀。如水清珠。紛紜雜念。不斷自無。
- 一句彌陀。頓入此門。金翅擘海。直取龍吞。
- 一句彌陀。塵緣自斷。師子遊行。驚散野干。
- 一句彌陀。驀直念過。一踏到底。香象渡河。
- 一句彌陀。無相心佛。國土莊嚴。更非他物。
- 一句彌陀。無爲大法。日用單提。劍離寶匣。



一句彌陀。無漏真僧。雪山藥樹。險道明燈。  
一句彌陀。滿檀那度。裂破慳囊。掀翻寶聚。  
一句彌陀。滿尸羅度。都攝六根。圓淨三聚。  
一句彌陀。滿羸提度。二我相空。無生忍悟。  
一句彌陀。滿毗梨度。不染纖塵。直踏玄路。  
一句彌陀。滿禪那度。現諸威儀。藏甚枯樹。  
一句彌陀。滿般若度。境寂心空。雲開月露。  
一句彌陀。想寂思專。未離忍土。已坐寶蓮。  
一句彌陀。一朵寶蓮。唯心之妙。法爾如然。  
一句彌陀。一朵寶蓮。凡情不信。亦宜其然。  
一句彌陀。一朵寶蓮。決定不信。真箇可憐。  
一句彌陀。一朵寶蓮。直饒不信。已染識田。

- 一句彌陀。宏通敢情。入大悲室。坐法空座。
- 一句彌陀。無盡寶藏。八字打開。普同供養。
- 一句彌陀。斷諸煩惱。全佛全心。一了百了。
- 一句彌陀。滅除定業。赫日輕霜。洪爐片雪。
- 一句彌陀。能空苦報。世界根身。即麤而妙。
- 一句彌陀。圓轉三障。即惑業苦。成秘密藏。
- 一句彌陀。解難解冤。慈光共仰。法喜均沾。
- 一句彌陀。報未報恩。裂纏綿網。入解脫門。
- 一句彌陀。空諸惡趣。萬德洪名。那容思議。
- 一句彌陀。機逗人天。參差三輩。掩映九蓮。
- 一句彌陀。化兼小聖。回狹劣心。向無上乘。
- 一句彌陀。超然無礙。文殊普賢。大人境界。

- 一句彌陀。微妙難思。唯佛與佛。乃能知之。  
一句彌陀。列祖奉行。馬鳴造論。龍樹往生。  
一句彌陀。因緣時節。異香常聞。蓮社創結。  
一句彌陀。利大象龍。永明禪伯。智者教宗。  
一句彌陀。感應非輕。少康化佛。善導光明。  
一句彌陀。有教無類。雄俊入冥。惟恭滅罪。  
一句彌陀。是無上禪。一生事辦。曠劫功圓。  
一句彌陀。理非易會。百偈俄成。三尊加被。

宗乘百偈

- 一句彌陀。五宗公案。八裂七華。不勞判斷。  
一句彌陀。指向上路。不可言傳。直須神悟。  
一句彌陀。切忌莽鹵。瓜徹蒂甜。瓠連根苦。

- 一句彌陀。何敢相嘲。合取狗口。打折驢腰。
- 一句彌陀。現成公案。但辦肯心。必不相賺。
- 一句彌陀。正好活埋。拗折竹杖。燒卻草鞋。
- 一句彌陀。死了未燒。佛曾有約。天不須招。
- 一句彌陀。莫問宗教。未擲藤條。先焚疏鈔。
- 一句彌陀。計甚易難。三條竹蔑。七箇蒲團。
- 一句彌陀。拳拳牢執。捏鐵稱錘。出黃金汁。
- 一句彌陀。親切受持。一牛飲水。五馬不嘶。
- 一句彌陀。念來便好。不用分疏。顛蒙合道。
- 一句彌陀。悟機尤妙。念極情忘。寒灰豆爆。
- 一句彌陀。誰知如此。百丈鼻頭。雲門足指。
- 一句彌陀。正好轉身。山盡無路。溪回有村。

- 一句彌陀。踏上頭關。水不是水。山依舊山。
- 一句彌陀。萬重關透。佛手驢腳。面皮多厚。
- 一句彌陀。格外宗通。泥牛吼月。木馬嘶風。
- 一句彌陀。三玄三要。除卻楊修。阿誰知妙。
- 一句彌陀。天然五位。只爲分明。卻難領會。
- 一句彌陀。全賓全主。師子咬人。鵝王擇乳。
- 一句彌陀。四重料揀。收放卷舒。頂門有眼。
- 一句彌陀。四種藏鋒。巖頭去後。誰善斯宗。
- 一句彌陀。藏身無跡。此意誰知。華亭空憶。
- 一句彌陀。本分禪宗。橫擔榔栗。直入千峯。
- 一句彌陀。密轉不已。自己山河。山河自己。
- 一句彌陀。大有來由。暗中書字。窗裏出牛。

- 一句彌陀。誰善舉揚。龜毛拂短。兔角杖長。  
一句彌陀。六八宏願。冷便穿衣。飢來喫飯。  
一句彌陀。是何宗旨。雪峯鞦韆。天龍豎指。  
一句彌陀。得要明宗。攬草成藥。破壁飛龍。  
一句彌陀。全機勘破。勝金剛王。超木上座。  
一句彌陀。舊案全翻。喝退臨濟。棒走德山。  
一句彌陀。法身向上。如何苦何。徒勞讚謗。  
一句彌陀。一點靈明。無星稱上。兩頭恰平。  
一句彌陀。一箇主翁。若然兩物。用著融通。  
一句彌陀。坐鎮寰宇。燒返魂香。擊塗毒鼓。  
一句彌陀。切莫瞞頂。月圓當戶。日出連山。  
一句彌陀。重新指點。拽下禪牀。未是正眼。

- 一句彌陀。成羣合夥。覷井覷驢。是渠是我。
- 一句彌陀。居不待卜。盜入賊家。僧投寺宿。
- 一句彌陀。父子投機。慈顏咫尺。愧欠背違。
- 一句彌陀。君臣道合。聖德天淵。漸難報答。
- 一句彌陀。且淺商量。薰風南來。殿閣微涼。
- 一句彌陀。子細商量。心外無法。東土西方。
- 一句彌陀。的當商量。店中焚被。庫下賣薑。
- 一句彌陀。含靈普育。日麗山川。春榮草木。
- 一句彌陀。九品蓮華。種豆得豆。種瓜得瓜。
- 一句彌陀。九品蓮華。布帛非儉。錦繡非奢。
- 一句彌陀。九品蓮華。故鄉作客。別國爲家。
- 一句彌陀。九品蓮華。壺盧架上。卻結冬瓜。

- 一句彌陀。曾聞多觜。雁過長空。影沈寒水。  
一句彌陀。今重告語。生實不生。去決定去。  
一句彌陀。念者爲誰。曾得了也。猶欠鍼錐。  
一句彌陀。撥塵見佛。佛亦是塵。塵是何物。  
一句彌陀。於意云何。兩段不同。收歸上科。  
一句彌陀。願樂欲聞。草木真香。山水清音。  
一句彌陀。惟德是馨。山不在高。水不在深。  
一句彌陀。別啟玄關。一般雲月。各自谿山。  
一句彌陀。是殺人刀。當場拈起。鬼哭神嗥。  
一句彌陀。是活人劍。略露鋒銜。龍騰豹變。  
一句彌陀。轟雷掣電。法眼卷簾。三平斷案。  
一句彌陀。臨機自由。芭蕉拄杖。黃龍拳頭。



- 一句彌陀。不用嘵嘵。但歸山去。自有柴燒。
- 一句彌陀。頗深意致。買石雲饒。移花蝶至。
- 一句彌陀。說山中話。六月松風。人間無價。
- 一句彌陀。安樂故土。胡不歸來。鬧市有虎。
- 一句彌陀。轉身就父。無計承歡。何敢背忤。
- 一句彌陀。法本常住。綠樹啼鶯。動便飛去。
- 一句彌陀。不勞融貫。心佛衆生。本來一串。
- 一句彌陀。佛眼難窮。通身綿密。八面玲瓏。
- 一句彌陀。△字三點。喚破沙盆。作正法眼。
- 一句彌陀。千車同軌。王庫寶刀。祖庭真髓。
- 一句彌陀。坐大寶蓮。彌勒非後。釋迦不前。
- 一句彌陀。全心相委。似金博金。如水投水。

△此即梵書  
新伊字

- 一句彌陀。百千卷經。水中鹽味。色裏膠青。
- 一句彌陀。常寂滅相。時至華開。鶯啼柳上。
- 一句彌陀。是究竟道。下士聞之。呵呵大笑。
- 一句彌陀。殊非草草。救取丹霞。喚回趙老。
- 一句彌陀。萬古空平。當人面目。大地衆生。
- 一句彌陀。明珠走盤。看則有分。道即應難。
- 一句彌陀。豐儉隨家。香巖錐子。真淨袈裟。
- 一句彌陀。建大法幢。寰中道契。化外魔降。
- 一句彌陀。震大法雷。臥龍奮迅。蟄戶洞開。
- 一句彌陀。吹大法螺。木童撫掌。石女高歌。
- 一句彌陀。擊大法鼓。日月停輪。山河起舞。
- 一句彌陀。無邊衆生。同時度竟。豈待更稱。

- 一句彌陀。無盡煩惱。輾成一團。全身靠倒。
- 一句彌陀。無量法門。慈氏樓閣。武陵桃源。
- 一句彌陀。無上佛道。不許夜行。投明須到。
- 一句彌陀。且不是佛。名本非名。物原無物。
- 一句彌陀。何止唯心。山自高高。水自深深。
- 一句彌陀。心佛雙彰。兩輪互照。一統無疆。
- 一句彌陀。心佛兩亡。水歸滄海。雲去帝鄉。
- 一句彌陀。離見超情。水清月現。印壞文成。
- 一句彌陀。恰有明證。趙州狗子。卻無佛性。
- 一句彌陀。宗提格外。劫火洞然。者箇也壞。
- 一句彌陀。道出大方。寂光有相。佛性無常。
- 一句彌陀。人人知有。從東過西。進前叉手。

一句彌陀。大家委悉。向下文長。付於來日。

一。信生必有死。普天之下。從古至今。曾無一人逃得。

二。信人命無常。出息雖存。入息難保。一息不來。即為後世。

三。信輪回路險。一念之差。便墮惡趣。得人身如爪上土。失人身者。如大地土。

四。信苦趣時長。三途一報五千劫。再出頭來是幾時。

五。信佛語不虛。此日月輪。可令墮落。妙高山王。可使傾動。諸佛所言。無有異也。

六。信實有淨土。如今娑婆無異的。是有。

七。信願生即生。已今當願。已今當生。經有明文。豈欺我哉。

八。信生即不退。境勝緣強。退心不起。

九。信一生成佛。壽命無量。何事不辦。

十。信法本唯心。唯心有具造二義。如上諸法。皆我心具。皆我心造。

信佛語故。則造後四。不信佛語。但造前四。故深信佛言。即深信自心。

也。修淨業者。能具此十種信心。其樂土之生。如操左券而取故物。夫何難之有。甲子七月。訥堂道人書。

念佛偈

四言十二首  
五言二首  
七言五十一首

自性彌陀。彌陀自性。執性廢修。因樂成病。  
彌陀自性。自性彌陀。皇風一片。帝網交羅。  
佛非性外。性即佛中。如水投水。似空合空。  
佛在性中。性豈佛外。本自圓融。云何隔礙。  
極樂唯心。心唯極樂。離土論心。翻然大錯。  
唯心極樂。極樂唯心。山自高高。水自深深。  
未明唯土。豈達唯心。碻碻非玉。鍤石非金。  
欲會唯心。須明唯土。夜半正明。天曉不露。  
窮禪宗髓。提教網綱。阿彌果佛。安樂西方。

九品寶蓮。在腳跟底。不念彌陀。辜負自己。

信手瓣香。至心一拜。本分修持。大人境界。

見聞隨喜。信願持名。功圓曠劫。佛補一生。

欲明安樂國。端的是西方。唯土宗非謬。即心理更長。寂光原有相。佛性卻無常。未委深深旨。何妨問願王。

一聲佛號一聲心。須信心深佛更深。夢眼未開情逐逐。慈光常照夜沈沈。

一聲佛號一聲心。落落圓音聞現今。何事世間癡漢子。猶將黃葉謗黃金。

一聲佛號一聲心。山自高兮水自深。不落宮商間曲調。鍾期未必是知音。

一聲佛號一聲心。法藏門開深復深。萬論千經都話盡。分明題目祇而今。

一聲佛號一聲心。格外投機句其深。無限含靈毛卓豎。大家齊著頂門針。

一聲佛號一聲心。葉茂由來根自深。不借東風些子力。優曇香綻古叢林。

一聲佛號一聲心。覺海靈源勿淺深。四十二重因果相。都廬不墮去來今。

一聲佛號一聲心。直下分明豈外尋。鞭影未勞頻舉示。白牛運出古黃金。  
一聲佛號一聲心。向上全提入髓深。臨濟德山如未肯。任教棒喝惱叢林。  
一聲佛號一聲心。心佛雙忘趣轉深。定久不知誰喚醒。滿天霜月照幽林。  
娑婆界捨唯心穢。淨土蓮開自性香。不向此宗親見徹。西方端的是何方。  
明明大道古今通。天地毫釐辨異同。誰識西方無量壽。原來卻是主人翁。  
說著蓮邦雨淚垂。閻浮苦趣實堪悲。世間出世思惟遍。不念彌陀更念誰。  
痴迷一念入娑婆。長劫沉淪可奈何。穢土欲翻成淨界。全機撥轉念彌陀。  
自憐身作太平僧。了死脫生卻未曾。但願名標蓮蕊裏。不須高列上傳燈。  
話到無常祇自悲。百年彈指欲何爲。惟求慈父垂哀憫。小小蓮花與一枝。  
圓發三心心愈切。單提一念念彌堅。盡生不起餘思想。要種西方上品蓮。  
學道經今四十年。還鄉出要尚茫然。輪珠百八閒拈起。心佛衆生一串穿。  
彌陀自性兩相當。雙照雙遮總不妨。念到圓融無礙處。時聞一陣藕花香。

猛切持名如救頭。娑婆那更可遲留。即今撒手便歸去。已較前賢輸一籌。  
一句洪名一寶蓮。聲聲流出自心田。但教念念能相續。不怕彌陀不現前。  
已知安養是吾家。歸去休教路更差。不念塵緣唯念佛。珍池高占寶蓮花。  
我念彌陀有課程。晨昏十萬句分明。但教盡報常如此。淨業誰論成不成。  
個事分明見最真。從來無法及心親。一聲喚著一聲應。端的彌陀非別人。  
故鄉一別久經秋。切切歸心不暫留。我念彌陀佛念我。天真父子兩相投。  
一阿彌了又阿彌。除卻阿彌總不知。插到念珠繩索斷。飯香菜熱已多時。  
一聲佛號時中憶。九品蓮香靜裏聞。樂國已知原不遠。休教更隔念紛紜。  
僧拙但知專淨業。客來幸勿帶紅塵。世間多少奇男子。不識西方路最真。  
尋常粥飯個閒僧。律教禪宗百不能。佛號六時常密轉。一心不亂竟何曾。  
淨土唯心我獨知。癡人空自泣多歧。故鄉歸去便歸去。金色花開正是時。  
唯心淨土幾人知。六字洪名須密持。拶到水窮山盡處。樂邦不隔一絲絲。



波清月現看偏好。地暖花開喻更親。佛號一聲蓮九品。高低分位屬何人。  
佛土雖遙千百億。腳跟有路是通津。奈何多少思歸客。都把彌陀作別人。  
十念得生佛有願。一心不亂我無疑。寶蓮已信標名字。未委花池第幾枝。  
曾與彌陀有宿緣。尋常歷歷現吾前。者回不斬塵情斷。深負珍池大寶蓮。  
專志持名與不孤。千回百轉過輪珠。彌陀我但時時念。那管彌陀念我無。  
彌陀日念百千轉。不亂一心竟未成。禪客那堪頻啟請。重開貝葉可憐生。  
唯心具造理分明。九品蓮胎念念成。試展金經聽講演。更無一句不相應。  
林巒眨眼變青黃。總是無常信息忙。穢土但超輪轉苦。蓮池下品又何妨。  
明明四土非他土。的的三身祇此身。身土都來穿一串。一回舉著一回親。  
一句彌陀念便默。恰如死了未曾埋。娑婆已竟多生債。淨土而今歸去來。  
一句彌陀念便親。千生萬劫種來因。娑婆不結娘生業。要作蓮池自在人。  
劃斷塵緣百不思。通身著力念阿彌。娑婆深厭輪迴苦。早向花池占一枝。

十萬彌陀念已週。案前古鼎尚香浮。尚衣不覺沈沈睡。極樂翛然一夢遊。  
六字洪名密憶持。工夫冷暖自家知。娑婆不作輪迴夢。穩看花開七寶池。  
空澄海湛寂光土。日照天臨法界身。父子相逢重會合。一團和氣滿門春。  
要作蓮池自在人。娑婆肯更惹紅塵。心神早送歸安養。此地空餘鏡裏身。  
一朵花含一聖胎。名書某甲亦奇哉。從來因果唯心現。底事分明不用猜。  
洪名六字水清珠。方寸澄澄百慮無。個裏風光難舉似。長天萬里月輪孤。  
彌陀已悟主人翁。極樂同居路正通。諸上善人俱會處。何妨某亦在其中。  
已今當願已今生。金口親宣語最明。何事娑婆猶戀戀。自甘極苦尚多情。

示衆偈六首

泥牛海底喫金鞭。轉步踏翻碧浪天。誰識皮毛參異類。自甘耕牧了殘緣。  
。三車門外原無法。五字脇邊不是禪。在處青山饒水草。眠雲臥月自年年。

會取吾家向上宗。移星換斗自從容。老祖曾未來東土。童子何須過別峯。  
。流出靈源波湛湛。照歸古鏡影重重。相逢不吝閒拈示。百尺樓頭一擊  
鐘。

坐斷劫前一點空。卻來赤手展家風。何妨傍戶揖賓客。未許當堂見主翁。  
。與奪靈機格外轉。縱橫活路腳跟通。千門洞啟恣遊戲。赫赫金烏出海  
東。

寥寥大化絕疏親。一片花含萬古春。少室九年情已露。曹溪一宿話維新。  
。謾勞慈氏頻彈指。應惜遊人徧問津。椎拂未拈知落處。到頭猶是眼中  
塵。

生死牢關未透時。腳跟一句好提持。不教覓水逢泥止。那得亡羊逐路歧。  
。驀地寒灰爆黑豆。灼然大寶獲春池。到頭始信原無事。弓影非蛇祇自  
疑。

參禪本爲了生死。緊要先須識自己。項上頭非鏡裏頭。娘生嘴是虛空嘴。  
。眼中不著一星沙。耳底常容大海水。擬剔眉毛早隔山。那堪更問張三  
李。

講圓覺經畢示衆偈七首

炎炎長夏苦跣趺。貝葉頻開興不孤。十二章經都話徧。不知真個覺圓無。  
皮袋年來病不休。渾無氣力按牛頭。相逢偶與閒拈示。猶憶歌聲下酒樓。  
一重雪上一重霜。今歲還同去歲涼。擔板禪和猶不會。更煩人爲點茶湯。  
相逢不用作麼生。此事頭頭總現成。鶴膝自長鳧脰短。更嫌何處不分明。  
智慧爲船精進篙。一撐直渡惡波濤。境風順逆猶堪懼。端在梢公舵把牢。  
陣雲初斂劍光凝。十里長河夜鎖冰。脫屣圍爐相對坐。大家俱是太平僧。  
爲惜流光荏苒過。殷勤開演貝多羅。非云擊節明經義。聊與諸人遣睡魔。

覆講大義八首

每覆講預日侍者下某某籤。此次磬鳴衆集。始知侍者悞送籤。師遂拈以爲題云。

臭口不開趣正長。名言纔墮便亡羊。爲憐摘葉尋枝去。大義當頭特舉揚。事出平常理最玄。磬聲一擊耳門穿。言前有句如何說。大義渾該三百篇。莫更談玄論有無。盈前海衆嘴盧都。個中大好真消息。不但人空法亦如。機先一句是如何。清磬聲中漏泄多。說默雙離誰不二。等閒疑殺老維摩。瓶瀉河流成底事。雨花動地也徒然。大家高挂娘生口。聽取虛空講卻圓。磬聲三扣報知音。誰道堂前草丈深。法座未登講已竟。到頭一著勝雙林。現成證據豈矜誇。畢竟空生非作家。座上果無能說者。看渠何處散天花。懶隨清磬證圓通。一任燈王寶座空。如是來還如是去。堂堂格外展家風。

### 解制示衆偈

結冬又解冬。鑄印還銷印。暗地撒明珠。當頭截露刃。

禹門驚迅雷。棧道試神駿。毒鼓已頻過。劫燒無賸燼。  
當人莫自欺。個事宜親信。此去到諸方。不須重問訊。

我空偈四首

三心澄湛波間月。四大紛紜空裏花。擬向個中尋主宰。程途萬里未云賒。  
百骸食盡身猶在。二客相持鬼本無。莫笑含生無倒斷。將刀誰肯自輕屠。  
解云體盡冰還在。會取緣生火自空。拶到水窮山盡處。不知誰是主人翁。  
水綠山青明歷歷。鴉鳴鵲噪韻囂囂。可憐誤識東君面。王庫何曾有此刀。

資福寺講前示衆偈十六首

兩寺皇都偶夢遊。霜華已染鬢絲秋。一聲退鼓歸來晚。雲自高飛水自流。  
白木柴牀支講臺。紅螺古寺法新開。漫嫌頑石頭難點。且得虛空笑滿顛。  
六十韶光瞬息過。業緣猶繫苦娑婆。還鄉一曲難成調。且自逢場唱哩羅。  
從來國土本唯心。個話顛頑古到今。不是老僧親道破。森羅萬象盡沈吟。

相逢盡說土唯心。豈識唯心理甚深。擎塵每徵唯土義。一沈吟了一沈吟。  
盤走珠兮珠走盤。唯心唯土兩無端。不知死語從來活。算盡河沙祇自瞞。  
老病頭陀缺主裁。杖梨扶上講經臺。驢唇馬嘴渾閒事。惹得虛空笑滿顛。  
有無生否去耶非。咫尺蓮邦歸未歸。一自毫端輕漏泄。金烏夜半潑天飛。  
大小慈尊賺善財。一聲彈指閣門開。直饒入後樓還閉。不合當初自外來。  
家居百事總相當。渴飲饑餐樂有常。豈料跨門纔一步。翻然故國盡他鄉。  
拈來窮子衣中寶。恰是輪王髻上珠。大施門開饒利濟。從來一物卻原無。  
杯銜弓影病難消。幾度逢君舌苦饒。肝膽者回都吐盡。奈何依舊首橫搖。  
寶珠出篋將懸處。明鏡當臺未照時。萬別千差無欠少。個中消息幾人知。  
一句彌陀法界宗。千門萬戶盡羅籠。只須淨念能相繼。四土三身影現重。  
西方淨土本唯心。直透唯心義甚深。親見彌陀曾問訊。珍樓羅列樹陰森。  
爲愛追隨重法情。山房九夏話無生。重玄極妙如何說。萬里長天孤月明。

開爐示衆偈二首

火種親從鷲嶺傳。性空無我寄諸緣。一星撥轉寒灰裏。大地山河俱洞然。  
青煙突起死柴頭。舜若多神赤汗流。驚得泥牛吞卻月。森羅萬象笑抬眸。

題誠齋居士照

乙巳秋日。誠齋居士自携其照索題。且曰余習性多瞋。無以自解。願爲說法。并施以對治之門。因說偈曰。

一身如影像。萬事等空花。於此試諦觀。瞋習何所有。心本自無瞋。境空瞋何有。心境兩無瞋。合亦不應有。譬如兩空手。合之亦無物。有因尚不生。無因瞋何有。瞋生何處來。瞋滅何處去。正當於瞋時。瞋爲在何處。四句本無生。三際不可得。居士何自知。習性多瞋怒。此知所知瞋。爲復是即知。爲復是非知。知此瞋之知。此知爲即瞋。此知爲非瞋。瞋若即是知。有知即應瞋。知若即是瞋。知應不知瞋。此瞋若非知。



非知便無瞋。此知若非瞋。知瞋即兩心。瞋者爲阿誰。阿誰知此瞋。展轉竟不知。不知更是誰。如是諦觀察。久之當自曉。隻眼洞然開。無著慚惶處。昔本爲迷迷。今復因瞋了。瞋尚本非瞋。了復何所了。昨日與今朝。自倒還自起。從此徹根源。何瞋復何喜。

### 個菴老人斗室偈

一斗之室。置法空座。太虛不寬。毫端不窄。有松兩株。有竹幾個。明月夜來。清風曉過。老更何爲。佛也不做。衲以遮身。粥以療餓。歲月任遷。蒲團任破。常在其中。經行坐臥。

### 觀空應真

無道可悟。無心可安。撩天鼻孔。不受人瞞。一領布衲。一個蒲團。盡未來際。作如是觀。

### 頌楞嚴經十首

經題

劈破虛空露一機。未開口處示全題。可憐眼底無珠者。誤認經前廿字題。頂門突出破沙盆。的的無門是法門。怪殺瞿曇機不密。晴空迸作一條痕。

證信序

法王法要豈輕宣。滿座知音道有傳。話到點頭側耳處。祇園一會尚儼然。

發起序

道力何堪不自量。等慈妄擬墮淫房。定門縱使重重啟。也是閒刊好肉瘡。

四 chapters

四大毒蛇性本空。等閒拶著便成龍。飛騰可惜無人識。幾度頻埋下土中。

虛空藏章

法身親證等虛空。也是無端枉用功。試把鏡珠都放下。諦觀何法不圓融。

彌勒章

習氣難忘是利名。世間出世幾多爭。看他補佛情猶在。大似唯心定未成。

### 大勢至章

個中無路與人行。攜手歸來已隔程。若待攝心勤念佛。他年緩緩證無生。

### 道場加行頌

秘密門開妙總持。須知神用力難思。但教心口一如轉。便是習忘業淨時。  
聖凡物我體元同。感應休疑道有窮。天自高寒波自湛。誰推明月落潭中。

### 開講楞嚴頌

花香鳥語圓通性。水綠山青常住心。一部楞嚴渾漏泄。不須低首更沈吟。

### 頌金剛般若經

剛道即非又是名。等閒一舉便超情。有求有得全封見。無說無聞總隔程。  
。如是降伏如是住。若爲色相若爲聲。分明一段劫前境。八百餘家畫不成。

頌般若心經

經題

滾滾洪波無盡頭。孤帆高掛下中流。夜深明月來相照。兩岸蘆花一色秋。  
生佛同乘沒底船。漚花影裏去仍還。一篙撐塌東西岸。明月團團下九天。

觀自在菩薩節

從來五蘊性元空。豈借區區一照功。要看勞生開夢眼。金烏夜半潑天紅。  
風休雲靜地天空。畫筆詩情寫未工。花落亂隨流水去。夢回閒臥月明中。

色不異空節

真空幻色兩無殊。道得分明在半途。覲面未開宗正眼。徒勞水上按葫蘆。  
活潑明珠走玉盤。色空空色辯還難。拈來幾度從容看。兩不成雙一不單。

諸法空相節

萬里晴空湛玉壺。重重法界一塵無。僧繇也皺雙眉斷。此景如何上畫圖。

聖凡無地著名模。擬涉毫端便染汙。直下分明擔荷得。迢迢十萬隔程途。  
以無所得節

冒死身經百戰場。歸來真個便封王。雖云高爵尊寰宇。逸格風流輸子房。  
月滿江澄湛不流。遊人到此盡停舟。漁翁老大曾經慣。移棹攢眉過別洲。  
故說般若節

說了殷勤復自誇。可憐心事已如麻。當時若解牙三打。也勝重鋪錦上花。  
勞勞重復論前功。一片婆心未有窮。不得末梢頭句好。穩教千古錯流通。

頌禪人血書蓮經求生淨土

血染蓮經七軸長。一橫一點盡含香。他年海會談因地。十指光流照此方。

頌番僧轉世

客舍并州已十霜。歸心晝夜憶咸陽。無端更渡桑乾水。卻望并州是故鄉。

頌說得一丈不如行得一尺

古佛口門高挂鎖。鐵牛腳下痛加錘。任他千聖頻呼喚。榔栗橫眉更顧誰。

頌聖人不是無心祇是無心心耳

無心恰是聖人心。聖不無心趣轉深。會取無心端的旨。無心心卻無無心。

頌察秋毫之末不自見其睫

洞燭秋毫不見睫。由來專向境邊涉。而今驀地迴光照。始覺從前被眼遮。

心花頌

心華無種如何種。紅紫芬芳另有春。白雪立深香乍冷。蒼顏皺破色初新。  
。 翻翻葉布迦文國。蓓蕾臺承淨滿身。未瞎娘生雙鬼眼。空教靚面隔前塵。

頌雪彌勒

天宮不住下塵埃。已是無端惹禍胎。只個幻身不自了。那般笑口爲誰開。

日光定裏如何見。樓閣門前甚處回。似此行藏渾沒據。爭教補闕待當來。

## 歌詩

### 擬證道歌

永嘉大師證道歌。直截痛快。言約義豐。洵爲古今絕唱。辛丑夏六月禪坐之隙。爲禪者演說一過。頗有會心處。因躡其每段兩短句。續而歌之。非敢與大師較美。聊自娛耳。

君不見。是甚麼。眨上眉毛早錯過。欲會吾宗端的旨。耳門塞斷聽重歌。  
。證實相。無人法。萬里還家只一霎。通身是口道應難。未動舌根恰恰恰。  
頓覺了。如來禪。鼻孔依前脣上邊。曠大劫來祇者是。何分東土與西天。  
無罪福。無損益。空裏何須尋鳥迹。一性圓明萬境閒。三千刹海澄虛碧。  
誰無念。誰無生。滾滾黃河徹底清。夜半日輪當午照。更嫌何處不分明。  
放四大。莫把捉。天真不在工雕琢。寒暄動靜總無干。十二

時中自卓犖。決定說。表真乘。一言道斷古今憑。龍宮天界咸珍重。長夜明明照世燈。摩尼珠。人不識。六宮八國空狼籍。波斯不解自囊藏。幾度逢人頻戲擲。淨五眼。得五力。血戰功高碑可勒。塞北安南一陣收。雕弓永挂狼煙息。常獨行。常獨步。腳跟不踏今時路。寰中物外任逍遙。千聖齊應聽指呼。窮釋子。口稱貧。徹骨窮來有幾人。信手打開無盡藏。磚頭瓦礫盡奇珍。無價珍。用無盡。十方九界隨時賑。等教立地證菩提。無奈當人不自信。從他謗。任他非。我尚非我他是誰。不捨大慈洪誓願。金毛獅子現全威。觀惡言。是功德。賊馬騎將好趕賊。捉得賊來馬也閒。一齊趁入無生國。宗亦通。說亦通。大用縱橫不墮功。教海掀翻言默絕。禪關坐斷悟迷空。獅子吼。無畏說。威音那畔一聲徹。須彌走入藕絲中。無位真人驚吐舌。行亦禪。坐亦禪。全身突出未生前。十虛圓裏無今古。說甚香林四十年。幾回生。幾回死。自倒依前還自



起。驀地迴光返照時。幾乎笑破娘生嘴。入深山。住蘭若。竹箴三條鏝一把。佛法從教爛卻休。人前指甚鹿爲馬。覺卽了。不施功。萬別千差一照中。刹刹塵塵全體現。更教何處不圓通。但得本。莫愁末。腳跟路活乾坤闊。神通三昧幾何般。一著當陽貴獨脫。江月照。松風吹。跏趺石上夜忘歸。泥牛入海無消息。個裏風光舉似誰。降龍鉢。解虎錫。遞代持來作準的。爲問泥犁幾度開。須彌山子如何喫。不求真。不斷妄。道人行處難名狀。和衣睡倒月明前。一覺醒來天大亮。心鏡明。鑑無礙。胡來漢現空多態。若教撞著老東平。決定與君重撲碎。豁達空。撥因果。空王殿上披枷鎖。迴光一念脫樊籠。迷悟分明機在我。捨妄心。取真理。忙忙馳逐何窮已。直饒生斷兩頭機。也是全身墮死水。損法財。減功德。賊是親家防不得。冷地一回看破渠。漸惶無限偷心息。大丈夫。秉慧劍。寒光閃灼陵天岸。當頭一擲不留情。魔佛都教成兩段。震法

雷。擊法鼓。驚起大蟲。殺虎。萬象森羅無處尋。木人回首雙睛努。不可毀。不可讚。爲君格外通方便。和聲送出太分明。切忌看他手裏扇。取不得。捨不得。八字打開無隱匿。猶更低頭犯忖量。當來緩緩問彌勒。默時說。說時默。晏坐巖前天帝悅。四十九年一字無。千古萬古分明極。建法幢。立宗旨。大似虛空安兩耳。一自拈花賺飲光。兒孫浪說分皮髓。法東流。入此土。五宗二派昭千古。爭知教外別無傳。一十原來是二五。真不立。妄本空。孤峯絕頂路難通。從來不坐空王殿。那復分身萬象中。心是根。法是塵。根塵無性性元真。若教認著元真處。又是重添古鏡塵。嗟末法。惡時世。吾道陵夷堪泣涕。安得驚羣大丈夫。祖燈展轉憑相斷。作在心。殃在身。焦脣拔舌豈無因。泥犁多少酸辛輩。半是閻浮謗法人。栴檀林。無雜樹。枝葉扶疏香四布。鼻孔休教少半邊。風來猶待兩三度。獅子兒。衆隨後。爪牙未露不如狗。有時跳入野狐

羣。一喝乾坤顛倒走。圓頓教。勿人情。堂堂古路少人行。善財去後樓常閉。龍女來時珠正明。非不非。是不是。個裏清訛誰共委。生鐵饅頭當面拋。等閒塞斷虛空嘴。種性邪。錯知解。烏焉成馬何足怪。三翻四覆爲宣揚。漆桶依然還不快。亦愚癡。亦小駮。是非好惡曾何解。三途六趣互相吞。自賣到頭還自買。獅子吼。無畏說。虛空口啟山河舌。石人拍手笑呵呵。此曲阿誰曾聽徹。不思議。解脫力。個般受用何窮極。重重法界一毫端。隱顯縱橫無不得。法中王。最高勝。腳跟不動常相應。騰騰日用自忘機。信手拈來無少賸。了了見。無一物。綠水洋洋山鬱鬱。借問路人渾不知。殷勤爲舉龜毛拂。日可冷。月可熱。古今此道曾無別。丈夫眼裏誰無珠。肯謗山僧謂有說。

### 示學者

個裡分明一事無。那堪特地起規模。無端翳眼空華現。致使重黏鬼戶符

。脚跟既已涉程途。直捷紆曲迥自殊。萬事無如生死切。單刀直入是良圖。直入何曾間語默。精誠一念超勤惰。話頭舉處萬機忘。匝地普天成一個。無事甲邊休住腳。將心待悟渾成錯。思量擬議轉無端。一鏃三關須透過。透過還宜踏向上。身心一拶空無相。驀然豆子爆寒灰。者朵心華燦爛放。撒卻層層眼底障。打開灼灼光明藏。到斯不必自矜誇。且喫山僧手中棒。棒頭觸瞎頂門眼。別有風光來歲晚。入海泥牛眠不醒。鼻端一線輕牽轉。生死長途真個險。相逢不禁因相勉。不於言外解知歸。謂我說禪謗不淺。

挽羯磨阿闍黎岫雲靜觀老和尚

化緣畢矣願輪移。酸淚滴連不自持。已識浮生身是幻。難忘面命語多慈。  
。東寮指點經親授。予曾執侍東寮從師過報恩經故云南塔殷勤識預垂。圓具後隨師南塔院拔草次師指某願謂諸戒兄弟曰此子他日出世當先於  
汝曹今果然圓淨戒珠光照夜。陰森覺樹老極枝。三宗道合因無我。萬里傾心爲

有師。法雨頻霑期此際。迷津倦濟欲何之。九峯雲掩千花座。四色蓮開七寶池。丈室徘徊勞想像。樂邦迢遞忍棲遲。殘霞古木風來處。秋水石潭月落時。哀慕未能空象外。林泉巖壑總成悲。

祝闡教禪師八十壽三首

性天寥廓。覺海淵澄。高深畢睹。今昔孰曾。維師降靈。殆非偶爾。乘大願輪。爲如來使。冰霜三聚。煙水百城。孤峯絕侶。鵬舉師行。契古南心。接賢宗武。據曲衆牀。擊大法鼓。道行四刹。聞達九重。光輝泉石。奔騰象龍。奮筆註經。扣關擊節。白髮青燈。老而不輟。慈父孝子。法王忠臣。承先啟後。師乎其人。德斯壽斯。胡爲乎祝。聊爾殷勤。嶽培一掬。

閻淨地勝超尋常。千佛出興古道場。生緣幸托薄天堂。況當御世遭輪王。開。士應緣來帝鄉。願輪高駕何軒昂。獅搏鵬舉見行藏。顯密權實難測。

量。白馬西來歲月長。五乘八藏實汪洋。古今註疏滋分張。歧多遂爾致  
羊亡。爲憐末學別雌黃。博采羣詮定宗綱。措詞析義精且詳。該括五教  
宗清涼。時揮塵尾吐詞章。河流四辯韻鏗鏘。獰龍威鳳逐騰翔。零亂天  
花雨座傍。金鑊妙手開生盲。高風四播傾遐方。番僧入賀對舉揚。三宗  
五部語琅琅。紫衣昔曾惹御香。師號今更叨天光。春秋八十老風霜。榮  
辱心知師已忘。片言用祝壽彌昌。維持此道答吾皇。僧史他年照縹緗。  
拈花萬古轉芬芳。

歲月靈椿秀氣鍾。神資道味貌如松。法華深悟不遷旨。般若巧傳無住宗  
。願海正翻波浩浩。心燈早續焰重重。卻慚無物爲師壽。倩得須彌第一  
峯。

爲潭柘監院琮公七旬壽

重興千載舊叢林。令德維新道俗欽。一片悲田耕不盡。幾重願海探彌深

。石潭見底常含月。老柘陵空正布陰。鼻孔曾無措大氣。謾勞相向話從心。

爲廣善復公法主五旬之慶

雲奔水赴競相依。赫赫聲光動帝畿。頑石真教頭自點。天花時傍座前飛。  
。荃窳都脫情無滯。境觀重空道入微。濟物應將籌論室。誰云四十九年非。

鐵冶亭長江濯足圖

幻質本來空。寓形良有以。乾坤一葉舟。今古長江水。船子覆何曾。龐公吸未已。快哉無垢人。濯足靈源裏。

小徑蒔花

繞徑植花叢。殷勤奪化工。源頭汲活水。葉底露春風。既委真猶幻。何妨色是空。西來無限意。漏洩此園中。

題柏石小照

坐斷千差不染塵。何妨身外更分身。百城南去門庭舊。萬里西來面目新。  
柏老已傳佳話徧。石靈應解點頭頻。水雲未委深深意。猶謂師將境界示  
人。

山居三十首

謁罷禪筵及講叢。歸來茅屋四山中。黃精紫芋食無盡。活水乾柴用不窮。  
雲淨夜寒猿嘯月。林深日暖鳥吟風。遙思海上同參者。此意何能一信  
通。

一龕寂寂枕孤峯。極目煙巒色轉濃。瀑布真垂千丈壁。懸巖到長萬年松。  
苔封古徑樵歌斷。月照深林塔影重。借問菴中誰是主。銜花百鳥覓無  
踪。

山空人靜水淙淙。獨自披衣對夜缸。花氣隔簾侵石榻。鐘聲和月到松窗。



。塵塵三昧機先露。擾擾狂心定後降。通曉坐來渾似睡。夢魂幾度落蓮邦。

結茅一住便相宜。心眼空來說向誰。竹榻通宵塵夢斷。蒲團竟日素懷怡。看梅待月歸來晚。聽瀑臨風睡去遲。此趣未居山不委。居山能得幾人知。

千峯如畫掩柴扉。石徑苔深人跡微。流水影含空界月。落花香襲老僧衣。此宗本自無迷悟。大道何曾有是非。客到不將拳指示。任教人話鈍禪機。

我儂性癖愛幽居。卜得重巖構小廬。滿地白雲常近榻。繞門流水自成渠。清晨和露食林果。入夜挑燈讀佛書。消受幾多閒歲月。雅懷此外復何如。

兩鬢斑花藏月徂。青山入眼漸模糊。坐來定裏眉毛重。老去胸中佛法無

。臨澗自憐禪影瘦。穿雲唯喜杖藤枯。盤桓不厭頻相對。階下支離松幾株。

半間箬屋足幽棲。巖岫參差覆戶低。就蔭頻來松樹下。消閒徐步板橋西。晴峯有色時窺座。皓月無聲夜落溪。對客不談玄字腳。從教千古錯標題。

寄跡空山爲學猷。更教何事可干懷。經書高向虛空挂。佛祖深於實際埋。雲淨月圓當夜戶。雨餘花落覆春階。客來懶共閒饒舌。門額題懸止止齋。

幽巖竟日坐堆堆。口滿醜花衣滿苔。但向眉間懸寶劍。誰於肚裏著寒灰。咄哉縱火婆休去。久矣銜花鳥不來。莫把野狐涎唾我。此間明鏡不當臺。

南枝梅蕊報先春。造化傳來消息真。燄吐冰河宛有象。氣融雪谷杳無垠。

。草鞋跟底山川舊。竹杖頭邊歲月新。萬疊雲峰圖畫裡。何妨老我一閒身。

機先得旨不關文。紙燭纔吹鈔便焚。執謝無庸情繾綣。心空豈礙境紛紜。看山見見見非見。聽瀑聞聞聞不聞。此意是誰堪共委。好將一榻臥松雲。

山家沒事到黃昏。分付兒童早掩門。自牯自回九曲澗。黃猿不戀六花村。風鳴萬籟聲初靜。月上千峰影半吞。翻憶踰躅途路者。無端辜負草鞋跟。

萬緣脫略海天寬。塵世無交宜隱巒。不有桃花驚客眼。唯餘梅子澣牙酸。傳燈誰共挑燈話。指月時携就月看。往事回觀堪一笑。此心十載倩人安。

山外環溪溪外山。紅塵飛不到林間。巖邊朽木甘他朽。嶺上閒雲羨我閒。

。撞彩何難斫一指。脫空未慣說三關。葛藤樁子連根拔。壁立門前路絕攀。

期從幽壑了殘緣。面壁誰拘定九年。折柄鑿頭堪著力。落牀枕头不驚眠。  
。移花偶惹春風至。汲水常擔夜月還。一領袈裟零亂甚。那來佛法與人傳。

爲愛林泉趣頗饒。市塵隔絕路迢遙。千更竹樹居幽僻。一個蒲團坐寂寥。  
。晝靜窗中山色澹。日高簾外鳥聲嬌。定回滿目皆生意。乘興扶筇過小橋。

鐵犁木耙久曾拋。投老情懷百不膠。饑腹欲填劖紫芋。漏房將補斬黃茅。  
。溪邊苔厚牛無跡。谷口雲橫鳥覓巢。道者行藏唯自信。世途何用苦相嘲。

藏身自畫地爲牢。選得一峯高又高。籬壁深栽玄兔角。衡門重覆白龜毛。

。窗開時放煙霞入。夜靜唯聞虎豹號。住後不知誰是我。清風明月兩翬  
。翼。

鶴骨撐撐背欲駝。劇憐歲月密相過。寥寥吾道堪誰寄。咄咄人生奈老何  
。閒向溪流徵面目。漫從石壁寫伽陀。年來得個休心訣。一榻翛然伴睡  
。魔。

潦倒無羈野衲家。饑來喫飯渴來茶。磚頭磨鏡人皆笑。心字書門我亦嗟  
。放曠不尋新事業。忘機潑撒舊生涯。近時也向巖前坐。沒個天人更散  
。花。

曲徑重林山半央。竹籬低護矮茅堂。一灣流水千溪月。滿塢梅花十里香  
。夜戶雪埋禪榻冷。曉鐘夢破地爐霜。他年待到臺山日。好與文殊細較  
。量。

疎拙難堪應世情。餘生贏得寄柴荆。且無活計卷脣鐙。儘有家私折腳鐙

。亭畔開池宜浣月。籬邊種菊喜餐英。敢云野況齊安養。差勝人間閒利名。

不坐蒲團不看經。主人更說甚惺惺。眼中曾不著金屑。空裏何須釘鐵釘。  
。雨濺落花香滿地。風驚懸瀑嚮虛庭。客來問我山中境。一片寒松萬頃青。

萬峯羅拜最高層。斗室中藏個老僧。花發千林春若錦。雲鄰四壁夏如冰。  
。且無隙地栽瓜豆。那得閒情打葛藤。怪底經年人跡少。陵空鳥過不堪登。

同羣鶴塵老林丘。萬壑千巖儘自由。不向鬚眉驚夢幻。肯將寒暑記春秋。  
。閒聽好鳥時鳴止。笑看白雲自去留。爛煮黃精噉得飽。倚松枕石睡齁齁。

韶光一去杳難尋。鬢染霜花老漸侵。肩上橫將朽木担。胸頭賸有壁觀心。

。當機誰發拈花笑。向日躬穿補衲鉞。遮莫秋風扇四野。滿林黃葉正如金。

若魯如愚百不堪。亂峯深處著茅龕。曾無聲跡勞他覓。那有幽奇到我探。  
。杖挂苔衣仍靠壁。經穿蠹字未開函。山靈似解寂寥甚。日遣閒雲傍座參。

峯迴礪合屋頭尖。塵外風光足四簷。滿徑幽香花浸露。半牀虛白月篩簾。  
。心從歇去禪饒味。機到忘來虎不嫌。林壑久深投老約。何妨華髮鏡中添。

年來無力下巉巖。竟日齋餘口便緘。腰瘦難圍三束篋。身輕爭挂七斤衫。  
。灰寒古鼎猶重撥。草滿空階亦懶芟。客到也須高著眼。謾勞相對話誦謫。

### 紙鳶

放去收來一線牽。等閒出沒太虛邊。無心落影留春水。得意乘風破曉煙。  
。質幻自應超象外。音希誰解聽聲前。可憐都作兒童戲。幾度空勞下遠  
天。

和惺齋主人原韻

跣趺百慮未全澄。已是人間無事僧。說法閒將三寸舌。酬機賸有一枝藤。  
。香花此日來天界。公案他年入祖燈。獨愧蒲團空幾破。深禪妙悟竟何  
曾。

偶作三首

五蘊山頭個朽廬。六窗虛豁任緣居。空華誰復分榮落。幻影無勞問我渠。  
。二鼠齧籐情促促。四蛇盤篋體如如。雲林一段閒消息。黑漆屏風醉後  
書。

湖海年來懶構廬。寄懷何處不幽居。三千刹土行無迹。一個蒲團坐有餘



。今古任教說去住。佛魔自是沒親疏。溪山雲月活蘭若。無用心心門壁書。

八面銀鐙個故廬。是誰於此解安居。創來莫問年多少。到者方知地有餘。  
。香盡古爐煙寂寂。月移空界影徐徐。就中一種真奇絕。戶牖不開見十虛。

### 落花十首

小院春移興索然。蜂癡蝶戀尚蟬聯。殘紅墮雨埋幽徑。冷艷流香膩逝川。  
。一片愁含三際外。幾枝夢斷五更前。薄情最是東風惡。吹落無心似去年。

禪心久不爲春傷。無那飛紅照眼光。風妬暗催辭故本。苔嬌遙倩點新妝。  
。講臺晝靜翻晴雨。丈室窗空映晚塘。愁殺東園將宿蝶。夢魂從此不成香。

撲撲餘香襲衲衣。隔簾時見鳥銜飛。一林春老吟情淡。三徑苔深客屐稀。  
。是境是心勞我辨。非空非色定誰歸。東風莫教吹便盡。留取些些襯草  
菲。

無奈留春不住何。朱英玉蕊亂辭柯。月憐影瘦光應滅。鳥怨枝空罵定多。  
。香水潺湲牽客思。綠陰掩映動樵歌。頭陀未慣空心眼。見見聞聞墮白  
窠。

東西逐逐二輪忙。斷送春光去渺茫。夢蝶驚風心欲醉。錦苔過雨地生香。  
。高樓有興空裁句。短杖無聊日倚牆。自笑年來禪力薄。也隨浮幻動愁  
腸。

鳥怨春歸啼錦叢。窗開滿地盡殘紅。幽崖有約還期坐。病室何人更滯空。  
。再放下時應具眼。未拈起處好欽風。凭欄珍重舒長望。豈在紆紆物態  
中。

暮雨朝風興尚幽。流光易過眼睛頭。金烏啄破千枝血。玉兔踏殘滿地愁。  
仙洞溪流春片片。江城笛弄恨悠悠。誰探藏海榮枯本。彈指一登慈氏樓。

紅銷香冷欲何任。節序摧殘故惱人。不禁已添頭上雪。可堪重減眼前春。  
。愁風愁雨更愁露。墮水墮苔兼墮塵。化母不知工省費。擬將鋪地繡長茵。

雨聲纔過又風聲。花事年來興不盈。幽鳥多情春竟去。夜窗無賴月偏明。  
。五衰何處終天相。十劫還他重法情。眼底閒愁拋未得。經旬高臥掩柴荆。

春光歲歲去還來。經慣無庸著甚哀。不逐殘芳驚睡眼。從教細草沒靈臺。  
。依牆遊屐全微雨。倒地詩瓢半裏苔。定起忽過村園暮。清風明月兩徘徊。

閱歸元鏡

大方無滯見通人。用處投機法法親。觸目已成三聖觀。和聲與種九蓮因。  
。一乘本不容株守。二諦何嘗是浪陳。解展化權常格外。空花也放少林  
春。

香巖居士肖像

富貴場中偶現身。靈根久不昧前因。誰曾在欲能離欲。君獨同塵不染塵。  
。萬劫情關期力透。一聲佛號與心親。他年九品蓮高占。應是而今畫裏  
人。

偶成四首

輦路橫門外。皇都峙寺傍。禪關白晝掩。端坐一爐香。  
古柏根盤地。刹竿頂指天。客來休借問。此外更無禪。  
浩浩紅塵迷白晝。堂堂古路透皇都。知他來去忙忙者。腳底還曾踏著無。

寺近皇都靜若山。機忘何地不閒閒。經年祇解貪趺坐。豈料浮名滿世間。  
題慈因講寺太湖石

經年怪底久沈埋。孤硬無情觸處乖。試看生公未入座。依稀他卻點頭來。  
病中示衆二首

輪迴偶憶骨毛寒。四十年光一指彈。禪病通身醫不得。祇應高臥且加餐。  
適從鄰院參新座。又共劉郎結淨因。竟日勞勞忙未了。不知身是病中身。

### 三週哭師三首

憶昔泥洹示早秋。經今屈指已三週。斷腸不耐頻追思。恩怨重重若爲酬。  
烏籐白拂共傳心。皮髓分時論芥鍼。白浪洪波空浩渺。黃金骨具欲誰尋。  
自恨當年缺主張。祇將九拜當尋常。而今有口如何說。沈水一爐淚兩行。

### 立春

蒲團瞌睡正酣濃。忽報春光歲裏通。鞭起泥牛急著力。一犁耕破古長空。

香巖公松泉小照三首

淨業曾經細較量。數年相與集津梁。跏趺竟日成三昧。不是堆堆學坐忘。  
蓮蕊書名勝祖燈。宗風不羨嶺南能。金臺一任來遲早。且作人間帶髮僧。  
一句彌陀萬慮休。腳跟不動出閻浮。相逢若問唯心旨。松自青青水自流。

挽戒臺度公四首

白髮盈頭走市塵。知他未了是何緣。無端夜奏還鄉曲。一日能教萬口傳。  
不愛深山坐寂寥。九重城裏打塵勞。腳跟自有通宵路。突兀須彌未是高。  
無位真人赤肉團。紅塵堆裏許誰瞞。臨行一句分明說。勿謂從空放下難。  
來兮有象波含月。去也無心鳥跡空。撥轉上頭關棧子。金烏突出一輪紅。

自題肖像六首

鼻孔纔通氣。斑麻數不清。祇須看嘴臉。何用問生平。  
參久禪爲悟。翻殘教未通。可憐個面目。也入畫圖中。

披殘肩上衲。捏徧手中珠。一句彌陀佛。還曾記得無。  
豈但投機拙。何嘗見諦通。將他無量壽。喚作主人翁。  
兩處皇都寺。一生淨土心。從來無所住。料得有知音。  
真身原有相。幻質卻無形。覲面相逢著。不須話姓名。

夢東禪師遺集卷下

語錄

法照入竹林寺傳◎◎唐釋法照·不知何許人。大曆二年·棲止衡州雲峰寺·勤修不懈。於僧堂內粥鉢中·忽睹五彩祥雲·雲內現山寺。寺之東北五十里已來·有山·山下有澗·澗北有石門。入可五里·有寺·金榜題云·大聖竹林寺。雖目擊分明·而心懷隕穫。他日齋時·還於鉢中五色雲內·現其五臺諸寺。盡是金地·無有山林穢惡·純是池臺樓觀·衆寶莊嚴。文殊一萬聖衆而處其中。又現諸佛淨國。食畢方滅。心疑未決·歸院問僧·有曾遊五臺山已否。時有嘉延曇暉二師言·曾到·言與鉢內所見·一皆符合。然尚未得臺山消息。暨四年夏·於衡州湖東寺·內有高樓臺·九旬起五會念佛道場。六月二日未時·遙見祥雲彌覆臺寺。雲中有諸樓閣·閣中有數梵僧·各長丈許·執錫行道。衡州舉郭咸見彌陀佛·與文殊普賢一萬菩薩·俱在此會。其身高大。見之者皆深泣血設



禮。至酉方滅。照其日晚。於道場外。遇一老人告照云。師先發願往金色世界。奉覲大聖。今何不去。照怪而答曰。時難路艱。何可往也。老人言。但亟去。道路固無留難。言訖不見。照驚入道場。重發誠願。夏滿約往前。任是火聚冰河。終無退衄。至八月十三日。於南嶽與同志數人。惠然肯來。果無阻礙。則五年四月五日到五臺縣。遙見佛光寺南。數道白光。六日到佛光寺。果如鉢中所見。略無差脫。其夜四更。見一道光。從北山下來射照。照忙入堂內。乃問衆云。此何祥也。吉凶焉在。有僧答言。此大聖不思議光。常答有緣。照聞已。即具威儀。尋光至寺東北五十里間。果有山。山下有澗。澗北有一石門。見二青衣。可年八九歲。顏貌端正。立於門首。一稱善財。二曰難陀。相見歡喜。問訊設禮。引照入門。向北行五里已來。見一金門樓。漸至門所。乃是一寺。寺前有大金榜。題曰。大聖竹林寺。一如鉢中所見者。方圓可二十里。

· 一百二十院。皆有寶塔莊嚴。其地純是黃金。流渠華樹。充滿其中。  
 照入寺。至講堂中。見文殊在西。普賢在東。各據師子之座。說法之音。  
 · 歷歷可聽。文殊左右菩薩萬餘。普賢亦無數菩薩圍繞。照至二聖前作  
 禮問言。末代凡夫。去聖時遙。知識轉劣。垢障尤深。佛性無由顯現。  
 佛法浩瀚。未審修行於何法門。最為其要。唯願大聖。斷我疑網。文殊  
 報言。汝今念佛。今正是時。諸修行門。無過念佛。供養三寶。福慧雙  
 修。此之二門。最為徑要。所以者何。我於過去劫中。因觀佛故。因念  
 佛故。因供養故。今得一切種智。是故一切諸法。般若波羅蜜。甚深禪  
 定。乃至諸佛。皆從念佛而生。故知念佛。諸法之王。汝當常念無上法  
 王。令無休息。照又問。當云何念。文殊言。此世界西。有阿彌陀佛。  
 彼佛願力不可思議。汝當繼念。令無間斷。命終之後。決定往生。永不  
 退轉。說是語已。時二大聖。各舒金手摩照頂。為授記莚。汝以念佛故

·不久證無上正等菩提。若善男女等。願疾成佛者。無過念佛。則能速證無上菩提。語已。時二大聖。互說伽陀<sup>讚美也</sup>。照聞已。歡喜踴躍。疑網悉除。又更作禮。禮已合掌。文殊言。汝可往詣諸菩薩院。次第巡禮。受教已。次第瞻禮。遂至七寶果園。其果纔熟。其大如鉢。便取食之。食已。身意泰然。到大聖前。作禮辭退。還見二青衣。送至門外。禮已。舉頭遂失所在。倍增悲感。乃立石記。至今存焉。復至四月八日。於華嚴寺西樓下安止。洎十三日。照與五十餘僧。同往金剛窟。到無著見大聖處。虔心禮三十五佛名。照禮纔十徧。忽見其處廣博嚴淨。琉璃宮殿。文殊普賢一萬菩薩。及佛陀波利。居在一處。照見已。惟自慶喜。隨衆歸寺。其夜三更。於華嚴院西樓上。忽見寺東山半有五聖燈。其大方尺餘。照咒言。請分百燈歸一畔。便分如願。重謂分爲千炬。言訖便分千數。行行相對。徧於山半。又更獨詣金剛窟所。願見大聖。三更盡

到。見梵僧。稱是佛陀波利。引之入聖寺。語在覺護傳。即佛陀波利傳。至十二月初。遂於華嚴寺華嚴院。入念佛道場。絕粒要期。誓生淨土。至於七月初夜。正念佛時。又見一梵僧入乎道場。告云。汝所見臺山境界。何故不說。言訖不見。照疑此僧。亦擬不說。翌日申時。正念誦次。又見一梵僧。年可八十。乃語照曰。師所見臺山靈異。何不流布。普示衆生。令使見聞。發菩提心。獲大利樂乎。照曰。實無心祕蔽聖道。恐生疑謗故。所以不說。僧云。大聖文殊。現在此山。尚招人謗。況汝所見境界。但使衆生見聞之者。發菩提心。作毒鼓緣耳。照聞斯語。便隨憶念錄之。時江東釋慧從。以大曆六年正月內。與華嚴寺崇暉明謙等三十餘人。隨照至金剛窟所。親示般若院立石標記。於時徒衆。誠心瞻仰。悲喜未已。遂聞鐘聲。其音雅亮。節解分明。衆皆聞之。驚異尤甚。驗乎所見不虛。故書於屋壁。普使見聞。同發勝心。共期佛慧。自後。照又依

所見化竹林寺題額處。建寺一區。莊嚴精麗。便號竹林焉。又大曆十二年九月十三日。照與弟子八人。於東臺觀白光數次。有異雲靉靄。雲開見五色通身光。光內有圓光紅色。文殊乘青毛師子。衆皆明見。乃霏微下雪。及五色圓光。徧於山谷。其同見弟子純一。惟秀。歸政。智遠。沙彌惟英。優婆塞張希俊等。照後篤鞏其心。修鍊無曠。不知其終。絳州兵掾王士詹。述聖寺記云。



清 彭 際 清 編 纂

念 佛 警 策

佛 陀 教 育 基 金 會 印 贈





# 念佛警策卷上

菩薩戒弟子彭際清纂

## 無量壽經

佛告阿難。十方世界諸天人民。其有至心願生彼國。凡有三輩。其上輩者。捨家棄欲而作沙門。發菩提心。一向專念無量壽佛。修諸功德。願生彼國。此等衆生。臨壽終時。無量壽佛與諸大衆現其人前。即隨彼佛往生其國。便於七寶華中自然化生。住不退轉。智慧勇猛。神通自在。是故阿難。欲於今世見無量壽佛。應發無上菩提之心。修行功德。願生彼國。其中輩者。十方世界諸天人民。其有至心願生彼國。雖不能行作沙門。大修功德。當發無上菩提之心。一向專念無量壽佛。多少修善。奉持齋戒。起立塔像。飯食沙門。懸繪然燈。散花燒香。以此回向。願生彼國。其人臨終。無量壽佛。化現其身。光明相好。具如真佛。與諸大衆現其人前。即隨化佛往生其國。住不退轉。

功德智慧。次如上輩者也。其下輩者。十方世界諸天人民。其有至心願生彼國。假使不能作諸功德。當發無上菩提之心。一向專意。乃至十念。念無量壽佛。願生其國。若聞深法歡喜信樂。不生疑惑。乃至一念念於彼佛。亦得往生。功德智慧。次如中輩者也。

### 阿彌陀經

舍利弗。若有善男子善女人。聞說阿彌陀佛執持名號。若一日若二日若三日若四日若五日若六日若七日。一心不亂。其人臨命終時。阿彌陀佛與諸聖衆現在其前。是人終時心不顛倒。即得往生阿彌陀佛極樂國土。舍利弗。我見是利。故說此言。若有衆生聞是說者。應當發願。生彼國土。

### 觀無量壽佛經

佛告阿難。及韋提希。諸佛如來是法界身。入一切衆生思想中。是故

汝等心想佛時。是心即是三十二相。八十隨形好。是心作佛。是心是佛。諸佛正徧知海。從心想生。是故應當一心繫念。諦觀彼佛。多陀阿伽度。阿羅訶。三藐三佛陀。想彼佛者。先當想像。閉目開目。見一寶像。如閻浮檀金色。坐彼華上。見像坐已。心眼得開。了了分明。見極樂國七寶莊嚴。寶地寶池。寶樹行列。諸天寶幔。彌覆其上。衆寶羅網。滿虛空中。見如此事。極令明了。如觀掌中。見此事已。復當更作一大蓮華在佛左邊。復作一大蓮華在佛右邊。想一觀世音菩薩像坐左華座。亦作金色。如前無異。想一大勢至菩薩像坐右華座。此想成時。佛菩薩皆放光明。其光金色。照諸寶樹。一一樹下。亦有三蓮華。諸蓮華上。各有一佛二菩薩像。徧滿彼國。此想成時。行者當聞水流光明。及諸寶樹。鳧雁鴛鴦。皆說妙法。出定入定。恆聞妙法。

## 首楞嚴經

大勢至法王子。與其同倫五十二菩薩。即從座起。頂禮佛足而白佛言。我憶往昔恆河沙劫。有佛出世。名無量光。十二如來相繼一劫。其最後佛。名超日月光。彼佛教我念佛三昧。譬如有人。一專爲憶。一人專忘。如是二人。若逢不逢。或見非見。二人相憶。二憶念深。如是乃至從生至生。同於形影。不相乖異。十方如來。憐念衆生。如母憶子。若子逃逝。雖憶何爲。子若憶母。如母憶時。母子歷生不相違遠。若衆生心憶佛念佛。現前當來。必定見佛。去佛不遠。不假方便。自得心開。如染香人身有香氣。此則名曰香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯爲第一。

## 大方等大集賢護經

賢護。彼善男子。善女人。端坐繫念。專心想彼阿彌陀如來應供等正覺。如是相好。如是威儀。如是大衆。如是說法。一心相續。次第不亂。或經一日。或復一夜。如是或至七日七夜。是人必覩阿彌陀如來應供等正覺也。若於晝時不能見者。若於夜分或睡夢中。阿彌陀佛。必當現也。復次賢護。譬如世間若男若女。遠行他國。於睡夢中。見本居家。時實不知爲晝爲夜。而亦不知爲內爲外。是人爾時所有眼根。牆壁石山。終不能障。乃至幽冥黑暗。亦不爲礙也。賢護。菩薩摩訶薩。心無障礙。亦復如是。當正念時。於彼所有佛剎中間。凡是一切須彌山王。及鐵圍山大鐵圍山。乃至自餘諸黑山等。不能與此眼根爲障。而亦不能覆蔽是心。然是人者。其實未得天眼。能見彼佛。亦無天耳。聞彼法音。復非神通。往彼法界。而亦不於此世界沒。生彼佛前。而實但在此世界中。積念熏修。久觀明利。故終得覩彼阿彌陀

如來應供等正覺。僧衆圍繞。菩薩會中。或見自身。在彼聽法。聞已憶念。受持修行。或時復得恭敬禮拜。尊承供養。彼阿彌陀如來應供等正覺已。是人然後起此三昧。其出觀已。次第思惟。如所見聞。爲他廣說。

### 文殊所說般若經

文殊師利言。世尊。云何名一行三昧。佛言。法界一相。繫緣法界。是名一行三昧。若善男子善女人。欲入一行三昧。當先聞般若波羅蜜。如說修學。然後能入一行三昧。如法界緣。不退不壞。不思議。無礙無相。善男子。善女人。欲入一行三昧。應處空閒。舍諸亂意。不取相貌。繫心一佛。專稱名字。隨佛方所。端身正向。能於一佛念念相續。即是念中。能見過去未來現在諸佛。何以故。念一佛功德。無量無邊。亦與無量諸佛功德無二。不思議佛法。等無差別。皆乘一如

。成最正覺。悉具無量功德。無量辯才。

### 華嚴經兜率偈讚品

以佛爲境界。專念而不息。此人得見佛。其數與心等。

### 賢首品

若常修習波羅蜜。則能具足摩訶衍。若能具足摩訶衍。則能如法供養佛。若能如法供養佛。則能念佛心不動。若能念佛心不動。則常覩見無量佛。若常覩見無量佛。則見如來體常住。

### 坐禪三昧經

菩薩坐禪。不念一切。唯念一佛。即得三昧。

### 目連所問經

佛告目連。譬如萬川長流。有浮草木。前不顧後。後不顧前。都會大海。世間亦爾。雖有豪貴。富樂自在。悉不得免生老病死。祇由不信

佛經。後世爲人。更甚困劇。不能得生千佛國土。是故我說無量壽國。易往易取。而人不能修行往生。反事九十六種邪道。我說是人。名無眼人。名無耳人。

### 大智度論

龍樹菩薩

念佛三昧。能除種種煩惱。及先世罪。餘諸三昧。有能除婬。不能除瞋。有能除瞋。不能除婬。有能除癡。不能除婬。有能除三毒。不能除先世罪。是念佛三昧。能除種種煩惱。種種罪。復次。念佛三昧。有大福德。能度衆生。是諸菩薩欲度衆生。諸餘三昧。無如此念佛三昧福。能速滅諸罪。復次。佛爲法王。菩薩爲法將。所尊所重。惟佛世尊。是故應常念佛。譬如大臣特蒙恩寵。常念其主。菩薩亦如是。知種種功德。無量智慧。皆從佛得。知恩重故。常念佛。

常欲不離諸佛者。菩薩世所生。常值諸佛。問曰。菩薩當化衆生。



何故欲值佛。答曰。有未入菩薩位。未得阿鞞跋致。受記蒞故。若遠離諸佛。便壞諸善根。沒在煩惱。不能自度。安能度人。如人乘船。中流壞敗。欲度他人。反自沒水。又如少湯投大冰池。雖消少處。反更成冰。菩薩未入法位。若遠離諸佛。以少功德。無方便力。欲化衆生。雖少利益。反更墜落。聲聞辟支。雖有涅槃利益。無一切智故。不能教導菩薩。諸佛一切種智故。能教導菩薩。如象沒泥。非象不能出。菩薩若入非道中。唯佛能救。同大道故。復次。菩薩作是念。我未得佛眼。如盲無異。若不爲佛所引導。則無所趣。錯入餘道。設聞佛法。異處行者。未知教化時節。行法多少。復次。菩薩見佛。或眼見。心清淨。若聞所說。心則樂法。得大智慧。隨法修行。而得解脫。如是等值佛無量益利。豈不一心求欲見佛。如嬰兒不應離母。行道不離糧食。大熱不離涼風冷水。大寒不離火。渡深水不離船。病人不

離良醫。菩薩不離諸佛。過于上事。父母親屬知識人天王等。皆不能如佛益利。佛益利諸菩薩。離諸苦處。住世尊之地。問。云何得不離諸佛。答。衆生有無量劫罪因緣。雖行福德。智慧薄少。雖行智慧。福德薄少。菩薩求佛道。要行生忍。法忍。行生忍故。一切衆生中。發慈悲心。滅無量劫罪。得無量福德。行法忍故。破諸法無明。得無量智慧。二行和合。世世不離諸佛。復次。菩薩常愛樂念佛故。捨身受身。恆得值佛。如衆生習欲心重。受姪鳥身。瞋恚偏多。生毒蟲中。菩薩不貴轉輪聖王人天福樂。但念諸佛。故隨心所重而受身形。復次。菩薩常善修念佛三昧因緣故。所生常值諸佛。如般舟三昧經中說。菩薩入是三昧。即見生阿彌陀國。

## 大乘起信論

馬鳴菩薩

復次。衆生初學是法。欲求正信。其心怯弱。以住於此娑婆世界。自

畏不能常值諸佛。親承供養。懼謂信心。難可成就。意欲退者。當知如來有勝方便。攝護信心。謂以專意念佛因緣。隨願得生他方佛土。常見於佛。永離惡道。如修多羅說。若人專念西方極樂世界阿彌陀佛。所修善根。回向願求生彼世界。即得往生。常見佛故。終無有退。若觀彼佛真如法身。常勤修習。畢竟得生。住正定故。

## 十疑論

智者大師

問。決定求生西方。未知作何行業。以何為種子。得生彼國。又俗人皆有妻子。不斷婬欲。得生彼否。答。欲決定生西方者。具二種行。一。定得生彼。一。厭離行。二。欣願行。厭離行者。凡夫無始以來。為五欲纏縛。輪迴五道。備受衆苦。不起心厭離五欲。未有出期。為此常觀此身。膿血屎尿。一切惡露。不淨臭穢。涅槃經云。如是身城。愚癡羅刹止住其中。誰有智者當樂此身。又經云。此身衆苦所集。一切皆

不淨。扼縛癰瘡等。根本無義利。至諸天身。皆亦如是。行者若行若坐。若睡若覺。常觀此身。唯苦無樂。深生厭離。縱妻房不能頓斷。漸漸生厭。作七種不淨觀。一此姪欲身。從貪愛煩惱生。是種子不淨。二父母交會時。赤白和合。是受生不淨。三胎中在生臟下。熟臟上。是住處不淨。四在胎惟食母血。是食噉不淨。五十月滿足。頭向產門。膿血俱出。臭穢狼藉。是初生不淨。六薄皮覆上。其內膿血徧一切處。是舉體不淨。七乃至死後脛脹爛壞。骨肉縱橫。狐狼食噉。是究竟不淨。自身既爾。他身亦然。所愛境界。男女身等。深生厭離。常觀不淨。能如此觀者。姪欲煩惱。漸漸減少。又發願願我永離三界雜食臭穢。膿血不淨。耽荒五欲。男女等身。願得淨土法性生身。此爲厭離行。欣願行。復二種。一先明求往生之意。二觀彼淨土莊嚴等事。欣心願求。明往生意者。所以求生淨土。爲欲救拔一切衆生苦。

即自思忖。我今無力。若在惡世。煩惱境強。自爲業縛。淪溺三塗。動經劫數。如此輪轉。無始來未曾休息。何時得救苦衆生。爲此求生淨土。親近諸佛。若證無生忍。方能於惡世救苦衆生。故往生論。發菩提心者。正是願作佛心。願作佛心。則是度衆生心。度生心。則是攝衆生生佛國心。又願生淨土。須具二行。一須遠離三種障菩提門法。二須得三種順菩提門法。何爲遠離三種障菩提門法。一依智慧門。不求自樂。遠離我心貪著自身故。二依慈悲門。拔一切衆生苦。遠離無安衆生心故。三依方便門。憐憫一切衆生。欲與其樂。遠離恭敬供養自身心故。若能遠三種菩提障。則得三種順菩提法。一無染清淨心。不爲自身求諸樂故。菩提是無染清淨處。若爲自身求樂。即染身心。障菩提門故。無染清淨心。是順菩提門。二安清淨心。爲拔衆生苦故。菩提是安隱一切衆生清淨處。若不作心拔一切衆生令離生死苦。

即違菩提門故。安清淨心。是順菩提門。三樂清淨心。欲令一切衆生得大菩提涅槃故。菩提涅槃是畢竟常樂處。若不作心令一切衆生得畢竟常樂。即遮菩提門故。樂清淨心。是順菩提門。此菩提因何而得。要因生淨土。常不離佛。得無生忍已。於生死國中。救苦衆生。悲智內融。定而常用。自在無礙。即菩提心。此是願生之意。二明欣心願求者。希心起想。緣彌陀佛。若法身。若報身等。金色光明。八萬四千相。一一相八萬四千好。一一好放八萬四千光明。常照法界。攝取念佛衆生。又觀彼土七寶莊嚴妙樂等。備如無量壽經觀經十六觀等。常行念佛三昧。及施戒修等一切善行。悉以迴施一切衆生。同生彼國。決定得生。此欣願門也。

### 淨業專雜二修說

善導和尚

問曰。何故不令作觀。直遣專稱名號者。有何意耶。答。衆生障重。

境細心粗。識颺神飛。觀難成就。是以大聖悲憐。直勸專稱名字。正由稱名易故。相續即生。若能念念相續。畢命爲期者。十即十生。百即百生。何以故。無外雜緣得正念故。與佛本願相應故。不違教故。順佛語故。若捨專念修雜業者。百中希得一二。千中希得三四。何以故。乃由雜緣亂動。失正念故。與佛本願不相應故。與教相違故。不順佛語故。繫念不相續故。心不相續念報佛恩故。雖作業行。常與名利相應故。樂近雜緣。自障障他往生正行故。比見諸方道俗。解行不同。專雜有異。但使專意作者。十即十生。修雜不至心者。千中無一。願一切人等。善自思惟。行住坐臥。必須厲心克己。晝夜莫廢。畢命爲期。前念命終。後念即生。長時永劫。受無爲法樂。乃至成佛。豈不快哉。

## 臨終正念訣

凡人臨命終時。欲得往生淨土者。須先準備。不得怕死貪生。常自思念我現在之身。多有衆苦。不淨惡業。種種交纏。若得捨此穢身。即得往生淨土。受無量快樂。見佛聞法。離苦解脫。乃是稱意之事。如脫臭敝之衣。得著珍御之服。放下身心。莫生貪著。纔有病患。莫論輕重。便念無常。一心待死。須囑家人看病人往來人。凡來我前。但爲我念佛。不得說眼前閒雜之事。家緣長短之事。亦不須輕語安慰。祝願安樂。此皆是虛華無益之語。及至病重。家人親屬不得來前垂淚哭泣。惑亂心神。失其正念。但教記取阿彌陀佛。守令氣絕。更或有明解淨土之人。頻來策勵。如此者千萬往生。必無疑慮也。

### 念佛三昧寶王論

飛錫禪師

問。人生石火電光。一經蹉跎。悔無所及。修道之人。尚不親心。况親於身。况身外乎。常恐出息不還。屬于後世。狂風飄蓬。茫茫何之



。願示一生之計。對。悲華經。阿彌陀佛。昔爲轉輪王。名無諍念。千子具足。於寶藏佛所發菩提心。取西方極樂淨土。諸經中知名佛菩薩聲聞等。皆昔之千子也。太子不瞬。觀音也。次摩尼。勢至也。次王衆。文殊也。次能伽奴。即金剛智慧光明菩薩。次無畏。即蓮華尊如來。次庵婆羅。即虛空光明菩薩。次善臂。即師子香菩薩。次泯圖。即普賢也。次密蘇。阿閃佛也。密蘇發心以來。行時步步心心數法。常念諸佛。今登正覺。生妙樂刹焉。吾謂經行廣陌。陡步幽林。固當如密蘇之見。即鳴珂入仗。動珮朝天。肅肅羽儀。駸駸車馬。又安得不用心於步步間哉。夫含齒戴髮。死生交際。未有無出入息者。世人多以寶玉木穗等爲數珠。吾以出入息爲念珠焉。稱佛名號。隨之於息。有大恃怙。安懼一息不還。即屬後世者哉。余行住坐臥。常用此珠。縱昏昧含佛而寢。覺即續之。必於夢中得見彼佛。如鑽燧煙飛。

火之前相。夢之不已。三昧成焉。面覩玉毫。親蒙授記。萬無一失也。子宜勉之。

問。方等經。修無上深妙禪定。令繼想白毫。兼稱佛號。以祈勝定。然默念泉澄。三昧自至。何必聲喧里巷。響震山林。然後爲道哉。對。聲亦無爽。夫辟散之要。要存乎聲。聲之不厲。心竊無定。有五義焉。拔茅連茹。乘策其後。畢命一對。長謝百憂。一也。聲光所及。萬禍水消。功德叢林。千山松茂。二也。金容煒煌以散彩。寶華浙瀝而雨空。若指諸掌。皆聲致焉。三也。如牽木石。重而不前。洪音發號。飄然輕舉。四也。與魔軍戰。旗鼓相望。用聲律於戎軒。以定破於強敵。五也。喧靜兩全。止觀雙運。叶夫佛意。不亦可乎。念佛三昧序云。功高易進。念佛爲先。夫元音之叩。塵累每消。滯情融朗。非天下之至妙。其孰能與於此。華嚴經。寧受無量苦。得聞佛音聲。

不受一切樂。而不聞佛名。然則佛聲遠震。開善萌芽。猶春雷之動百草。安得輕誣哉。

### 萬善同歸集

永明大師

問。觀經明十六觀門。皆是攝心修定。觀佛相好。諦了圓明。方階淨域。如何散心。而能化往。答。九品經文。自有升降。上下該攝。不出二心。一定心。如修習定觀。上品往生。二專心。但念名號。衆善資薰。迴向發願。得成末品。仍須一生歸命。盡報精修。坐臥之間。常面西向。當行道禮敬之際。念佛發願之時。懇苦翹誠。無諸異念。如就刑獄。若在狴牢。怨賊所追。水火所逼。一心求救。願脫苦輪。速證無生。廣度含識。紹隆三寶。誓報四恩。如斯志誠。必不虛棄。如或言行不稱。信力輕微。無念念相續之心。有數數間斷之意。恃此懈怠。臨終望生。但爲業障所牽。恐難值其善友。風火逼迫。正念不

成。何以故。如今是因。臨終是果。應須因實。果則不虛。聲和則響順。形直則影端。故也。如要臨終十念成就。但預辦津梁。合集功德。迴向。此時。念念不虧。即無慮矣。夫善惡二輪。苦樂二報。皆三業所造。四緣所生。六因所成。五果所攝。若一念心瞋恚邪淫。即地獄業。慳貪不捨。即餓鬼業。愚癡闇蔽。即畜生業。我慢貢高。即修羅業。堅持五戒。即人業。精修十善。即天業。證悟人空。即聲聞業。知緣性離。即緣覺業。六度齊修。即菩薩業。真慈平等。即佛業。若心淨。即香臺寶樹。淨刹化生。心垢。則邱陵阮坎。穢土稟質。皆是等倫之果。能感增上之緣。是以離自心源。更無別體。欲得淨果。但行淨因。如水性趨下。火性騰上。勢數如是。何足疑焉。

### 淨土十疑論後序

陳 瑾

人心無常。法亦無定。心法萬差。其本在此。信此則徧信。華嚴所以

說十信。疑此則徧疑。智者所以說十疑。出疑入信。一入永入。不離於此。得究竟處。淨土者。究竟處也。此處有說法之主。名無量壽。此佛說法未嘗間斷。疑障其耳。則聾而不聞。疑障其心。則昧而不覺。不聞不覺。安住惡習。讚歎不念。隨喜粗心。妄指蓮胞以爲虛誕。終不自念此分段身。從何而得。自何而來。胎獄穢濁。真實安在。信憑業識。自隔真際。於一幻境。非彼執此。生生不靈。永絕聖路。以如是故。釋迦如來起大慈憫。於生死中爲大船師。載以法船。令趨彼岸。晝夜度生。無有休息。然而彌陀之岸。本無彼此。釋迦之船。實非往來。譬如一燈分照八鏡。鏡有東西。光影無二。彌陀說法徧光影中。而釋迦方便獨指西鏡。故已到彼岸者。乃可以忘彼此。未入法界者。何自而泯東西。於此法中若未究竟。勿滯方隅。勿分彼此。但當正念諦信而已。此二聖之意。而智者之所以信也。信者萬善之母。疑

者衆惡之根。能順其母。能鋤其根。則向之所謂障緣衆生。聾可復聞。昧可復覺。未出生死。得出生死。未生淨土。得生淨土。順釋迦之誨。往面彌陀。隨彌陀之願。來助釋迦。在此而徧歷十方。即西而普入諸鏡。自二聖建立以來。如是之人。如河沙數。云何不信。云何而疑。能自信已。又作方便。令諸未信無有不信者。此則智者之所以爲悲也。明智大師中立。學智者之道。不順其文而順其悲。所以又印此論。冠以次公之序。而請予申廣其說。以助其傳。

### 念佛方便文

江公望

世出世間之法。欲得成辦省力。莫若繫心一緣。祇如稱念阿彌陀佛名號。念若出聲。不唯日久耗乏臟氣。齒舌擊磕。心念隨動。耳根承攬。分別識生。聞性內搖。隨出不返。是三成勞。積久或怠。若祇心念。不作音聲。外機不抽。內對不出。沈濁昏住。易成廢忘。有巧方便。

。無用動口。不出音聲。微以舌根。敲擊前齒。心念隨應。隨心應量。循業發現。舌意根下。念念之中。便有阿彌陀佛四字。音聲歷歷可陳。聲不越竅。聞性內融。心應舌機。機抽念根。心竅在舌。擊擊竅聞。機機念復。寄竅在耳。從聞入流。聞反精元。寂聞空性。是三融會。念念圓通。久久遂成唯心識觀。若是利根之人。念念不生。心心無所。六根杳寂。諸識消落。法法全真。門門絕待。瞥爾遂成真如實觀。初機後學。唯除賓客寒溫時。大小便利時。中暫停念。乃至營辦家事。種種作務。自不用捨。亦自不相妨礙。心口念念聲聲稱誦聖號。更有甚邪思惡慮敢萌於心。自然純一無雜。若能都攝六根。淨念相繼。不過旬月。便成三昧。所謂自心作佛自心是佛。是心見佛。上根大器。一念直超。平展之流。善觀方便。

## 勸人發願偈

慈照大師

萬法從心生。萬法從心滅。我佛大沙門。常作如是說。持戒無信願。不得生淨土。唯得人天福。福盡受輪迴。輾轉難脫離。看經無慧眼。不識佛深意。後世得聰明。亂心難出離。不如念佛好。現世無名利。行坐不多羅。則是阿彌陀。發願持戒力。回向生樂國。如是各行持。千中不失一。釋迦金口說。彌陀親攝受。諸佛皆護念。諸天善護持。見此念佛人。與佛不相遠。應當坐道場。轉於大法輪。普度無邊衆。譬如貧家女。腹孕轉輪王。諸天常愛護。貧女自不知。腹中有貴子。今此念佛人。其意亦如是。憶佛常念佛。不久當成佛。諸佛善護持。其人自不知。我當生淨土。卻要來後世。再得生人中。譬如貧人家。地內有伏藏。藏神常守護。不令其有失。貧人自不知。家內有寶藏。逐日趁客作。求衣食自濟。今此念佛人。其意亦如是。不知念佛人。具足如來藏。自說我無分。反要生人中。譬如病人家。自有真妙藥。



不知妙藥性。不能自治病。每日牀枕邊。痛苦受無量。今此念佛人。其意亦如是。不知念佛心。能滅貪瞋癡。能爲大醫王。能爲大寶藏。利濟一切人。能爲大法王。覆護一切衆。將謂是凡夫。不得生淨土。且自持齋戒。後世願爲人。輾轉更修行。方可生彼國。多見修行人。常作如是說。不稱彌陀願。不合淨土經。邪見障覆心。畢竟難出離。非是他人障。皆是自障心。今世不得生。一蹉成百蹉。勸汝修行人。信我如來說。佛無不實語。豈是虛誑言。但當自精勤。一心求淨土。因風吹于火。用力不消多。幸有念佛心。回願超三界。逢寶不取寶。遇食苦長飢。咄哉大丈夫。不見真實意。我今略勸讚。輾轉傳與人。代我廣流通。作于如來使。真是諸佛子。真名報佛恩。普願如說行。同生極樂國。

## 蓮宗寶鑑

優曇法師

慈照宗主云。離相念佛三昧者。上根智人。悟此深理。常運虛空平等心。無我人衆生壽者相。經云。離一切諸相。即名諸佛。論曰。我以計內。人以計外。衆生以續前爲能。壽者以續後爲義。既無內外前後執心。則一切諸相悉皆空寂。故經云。知無我人。誰受輪轉。亦無身心受彼生死。是名離相念佛三昧。此則見一切衆生本性皆同彌陀。既不著有相無相二邊。亦無有斷見常見之說。是念念彌陀出世。處處極樂現前。如此念者。無念之念。念則真如。無生之生。生則實相。故知無念即離念。實相乃無相。無相則無住。無住則入佛境界。此乃無上真正大菩提道。若到此地。無修無證。無生死可脫。無涅槃可求。性相俱空。聖凡齊等。無佛道可成。無衆生可度。無己靈可得。一念無爲。十方坐斷。無一法本有。無一法始成。自他互收。事理無礙。塵塵具足。剎剎全彰。法本如然。思議莫及。可謂十方薄伽梵。一路

涅槃門。

遠祖師禪經序云。禪非智無以窮其寂。智非禪無以深其照。禪智者。照寂之謂。其相濟也。照不離寂。寂不離照。感則俱遊。應則同趣。慈照云。寂而常照。照而常寂。常寂常照。名常寂光。念佛之人。欲參禪見性。但依此法。要於淨室正身端坐。掃除緣累。截斷情塵。瞳開兩睛。外不著境。內不住定。迴光一照。內外俱寂。然後密密舉念南無阿彌陀佛三五聲。迴光自看云。見性則成佛。畢竟那箇是我本性阿彌陀。卻又照覷看。只今舉這一念從何處起。覷破這一念。復又覷破這覷的是誰。參良久。又舉念南無阿彌陀佛。又如是覷。如是參。急切做工夫。勿令間斷。惺惺不昧。如雞抱卵。不拘四威儀中。亦如是舉。如是看。如是參。忽於行住坐臥處。聞聲見色時。豁然明悟。親見本性彌陀。內外身心。一時透脫。盡乾坤大地。是箇西方。萬象

森羅。無非自己。靜無遺照。動不失寂。然後興慈運悲。接引未悟。悲智圓融。入無功用行。得生上品。名實報莊嚴土。得一切種智。大般若經云。曼殊室利白佛言。菩薩修行何法。疾證無上菩提。佛言。菩薩能正修行一相莊嚴三昧。疾證菩提。修此行者。應離喧雜。不思衆相。專心繫念於一如來。審取名字。善想容儀。即爲普觀三世一切諸佛。即得諸佛一切智慧。天台十疑論云。一切諸佛。悉皆平等。但衆生根鈍。濁亂者多。若不專心繫念一佛。則心散漫。三昧難成。故專令念阿彌陀佛。即是一相三昧。寶王論云。修持一相念佛三昧者。當於行住坐臥。繫念不忘。縱令昏寐。亦繫念而寢。覺即續之。不以餘業間斷。不以貪瞋等間隔。隨犯隨懺悔。不隔念。不異念。不隔日。不隔時。念念常不離佛。念念清淨圓明。即是得一相三昧也。凡修淨土之人。灼然是要敵他生死。不是說了便休。當念無常迅速。

時不待人。須是把做一件事始得。若也半進半退。似信似疑。到了濟得其麼邊事。如何出離輪迴。若是信得及。便從今日去。發大勇猛。發大精進。莫問會與不會。見性不見性。但只執持一句南無阿彌陀佛。如靠著一座須彌山相似。搖撼不動。專其心。壹其意。或參念觀念。或默念專念繫念禮念。念茲在茲。常憶常念。朝也念。暮也念。坐也念。行也念。心念不空過。念佛不離心。日日時時。不要放捨。綿綿密密。如雞抱卵。常教暖氣相接。即是淨念相繼。更加智照。則知淨土即是自心。此乃上智人修進工夫。如此抱得定。做得主。靠得穩。縱遇苦樂逆順境界現前。只是念阿彌陀佛。無一念變異心。無一念退惰心。無一念雜想心。直至盡生。永無別念。決定要生西方極樂世界。果能如是用功。則歷劫無明。生死業障。自然消殞。塵勞習漏。自然淨盡無餘。親見彌陀。不離本念。功成行滿。願力相資。

。臨命終時。定生上品。

若念佛之人。塵垢未淨。惡念起時。須自檢點。或有慳貪心。瞋恨心。癡愛心。嫉妬心。欺誑心。吾我心。貢高心。諂曲心。邪見心。輕慢心。能所心。及諸逆順境界。隨染所生一切不善之心。設或起時。急須高聲念佛。斂念歸正。勿令惡心相續。直下打併淨盡。永不復生。所有深信心。至誠心。發願回向心。慈悲心。謙下心。平等心。方便心。忍辱心。持戒心。喜捨心。禪定心。精進心。菩提心。及一切善心。常當守護。更要離非梵行。斷惡律儀。雞狗豬羊。慎毋畜養。畋獵漁捕。皆不應爲。當知極樂國內諸上善人。良由捨棄惡緣。循行善業。獲生淨土。不退菩提。念佛之人。當隨佛學。應以去惡取善爲鑑戒焉。

凡修念佛之人。欲生淨土。每念世間一切無常。成必有壞。生必有死

。若不親聞佛法。則捨身受身。輪轉三界。四生六道。無解脫期。我今有緣。得聞正法。得修淨業。唯佛爲念。捨此報身。當生淨土。入彼蓮胎。受諸快樂。永脫生死。不退菩提。此乃大丈夫平生之能事也。纔有疾病。正要向前坦蕩身心。莫生疑慮。直須西向正坐。專想阿彌陀佛。與觀世音大勢至菩薩。及無數化佛。現在其前。一心稱念南無阿彌陀佛。聲聲不絕。於諸世間。一切事務。不得思念。不得貪戀。若或心念起來。但要急稱佛號。於念念中。除滅罪障。若病人昏困。不能自念。則看病人。當方便警策。勸而諭之。如此用心。助令命盡。只此一念。決定往生淨土。命若未盡。自得安寧。慎勿妄起留戀世間之心。當存自存。當死須死。但辦往生。何須疑慮。若解此理。如脫敝服。以著上衣。一舍凡身。便登佛地。奇哉偉哉。至矣盡矣。真信修行之士。端的是要生西方極樂世界。專意一念。持一向阿彌陀

佛。只此一念。是我本師。只此一念。即是化佛。只此一念。是破地獄之猛將。只此一念。是斬羣邪之寶劍。只此一念。是開黑暗之明燈。只此一念。是渡苦海之大船。只此一念。是脫生死之良方。只此一念。是出三界之徑路。只此一念。是本性彌陀。只此一念。達唯心淨土。但只要記得這一句阿彌陀佛在念。莫教失落。念念常現前。念念不離心。無事也如是念。有事也如是念。安樂也如是念。痛苦也如是念。生也如是念。死也如是念。如是一念分明不昧。又何必問人覓歸程乎。

### 淨土或問

天如禪師

問曰。一生造惡。臨終念佛。帶業得生。又無退轉。此彌陀願力。誠乎不可思議矣。然則我於生前且做世間事業。直待臨終然後念佛。可乎。答曰。苦哉苦哉。何等愚謬之言也。砒霜酖酒。毒中之毒。今汝



此言。毒於砒霜酖酒者也。非特誤賺自己。又且誤賺天下若僧若俗。善男信女。皆此言也。向所謂逆惡凡夫臨終念佛者。乃是夙有善根福德因緣。方遇知識。方得念佛。此等僥倖。萬萬人中。無一箇半箇。汝將謂人人臨終有此僥倖哉。豈不見羣疑論云。世間有十種人臨終不得念佛。一者善友未必相遇。故無勸念之理。二者業苦纏身。不遑念佛。三者偏風失語。不能稱佛。四者狂亂失心。注想難成。五者或遭水火。不暇至誠。六者遭遇豺狼。無復善友。七者臨終惡友。壞彼信心。八者飽食過度。昏迷致死。九者軍陣鬪戰。奄忽而亡。十者忽墜高巖。傷壞性命。如此等十種之事。皆是尋常耳聞眼見。不論僧俗男女。人皆有之。或宿業所招。現業所感。忽爾現前。不容迴避。你又不是神通聖人。有宿命通。能知臨終有業無業。又不是有他心天眼。能知臨終好死惡死。如上十種惡緣。忽然遭著一種。便休了也。便做

手脚不得了也。便有知識活佛圍繞。救汝不得了也。便須隨業受報。向三塗八難中受苦受罪。到那時便聞佛名不得了也。直饒汝無此惡緣。只是好病而死。亦未免風刀解體。四大分離。如生龜脫筒。螃蟹落湯。痛苦逼迫。怕怖悻惶。念佛不得了也。更饒你無病而死。又或世緣未了。世念未休。貪生怖死。擾亂胸懷。若是俗人。又兼家私未明。後事未辦。妻啼子哭。百種憂煎。念佛不得了也。更饒你未死以前。只有些少病痛在身。忍痛忍苦。叫喚呻吟。問藥求醫。祈禱懺悔。雜念紛飛。念佛不得了也。更饒你未死以前。只是年紀老大。衰相現前。困頓龍鍾。愁歎憂惱。只向箇衰老身上左安右排。念佛不得了也。更饒你未老以前。政是少壯之日。政好念佛之時。稍或狂心未歇。俗務相關。東攀西緣。胡思亂想。業識茫茫。念佛不得了也。更饒你清閒自在。有志修行。稍於世相之中。照不破。放不下。把不定。坐

不斷。忽有些子境界現前。一箇主人隨他顛倒。念佛不得了也。你看他老病之時。少壯清閒之日。稍有一事挂心。早是念佛不得。况待臨終時哉。何況你更道且做世間事業。你真癡人。說此癡話。敢保你錯用身心了也。且世間事業。如夢如幻。如影如響。那一件有實效。那一件替得生死。縱饒廣造伽藍。多增常住。攀求名位。交結官豪。你將謂做好事。殊不知犯了如來不體道本。廣造伽藍等戒。豈不見道。有爲之功。多諸過咎。天堂未就。地獄先成。生死未明。皆成苦本。眼光落地。受苦之時。方知平生所作。盡是枷上添枷。鎖上添鎖。鑊湯下增柴炭。劍樹上助刀槍。袈裟下失卻人身。萬劫難復。鐵漢聞之。也須淚落。祖師如此苦口勸人。曾許你且做事業。待臨終方念佛乎。又不見死心禪師道。世間之人。財寶如山。妻妾滿前。日夜歡樂。他豈不要長生在世。爭柰前程有限。暗裏相催。符到奉行。不容住滯。

。閻羅老子。不順人情。無常鬼王。有何面目。且據諸人眼裏親見。耳裏親聞。前街後巷。親情眷屬。朋友兄弟。強壯後生。死卻多少。世人多云待老來方念佛。好教你知黃泉路上無老少。能有幾人待得老到。少年夭死者多矣。死心如此苦口勸人。曾許你且做事業。待臨終方念佛乎。當思人生在世。能有幾時。石火電光。眨眼便過。趁此未老未病之前。抖擻身心。撥棄世事。得一日光景。念一日佛名。得一時工夫。修一時淨業。由他臨命終時。好死惡死。我之盤纏。預辦了也。我之前程。穩穩當當了也。若不如此。後悔難追。思之思之。

問。上文所云抖擻身心。撥棄世事。今世網中人。閒有境緣順便。身意安閒者。則可依此而行。其有世事不容撥棄者。又當何以教之。答曰。世網中人。若是痛念無常。用心真切者。不問苦樂逆順。靜鬧閒忙。一任公私幹辦。迎賓待客。萬緣交擾。八面應酬。與他念佛兩不

相妨。不見古人道。朝也阿彌陀。暮也阿彌陀。假饒忙似箭。不離阿彌陀。又云。竹密不妨流水過。山高豈礙白雲飛。其有世緣稍重。力量稍輕者。亦須忙裏偷閒。鬧中取靜。每日或念三萬聲。一萬聲。三千聲。一千聲。定爲日課。不容一日放過。又有冗忙之極。頃刻無閒者。每日晨朝必須十念。積久功成。亦不虛棄。念佛之外。或念經禮佛。或懺悔發願。種種結緣。種種作福。隨力布施。修諸善功以助之。凡一毫之善。皆須回向西方。如此用功。非唯決定往生。亦且增高品位矣。

問曰。泛言念佛。未有其方。且十念回向之法。亦所未喻。幸詳以示之。答曰。念佛者。或專緣三十二相。繫心得定。開目閉目。常得見佛。或但專稱名號。執持不散。亦於現身而得見佛。此間現見多是稱佛名號爲上。稱佛之法。必須制心不令散亂。念念相續。繫緣佛號。

口中聲聲喚阿彌陀佛。以心緣歷。字字分明。稱佛名時。無管多少。並須一心一意。心心相續。如此方得一念滅八十億劫生死之罪。若不然者。滅罪良難。十念者。每日清晨。面西。正立。合掌。連聲稱阿彌陀佛。盡一氣爲一念。如是十氣。名爲十念。但隨氣長短。不論佛數多少。唯長唯久。氣極爲度。其佛聲不高不低。不緩不急。調停得中。如是十氣連屬不斷。意在令心不散。專精爲功。故名此爲十念者。顯是藉氣束心也。盡此一生。不得一日暫廢。回向發願者。念佛既畢。即誦一心皈命文。如上念佛之法。至於回向。乃先德垂訓切要之方。盛傳於世久矣。當遵而行之。

問曰。圓修之觀。惟心之念。似乎上器之行門。華嚴十願。寶積十心。亦乃大根之功用。倘根器之不對。則功行之難成。今吾自揣其根。觀吾所好。惟在專持名號。暇則或加禮拜懺悔而已。師以爲何如。答

曰。善哉善哉。汝知量矣。觀汝之言。正合善導專修無間之說矣。專修者。政由稱名易故。相續即生。無間修者。身須專禮阿彌陀佛。不雜餘禮。口須專稱阿彌陀佛。不稱餘號。不誦餘經。意須專想阿彌陀佛。不雜餘想。又若貪瞋癡來間者。隨犯隨懺。不令隔日隔夜。常使清淨。亦名無間修也。

問曰。念念相續之修。豈非予所願也。柰何定力未成。念頭無主。眨得眼來。千里萬里去了。又或礙著一毫世事。便是五日十日。半月一月。擺脫不去。又當何策以治之。答曰。嗚呼。此天下學者之通患也。汝當間斷之時。若不痛加鞭策。則專修無間之念。永無成就之期矣。余聞古人有三種痛鞭之策。今復爲汝獻之。一曰報恩。二曰決志。三曰求驗。第一報恩者。既修淨土。當念報恩。佛恩國恩。固未暇論。只如父母養育之恩。豈非重恩。師長作成之德。豈非重德。你最初

出家。便說要報重恩。後來行腳。又說要報重德。離鄉背井。二三十年。父母師長。艱難困苦。你總不顧。父母老病。你又不看。及聞其死。你也不歸。如今或在三塗受罪受苦。望你救他。望你度他。你却念念間斷。淨土不成。淨土不成。自救不了。如何救他。既不能相救。你是忘恩負義。大不孝人。經云。不孝之罪。當墮地獄。然則一念間斷之心。便是地獄業也。又且不織而衣。不耕而食。僧房臥具。受用現成。你當勤修淨業。圖報信施之恩。祖師道。此是施主妻子分上減刻將來。道眼未明。滴水寸絲。也須牽犁曳耙償他始得。你却念念間斷。淨土不成。淨土不成。酬償有分。然則一念間斷之心。便是畜生業也。第二決志者。若學專修。志須決定。你一生參禪。禪既不悟。及乎看教。教又不明。弄到如今。念頭未死。又要說幾句禪。又要說幾句教。又要寫幾箇字。又要做幾首詩。情挂兩頭。念分四路。祖



師道。毫釐繫念。三塗業因。瞥爾情生。萬劫羈鎖。你卻志無決定。情念多端。因此多端。間斷正念。然則一念間斷之心。便是三塗羈鎖業也。又且守護戒根。志不決定。或因身口。念念馳求。教中道。寧以洋銅灌口。不可以破戒之口受人飲食。寧以熱鐵纏身。不可以破戒之身受人衣服。况因諸戒不嚴。邪心妄動。因此妄動。間斷真修。然則一念間斷之心。何止熱鐵洋銅業也。又且斷除憎愛。志不決定。每於虛名浮利。自照不破。名利屬我。便生貪愛。名利屬他。便生憎妬。古人云。貪名貪利。同趨鬼類。逐愛逐憎。同入火坑。你卻因此愛憎。間斷淨土。然則一念間斷之心。便是餓鬼火坑業也。第三取驗者。既學專修。當求靈驗。你如今髮白面皺。死相現前。知道臨終。更有幾日。須在目前。便要見佛。只如廬山遠法師。一生之中。三度見佛。又如懷感法師。稱念佛名。便得見佛。又如少康法師。唱佛一聲。

。衆便見一佛從口飛出。唱佛十聲。則有十佛從口飛出。此等靈驗。萬萬千千。你若心無間斷。見佛不難。間斷心生。決不見佛。既不見佛。與佛無緣。既無佛緣。難生淨土。淨土不生。必墮惡道。然則一念間斷之心。便是三塗惡道業也。如上三策。當自痛鞭。使其念不離佛。佛不離念。感應道交。現前見佛。既見樂邦之佛。即見十方諸佛。既見十方諸佛。即見自性天真之佛。既見自性天真之佛。即得大用現前。然後推其悲願。廣化一切衆生。此名淨土禪。亦名禪淨土也。

### 答弟行遠

吾忝學禪。不能使父母發明生死大事。成就道業。此爲可愧。然竊觀二老。恐非禪學機器。猶發藥不對病。則反病於藥矣。故甲子秋之歸。嘗以繫念法門。爲當機對證之良方也。爾後日遷月化。其操舍勤怠。及臨終得力與否。皆非吾所能知。今幸老母尚壽。而歲將七十。餘

景幾何。此又不容不再告者。繫念之法。不拘行住坐臥。不必出聲損氣。唯務至誠。默想默念。念念相繼。心無間斷。敢許現生肉眼。便能見佛。或見光明。或承摩頂等事。又豈定在臨終時哉。此是一種徑捷法門。至簡至要。極靈極驗。倘使得生淨土。見佛聞法。不患大事之不明。生死之不了。道業之不成矣。共或不然。則虛生浪死。苦趣其能免耶。煩吾弟以前說詳告慈母。切不可雜務關其懷抱。須旦夕曲施方便。令得專心致慮。倚靠者一著子。如照夜之炬。如過海之舟。不可須臾離也。誠能如此預備行纏。功無虛棄。則汝事親之孝。莫大於此矣。

吾母于禪門直指之道。既不能湊泊。舊嘗勤其精進念佛。當照破世間。總是一場夢事。苦也是夢。樂也是夢。富也是夢。貧也是夢。莫被夢境所惑。起心造業。誤賺平生。夢向三途苦趣中去。者場生受不可

說也。當此之時。親父親母。救你不得。的子的孫。替你不得。舉眼看來。有誰可靠。唯有樂邦之佛。能救度汝。能攝受汝。能保護汝。能成就汝。切須趁此眼明腳健。全身倚靠。求哀乞憐。夙夕懇禱。不可斯須放捨。你若靠他不穩。未免等閒蹉過。後悔難追。當念殘生如草上露。水上漚。風中燭。石中火。變滅無常。匪朝即夕。不可不上緊也。此事非獨吾母可行。凡諸見者聞者。皆當遞相勸諫。同使發心。亦是一種大方便事。倘吾弟深鑑吾心。輔行吾言。信有樂邦之往。則母子弟兄之會可期矣。鄉井之歸。奚足念哉。

### 示月庭居士

楚山禪師

夫格外真機。難容湊泊。初參之士。必假筌蹄。所謂梵語阿彌陀佛。此云無量壽。佛者覺也。覺即當人之自心。心即本來之佛性。是故念佛者。乃念自心之佛。不假外面馳求。馬大師所云。即心即佛是也。

或謂即心是佛。何勞更念佛乎。只爲當人不了自心是佛。是以執相循名。妄生倒惑。橫見生死。枉入迷流。故勞先聖曲垂方便。教令注想觀心。要信自心是佛。則知念佛念心。念心念佛。念念不忘。心心無間。忽爾念到心思路絕處。當下根塵頓脫。當體空寂。始知無念無心。無心無念。心念既無。佛亦不可得矣。故云。從有念而至無念。因無念而證無心。無心之心。始是真心。無念之念。方名正念。無佛之佛。可謂無量壽佛者矣。到此覓一毫自他之相了不可得。何聖凡迷悟之有哉。只這不可得處。即識心達本之要門。乃超生脫死之捷徑。居士果能於此洞徹自心源底。始信火宅凡居。即爲西方安養。舉足動足。無非古佛道場。溪光山色。頭頭彰紫磨金容。谷韻風聲。歷歷展紅蓮舌相。塵塵契妙。法法該宗。不即不離。心心解脫。於斯領旨。管取一笑而無疑矣。居士其尚勉乎哉。

## 念佛警策

古音禪師

一句阿彌陀佛。宗門頭則公案。譬如騎馬拄杖。把穩生涯一段。不拘四衆人等。持之悉有應驗。行住坐臥之中。一句彌陀莫斷。須信因果深。直教不念自念。若能念念不空。管取念成一片。當念認得念人。彌陀與我同現。便入念佛三昧。親證極樂內院。蓮胎標的姓名。極功之者自見。親見彌陀授記。便同菩薩作伴。自此出離娑婆。一路了無憂患。直至無上菩提。永劫隨心散誕。依得此道歸來。決定成佛不欠。

## 答湖州董宗伯

蓮池大師

心本不生。緣合而生。心本不死。緣散而死。似有生有死。原無去來。於斯會得。生順死安。常寂常照。如或未能。便當全身放下。密密持念一句阿彌陀佛。求生淨土。假使諸緣未盡。壽命未終。倍應念佛。

有大利益。古云。念佛法門。此金仙氏之長生也。

### 答張百戶廣活

妄念是病。念佛是藥。久病非片劑所能療。積妄非暫念所能除。其理一也。莫管他妄念紛飛。只貴在念佛精切。字字分明。句句接續。極力執持。方有趨向分。所謂真積力久。而一旦豁然。喻如磨杵作鍼。鍊鐵成鋼者。定不誣也。入道多門。惟此一門最爲捷徑。不可忽。不可忽。

### 與蘇州劉居士

曩啟專以念佛求生淨土奉勸。然此道至玄至妙。亦復至簡至易。以簡易故。高明門者忽焉。夫生死不離一念。乃至世出世間萬法。皆不離一念。今即以此念念佛。何等切近精實。若覩彼此念起處。即是自性彌陀。即是祖師西來意。縱令不悟。乘此念力。往生極樂。且橫截生

死。不受輪迴。終當大悟耳。願翁放下萬緣。十二時中。念念提撕。是所至望。

### 與江陰馮居士

七十古稀。百年能幾。今此暮景。正宜放開懷抱。看破世間。宛如一場戲劇。何有真實。但以一聲阿彌陀佛。消遣光陰。但以西方極樂世界。爲我家舍。我今念佛。日後當生西方。何幸如之。發大歡喜。莫生煩惱。倘遇不如意事。即便撥轉心頭。這一聲佛急急提念。卻迴光返照。我是阿彌陀佛世界中人。柰何與世人一般見識。回瞋作喜。一心念佛。此是智慧中人。大安樂大解脫法門也。

### 與太倉王孝廉

貴宅世修盛德。何爲尊體邁斯劇疾。得無夙業使之然乎。疾病之由。多殺生中來。故偏重生也。今更有所陳。良以外僧代懺。與內心自



懺。功德懸殊。願空其心。盡罷一切諸緣。於空心中。單念一聲阿彌陀佛。所云念者。不必啟口動舌。但默默以心眼返照。一字一字分明。一句一句接續。從朝至暮。從暮至朝。心心靡間。若有痛苦。忍之耐之。一心顧念。經云。至心念佛一聲。滅八十億劫生死重罪。故功德懸殊也。

### 答聞谷廣印

問。古人已稟單傳直指。後修淨業而欲往生者。爲是悟後隨願起行耶。爲是未悟二行兼修耶。若兼修者。墮偷心歧路心。工夫那得成片耶。若已悟。則塵塵華藏。在在蓮邦。十方無不可者。何獨樂生西方耶。答。真信淨土決志往生者。不論已悟未悟。其從事單傳直指而未悟者。雖日以參禪爲務。不妨發願往生。以未能不受後有。畢竟有生處故。不是偷心歧路心也。其已悟者。古人云。汝將謂一悟便可上齊諸佛。

乎。故普賢爲華嚴長子。雖塵塵華藏。在在蓮邦。而行願品。必拳拳以往生安樂爲言也。已悟尚然。未悟可知矣。

問。參禪貴一念不生。念佛貴淨念相繼。茲參究念佛一門。意在妙悟而得往生也。今念時雖心佛分明。參時即二俱坐斷。斷故參功漸深。念力漸微。則他時焉得亦悟亦生耶。

答。一念不生。是禪非參。起念下疑。乃名曰參。楞嚴云。又以此心反覆研究等是也。念時參時。俱屬有念。亦不相悖。

問。即心即佛。不外馳求之理。信得及。見得徹了。爲便隨緣消業。勿造新殃。任運騰騰。以待夫識乾自得耶。爲當更起疑情。窮參力究以求妙悟耶。

答。即心即佛。若真信得及。真見得徹。千了百當。更無疑滯者。方可任運過時。如其不然。未可放參。

## 示大同

古人教親近明師。求善知識。而善知識。實無口傳心授祕密法門。只替人解黏去縛。便是祕密。今但執持名號一心不亂。此八箇字。即是解黏去縛。祕密法門。即是出生死堂堂大路。朝念暮念。行念坐念。念念相續。自成三昧。莫更他求也。

## 警衆

入道要門。信爲第一。惡事非信。尚不成就。况善事乎。譬如世間盜賊。時乎敗露。官府非不以極刑繩之。迨後釋免。依舊不悔。所以者何。他卻信得者條門路。不齎一文本錢。自獲利無算。所以備受苦痛。決不退悔。今人念佛再不肯真切加功。只是不曾深思諦信。不要說不信淨土。只如世尊說人命在呼吸間。者一句話。於義理不是難解說。汝們眼裏親見。耳裏親聞。經過許多榜樣。如今要汝信得者句話。

早是不能夠也。汝若真實信得者。句話。則念佛法門。不必要我費盡力氣。千叮萬囑。爾自如水赴壑。萬牛不能挽矣。

予見新學後生。才把一句佛頓在心頭。閒思妄想。越覺騰沸。便謂念佛工夫。不能攝心。不知汝無量劫來生死根由。如何能得即斷。且萬念紛飛之際。正是做工夫時節。旋收旋散。旋散旋收。久後工夫純熟。自然妄念不起。且汝之能覺妄念者。虧者句佛耳。如不念佛之時。瀾翻湧湧。剎那不停者。自己豈能覺乎。

念佛有默持。有高聲持。有金剛持。高聲覺太費力。默念又易昏沈。只是綿綿密密。聲在於脣齒之間。乃謂金剛持。然又不可執定。或覺費力。則不妨默持。或覺昏沈。則不妨高聲。如今念佛者。只是手打魚子。隨口叫喊。所以不得利益。必須句句出口入耳。聲聲喚醒自己。譬如一人濃睡。一人喚云某人。則彼即醒矣。所以念佛最能攝心。

今人不肯念佛。只是輕視西方。不知生西方乃是大德大福大智大慧大聖大賢的勾當。轉娑婆成淨土。不同小可因緣。汝但看此城中一日一夜。死卻多少人。不要說生西方。即生天。千百人中尚無一箇。其有自負修行者。祇是不失人身而已。故我世尊大慈大悲。示此法門。功過乾坤。恩逾父母。粉骨碎身。不足爲報。

人子於父母。服勞奉養以安之。孝也。立身行道以顯之。大孝也。勸以念佛法門。俾得往生淨土。大孝之大孝也。予生晚。甫聞佛法。而風木之悲已至。痛極終天。雖欲追之。末由也已。奉告諸人。父母在堂。早勸念佛。父母亡日。課佛三年。其不能者。或一周歲。或七七。日。皆可也。孝子欲報劬勞之恩。不可不知此。

### 念佛訣

草庵禪師

阿彌陀佛。誰不能念。而偏難念。西方極樂。誰不願生。而罕得往生

者。蓋念佛之人未得其訣耳。教念佛而使之真切者。其惟死之一字乎。死之一字在念頭上。境緣自然冷淡。情愛亦自輕微。名利勢豪。向此處俱用不得。見聞知解。到此時卻使不行。四大各離。將何所靠。孤魂無主。安得自由。此時不見彌陀。恐逢羅刹。此時不生淨土。恐入驢胎。縱無惡業。亦不免人道往還。即有善因。其曾奈天福易盡。莫云自有主宰。業果所牽。誠難迴避。莫道本無生死。識心未盡。總屬輪迴。莫視此事爲緩。明日之事。今日不知。莫將此事爲輕。錯過此生沈淪永劫。是一切事。無如生死大事。則事事皆不切之事。於一切時。總作臨命終時。則時時皆念佛之時。如是念佛。斯爲切心。如是切心。方生淨土。須下死功夫。纔成淨業。常念死時節。方肯切心。此乃成佛之階。是誠念佛之訣。

念佛警策卷上終

# 念佛警策卷下

菩薩戒弟子彭際清纂

## 紫柏老人集

達觀大師

僧海州參。師問曰。汝出家爲甚麼。曰。爲求出苦。師曰。以何法而求出苦。曰。我資鈍。但念佛。師曰。汝念佛常閒斷否。曰。合眼睡時。便忘了。師震威呵曰。合眼便忘。如此念佛。念一萬年也沒幹。汝自今而後。直須睡夢中念佛不斷。方有出苦分。若睡夢中不能念佛。忘記了。一開眼時。痛哭起來。直向佛前叩頭流血。或念千聲。或念萬聲。盡自家力量便罷。如此做了三二十番。自然大昏睡中佛即不斷矣。且世上念佛的人。或三二十年。或盡形壽念佛。及到臨時。卻又無用。此是睡夢中不曾有念頭故也。人生如覺。人死如夢。所以夢中念得佛人。臨死自然不亂也。

念佛法門。最爲簡便。但如今念佛之人。都無定志。所以千百人念佛

。無有一兩人成就者。這一句佛。一切菩薩。一切天。一切人。若生西方者。莫不因此這一句阿彌陀佛。而渡苦海。然念佛心真不真。勘驗關頭。直在歡喜煩惱兩處取證。其真假之心。歷然可辨。大抵真心念佛人。於歡喜煩惱中。必然念念不間斷。是以煩惱也動他不得。歡喜也動他不得。煩惱歡喜既不能動。死生境上自然不驚怖。今人念佛。些小喜怒到前。阿彌陀佛便撇在腦後。如何能得念佛靈驗。若依我念佛。果能於愛憎關頭不昧此句阿彌陀佛。而現在不得受用。臨終不得往生。我舌根必然破爛。你若不依我法行。則念佛無有靈驗。過仍在汝。與我無干。嘉靖初。蒲之萬固寺背七里許。有刹曰讚歎。其中老衲義秀者。溫里人。精進敦實。日課阿彌陀佛十萬餘聲。朝夕無間。五十餘年。至於經行之所。磚砌成漕。或穿及底。人試補之。久復成漕。今猶在也。初有貧寒子不能自活。來依秀。秀納之。久之見其



動靜弗佳。因呵曰。汝真賊也。無何。果約其黨。乘夜擊秀。初擊。秀稱佛聲猶洪。再擊。秀稱佛聲弗斷。然亦微矣。因死。噫。當垂絕之時。佛聲弗斷。至於股折能跏趺而逝。非五十年志氣堅強勁正。烏能至此。

## 示念佛切要

憨山大師

念佛求生淨土一門。原是要了生死大事。故云念佛了生死。今人發心因要了生死。方纔肯念佛。只說佛可以了生死。若不知生死根株。畢竟向何處念。若念佛的心。斷不得生死根株。如何了得生死。如何是生死根株。古人云。業不重不生娑婆。愛不斷不生淨土。是知愛根乃生死之根株。推此愛根。不是今生有的。也不是一二三四生有的。乃自從無始最初有生死以來。生生世世。捨身受身。皆是愛欲流轉。直至今日。翻思從前何曾有一念暫離此愛根耶。如此愛根種子。積劫深

厚。故生死無窮。今日方才發心念佛。只望空求生西方。連愛是生死之根的名字也不知。何曾有一念斷著。既不知生死之根。則念佛一邊念。生死根只聽長。如此念佛。與生死兩不相關。念到臨命終時。只見生死愛根現前。那時方知佛全不得力。卻怨念佛無靈驗。悔之遲矣。故勸今念佛的人。先要知愛是生死根本。而今念佛。念念要斷這愛根。即日用現前。在家念佛。眼中見得兒女子孫。家緣財產。無一件不是愛的。則無一事無一念不是生死活計。如全身在火坑中一般。不知正念佛時。心中愛根未曾一念放得下。愛是主宰。念佛是皮面。如此佛只聽念。愛只聽長。且如兒女之情現前時。迴光看看者一聲佛。果能敵得者愛麼。果能斷得者愛麼。若斷不得者愛。畢竟如何了得生死。以愛緣多生習熟。念佛才發心。甚生疏。又不切實。因此不得力。若目前愛境主張不得。則臨命終時。畢竟主張不得。故勸念佛人。

第一要知爲生死心切。要斷生死心切。要在生死根株上念念斬斷。則念念是了生死之時也。如此念念真切。刀刀見血。若不出生死。則諸佛墮妄語矣。故在家出家。但知生死心。便知了生死的時節也。豈更有別妙法哉。

### 示淨心居士

往老人過吳中。淨心居士參禮請益。老人示之以念佛法門。以念佛如水清珠。能清濁水故。以淨心爲道號。別數年矣。今書來云念佛難成一片。復請開示。老人因示之曰。修行第一要爲生死心切。生死心不切。如何敢云念佛成片。且衆生無量劫來。念念妄想。情根固蔽。即今生出世。何曾一念痛爲生死。日用念念循情。未嘗反省。今欲以虛浮信心。就要斷多劫生死。所謂滴水救積薪之火。豈有是理哉。若果爲生死心切。念念若救頭然。只恐一失人身。百劫難復。要將此一聲

佛咬定。定要敵過妄想。一切處念念現前。不被妄想遮障。如此下苦切工夫。久久純熟。自然相應。如此不求成片而自成一片矣。此事如人飲水。冷暖自知。告訴不得他人。全要自己著力。若但將念佛做面皮。如此驢年無受用時。直須勇猛。莫更遲疑。

### 淨土法語

幽溪法師

楊次公云。愛不重。不生娑婆。念不一。不生極樂。娑婆有一愛之輕。則臨終爲此愛所牽。矧多愛乎。極樂有一念之不一。則臨終爲此念所轉。矧多念乎。夫愛有輕焉重焉。厚焉薄焉。正報焉。依報焉。歷舉其目。則父母妻子。昆弟朋友。功名富貴。文章詩賦。道術技藝。衣服飲食。屋室田園。林泉花卉。珍寶玩物。不可以盡。有一物之不忘。愛也。有一念之不遺。愛也。有一愛存於懷。則念不一。有一念不歸於一。則不得生。或問。輕愛有道乎。曰。輕愛莫要於一念。

一念有道乎。曰。一念莫要於輕愛。蓋念不一。由散心異緣使然。散心異緣。由逐境紛馳使然。娑婆有一境。則衆生有一心。衆生有一心。則娑婆有一境。聚緣內搖。趣外奔逸。心境交馳。愛若塵沙。故欲輕其愛者。莫若杜其境。衆境皆空。萬緣都寂。萬緣都寂。一念自成。一念若成。則愛緣俱盡矣。曰。杜境有道乎。曰。杜境者。非屏除萬有也。亦非閉目不觀也。即境以了其虛。會本以空其末也。萬法本自不有。有之者情。故情在物在。情空物空。萬法空而本性現。本性現而情念息。自然而然。非加勉強。楞嚴所謂見與見緣。并所想相。如虛空花。本無所有。此見及緣。原是菩提妙淨明體。云何於中有是非。是以欲杜其境。莫若體物虛。體物虛。則情自絕。情絕。則愛自不生。而唯心現。念一成。故圓覺云。知幻即離。不作方便。離幻即覺。亦無漸次。一去一留。不容轉側。功效之速。有若桴鼓。學道

之士。於此宜盡心焉。曰。輕愛既聞命矣。一念柰何。曰。一念之道有三。曰信。曰行。曰願。不疑之謂信。苟有疑焉。心不得一矣。是以求生極樂。以敦信爲始。必須徧讀大乘。廣學祖教。凡是發明淨土之書。皆須一一參求。悟極樂原是我唯心之淨土。不是他土。了彌陀原是我本性之真佛。非是他佛。大要有二。悟妙有徧周徧具。以爲欣淨之本。悟真空圓離圓脫。以爲捨穢之原。第二修行者。敦信如目視。修行如足行。信而不行。猶有目無足。行而不信。猶有足無目。是故信解既備。應當念佛修行。如目足兼備。能到涼池。行門有二。一正。二助。正行復二。一稱名。二觀想。稱名。如小本彌陀經。七日持名一心不亂。有事一心。理一心。若口稱佛名。繫心在緣。聲聲相續。心心不亂。設心緣外境。攝之令還。此須生決定心。斷後際念。撥棄世事。放下緣心。使念心漸漸增長。從漸至久。自少至多。一日

二日。乃至七日。畢竟要成一心不亂而後已。此事一心也。苟得此已。則極樂之淨因成就。垂終之正念必然。身無病苦。不受惡纏。預知時至。身心歡喜。吉祥而逝。坐脫立亡。親見彌陀。垂光接引。得生淨土必矣。理一心亦無他。但于事一心中。念念了達能念之心。所念之佛。三際平等。十方互融。非空非有。非自非他。無去無來。不生不滅。現前一念之心。便是未來淨土之際。念而無念。無念而念。無生而生。生而無生。于無可念中熾然而念。于無生中熾然求生。是爲事一心中明理一心也。二觀想者。具如觀無量壽佛經。境有十六。觀佛最要。當觀阿彌陀佛丈六之身。作紫磨黃金色像。立華池上。作垂手接引狀。身有三十二種大人相。相有八十種隨形好。作此想者。亦有事理。事則以心繫佛。以佛繫心。初觀足下安平如奩底。次觀具千輻輪相。如是次第逆緣至頂中肉髻。復從肉髻順緣至足底。了了分明

。無分散意。理一心者。經云。諸佛如來是法界身。入一切衆生心想中。是故心想佛時。是心即是三十二相。八十種好。是心作佛。是心是佛。諸佛正徧知海。從心想生。是故汝等應當繫念彼佛。此義具明微妙三觀。如觀經疏妙宗鈔中說。然此二種正行。當相須而進。凡行住睡臥時。則一心稱名。凡趺坐時。則心心作觀。行倦則跌坐以觀佛。坐出則經行以稱名。苟于四威儀中修之不閒。往生淨土必矣。二助行。亦有二。一世間之行。如孝順父母。行世仁慈。慈心不殺。具諸戒律。一切利益之事。若能回向西方。無非助道之行。二出世之行。如六度萬行。種種功德。讀誦大乘。修諸懺法。亦須以回向心而助修之。無非淨土行也。更有一種微妙助行。當歷緣境。處處用心。如見眷屬。當作西方法眷想。以淨土法門而開導之。令輕愛一以其念。永作將來無生眷屬。若生恩愛時。當念淨土眷屬無有情愛。何當得生淨



土。遠離此愛。若生瞋恚時。當念淨土眷屬無有觸惱。何當往生淨土。得離此瞋。若受苦時。當念淨土無有衆苦。但受諸樂。若受樂時。當念淨土之樂。無央無待。凡歷緣境。皆以此意而推廣之。則一切時處。無非淨土之助行也。第三願者。夫淨土舟航。要以信爲舵。行爲篙。檣檣纜。願爲風帆。無舵。則無所指南。無篙檣檣纜。則不能運行。無風帆。則不能破浪疾到。故次行以明願也。第願有通別。有廣狹。有徧局。通如古德所立回向發願文。別則各隨己意。廣謂四宏。上求下化。狹謂量力。決志往生。局如課誦有時。隨衆同發。徧則時時發願。處處標心。但須體合四宏。不得師心妄立。大率所發之願。別勝於通。通恐隨人語轉。別則自己標心。然隨通文而生決志。雖通而別。若於別文而生濫漫。別亦成通。又廣勝於狹。廣則發心大。剋果勝。狹則悲願淺。獲果劣。又徧勝於局。局則數數閒斷。徧則念念圓。

成。如此三法。可以期生淨土。速覲彌陀。一切淨土法門。舉不外乎是矣。

### 西方合論

袁宏道

一信心行者。經云。信爲道元功德母。一切諸行。信爲正因。乃至菩提果滿。亦只完此信根。如穀子墮地。迨於成實。不異初種。如稚筍參天。本是原竿。初心菩薩。無不依信力成就者。蓮宗尤仗信爲根本。一信阿彌陀佛不動智。根本智。與己無異。如太虛空。日映則明。雲來則翳。虛空本無是故。又雲日即虛空故。二信阿彌陀佛那由他劫難行難忍。種種修習之事。我亦能行。何以故。無始漂溺三途。生苦死苦。披毛戴角。鐵牀銅柱。一切無益之苦。皆能受之。況今菩薩萬行濟衆生事。豈不能爲。三信阿彌陀佛無量智慧。無量神通。及成就無量願力等事。我亦當得。如來自性方便。具有如是不思議事。我與

如來同一自體清淨性故。四信阿彌陀佛不去不來。我亦不去不來。西方此土。不隔毫端。欲見即見。何以故。一切諸佛。皆以法性爲身故。五信阿彌陀佛修行歷劫。直至證果。不移剎那。我亦不移剎那。位齊諸佛。何以故。時分者。是業收。法界海中。業不可得故。如是信解。是入道初心。信一切諸佛淨土之行。二止觀行者。台宗三觀。示一心之筌蹄。撮諸法之要領。西方十六觀。一一具此三義。妙宗鈔云。性中三德。體是諸佛三身。即此三德三身。是我一心三觀。若不然者。則觀外有佛。境不即心。何名圓宗絕待之觀。亦可彌陀三身以爲法身。我之三觀以爲般若。觀成見佛即是解脫。舉一具三。如新伊字。觀佛既爾。觀諸依正。理非異塗。廣如疏鈔。不能具述。知此。則知念佛一聲。具足三觀。了能念之心。非肉團。非緣影。是空觀。了所念之佛。若依若正。各各主伴圓融。豎窮橫徧。是假觀。了能所

絕待。雙亡雙照。是中觀。又能念即一心三觀。所念即一境三諦。能所不二。即諦觀不二。三諦即法身。三觀即般若。諦觀不二。念佛相應。即解脫。舉一即三。如新伊字。是則念佛一聲。能淨四土。如拈一微塵。變大地作黃金。是謂法界圓融不可思議觀門。三六度行者。起信論。菩薩深解現前。所修離相。知法性體。離慳貪故。隨順修行檀波羅蜜。法性無染。離五欲過故。隨順修行戒波羅蜜。法性無苦。離瞋惱故。隨順修行忍波羅蜜。法性無身心相。離懈怠故。隨順修行精進波羅蜜。法性常定。體無亂故。隨順修行禪波羅蜜。法性體明。離無明故。隨順修行般若波羅蜜。故修淨土者。不越一行。具此六義。念念離行於施。念念淨行於戒。念念寂行於忍。念念續行於進。念念一行於定。念念佛行於智。當知離淨寂續一。必有事相隨緣而起。而皆從念佛流出。正助不二。事理不二。是故念佛一行。能該諸行。

以念佛是一心法門。心外無諸行故。若廢諸行。即是廢心。四悲願行者。諸佛菩薩性海無盡。供養無盡。戒施無盡。饒益無盡。故天親菩薩淨土五念門。以禮拜讚歎作願觀察四種。爲成就入功德門。回向一切煩惱衆生。拔世間苦。爲成就出功德門。菩薩修五念門。速得阿耨菩提。難曰。淨名經。觀衆生如夢所見已寤。發願利生。將無眼見空華耶。答。智度論引佛云。無佛者。破著佛想。不言取無佛相。當知無衆生者。破衆生想。不言取無衆生相。故淨名謂菩薩作是觀已。自言我當爲衆生說無衆生法。是名真實慈也。故知菩薩種種度生。是深達無衆生義。若見有衆生。即見有我。慈悲心劣。豈能行如是二種饒益之行。佛告比丘。功德果報甚深。無有如我知恩分者。我本以欲心無厭足故得佛。今雖更無功德可得。我欲心亦不休。當知行海無邊。非丈竿尺木所能探其底裏。癡兒見人指門前竿云。在天半。即計量言

。從地至天。止兩竿許。佛法戲論。亦復如是。五稱法行者。法界海無量無邊。行海亦無量無邊。是故菩薩一切行。皆稱自性。非有非無。非行非不行。稱法自性。非初心得。非後心得。今當略出其相。一菩薩度一切衆生。究竟無餘涅槃。而生界不滅。如登場傀儡。悲笑宛然。唯一土泥。空無所有。二菩薩行五無間。而無惱恚。至地獄無罪垢。至畜生無無明憍慢等過。如女子離魂。乃至生子。而身常在母前。三菩薩自身入定他身起。一身入定多身起。有情身入定無情身起。如猛虎起屍。跪拜作舞。唯虎所欲。而屍無知。四菩薩於小衆生身中轉大法輪。然大法炬。震大法雷。魔宮摧毀。大地震動。度無量無邊衆生。而此小衆生不覺不知。如天帝樂人。逃入小女子鼻孔。而女不覺知。五菩薩欲久住世。即以念頃衍無量無數百千億那由他劫。欲少住世。即以無量無數百千億那由他劫縮爲念頃。如小兒看燈中走馬。

計其多寡首尾。了不可得。若證如是不思議行者。一念中。三世諸佛淨土。攝入無餘。是謂菩薩莊嚴淨土之行。以無思智照之可見。非情量所能猜度。何以故。自性超一切量故。○△此即梵書新伊字

## 紀夢

袁中道

萬曆甲寅十月十五夜。課畢趺坐。忽瞑去。如得定。俄魂出屋上。月正明。不覺飄然輕舉。疾如飛鳥。雲中二童子駭呼予曰。逐我來。蓋西行也。下視城邑村落。若蜂衙蟻穴。俄二童子下至地。曰。住。予隨下。見坦道如繩。平如掌。視其地。非沙石。光耀滑膩。逐路有渠。文石爲砌。寬十餘丈許。渠中五色蓮。芳香非常。渠上樹枝葉晃耀。好鳥和鳴。間有金橋界渠。欄楯交羅。樹內樓閣。整麗無比。樓中人。清美研好。宛若仙。皆睨予而笑。童子行速。予追不及。大呼曰。可於金橋少待。童子如言。始及之。共倚橋上寶欄少息。予揖問。

卿何人。此何處。幸爲我言。曰。予靈和先生侍者也。先生與卿有所晤言。予曰。先生何人。曰。即令兄中郎先生。相見自爲卿言。可疾往。復取道至一處。樹千餘株。葉翠羽。花金瓣。樹下池水汨汨。池上白玉扉。一童先入。一童導過樓閣二十餘重。金色晃耀。靈花異草拂簷楹。至一樓下。一人下迎。神似中郎。而顏如玉。衣若雲霞。長丈餘。見而喜曰。弟至矣。攜手上樓。設拜。有四五天人來共坐。中郎曰。此西方邊地也。信解未成。戒寶未全者。多生此。亦名懈慢國。上方有化佛樓臺。前有大池。可百由旬。中有妙蓮。衆生託體。滿則散處樓臺。與有緣淨友相聚。以無姪聲美色。勝解易成。不久進爲淨土中人。予私念如此尚是邊地耶。問。兄生何處。中郎曰。我淨願雖深。情染未除。初生此少時。今居淨域矣。終以乘急戒緩。僅地居。不得與大士升虛空寶閣。尚需進修耳。幸宿生智慧猛利。又曾作西



方論。讚歎如來不可思議度生之力。感得飛行自在。遊諸刹土。諸佛說法。皆得往聽。此實爲勝。拉予行。冉冉上升。倏忽千萬里。至一處。隨中郎下。無日月。無晝夜。光耀無障蔽。皆以琉璃爲地。內外映徹。以黃金繩。雜廁間錯。界以七寶。分劑分明。樹皆栴檀吉祥。行行相值。莖莖相望。數千萬重。一一葉。出衆妙花。作異寶色。下爲寶池。波揚無量自然妙聲。其底沙純以金剛。池中衆寶蓮。葉五色光。池上隱隱。危樓迴帶。閣道旁出。棟宇相承。窗闥交映。階墀軒檻。種種滿足。皆有無量樂器。演諸法音。大小彌陀經所載。十不得其妙忽耳。仰而睇之。空中樓閣。皆如雲氣。中郎曰。汝所見。淨土地行衆生光景。過此爲法身大士住處。甚美妙。千倍萬倍於此。神通亦百倍千倍於此。吾以慧力遊其間。不得住也。過此爲十地等覺所居。吾亦不得而知。過此爲妙覺所居。惟佛與佛乃能知之。語罷。復至

一處。無牆垣。有欄楯。院宇光耀非常。不知何物爲之。覺黃金白玉。皆如土色。共坐一樓下。少談。中郎曰。吾不圖樂之至此極也。使吾生時嚴持戒律。尚不止此。大都乘戒俱急。生品最高。次戒急。生最穩。若有乘無戒。多爲業力所牽。流入八部鬼神衆去。予親見同人矣。弟般若氣分頗深。戒定力甚少。夫悟理不能生戒定。亦狂慧也。歸五濁。趁強健。實悟實修。兼持淨願。勤行方便。憐憫一切。不久自有良晤。一入他途。可怖可畏。如不能持戒。有龍樹六齋法現存。遵而行之。殺戒尤急。寄語同學。未有日啟鸞刀。口貪滋味。而能生清泰者也。雖說法如雲如雨。何益於事。我與汝空王劫時。世爲兄弟。乃至六道。莫不皆然。幸我已得善地。恐汝墮落。方便神力。攝汝至此。淨穢相隔。不得久留。予更問伯修諸人生處。曰。生處皆佳。汝後自知。忽陵空而逝。予起步池上如墮。一駭而醒。通身汗下。時

殘燈在篝。明月照窗。更四下矣。

## 答卓發之文學

無異禪師

問。華嚴會中。二乘如盲如聾。然亦兼攝聲聞。以包含無量乘故。此經雖云二乘種不生。乃所宣道品。大小互通。正與華嚴四聖諦品不異。故有生彼經劫方證小果者。如大智度論言。彌陀亦以三乘度生。自應三藏五教總攝。何云不攝小乘。且既通雜華。復不能通雜華所攝無量乘耶。

居士既知華嚴攝無量乘。豈不知上德聲聞如身子目連。杜視絕聽。悉是如來勝方便力故。爲導引一類小機。發起深信。信于一乘。如法華云。佛以無數方便引導衆生。其實皆爲一佛乘故。此經云。二乘種不生者。正爲化導二乘執空不修淨土者。鈔云。豈獨凡夫。亦度二乘聖人。二乘既生。况菩薩不生。彌陀以三乘度生。當無疑惑。既以三乘化導。亦攝無量乘。二經互通。不言可喻。

問。餘門學道。名豎出三界。念佛往生。名橫出三界。所謂餘門。正指教中觀行。故參禪稱爲別傳。淨土亦云徑路。皆以超越觀行故。今云觀即是念。念即是觀。直以台觀當之。不反鈍置念佛耶。

橫豎等論。鈔云。如蟲在竹。豎則歷節難通。橫則一時解脫。謂樂邦與苦域並峙。故曰橫也。此是一往之說。論一心者。橫豎皆徧。彌陀經云。其佛光明無量。照十方國。無所障礙。觀經云。是心作佛。心即佛故。淨土唯心。以界曰橫。論心豈不圓具也。餘門。非單指觀行。實乃具一切法門。參禪稱爲別傳者。非五教之所詮。淨土亦云徑路。非三觀之所及。今說觀即是念。念即是觀。舉一念即具觀行。以一念超越。即便往生。非觀行成就。然後往生。故知念不妨攝觀。非觀行能鈍置念佛也。

問。大本云。若有衆生。發一念心念無量壽佛。定生彼國。疏中剋期

止及十念。而不及一念。何耶。又念性剎那生滅。此經七日定力乃生。則未得禪定者無分。若此一念。如一稱成佛。釋作一心歸命。則本不應繫十念之後。若止作一念喜愛之心。則全無定力。亦得往生。其勝方便。又當超越小本耶。

十念與此本互相通故。何分優劣。以一念具一切念故。一念未必爲劣。以十念即一念故。十念未必爲優。是故說一念不妨十念。說十念不妨一念。又剎那際不妨七日。七日不妨剎那際。經云。一念普觀無量劫。無去無來亦無住。或說一念。或說十念。或說七日。或說多劫。皆是如來勝方便故。亦不論定不定。喜愛不喜愛。但一心念佛。無事不辦。如靈丹一粒。點鐵成金。更無疑慮。又何必以難易較其超越也。

問。此七日。若平時姑置。待臨終方念。已爲天如所呵。今既屬平時

。爲是七日之後。盡此形壽。更不復亂耶。爲復此後雖亂。終得往生耶。若永不復亂。不應止名七日。若更亂者。則已經退轉。何能感佛現前。

經云。一日乃至七日。是剋期往生。不論臨終平時。一聞佛名。便發猛銳。七日往生者不論。若未生者。在無間斷。念念相續。豈可七日得定。再不念佛。其執持二字。何以消文。疏中云。執者聞名受之。勇猛果決。不搖奪故。持者受斯守之。常永貞固。不遺忘故。何云七日後。復隨散亂耶。行者一心正念。更加猛利以終身。如初發念頃。何愁佛不感乎也。

問。鈔中明理一心。爲觀力成就。則體完全屬觀門。但前言妙觀難成。故顯持名殊勝。今乃復通觀法。仍是定觀勝于持名矣。若云參誰字是體究。則又全屬宗門。且當參話時不應有念。未免兩處負墮。義云

何通。

前言妙觀難成。顯持名殊勝。良以娑婆之衆。心多散亂。故持名攝念。勝乎觀門。今乃復通觀法。以觀境殊勝。不妨速於持名。以持名徑捷。不妨超乎觀法。兩處義成。何得云墮。若宗門參究。是逗機之法。不必與淨土和會。如參念佛者是誰。便屬言語道斷。又不可以理路爲依傍也。

問。一部疏鈔。大意全重理持。則所明持法。最爲要害。今既是持名。復標理觀。既是理觀。復拈話頭。禪淨止觀三法混淆。雖復義理圓融。而行人念不歸一。將何爲宗。此與一門深入。專修無間之旨。復何不侔。

疏鈔一部。雖則全歸理觀。如玄譚云。守約則唯事持名。又云。舉其名兮。兼衆德而成備。專乎持也。統百行以無遺。則知專尚持名。不



妨發明理觀。觀理明徹。如膏益火。則更增猛熾也。如華嚴大部攝無量乘。上根利智。頭頭是路。亦不名混淆。但以根器相投。亦吾師翁之善巧耳。

問。疏指至心念佛一聲。滅八十億劫生死重罪。屬理一心。若事一心者。多念止滅少愆。乃又引佛名經云。一聞佛名。滅無量劫生死之罪。釋云。一聞則不待憶念。無量則不但八十億劫。然則何必獨指理一心也。覺于此中。自相違礙。又此經亦言聞經聞名。皆得不退。則等閒發願。散亂稱名者。咸不退耶。

果得一心。則不論理事。疏鈔謂多念止滅少愆者。此是就散亂而冀一心者說也。聞名滅罪。衆生在迷。亦復不知。如地獄聞名。即得究竟。并獲往生者。何止滅罪。蓋論衆生心力之勤怠耳。大凡教中論理論事。論定論散。如用兵之法式。臨陳決勝。貴在當人。必不以法式楷

定。然後爲正論也。

問。棗柏言。華嚴一乘大道。非往生菩薩境界。何故華嚴長子。乃以十願導歸極樂。如生公說闡提有佛性。則後出涅槃爲證。今行願全與棗柏不符。則一論宗旨。竟將安歸。乃雲棲但拈出導歸之文。亦不能折棗柏之誤。當知棗柏未易輕詆。今欲和會兩義。其說云何。

棗柏謂華嚴非往生菩薩境界。爲顯一乘。不妨抑彼揚此。普賢導歸極樂。正謂攝無量乘故。棗柏爲化大心凡夫頓入華藏故。普賢是華藏中菩薩。以十願導歸極樂者。爲三根普利故。如觀方入一隅。則十方普現故。良以大心難發。極樂易生。究竟旨歸。彼此符合。則知棗柏原非錯誤。雲棲安得以是爲非耶。

問。諸經多言念佛行人。現前見佛。如遠公三觀聖相等。所謂念佛人佛住其頂。古德教人決志求驗。正在平時。今經止言臨終佛現。豈七

日功成。未能現見。僅感臨終耶。抑必現前見已。然後臨終得見耶。諸經多言行人現前見佛。亦有當來見佛之語。楞嚴云。憶佛念佛。現前當來必定見佛。其必定二字。深有旨趣。如種穀得穀。必無虛棄之功也。遠公三觀聖像。現前見佛也。淨土諸師臨終感佛來迎。當來見佛也。由此觀之。只愁不念佛。不愁行人不見佛也。無論平時七日。但一心不亂。專持名號。喚醒自性彌陀。一切佛菩薩。皆影現其中矣。

問。世尊言諸修行人。用攀緣心爲自性者。猶如煮沙欲成嘉饌。今念佛心。是攀緣心耶。非攀緣心耶。若用攀緣心者。一切覺觀思惟。皆是生死根本。若非攀緣心者。何言念性生滅。因果殊感。若云此生滅心即不生滅心。何云煮沙。乃法華所云。若人散亂心。一稱南無佛。南能所云。不斷百思想。對境心數起。又非用此生滅心耶。

世尊斥世間人認攀緣心爲自性。非斥用攀緣心入自性。豈不聞圓覺云。以幻修幻。天台專用六識。阿難云。供養如來。亦因此心。永退善根。亦因此心。以此推之。此心亦不惡。可以爲入道之前茅。論乎真性。何用念爲。論乎樂土。非念莫生。文殊云。念性生滅。此爲選耳根圓通。淨業智人。安得隨文殊腳跟轉。文殊如修般舟三昧。又當以我念佛爲良導。法華一稱。塵勞起而佛道成。南能不斷。妄想興而涅槃現。又當留待別時。向居士一一道破。

### 禮淨土懺文

此至化念佛同生淨土疏。二林原本。是三峯道頂法。因其對今人。恐弊多益少。故改用此。

蕩益大師

比丘智旭等。曠大劫來。至於今日。既迷本性。恆在輪迴。三業六根。無惡不造。五趣八難。無苦不嘗。暗識相傳。曾弗覺悟。死生浩漫。解脫何期。茲值大乘。得生微信。快聞淨土。宜速知歸。勤精進而已憾其遲。更怠緩而擬將何及。爰發懇心。共期三昧。修往生之願儀。

。夫七日以無雜。六時行道。四威攝心。仰叩圓悲。必垂妙應。願深求正法。不染情塵。行與志齊。道追古聖。盡捨緣務。痛念無常。八風不動。四誓莫移。乃至外護行人。並植深因。同歸淨土。師僧父母。歷劫親緣。法界靈蠢。過現有情。蒙法藏之願光。承阿彌之慈力。三障頓除。四土等淨。以此發願功德。總報三有四恩。同圓種智。

### 持名念佛歷九品淨四土說

若欲速脫輪迴之苦。莫如持名念佛。求生極樂世界。若欲決定得生極樂世界。又莫如以信爲前導。願爲後鞭。信得決。願得切。雖散心念佛。亦必往生。信不真。願不猛。雖一心不亂。亦不得生。云何爲信。一者信阿彌陀佛願力。二者信釋迦文佛教語。三者信六方諸佛讚歎。夫世間正人君子。便無妄語。况彌陀釋迦六方諸佛。豈有妄語。此而不信。真不可救。故須先生深信。勿起疑惑。云何爲願。一切時中

。厭惡娑婆生死之苦。欣慕淨土菩提之藥。隨有所作。若善若惡。善則迴向求生。惡則懺願求生。更無二志。是名爲願。信願既具。則念佛方爲正行。改惡修善皆爲助行。隨功力之淺深。以分九品四土。纖毫不濫。只須自己簡察。不必旁問他人。謂深信切願念佛。而念佛時心多散亂者。即是下品下生。深信切願念佛。而念佛時散亂漸少者。即是下品中生。深信切願念佛。而念佛時便不散亂者。即是下品上生。念到事一心不亂。不起貪瞋癡者。即是中三品生。念到事一心不亂。任運先斷見思塵沙。亦能伏斷無明者。即是上三品生。故信願持名念佛。能歷九品。的確不謬也。又信願持名。消伏業障。帶惑往生者。即是凡聖同居淨土。信願持名。見思斷盡而往生者。即是方便有餘淨土。信願持名。豁破一分無明而往生者。即是實報莊嚴淨土。信願持名。持到究竟之處。無明斷盡而往生者。即是常寂光淨土。故持名

能淨四土。亦的確不謬也。問曰。如何持名能斷無明。答曰。所持之佛名。無論悟與未悟。無非一境三諦。能持之念心。無論達與不達。無非一心三觀。只爲衆生妄想執著。情見分別。所以不契圓常。殊不知能持者即是始覺。所持者即是本覺。今直下持去。持外無佛。佛外無持。能所不二。則始覺合乎本覺。名究竟覺矣。問曰。既始覺合本。則當下即常寂光。如何亦說往生。答曰。若達當下即常寂光。又何妨說箇往生。蓋往即非往。非往而往。生即無生。無生而生。文殊善財之生西方者。此也。咄哉男子。無措思惟。

### 刻寶王三昧念佛直指序

念佛三昧。爲如來勝異方便。凡聖均收。利鈍悉被。以一念直歸佛海。至圓至頓。第一了義故也。而迷義徇名者。見五逆衆惡十念往生。反以爲專攝凡劣。但化鈍根。可謂昧佛妙旨。謗譭深經矣。予慨末世

行人。多疑多障。難悟難開。於深妙法門。非著事忘理。必執理撥事。著事者猶堪下品生因。執理者竟淪惡取空見。至此而直指之道。翻成斷滅深坑非藉金錘。誰抉翳膜。妙叶導師。法紹宗乘。教興蓮社。應永明角虎之記。暢寶王三昧之談。境觀並彰。纖疑悉破。闡唯心之致。依正宛然。示性自之源。感應不忒。俾達者以理融事。而理非事外。愚者因事入理。而事挾理功。誠除惑前茅。生西左券也。二百餘年。流通機塞。蓮大師欲見未能。而願力不磨。韓居士從萬融禪師處得之。予獲借讀。如飢醒醐。悲劫濁方殷。喜津梁有在。急謀付梓。以廣厥傳。普願見聞隨喜。種樂土圓因。讀誦思惟。證寶王法印。轉相曉悟。共脫沈淪。庶不負希有良緣已。

### 彌陀要解跋

經云。末法億億人修行。罕一得道。唯依念佛得度。嗚呼。今正是其



時矣。捨此不思議法門。其何能淑。旭出家時。宗乘自負。藐視教典。妄謂持名曲爲中下。後因大病。發意西歸。復研妙宗圓中二鈔。及雲棲疏鈔等書。始知念佛三昧。實無上寶王。方肯死心執持名號。萬牛莫挽也。吾友去病。欲令此經大旨。辭不繁而炳著。請予再述要解。予欲普與法界有情同生極樂。理不可卻。舉筆於丁亥九月二十有七日。脫稿於十月初五日。所願一句一字。咸作資糧。一見一聞。同階不退。信疑皆植道種。讚謗等歸解脫。仰唯諸佛菩薩。攝受證明。同學友人。隨喜加被。

### 化念阿彌陀佛同生淨土疏

禮淨土懺文至此五篇。雖不如三峯追頂嚴策。此專以信願行三。合淨土宗旨。自較有利無弊。

自唯心本性之理不明。學道者率尚玄理而薄事相。甚至認斷空爲寂光。疑西方爲非實。相與判作權乘。視同烏有。於是不可思議功德。終成難信之法。長溺迷津。可勝痛哉。不知事理一致。生佛同源。八萬

四千相好光明。顯然在十萬億方。即灼然居一真心內。心既豎窮橫徧。土亦豎窮橫徧。佛亦豎窮橫徧。既不信佛土之實。又寧知心性非虛。若真悟心性本源。則了達十界染淨。咸由一心。心染故六趣昇沈。娑婆之惡境宛然。心淨故一道清寧。極樂之莊嚴法爾。奈何於娑婆則見其有。於極樂則惑其無。又高稱圓頓。侈談無礙。以忻厭是迂途。取捨爲兩極。然果悟圓宗。忻厭何嘗不圓。果證無礙。取捨亦豈有礙。必欲離淨土而談唯心。捨彌陀而言本性。橫隔自他。割裂事理。如實料簡。僅成惡取空見。豈若熾然存念。決定求生。了則念即無念。生即無生。不了亦無念之念。無生之生。以諸佛心內衆生。念衆生心內諸佛。不問智愚。咸歸覺海。一念相應一念佛。念念相應念念佛。佛是本覺。念是始覺。始本相合。當下究竟。能所歷然。能所性絕。至圓至頓。真實無礙。超越一切法門。名爲三昧中王。此六方調御所

以極力稱揚。歷代祖師所以盡心修勸也。勝超大德。矢修淨業。欲使大千衆生。各各承當此事。爰立大冊。廣勸緇素。或自念。或轉請。或以口讚。或別冊襄。自念則念念膺合佛性。化人則人人頓會菩提。用心善且廣矣。特序之。爲同有佛性者告。

### 結壇持往生呪偈

稽首無量壽。拔業障根本。觀世音勢至。海衆菩薩僧。我迷本智光。妄墮輪迴苦。曠劫不暫停。無救無歸趣。劣得此人身。仍遭劫濁亂。雖獲預僧倫。未入法流水。目擊法輪壞。欲挽力未能。良由無始世。不植勝善根。今以決定心。求生極樂土。乘我本誓船。廣度沈淪衆。我若不往生。不能滿所願。是故於娑婆。畢定應捨離。猶如被溺人。先求疾到岸。乃以方便力。悉拯暴流人。我以至誠心。深心迴向心。然臂香三炷。結一七淨壇。專持往生呪。惟除食睡時。以此功德力。

求決生安養。我若退初心。不向西方者。寧即墮泥犁。令疾生改悔。誓不戀天人。及以無爲處。仰願大威神。力無畏不共。三寶無邊德。加被智旭等。折伏使不退。攝受令增長。

### 結壇念佛回向文

稽首阿彌陀。諸佛護念法。淨土諸聖賢。唯垂哀護持。智旭從無始來。迷常住理。失智慧明。背自性而枉受輪迴。取妄心而永違真境。善根雖發。投正教以捨家。宿習偏濃。熏三昧而罔就。矢心淨域。誓出苦輪。機感不專。聖應莫顯。悠悠歲月。罔罔襟期。可痛可悲。無洲無渚。今依釋迦誠訓。七日持名。用投無量慈光。一生求度。棲身淨壇。專稱洪號。若定若散。有記無記。仗佛悲輪。功無唐棄。願以功德。及諸善根。悉共衆生。回向安樂。所冀現生魔障消除。捨報正念決定。一剎那頃。生如來前。受苦提記。滿本願輪。

## 示念佛法門

念佛法門。別無奇特。只深信力行為要耳。佛云。若人但念彌陀佛。是名無上深妙禪。天台云。四種三昧。同名念佛。念佛三昧。三昧中王。雲棲云。一句阿彌陀佛。該羅八教。圓攝五宗。可惜今人將念佛看做淺近勾當。謂愚夫愚婦工夫。所以信既不深。行亦不力。終日悠悠。靜功莫剋。設有巧設方便。欲深明此三昧者。動以參究誰字為向上。殊不知現前一念能念之心。本自離過絕非。不消作意離絕。即現前一句所念之佛。本自超情離計。何勞說妙談玄。祇貴信得及。守得穩。直下念去。或晝夜十萬。或五萬三萬。以決定不缺為準。畢此一生。誓無變改。若不得往生者。三世諸佛便為誑語。一得往生。永無退轉。種種法門。咸得現前。切忌今日張三。明日李四。遇教下人。又思尋章摘句。遇宗門人。又思參究問答。遇持律人。又思搭衣用鉢

。此則頭頭不了。帳帳不清。豈知念得阿彌陀佛熟。三藏十二部極則教理。都在裏許。千七百公案。向上機關。亦在裏許。三千威儀。八萬細行。三聚淨戒。亦在裏許。真能念佛。放下身心世界。即大布施。真能念佛。不復起貪瞋癡。即大持戒。真能念佛。不計是非人我。即大忍辱。真能念佛。不稍間斷夾雜。即大精進。真能念佛。不復妄想馳逐。即大禪定。真能念佛。不爲他歧所惑。即大智慧。試自簡點。若身心世界猶未放下。貪瞋癡念猶自現起。是非人我猶自挂懷。閒斷夾雜猶未除盡。妄想馳逐猶未永滅。種種他歧猶能惑志。便不爲真念佛也。要到一心不亂境界。亦無他術。最初下手。須用數珠。記得分明。刻定課程。決定無缺。久久純熟。不念自念。然後記數亦得。不記亦得。若初心便要說好看話。要不著相。要學圓融自在。總是信不深。行不力。饒你講得十二分教。下得千七百轉語。皆是生死岸邊

事。臨命終時。決用不著。珍重。

## 示法源

念佛工夫。祇貴真實信心。第一要信我是未成之佛。彌陀是已成之佛。其體無二。次信娑婆的是苦。安養的可歸。熾然欣厭。次信現前一舉一動。皆可迴向西方。若不迴向。雖上品善亦不往生。若知迴向。雖誤作惡行。速斷相續心。起殷重懺悔。懺悔之力。亦能往生。况持戒修福。種種勝業。豈不足莊嚴淨土。只爲信力不深。勝業淪於有漏。又欲捨此別商。誤之誤矣。但加真信。一切行履。更不須改也。

## 示王心葵

法華一經。殷勤稱歎方便。須知有世間方便。布施愛語。孝弟忠信等是也。有出世間方便。苦空無常無我不淨。數息因緣遠離知足等法門是也。有出世上上方便。十波羅蜜。四攝四辨。八萬四千三昧總持等

是也。有不思議勝異方便。信自性中實有西方現成佛道之彌陀如來。唯心中實有莊嚴之極樂世界。深心宏願。決志求生。不唯上上方便是其資糧。將世出世一切方便。無非往生左券。此法門中。點鐵成金手段。不歷僧祇。頓階不退。名絕待妙法也。

### 示郭善友

佛法大海。信爲能入。智爲能度。若信心而乏智慧。未有不泣歧兩端者。佛言。末世鬪諍堅固。億億人學道。罕有一人證果。惟依念佛求生淨土。可以橫超苦輪。昔有祖師。初但至誠禮法華經。拜至糞字。遂悟法華三昧。有誦法華人來壽昌禪師處請益。叱云。邪見衆生。不識好惡。法華便是禪。那裏別有禪可參。其人服膺而去。竟以持法華悟道。若深信念佛禮拜是佛祖真因。確乎不被時流所轉。便是大智慧光明。超登淨土。永無泣歧之患矣。



## 答卓左車茶話

宗乘與淨土。二俱勝妙法。衆生根性異。不免隨機說。向上一著。非淨非禪。即禪即淨。才言參究。已是曲爲下根。果大丈夫。自應諦信是心作佛是心是佛。設一念與佛有隔。不名念佛三昧。若念念與佛無間。何勞更問阿誰。故參究誰字。與攝心數息等。皆非淨土極則事也。淨土極則事。無念外之佛爲念所念。無佛外之念能念於佛。正下手時。便不落四句百非。通身拶入。但見阿彌陀佛一毛孔光。即見十方無量諸佛。但生西方極樂一佛國土。即生十方諸佛淨土。此是向上一路。若捨現前彌陀。別言自性彌陀。捨西方淨土。別言唯心淨土。此是淆譌公案。經云。三賢十聖住果報。唯佛一人居淨土。此是腦後一鎚。普賢十大願王導歸極樂。誰敢收作權乘。憶佛念佛。不假方便。自得心開。誰謂定屬廉纖。但能深信此門。依信立願。依願起行。則

念念流出無量如來。徧坐十方微塵國土。轉大法輪。照古照今。非爲分外。何止震動大千世界而已。欲知衲僧家事。不妨借中峯一偈通箇消息。偈曰。禪外不曾談淨土。須知淨土外無禪。兩重公案都拈卻。態耳峯開五葉蓮。

### 示丁耕野居士

截流禪師

昔寂室和尚云。世人欲修淨業。不可言我今忙迫。且待閒暇。我今貧乏。且待富足。我今少壯。且待老時。若分定常忙。分定貧乏。分定夭折。即於淨業無緣修習。忽爾喪亡。雖悔無及。何如趁身強健。努力修之。至哉言乎。然今之人。無論信樂者少。縱能深信淨土。而因循需待。蹉過一生者。比比皆是也。居士天姿醇謹。向見衲不久。即能警悟無常。長齋事佛。蓋宿緣有在也。然居士家無恆產。歲以館穫得精。夫家無恆產。則不足可知矣。身有館職。則不閒可知矣。年方

半百。則未至衰老可知矣。乃一旦謝館不赴。卻諸門弟子。秉持滿分優婆塞戒。鍵戶終年。專力淨業。至于資糧薪水初無會計。非勇猛丈夫而能若是乎。且以斗室狹隘。半供經像。於中避囂息影。銳意精修。一如夏屋寬舒。泰然自足。惟慮其不能久久如斯也。嗟乎。夫人之居世。亦何足定哉。竊嘗論之。暇莫暇於不失時。富莫富於常知足。強莫強於勤精進。今居士兼三者而有焉。則雖舉天下之閒者富者強有力者與居士較。吾知其有名而無義矣。能如是。於生淨土也何有。然更有一語願相告誡者。譬如萬斛之舟。欲有所往。檣非不高也。舵非不正也。資具非不完備也。去志非不決也。乘風張帆。有瞬息千里之勢。倘若船頭一樁未曾拔卻。被一條纜索繫住。雖種種推排。其能有濟否。今時淨業人。有終日念佛懺罪發願。而西方尚遙。往生弗保者。無他。愛椿未拔。情纜猶牢。故也。若能將娑婆恩愛視同嚼蠟。不

管忙閒動靜。苦樂憂喜。靠著一句佛號。如須彌山相似。一切境緣。無能搖動。或時自覺疲懈。惑習現前。便奮起一念。如倚天長劍。使煩惱魔軍。逃竄無地。亦如紅鑪猛火。使無始情識。銷鑠無餘。此人雖現處五濁之鄉。已渾身坐在蓮華國裏。又何待彌陀授手。觀音勸駕。而始信其往生哉。或曰。彼居士勇猛精進如是。豈復牽於情愛。不幾於無病而授藥乎。予曰。不然。古人云。愛不重不生婆婆。又云。道念若同情念。則成佛多時。五通仙人。累劫精勤。尚以欲漏未除。墮其功行。故知未登聖果以還。鮮有不被其繫累者。居士果世念輕微。道心勇銳。見欲如避火坑。憶佛如戀慈母。淨齋清課。永失弗渝。又何妨以無病好人。常服良藥。寧不起居輕利。轉益強健乎。總之煩惱無盡。而生死根本。則唯貪愛。能漂溺行人。障往生法。是故先佛經中。處處訶責。但情愛一分疎澹。則淨業一分成熟。於生死岸頭。

庶得解脫也。居士其勉之哉。

## 西方確指

覺明妙行菩薩

諸佛之法要。微密不思議。以非思議故。無能盡宣說。牟尼大慈父。悲憫衆生者。說所不能說。導彼今後世。更以異方便。顯示安樂刹。令發願往生。橫截諸惡趣。由佛阿彌陀。大願攝羣品。聞名能受持。決定生無惑。若有大力人。專念心常一。成就深三昧。現前亦見佛。今我如佛教。將開化導門。念爾等迷倒。確指正修路。是非弱小緣。應具難遭想。西方萬億程。一念信即是。

所示淨土一門。真諸佛心宗。人天徑路。今汝等雖求往生。若發願不切。如入海而不獲寶珠。徒勞無益也。我昔於晉明帝時。受貧子身。爲貧苦故。乃發大願云。我以夙業受此苦報。若我今日不得見阿彌陀佛。生極樂國。成就一切功德者。縱令喪身。終不退息。誓已。七日

七夜。專精憶念。便得心開。見阿彌陀佛。相好光明。徧十方世界。我於佛前。親蒙授記。後至七十五而坐脫。竟生極樂。後以度生願重。再來此土。隨方顯化。或爲比丘。或爲居士。或爲國王。或爲臣宰。或爲女人。或爲屠狗。或隱或顯。或順或逆。皆隨順說法。導諸羣品。今則又爲汝等發明邪正。闡揚淨土。汝等當一意一心。堅修此門。必不相誤。若心志一堅。又不待隔世而生。現前亦得見佛。有偈四句。少說一句話。多念一句佛。打得念頭死。許汝法身活。

汝等慮身纏世網。念頭不得乾淨耶。我有一法。汝但發箇遠離求度之願。將牢牢歸向極樂世界見阿彌陀佛之心。換卻奔走名利之心。便能即塵勞而淨土矣。

有問念佛不能一心。當作何方便。菩薩曰。汝但息想定慮。徐徐念去。要使聲合乎心。心隨乎聲。念久。自得諸念澄清。心境絕照。證入

念佛三昧。然平日必須多念。從千至萬。心無間斷。則根器最易成熟。若強之使一。終不一也。

定茂欲捨持呪而念佛。請問。示曰。汝欲捨持呪而念佛。一志專修。最妙。但汝未知法要。只可名爲持齋好善之人。不得名爲念佛之人。何以故。欲泛大海。必具大舟。欲馳千里。必擇良馬。故念佛人。先須具大手段。割絕牽纏。打開塵網。直下即念是佛。即佛是心。乃至離即離非。頓入如來大光明藏。如是乃名正念念佛。得名爲念佛人也。汝應善解此義。

諸弟子。當知十方諸佛是衆生心。十方衆生是諸佛心。是故憶佛念佛。則十方諸佛現汝心內。然亦非諸佛之入於爾心。亦非汝心出於諸佛。皆是覺妙本明。不可思議。心行處滅。是諸佛常住真心。心行處有。是衆生生死業心。其間不容絲髮。若汝等能綿密加功。使此心無此

子空隙。方得幾分相應。莫略做半年十月。便謂我能苦心修道。不知此正障道處。切宜慎之。又工夫雖加。若未到銅山鐵壁。推不倒移不動處。猶未是打成一片。切莫見些影響。便即歇手。是爲半途而廢。必至棄其前功。毫無所益。此學道人大病。不可不知。要知佛法大海。轉入轉深。斷非小小知見之所能盡。應盡形修習。造極爲則。切莫作容易想。

念佛三昧。是汝心大勢力之所成。非由他致。今爾等念佛。晝夜不能如一。亂想猶復間真。皆是用心不得力處。

願定成求教。示曰。善男子。心本無念。念逐想生。此想虛妄。流轉生死。汝今當知此一句阿彌陀佛。不從想生。不從念有。不住內外。無有相貌。即是盡諸妄想。諸佛如來清淨微妙真實之身。非一非異。不可分別。如是念者。煩惱塵勞。無斷無縛。止是一心。必得一心。



方得名爲執持名號。方得名爲一心不亂。淨業功成。直趨上品。汝今當發大願。願生極樂。然後至誠懇惻。稱於阿彌陀佛。必使聲緣於心。心緣於聲。聲心相依。如貓捕鼠。久久不失。則入正憶念三昧。更欲上進。當廣參知識。博詢高明。自悟即心是佛妙諦。

示無朽曰。大抵修淨業人。行住坐臥。起居飲食。俱宜西向。則機感易成。根境易熟。室中止供一佛一經。一鑪一桌。一牀一椅。不得放一多餘物件。庭中亦掃除潔淨。使經行無礙。要使此心一絲不挂。萬慮俱忘。空洞洞地。不知有身。不知有世。并不知我今日所作是修行之事。如是則與道日親。與世日隔。可以趨向淨業。蓋汝生時撇得乾淨。拋得乾淨。念頭上不存一些子根節。大限到來。灑灑落落。不作兒女子顧戀身家子孫之態。豈不是大丈夫舉動。所以要汝一意修行。別無沾滯。正爲此一大關目也。至于修淨土之法。不出專勤二字。專

則不別爲一事。勤則不虛棄一時。汝今晨起。即誦阿彌陀經一卷。持阿彌陀佛一千聲。向佛前回向。念一心歸命文。以此文言簡而意備也。此爲一時之課。若初起。或身心未寧。日止四時。稍寧。漸增至六時。又漸增至十二時。合經十二卷。佛名一萬二千聲。更於回向時禮佛百拜。亦可分作四時。此爲每日常課。餘工不必計數。或默或聲。但攝心諦念而已。又持名之法。必須字字句句。聲心相依。不雜分毫世念。久久成熟。決定得生極樂。坐寶蓮華。登不退地。若餘年未盡。猶得以其所證爲四衆向導。報佛深恩。汝若于我所說一一遵依。方不負覺明菩薩示汝正道。令汝出家。此非小小因緣。汝莫自生輕慢。慎之慎之。

又示曰。彌陀經十二卷。佛名一萬二千。不要增。不要減。只依著我行去。但經要勻勻淨淨。不緩不急。不疾不徐。佛要聲聲心心。不澀

不掉。不浮不沈念去。至於回向。不是但誦舊文一過。須從自己心中發出真正大菩提願。至誠懇切。普願一切衆生同生極樂。而我心無所著。如虛空等。是名回向。又靜坐當反觀深究。佛即我心。是心是佛。不假外求。如心而住。無能無所。如是諦觀。更無二念。是名修行三昧。慎勿忘形死心。又落外魔知見。如是坐一時。便起經行。又更持誦。有箇次序。若忙忙促促。一氣趕去。謂可完卻一日課誦。便有苟且了局之見。非真正修行矣。大抵學道人。不遵知識明誨。決定勞而無益。未久必敗。慎之慎之。

大凡修淨土人。最忌是夾雜。何謂夾雜。即是又諷經。又持呪。又做會。又好說些沒要緊的禪。又要談些吉凶禍福。見鬼見神的話。卻是夾雜也。既夾雜。則心不專一。心不專一。則見佛往生難矣。卻不空費了一生的事。如今一概莫做。只緊緊持一句阿彌陀佛。期生極樂。

日久功成。方不錯卻。授汝一偈。依而行之。阿彌陀一句。萬法之總持。聲與心相依。念茲復在茲。感應不思議。蓮開七寶池。

### 念佛說

張光緯

經云。執持名號。一心不亂。執持二字。屬手不屬口。若有物可以把握者。非真有所把握也。儒家謂拳拳服膺。朱子釋云。恭敬奉持之貌。即是執持之義。下云勿失之矣。便是不亂義。儒家又云顧諟。朱子釋云。常目在之。即是作觀義。亦即是不亂義。口誦目顧。耳即自聽。聲從舌流。口沾禪味。鼻聞妙香。心塵不起。如是念佛。六根歸一。從何得亂。吾今念佛。作一方便。自視此心。如清淨寶瓶。佛名爲其嘉穀。逐字逐句。如穀投瓶。貫珠而下。穀既無盡。瓶亦不滿。不放一粒拋向瓶外。顧念此瓶徑寸耳。中藏三千大千世界。百億微塵數佛刹。三十六萬億一十一萬九千五百同名同號阿彌陀佛。安住其中。

我亦與之俱會一處。游樂宴息。方是我安身立命之地。雖然。猶有慮。一切無明覆障。皆爲鼠雀。防護稍懈。耗我嘉穀。萬一有犯波羅夷法。僧伽婆尸沙法。則寶瓶墮地。破壞無餘矣。慎之哉。

今之念佛者多矣。而不知念字從心。不僅用口。若僅用口。心佛不接。有何功行。屠赤水先生曰。念佛者假口攝心。口念千聲。心想萬端。何功之有。劉玉受先生曰。念佛至數百。省之與第一句不相著者。往往而是。此際宜帶參勘。石雨和尚偈曰。念佛切莫貪多念。且念一百心不亂。九十九聲一念差。捋轉數珠都不算。如是一百百至千。從千至萬如珠貫。箭射不入刀不侵。百萬魔軍皆退竄。念到人空法亦空。數珠拋向無生院。如上三等念佛。方稱真佛。不然。虛立程課。急了事。當其念時。且不知所謂佛者安在。何況未念以前。既念以後乎。吾向來念佛。亦只囫圇念過。今深知字字從心裏滾出來。又須字

字打入心裏去。且帶作觀。瞑目向西而坐。默想神與形離。驀直西去。漸見樹林水鳥。金繩界道。羅網欄楯。以次而寶池勝蓮。香臺樓閣。種種在目。儼然丈六彌陀。觀音侍左。勢至侍右。放眉間光。垂手接引。吾與諸上善人。同攝光中。隨引而上。禮足悲懇。忽見金掌摩頂。甘露灑身。如是良久。徐徐神返。若出定然。古人所云。先送心歸極樂者。想應如是。願告諸念佛人。須知心念。莫只口念。自然有入路矣。

### 書淨土約說後

翁叔元

蓮池大師。博採晉唐以來念佛生淨土者。各爲傳讚。如史家體。凡百六十有六人。都爲一帙。曰往生集。行世久矣。以叔元所親見者有四人。皆常熟產也。一爲北門金童廟僧。日持一板。擊於街巷。高聲唱無常迅速。一心念佛。衆不甚異之。明崇禎十三年庚辰春三月。徧辭

諸鄰舍。叔元時八歲。嬉於門首。僧摩頂言曰。小相公。好念佛。老僧去矣。叔元初不解何故。次日僧拈香佛前。合掌念佛。端坐而逝。一爲城南老嫗。嫗陳姓。年七十餘。以紡棉紗爲業。隨紡車聲念佛。終日不絕口。如是者。三十年矣。一日忽向其子言曰。兒不見空中襜幢寶蓋乎。因拍手大笑。自取水沐浴竟。合掌化去。觀者如堵。叔元往視之。惟見嫗凝然危坐。室中香氣。清芬襲人。非世間所有。時順治十年癸巳夏四月也。一爲崇文禪師。雲棲老人之法孫也。住南涿村靜室。年五十。雙目失明。乃專心念佛。每夜登座施瑜伽食。三年不輟。順治十五年戊戌三月十四日。其徒行先過余言曰。師明日西歸。特遣告別。叔元急趨往。時已昏夜。城門閉不得出。明日陵晨。詣師所。緇素圍集者三十餘人。師坐於牀。命其徒衆誦彌陀經一卷。誦畢入寂。室中聞菊花香。三日不散。一爲指南禪師。師參學有年。寓居

東塔寺吳王庵。終日默坐念佛。人予之錢。即轉施與人。性坦率。於一切無少繫戀。有芝塘里善士數人。素皈心於師。康熙三十年辛未夏六月。入城謁師。師謂曰。來月五日。與諸檀施別。衆人如期往。師無他語。惟勸令念佛。跌坐而化。余猶子是龍。讀書庵中。目擊其事云。淨土法門。自雲棲滅度後。江浙間嗣響寥寥。常熟有普仁寺。陸吏部胥仲尊人所修葺也。金壇有淨土寺。李戶部肖巖昆季捨宅爲院者也。卓錫於兩地者。有截流。身葉。霞標。鶴臞。四大師。皆具大弘願。以念佛法門倡導後進。精勤勇猛。學者翕然宗之。截公回首後。有孫狀元扶桑先生之長君翰臣。爲冥司勾攝。死去一晝夜。醒而言曰。吾拘繫閻羅殿下。黑暗中忽睹光明燭天。香花布空。閻羅伏地。迎西歸大師。即截公也。吾以師光明所照及。遂得放還。同日有南關外吳氏子病死。踰夕復活。具言所見。亦如孫子言。身公重研精苦。募



鑄丈六彌陀鐵像。三年而後成。常熟魔民意其有餘資。垂涎構獄。師曳杖而行。時霞公住淨土寺。聞身公行。喜曰。吾方丈得人矣。乙亥十月六日迎身公入寺。越二日。霞公說偈別衆。坐積薪上。舉火自焚。大衆觀歎悲泣。得未曾有。身公既住淨土。乃迎鶴公住普仁。兩地法幢相望。遠近皈依。海內人士。將有聞風興起。繼雲棲之法席。駕大海之慈航。而問津者。踵接於金壇常熟間矣。身公鶴公。尚勉旃哉。

### 與茅靜遠居士書

思齊法師

前三月下旬。返自四明。過訪居士。適遇公出。悵然而去。尋歸回龍。茲又一月餘矣。因數子相勸欲講法華。特到杭請經。因得致書于足下。足下造橋事畢。可謂莫大之功。然居士之心。好善無倦。一善甫完。復作一善。美則美矣。其如生死大事何。苟不以生死大事爲急。

而孽孽爲善。所作善事如須彌山。皆生死業緣。有何了日。善事彌多。生死彌廣。一念愛心。萬劫纏縛。可不懼耶。居士世間公案。久已參透。西方淨業。久已修習。然而生死心不切。家緣撇不下。人情謝不去。念佛心不專。何也。將名根不斷耶。抑愛念牽纏耶。於此二者。宜加審察。苟不把家緣世事。一刀斬斷。六字洪名。盡力提起。欲望娑婆之脫。安養之生。難矣。不生安養。而欲脫生死。不脫生死。而欲免墮落。抑又難矣。縱一生兩生不失人身。濟得甚麼事。嗟乎。居士慧心如此明利。家緣如此豐足。繼嗣如此賢能。事事適意。尚不能放下萬緣。一心念佛。爲天負人耶。爲人負天耶。不以念佛爲急。而以世間小善爲急。不以生死大事爲先。而以人天福報爲先。是不知先後也。居士今日要務。惟當謝絕人事。一心念佛。加以齋戒二字尤爲盡美。大抵西方佛國。非悠悠散善所能致。萬劫生死。非因循怠惰

所能脫。無常迅速。旦暮即至。安得不爲之早辦耶。衲所知識者甚寡。知識之中。求可以語此事者爲尤寡。捨居士一人。而深以期望者。誰哉。倘不以人廢言。幸加努力。若曰吾不能也。則亦無可奈何矣。

### 示禪者念佛偈

一句彌陀。頭則公案。無別商量。直下便判。如大火聚。觸之則燒。如太阿劍。撻之則爛。八萬四千法藏。六字全收。千七百則葛藤。一刀斬斷。任他佛不喜聞。我自心心憶念。請君不必多言。只要一心不亂。

### 念佛要旨

徹悟禪師

吾人現前一念能念之心。全真成妄。全妄即真。終日隨緣。終日不變。一句所念之佛。全德立名。德外無名。以名召德。名外無德。能念心外。無別所念之佛。所念佛外。無別能念之心。能所不二。生佛宛

然。本離四句。本絕百非。本徧一切。本含一切。絕待圓融。不可思議。蓮宗行者。當從者裏信入。

一切衆生。本來是佛。真心本有。妄性元空。一切善法。性本自具。但以久隨迷染之緣。未斷元空之妄。未證本有之真。善本具而未修。佛本是而未成。今欲斷元空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。無如持名念佛之一行矣。以能念之心。本是全真成妄。全妄即真。所念之佛。亦本全德立名。全名即德。能念心外。無別所念之佛。所念佛外。無別能念之心。能所兩忘。心佛一如。於念念中。圓伏圓斷五住煩惱。圓轉圓滅三雜染障。圓破五陰。圓超五濁。圓淨四土。圓念三身。圓修萬德。圓證本真。而圓成無上妙覺也。一念如是。念念皆然。但能念念相續。其伏斷修證。有不可得而思議者矣。以是全佛之心。念全心之

佛。實有自心果佛。全分威德神力。冥熏加被耳。一句佛號。不雜異緣。十念功成。頓超多劫。於此不信。真同木石。捨此別修。非狂即癡。復何言哉。復何言哉。

當念佛時。不可有別想。無有別想。即是止。當念佛時。須了了分明。能了了分明。即是觀。一念中止觀具足。非別有止觀。止即定因。定即止果。觀即慧因慧即觀果。一念不生。了了分明。即寂而照。了了分明。一念不生。即照而寂。能如是者。淨業必無不成。如此成者。皆是上品。一人乃至百千萬億人。如是修。皆如是成就。念佛者。可不慎乎。

## 念佛警策卷下終